

**EIGHTH LEGISLATIVE ASSEMBLY OF MIZORAM
(NINTH SESSION)**

LIST OF BUSINESS

FOR ELEVENTH SITTING ON WEDNESDAY, THE 9th MARCH, 2022
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **PU ZORAMTHANGA** to make obituary reference on the demise of **Pu K.M. BIAKSAILOVA**, former Member of Mizoram Legislative Assembly.

QUESTIONS

2. *Questions* entered in separate list to be asked and oral answers given.

FINANCIAL BUSINESS

DISCUSSION AND VOTING ON DEMANDS

3. **DR. K. BEICHHUA**, Minister to submit to the vote of the House various Demands under his charge.

Demand No.	Department	Amount (in ₹)	<i>Demand for Grants Page No.</i>
7	Excise & Narcotics	49,24,95,000.00	42-45
29	Social Welfare	1,48,53,13,000.00	274-294
34	Animal Husbandry & Veterinary	64,71,48,000.00	325-335
41	Sericulture	17,39,92,000.00	391-395
TOTAL		2,79,89,48,000.00	

4. **PU ZORAMTHANGA**, Chief Minister to submit to the vote of the House various Demands under his charge.

Demand No.	Department	Amount (in ₹)	<i>Demand for Grants Page No.</i>
1	Legislative Assembly	31,22,02,000.00	1-5
3	Governor	30,60,000.00	6-10
	Council of Ministers		11-15
5	Vigilance	6,63,71,000.00	32-35
9	Finance	31,12,17,34,000.00	50-60
11	Secretariat Administration	1,27,55,73,000.00	64-66
14	Planning & Programme Implementation	95,70,39,000.00	75-86
15	General Administration	92,11,45,000.00	87-117

32	Horticulture	88,09,71,000.00	314-320
45	Public Works	11,74,30,24,000.00	411-433
TOTAL		47,35,13,53,000.00	

LEGISLATIVE BUSINESS

Bill for introduction, consideration and passing

5. **PU ZORAMTHANGA**, hon. Chief Minister to beg leave of the House to introduce "The Mizoram Appropriation (Demand for Grants 2022-23) Bill, 2022.

ALSO

to introduce the Bill

to move that the Bill be taken into consideration

AND

to move that the Bill be passed.

H. LALRINAWMA
Commissioner & Secretary

SPEAKER : *Chuvangin, tu man mihringte chhuang suh se; Engkim hi in ta a ni vek si a.*

-I Korinth 3:20

Vawiinah hian *Obituary*, kan ram hruaitu kal ta sunna hun kan hman a lo tul leh ta a. Kan sun tur hi Pu K.M. Biaksailova, Former Member of Legislative Assembly a ni a, kan House Leader zahawm tak Pu Zoramthanga sunna hun hmang turin ka sawm e.

PU ZORAMTHANGA, CHIEF MINISTER : Pu Speaker, hei, rinloh takin kan duh loh tak mai thilthleng, tun hnai te March Ni 6, (Pathianni) khan kan Ex-MLA zahawm tak Pu K.M. Biaksailova, Zarkawt chu March Ni 6 (Pathianni) zan dar 6:10 PM-ah a chenna inah a boral a. Ani hi Aizawl-ah pawh pa-lar a ni a, mi tam takin kan hria ang a, a chanchin han sawi ila.

A ni hi Pu Lalauva leh Pi Zamani te fa niin, November Ni 12, 1938-ah Champhai-ah a piang a, an unau hi mipa pali leh hmeichhia panga an ni a. Pi Thangmawii Tlau nen February Ni 25, 1970-ah an innei a, fapa pathum leh fanu pakhat an nei a.

Zirna lamah chuan Primary leh Middle School chu Dawrpui School-ah a zir a, 1957-ah Matric hi Mizo High School atangin a pass a. 1959-ah IA hi Pachhunga College, Aizawl atangin a zir zo a, Kum 1963-ah St. Edmund College, Shillong atangin BA a zir zo leh a ni.

BA a zawh hnuin Thingsulthliah High School-ah Headmaster hna a thawk a, Shillong AG Office-ah Assistant Auditor hna a thawk leh a, chumi hnuah Accountant hna a thawk leh bawk a. Kum 1972-ah PWD hnuaiah Class-II Contractor a in register-in hun reilote chhungin Class-I Contractor ah hlankai a ni leh a, hei hi a eizawna pui ber a ni chho ta a ni.

Pu K.M. Biaksailova hian Peoples' Conference Party a zawm a, kum 1978 (Second Mizoram Legislative Assembly) General Election-ah Saitual Constituency atangin PC ticket-in MLA atan thlantlin a ni a. India ram emergency-a puan anih laiin pro-MNF nia puh a ni a, June, 1976 - April, 1977 chhung hian Nalbari Jail-ah a tang nghe nghe a.

Pu K.M. Biaksailova hi a lung lam a thatloh avangin April, 2019-ah Apollo Hospital, Kolkata-ah double-pacemaker vuah sak a ni a. January Ni 25, 2022-ah Covid avangin ZMC-ah admit a ni a, chumi hnu February Ni 7-ah Ebenezer Hospital-ah admit a ni leh a. February Ni 22-ah Ebenezer Hospital atangin a rawn chhuak a. March Ni 6,

2022 (Pathianni) zan dar 6:10-ah chatuan ram min pan san ta a ni. Ani Pu Biaksailova hi a mimal tak pawhin kei pawhin ka ui tak tak a, kan thianpa, kan u te a ni a. Aizawl pa-hlun pangngai chuan hriat ve tur khawpa mi lar, mi tha leh mitluang a ni a, tih takzetin a ni kan lo chan ta hi ‘kan ui a ni’ tih hi Pu Speaker, kan sawi duh a ni e.

SPEAKER : Member zahawm tak Pu Vanlalhlana ilo sawm ang.

PU VANLALHLANA : Pu Speaker, ka lawm e. Pu KM Biaksailova, ‘Khawlhing Milai Biaksailova’ a ni a, Aizawl tlangval intite zinga mi a ni ve thin a. A theihna te, a finna te, a remhriatna zawng zawng hmanga helai ram rorelnaah theipa tawp lo chhuah ve thin a ni a. Kan House Leader khan chipchiar takin a chanchin a sawi tawh a, biru deuh hlek a chanchin pahnih/khat ka han sawi ve ang a.

Kum 1978-ah PC ticket-in MLA-a thlantlin a ni a, khatih lai khan MLA-te kha 30 an ni a, Council of Ministers pawh 5 an ni. Chief Minister Brig. T. Sailo khan tlaikhawhnua min hrilh danin, politics-a decision a siam fuhloh pakhat chu, 1978 ministry an form khan Pu K.M. Biaksailova minister-a a dah ve lo kha a thiltih diklo pakhatatah a ngai a ni, tih min hrilh a. Pu Biaksailova hi ‘kan u, kan makpa’ kan tih ve a ni a. Hei, Treasury Square maiah hian kan awm a, UT lai chuan tui a vang em em mai a, tuikhur kan hlat em em mai a. Sorkar hnathawk tan motor-in tui a sem thin a ni. Pu Biaksailova hi chung tui sem zinga mi pakhat chu a ni a, kan harsat zia hriain tui te hi a khat tawh hian min rawn pe a, kan tuizem a rawn tikhat lang thin a. Tun hnua ka chhui kir a, engmah nilo, amaherawhchu a hun laia hlu em em a ni. Chuvangin hetia a awm talo mai hi ram tan hlohna chang ni lovin, mimal tak pawhin kan tuar a, a pawl kan ti; ‘kan tuar em em a ni’ tih kha ka han sawilang duh a ni. Ka lawm e

SPEAKER : Tunge han sawi leh ang? Awle, Member zahawm tak Pu C. Lalmuanpuia i lo sawm ang.

PU C. LALMUANPUIA : Pu Speaker, ka lawm e. Pu K.M. Biaksailova hunlo tak maia min boralsan hi pawl ka ti hle mai a. Kan House Leader leh member zahawm tak tak ten an han sawi a, mi tha, ram leh hnam tan mi chenpakawm tak mai, he House-ah ngei pawh a theihna zawng zawnga ram rawng lo bawl tawh a ni a. Kan hriat ang khan ram leh hnam tan pawh jail-ah te lo tang a, chutiang khawpa he ram tana lo tuar tawh, kan mi senior, ka bial chhung, Zarkawt-a awm a ni a. Pu Speaker, ui thu ka han sawi a, a kalsan tak, a nupui fanau, a chhung leh khatte Pathian-in awmpuiin thlamuan se ka duh a. Kan mi-senior a ni a, ‘kan ram tan pawha uiawm, kan chan nasa em em a ni’ tih kha vawiinah hian tawitein Pu Speaker, ka han sawi a ni e.

SPEAKER : Awle, Pu KM Biaksailova hi kan session laia boral a ni a, chuvangin, ‘kan ngaipawimawh a ni’ tih leh, amah kan sunna Session lai ngeia tihlan kan duh a. Tunah hian a chhungte leh thenrual thate helai hmunah hian an lo kal a, TV atangin min lo en bawk a ni. Tunah, kan Former Member zahawm tak Pu KM Biaksailova sun nan ngawi rengin minute khat i lo ding ang u. (*A sunnan minute khat member-te ngawi rengin an ding a..*) Thu ang ule.

Tunah chuan, *Zawhna & Chhanna*-ah kan kal ang a, Starred Question No. 161 zawt turin Dr. BD Chakma i lo sawm ang.

PU B.D. CHAKMA : Pu Speaker, ka lawm e. Public Works Department changtu Minister zahawm tak chhan atan -

- a) When will the PMGSY road between Chawngte and Longpuighat be completed?
- b) When will the major bridges of PMGSY road between Chawngte and Longpuighat be constructed?

Thank you.

SPEAKER : Chhang turin PWD changtu Chief Minister zahawm tak ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu BD Chakma zawhna chhannaah chuan -

- a) The PMGSY road between Chawngte and Longpuighat is expected to be completed by September, 2022.

Mizo tawng chuan: PMGSY kawng Chawngte leh Longpuighat a mi hi September, 2022-ah zawh tura beisei a ni.

- b) DPR for the major bridge between the PMGSY road Chawngte to Longpuighat is currently under preparation. The work will be tendered as and when sanction is obtained from the Ministry of Rural Development.

Mizo tawng chuan - “PMGSY kawng Chawngte atanga Longpuighat leilawn major bridge te hi a DPR buatsaih mek a ni a, Ministry of Rural Development hnen atanga sanction hmuh anih hunah a hna hi tender a ni ang” tih a ni e.

SPEAKER : *Zawhbelhna* zawt turin a zawhna neitu Pu BD Chakma ka sawm e.

PU B.D. CHAKMA : Pu Speaker ka lawm e. Ka *zawhbelhna*, Mizo tawngin kan lo ti ang e –

Hei, Chawngte leh Longpuighat inkar PMGSY road quality hi chhe tak a ni a. Tuichawng Lui chips leh cement nen PCC concrete tih mek a ni a. Pu Speaker, a quality hi a chhe tak tak a, chuvangin hei hi PWD workings tender-ah hian a him tawk em, a lui chips kha? A monitoring tih hmam khami lui chips leh rora tlem an pawlh a, kha kha surprised-visit neih hmaa an lo tihdan a ni a, a contractor ho khan. Chuvangin, hei hi 'surprised visit nge, informed visit' tih kha ka zawt duh a.

Tin, pahnihnaah chuan, PMGSY road estimate hi a hmuna kal miah lova an siam em ni? Hei hi ka zawhna chhan chu (mipui sawi dan leh ka hmuh danin), tul lovah a kal kual nasa lutuk a, chuvangin, PWD Minister zahawm tak, kan CM ni bawh hian PWD team te ennawn turin a rawn tir thei ang em?

A dawt leha Chawngte to Chotrapansuri road chungchangah hei chu Pu Speaker, House ah pawh ka sawi fo tawh thin a. Hei hi kan lifeline a ni a, 2010 bawh vel niin ka hria, NABARD hnuaiyah formation cutting an zo tawh a, chumi hnu chuan permanent works hi tun thleng hian engmah hmasawna hmuh tur a awm lova. Kha kha blacktop tumna a awm em, a awm anih chuan PWD Minister zahawm takin assurance min pe thei em tih kha ka zawhbelhna a ni e. Pu Speaker, ka lawm e.

SPEAKER : *Zawhbelhna* zawt turin Member zahawm tak Pu C. Ngunlianbunga ka sawm e.

PU C. NGUNLIANCHUNGA: Pu Speaker ka lawm e. Ka zawhbelhna chu - Contractor hian in withdraw-na Lawngtlai EE hnenah a thlen ta daih mai a, hei hi Vathuampui - Tuisentlang road a ni a. Hmannia kan sawi ang khan, Tuichawng tlang NGO joint meeting khan kawng hna kha thawk tawh lo tura an tih avangin, an thawk leh anih chuan an chungah harsatna pawh lo thleng sela mawh an phurhloh tur thu, vauna lehkha helai House-ah pawh ka chhiar chhuah tawh kha. Contractor hian EE Lawngtlai hnenah Ni 21.2.2022 khan withdraw dilna a pe lut a, chu chu EE hian SE hnenah Ni 22 bawh khan a thawn chho nghal a, khawngaih takin kan Chief Minister zahawm tak, PWD changtu ni bawh hian khatiang a in withdraw mai anih chuan, a dang an dah leh nghal dawn nge? An EM, tuna District Council-a PWD changtu hian 'an chhuak anih pawhin, a dang an rawn dah leh nghal mai dawna lawm' a ti a, 'kha kha tih mai theih a ni reng em' tih kha ka zawhna pakhatna nise. (**Speaker:** Kha kha engtik kuma work order nge a hriat theih em?) Pu Speaker, 2017 anih ka ring a, work order no. chiah kha chu ka hre lova. Hmannia kan sawi ang khan mual (field) darkar 72 laih sak tura an tih, an niin an laih theihloh avang khan Joint Action Committee khan hna hi thawkzawm tawh lo tura an tihna kha a ni a. Khawngaih takin kan Chief Minister khan, hei hi thlak a nih dawn pawhin, withdraw ani dawn anih pawhin 'an aiawh kha dah theih a ni reng em' tih kha ka zawt a.

A pahnihna atan chuan he Assembly Session Hall-ah hian nikum February-ah khan ka zawt tawh a, Chawngte atanga kan bial lama kawng kal ve hi, Chawngte atanga Vaseikai thleng tur anih lai khan Vaseikai thlen hma chiah Dam Lui-ah a tawp tlat mai a, kha Chawngte atanga kawng lo kala khan awmzia a nei dawn lova, ‘kha kha min laih sak thei ang em’ tia ka zawhna chu a chhannaah chuan, ‘sanction awm hunah laih theih a ni ang’ a ti a, ‘engtikah nge sanction a awm ang’ tih kha ka zawhna ni leh sela.

A pathumna ah chuan M. Kawnpui - Vathuampui kawng hi tunah hian RCC concrete thawh mek a ni a, nichina kan ngaihthlak tak ang khan, kan sorkar ve lai pawh khan kan buaipui a, bridge lian a awm a, IIT Kharagpur-ah te pawh kalpui a ni a, mahse vawiin thleng hian a chhuah theihloh avangin, he kawng atang hian diviation siamin, Chikhur Lui lei dawh ngei ngei a ngai a, nuai 70 diviation siam tura approval pawh awm tawh a ni a, kha kha a rang thei ang bera min tihsak loh chuan, kawng hi tha takin siam mah ila furah kha Chikhur Lui leilawn kha kai theih a ni tlat lo mai a, RCC bridge siam turin hma min lak sak thei ang em, khawngaih takin?

SPEAKER : Member zahawm tak Pu KT Rokhaw sawm ang aw.

PU K.T. ROKHAW : Pu Speaker, ka zawhna hi kan Chief Minister-in a hriat thiam theihna turin a background sawi a ngai a.

Pu Speaker, Marah Chanoh Py (MCHP) General Headquarters, Siaha-in Commerce & Industries, GoM kaltlangin NEC-ah ‘Mara Women Handloom & Weaving Center, Council Vaih, Siaha’ tiin project siam a ni a, NEC lam pawhin tha an lo tihpuiin MCHP project hi an lo approved ta a ni. Tichuan, he project hi NEC-in a approved amount chu cheng nuai 458,61,609.00 a ni a, NEC lamin he hna hi an ngaih pawimawh avangin ni 14.12.2020-ah khan tender buaipui nan leh civil works 1st installment atan NEC lamin Director, Commerce & Industries, Govt. of Mizoram hnenah an lo release tawh bawk a ni. Tichuan, Commerce & Industries, Govt. of Mizoram hian he hna thawk thei tur hian PWD, Govt. of Mizoram hnenah 9th August, 2021-ah khan a lo transfer leh tawh bawk a ni.

Pu Speaker, kan Chief Minister hnena ka zawh duh chu - Engvangin nge tun thlengin he hna thawh theihna tura Tender hi chhuah a la nih loh? (**Speaker:** A eng hna ber nge tih kha a la chiang chiah lo.) Engtikah nge he tender hi chhuah theih anih ang? He Project hi MCHP-in an buaipuiin, Project zawng zawng hi an siam a ni a, tender hunah anni hi duhsak theih an ni ang em? Ka lawm e.

SPEAKER : Aw le, zawhnate a inkarkik hle a, ‘surprised-visit nge informed-visit’ tihte. A theih ang ang chhang turin kan Chief Minister zahawm tak kan sawm e.

PU ZORAMTHANGA, CHIEF MINISTER: Pu Speaker, Chawngte - Longpuighat kha PMGSY hnuaiah hmun 4-a then a ni a –

- i) Chawngte - Jamersury Road hi a amount lakh 1804.77 a ni. A Contractor chu Pi Lalthanthuami, Chawnpui, Aizawl a ni a, tun thleng hian 27% vel a thawk zo tawha ngaih a ni.
- ii) Jamersury - Mandiasora Road hi a amount chu lakh 596.25 a ni a, a contractor chu Pu F. Sangkunga, Venghlui a ni. A hna hi 20% vel zo tawh anga ngaih a ni.
- iii) Mandiasora - Rajasora Road laih hna hi 2018-2019-a pek bawk a ni a, km 8.5 vel a ni. A amount chu nuai 798.03 a ni a, a contractor hi Pu R. Liantluanga, Bungkawn, Aizawl a ni. A hna hi 18% vel thawk tawha ngaih a ni.
- iv) Rajasora - Longpuighat hi 2016-2017-a sanction a ni a, a kawng sei lam hi km 10 chuang hret niin, a amount hi lakh 849.97 a ni. A contractor hi Pi Coleen Lalsangpuii, Lower Zarkawt a ni a, ani hian a thawk tam deuh ber a, 88% vel a thawk tawh nia hriat a ni.

Tichuan, major-bridge hi pasarih vel awm tura ngaih a ni a, a tam angreng khawp mai a. Girder-bridge a ni deuh vek a, pakhat erawh chu trans-bridge a ni a, chung chu kan hna kal chho lai chu a ni. A hna thawh hi a chak lova, a buaithlak khawp mai a. Helai hi an han tlawh a, ‘informed visit nge surprised visit’ tih kha chu ka han chhang mai thei hauh lova, kan lo enzui ang a.

PMGSY hna ho hi kan sawi ang khan open tender-in kan han ti a, an han inchhan hniam siak a. Khata tanga eng emaw zah percent below emawa an han chhan khan ‘ka hniam si’ tiin Court-ah an kal a. A buai chhungin a buai khawlo zo ang tih kan hlau a, pekloh theihloh a ni si a, sorkar hmasa pawh an buai ve thoin ka ring a. Pek dawnin a pawisa kha a tlem tawh a, a contractor te hlep tur kha tih tlak a awm si lova, hei tak hi PMGSY kawng chungchanga kan buaina a ni a. 25% below tein an han chhang a, tender kha pekloh theihloh, a zuih tulh tulh a, a tawpah an in withdraw leh a. Restricted-tender a tihtheih chu nise hetiangka kal lo tur hi a ni a. Amaherawhchu, open-tender-in an inchhan hniam siak si a, pelo thei lovin kan awm si a, chu chu kan buaina pawh a ni a. Engpawh nise, heng zawng zawng hi kan lo en nawn ang a, hmun thenkhatah in withdraw mai te pawh an awm a. Tuna Member zahawm takin ‘hnathawh a muang si a, kawng a chhe si a, engtin nge kan tih dawn’ a tih kha, beihpuiin kan lo ennawn ve leh ang e.

A hma kha chuan Covid restrictions vel vangin a contractor-te, sorkar leh engineer lamte pawh kan che thei lova. Amaherawhchu, tlem tlem a ziaawm tawh a. Member zahawm tak ten in ngaihpaawimawh zia inrawn sawi a, tin, a pawimawh bawksia a, kawngpui pawimawh tak niin sanction awm vek tawh a ni bawksia a. Theihtawpin hma kan lo la ang a, a tihchak dan kan lo ngaihtuah ang a, ‘a solve dan kan lo zawng ang e’ tih kha ka chhan theih ni phawt mai se.

Member zahawm tak Pu Nguna zawhna, Tuisentlang an contractor in withdraw ngawt mai kha chu a zialo riau mai a. In withdraw lova tih dan te ngaihtuahin, a khuate lo va biaka tih dan te kan lo va dap loh chuan, khate ngawta tih chi pawh a ni lova. An field laih kha a contract tel a ni hauh lo mai a, hna kha darkar sawm tel anih si chuan an lo ti theilo pawh kha an thiamawm ve tho mai a, Vauna nen an lo tih chuan, ‘ka thawk lo mai ang e’ an lo ti si a. A buai chuan a paltlang tur khuate khan an tuar dawn a, a siam fel dan theihtawpin kan lo zawng ang e.

Tichuan, ‘Chawngte atanga Dam Lui kha a kawng a kawilutuk’ a ti em ni kha?

PU C. NGUNLIANCHUNGA: Chawngte atangin Lai District lamah PMGSY hna hi thawh a ni a. Sumsi Lui te, Sakei Lui te, Jongnosury, Kar Lui-I, Kar Lui-II, Pandong Lui, Dam Lui a thleng a. Dam Lui atanga km 10 lekah khan Vaseikai road a kal a Kkawngpui thleng si lo khan Dam Lui-ah khan a tawp ta ringawt mai a ni. PMGSY tho a ni a, kawng kha awmze neilo khan a awm ringawt mai a ni. Nikum Budget Session pawh khan zawhna hi ka zawt tawh a.

PU ZORAMTHANGA, CHIEF MINISTER: PMGSY hi a buaithlakna chu, kawngpui va chhun tura laih an awih lova, khuate leh khuate inkara ngaih a ni a. Kha kha khawilai sanction dang atang emawa laih loh chuan PMGSY kha chuan a hmaa kawng lo awm sa chhun tura lo laih kha an awih si lova, hei tak hi kan buaina a ni fo a. Engpawh nise khawil fund atangin emawa laih dan a awm em tih kan lo en ang a, khatia a tawp ngawt kha chu a fel lova. Fund hrang hrang atangin a tih dan kan lo dap ang e.

Tin, M. Kawnpui leh Vathuampui inkara bridge kha a lian an titheisi lova. Hmun hniha dawh ngai an tih kha a ni a. Engpawh ni sela, Leihlawn liana kha a man a to si a, kawng laih khan a keng tel bawksilova, chuwanga kawng dang zawng ta kha an ni.

PU C. NGUNLIANCHUNGA: Hemi kawng hi a *actual*-a kha a tlem zawk a ni, estimate aiin. Km 12 estimate ang khan tender a ni ta a, a taka an han teh khan km 10 vel chauh a nih avangin, Kawnpui - Vathuampui division siamin, leihlawna kha cheng nuai 70 proposal an siam a, a daih ta a ni, pawisa dang pek a ngailo. Tun fur tlak hma hian hma chak takin min lak sak sela, chu tilo chuan furah kan kal leh thei dawn si lova.

PU ZORAMTHANGA, CHIEF MINISTER: Mualbukawnpui - Vathuampui saw ke-in vawi tam ka kal tawh a, a chak thei ang berin hma kan lo lak tir ang e.

Tin, Pu Rokhaw zawhna, NEC project kha engatinge MCHP in tih a kha PWD ah tender a la nih loh tih lai a kha, kan sawi mai thei lova, a hma thei tur ang bera tender tih tura kal anih tih tawh chuan tender kan lo tum dawn nia. Tin, a ti tute duhsak theihdan a awm em? tih a kha, duhsak theih dan a awm chuan duhsak an tha a, theihtawp in kan lo en dawn nia.

PU B.D. CHAKMA : Ka zawhbelhna pahnihna kha min la chhang lova, Chawngte - Chotraponsuri road NABARD hnuaiia mi saw ‘black-top turin hmalakna a awm em’ tih a kha min la chhang lova. Tin, Parva I - Parva II hi duh aiin a sei a, hei hi min ennawn sak thei se tih kha ka sawi duh bawk a ni.

SPEAKER : Vawiin hi demand sawi ni a ni a, hun kan pe thawl che u anih kha. *Starred Question No. 162* zawt turin Pu K. Laldawngliana i lo sawm ang.

PU K. LALDAWNGLIANA: Pu Speaker ka lawm e. Ka zawhna, *Starred Question No.162*, Chief Minister zahawm tak chhana tan –

“PWD, National Highway Division-III, Thingdawl hi Govt. High School building luahhawhin an awm mek a, anmahni hmun ngeia awm turin hmalakna a awm tawh em? Eng chen nge hmalak anih tawh” tih a ni e

SPEAKER : Chhang turin Chief Minister zahawm tak i lo sawm ang.

PU ZORAMTHANGA, CHIEF MINISTER: *Starred Question No. 162* chhanna chu –

“National Highway Division-III, PWD, Thingdawl hi mahni hmun ngeia awm tura hmalakna a awm a, a hmun tur pawh Thingdawl Hmunhlui Tlang-ah ruahman fel tawh a ni. A building design leh detail estimate pawh peih fel a ni tawh a, sum awm hunah hnathawh tan theih beisei a ni” tih a ni.

SPEAKER : *Zawhbelhna* zawt turin zawhna neitu Pu K. Laldawngliana i lo sawm ang.

PU K. LALDAWNGLIANA: Pu Speaker, *Zawhbelhna* - Kawnpui leh Khamrang kawngpui National Highway chei that mek hi tun thal chhung hian zawh hman theih a ni ang em?

SPEAKER : *Zawhbelhna* zawt turin Member zahawm tak Pu Zodingtluanga Ralte i lo sawm ang.

PU ZODINTLUANGA, RALTE: Pu Speaker, ka lawm e. Zawhna hmasa zawk PMGSY chungchang awmnaah khan ka chang ve ta lova. PMGSY hi ka bialah tam tak a awm a, Bungmun, Laisawral, Marpara, Sesawm te hi zawh tawh a ni a, ‘black-top tur hian a rang lamin hma min lo lak sak thei ang em’ tih kha pakhatna atan ka zawt a.

Pahnihna - Thuampui, Lungchem PMGSY laihna contractor pakhat, a hming chu ka sawi lo mai ang a, hnathawk tha duh lo deuh mai, officer tena thawk tha tura an tih pawha JE te, SDO te transfer thei tak mai contractor hi, sorkar ang hian action emaw, vauna emaw min pek sak thei ang em?

Pathumna - Aizawl by-pass road kha a lawmawm rualin, *Unstarred Question No. 320* kan en chuan, a kalkawng tur hi - Sakawrtuichhun, Ramrikawn Dihmunzawl lamah a rawn kal dawn a ni a. Aizawl by-pass road anih chuan Ramrikawn khu junction lian tak mai a ni tawh a, chuvangin khu mi hel law law khuan DPR siam a la nilo bawk a, hei hi kan Chief Minister zahawm tak hian lo enpui thei sela, tuna DPR an siam tumna hi kan khawpui chep laiah tho hian a rawn lut tlat mai a, chuvang chuan, ‘kan by-pass road hi Aizawl by-pass tur law law hian hma min lak sak thei em’ tih kha ka zawt duh bawk a ni e.

SPEAKER : *Zawhbelhna* zawt turin Pu Lalduhoma i lo sawm ang.

PU LALDUHOMA : Pu Speaker, ka zawh duh chu - Meidum leh Hortoki inkar kawng hi nikum December thla khan contractor te hnenah work-order pek chhuah tawh niin a lang a. Kan thudawna a sualloh chuan, tunah hian survey an bei mek a, work-order pek tawh hnuah survey a ni ta a. Engtin nge survey ti miah lovin estimate an siam theih? Survey zawh tawh hnuah estimate an siam ang a, chumi hnuah chuan work-order issue tur ni awm tak a ni a. Han inpek hmasak tawh hnuah han survey leh kha, hei hi thudik anih chuan, ‘enge a kal hmang’ tih kha pakhatna a ni a.

Pahnihna - Tuna kawng laih tur hi compensate pek tur a tam a, kawng a thui bawk a, helaia cheng khuate hian kawngruh hluia kal hi an duh zawk niin hriat a ni a. Kawngruh hluiah kal se chuan km 4 velin a tawi phah dawn a ni. Tin, a amount pawh

hi vaibelchhe 23 vela tlahniam thei turah ngaih a ni. Ka zawhbelhna chu, “kawngruh hlui zawkah chuan a la tih thei em, lo tih theih ta sela, a hmasa a work-order an lo estimate kha enthat leh vek a ni dawn em” tih kha kan zawt duh a.

Pathumna - “PMGSY kawng hian kawngpui a chhun thiango” tih kha a ni a. Kawngpui atang khan laih tan mai tur a ni dawn lawm ni, tichuan kha harsatna kha chu a awm lo a ni mai a?

Palina - “Ramrikawn-a lo chhuak tura kha a rawn chhun ve zeuh dawn a ni mai a, a hel leh dawn a, mahse khumi leh Sihhmui inkar hi a rei ta lutuk a, compensation avanga buai niin an sawi a, chinfel vat dan a awm em, a rei ta hle mai” tih kha ka zawt baw k a ni.

SPEAKER : Zawhbelhna a zau hle mai a, a theih ang ang chhang turin Chief Minister zahawm tak i lo sawm ang.

PU ZORAMTHANGA, CHIEF MINISTER: Awle, Pu Speaker, waviin chu ka solo thui dawn ang reng riau mai a, Member zahawm tak Dr. Thangtea kha a zawhna a lo kal dawn a, mahse Vice-President hmuakin a kal si a, a zawhna kha Dy. Chief Minister a lo pe a, mahse ani pawh a hman leh baw k si lova. ‘Speaker chu kan lo hrilh mai ang e’ an ti a, ka demand ni baw k nen, waviin chu a tam angreng riau a. Engpawh nise, ka theih ang angin ka han chhang ang a.

‘Kawnpui - Khamrang thal chhungin zawh hman a ni ang em’ tih Pu Dawngtea zawhna kha - Kan zo hman ang, khu khu chu. An thawk chak a, tunkar chhungin attaching leh resurfacing ngai lai kha chu an zo hman dawn niin a lang e. Tin, pahnihna kha ka zia k hman lova. A zawt tel em hei lo hi... tel lo maw? A tha e.

Tin, Member zahawm tak Pu Zodintluanga zawhna - Bungmun atanga PMDSY-a laih tawhho kha ‘black-top theih a ni ang em’ tih a ni a, black-top theih nise kan duh a, theihtawpin authority te pawh kan lo nawr ang a, black-top lova a awm hian a chhe mai thin a. A hma thei ang bera black-top ti turin kan theihtawpin thu neitute pawh kan lo nawr ang e.

Tin, ‘Thuampui leh Lungchem inkara hnathawk thalo contractor’ a tih kha, hna an thawhloh na nana chuan Engineer-ten an lo en ang a, hnathawk tha turin hma kan lo la ang.

Tin, Aizawl by-pass road kha Member zahawm tak Pu Duha’n a sawi tel nen khan a inang viau a. Hei hi tunah hian kan survey mek a, a kalna tur kha ka la chiang

bik lova. Member zahawm takte sawi ang khan, khulai kawna rawn chhuak han tih leh kha chu keima mimal ngaihnanah pawh a rem hmel loh riau mai a, ka lo enpui ang a. Khu khu chu hela, a thlang lama kal tur ni awm tak a ni a, khulai kawna velah khuan kan buai a, 'FCI kudam pawh a tibuai' kan tihna lai kha a ni a. Chuvangin, rawn kaltlang lova tih theih dan a awm chuan, a tha ber a, bypass-na lai tur ka lo enpui ang a, a kaltlangloh hram dan kan lo zawng dawn nia.

Tin, 'Meidum - Hortoki kawng an survey nawn leh a, an hnathawh tawh hnuah, kawng an zawng a, google atang tein. Theihtawpa an tih hnuah work-order nen an kal a, a tak taka an han laih dawn hian remlo lai, enfel ngai, contractor-ina a zawn tir ngai lai te a awm thin a. 'Hei hi a dik tawh lo' tih kha chu thudik tak a ni ringawt mai a, 'a tir atangin uluk takin kawng survey danglam lo turin an ti tur a ni' tih kha chu, a dan pangngai a ni a. Amaherawhchu, tlema han hmanhmawh leh 'a fund a liam dawn' an tih si avanga hmanhmawh deuha han tih a lo awm hian, an kawng zawn kha a tak taka han laih dawn chuan, 'hei zawk hi a tha a ni' tih kha a lo awm ta thin a, chutiang chuan inhnialna tam tak a awm a. Entirnan: Serchhip Sailiamkawn - Keitum inkar khi kan chho a, kan chhuk thla leh a, NHIDCL nen pawh kan inhnial nasa mai a, 'a hnuai Raltiau khamah ngil takin a kal thei tho ang chu, in laih tho tho dawn chuan' ka ti a. Mahse compensation an lo pe hman vek tawh a, an lo pe chak thin lutuk a min tibuai a. 'Hei hi chu tupawhin en se la awm an ti lovang' kan ti a.

Khatieng deuh khan NHIDCL nen pawh hian kan inhnial nasa thin a. Keiniah chuan a tlangpui thuin, 'he pawisa hi a liam dawn a, rawn ti vat rawh u' tiha, hmanhmawha kawng zawn kha a lo tha tawh thin lova, a laih dawn hian zawn that leh deuh a ngai ta thin a ni. Thudik tak a ni a, a fund sanction nen intibuai lova thawh dan an ni pawhin an zawng hram hram a, keini pawhin lo umzuiin, kan lo zawng hram hram ang.

Member zahawm tak Pu Duha zawhna pakhat – "Kawngruh hlui zawkah Meidum - Hortoki road khu kal se la, a tawi zawkin an sawi a" a tih kha, kan lo zawt ang a. A hma zawng zawng khan a khua leh tui pawh khan min hrilh ni se la chuan, keinin kan hre si lova, kan hre tlai ta deuh hlek thin a. Tha zawka tihtheih a la nih chuan tawi zawk, senso tlem zawk na nana kha chu a that pawh a tha a, tih dan a awm ang em kan lo en ang a.

Khulai kawng khu kan member-te hriat atan han sawibelh lawk ka duh chu - Kan laih chhan hi kan gas zawngtu company ONGC-te hian Meidum-ah gas an hmu a, 'helai hi chu a thlep (fold) a te lutuk a, a piahah sawn prospect tha tak Hortoki nen a inkarah a awm a, hei hi kan beiseina sang ber a ni; kawng a awmlah avangin kan lai thei si lova'

an ti a, NABARD pawisa in kan lai ta a. Anmahni hnehah pawh ‘eng emaw chen a kal theih tawh, rawn zawng leh rawh u’ kan ti a, kan intur mek lai a ni a.

Hortoki atangin airport kawng project tunah hian a kal mek a, airport atangin Hortoki, Bairabi-ah, hnai taka inthlun theih anih avangin a tha pawh kan ti a, kan tih chhan pawh a ni a. Eng pawh nise member zahawm tak tena in rawtna kha kan lo en ang a, a tih theih ang chen chen kha tih kan lo tum dawn nia.

SPEAKER : *Starred Question No. 163* zawt turin Member zahawm tak Pu Nihar Kanti Chakma i lo sawm ang.

PU NIHAR KANTI CHAKMA: Pu Speaker, ka zawhna, *Starred Question No. 163*, Commerce & Industries Department changtu Minister zahawm tak chhan atan -

“Indo-Bangladesh border-a *Border Haat* siam tur kha hmalakna eng chen nge ni tawh min hrilh thei em” tih a ni e.

SPEAKER : Kan ngaihthlak tawh ang khan leh, House Leader zahawm takin a sawi ang khan, Dr. R. Lalthangliana, Vice President hmuak turin tih a ni a, Dy. CM hnenah a authorized a, lehkha a rawn dah a, ani pawh chuti tho chu anih avangin min rawn phone a. Chuvangin kan CM zahawm tak Pu Zoramthanga chhang turin ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Nihar-a zawhna chhanna chu -

“Indo-Bangladesh border-a *Border Haat* siam tur hian hma chak tak a lak mek a ni” tih a ni e.

SPEAKER : *Starred Question No. 164* zawt turin Member zahawm tak Pu C. Ngunlianchnunga ka sawm e.

PU C. NGUNLIANCHUNGA: Pu Speaker, ka lawm e. Ka zawhna, *Starred Question No. 164* -

- a) Kum 2018-2019 BADP Bungtlang RD Block hnuai Mautlang Water Supply amount ₹11 lakh kha thawh zawh a ni tawh em? Hei hi kan awm ve laia Pu Speaker, ruahmanna kan siam, mahse kan thawh hman tak loh kha a ni.
- b) Thawh zawh a nihloh chuan engnge a chhan?
- c) Thawh anih chuan tunge work Agency?

SPEAKER : A chhang turin RD Minister zahawm tak Pu Lalruatkima i lo sawm ang u.

PU LALRUATKIMA, MINISTER : Pu Speaker, Member zahawm tak Pu C. Ngunlianchunga zawhna chhanna chu -

- a) He hna hi thawh zawh a la ni lova. Tui pipe hi lei fel tawh niin Mautlang-ah dah a ni tawh e.
- b) Mautlang khua-ah hian Solar Water Supply Project lian zawk BADP hnuaiyah a thara kalpui mek a ni a, he project thar zawh a nih hunah tuna Mautlang Water Supply hna hi project thar tih changtlun nan remchang zawkah hman tum a ni.
- c) BDO Bungtlang South enkawlina hnuaiyah hna hi thawh a ni e.

SPEAKER : *Zawhbelhna* - Zawhna neitu Member zahawm tak Pu C. Ngunlianchunga i lo sawm ang.

PU C. NGUNLIANCHUNGA: Pu Speaker, Minister zahawm tak khan thu dik takin min chhang a, a lawmawm ka ti khawp mai. Hei hi Mautlang solar scheme vang a ni lova, pipe hi mm 32 tlawn 300 an lei a, Mautlang-ah dah a ni a, chu chu duhtawkin kalsan a ni ta a ni. Tichuan, he pipe tlawn 300 hi solar pumping titute khan tuna hian an hmang fai vek a. Hmanniah Mautlangah hian ka kal a, pipe 300 hi tlawn khat ₹2,000/- ni ta se, ₹6,00,000/- man a lo ni a. ₹5,00,000/- kha engtingge hman a nih tak ang? 11 lakh estimate a ni a, pipe 300 an lei hi a dik a ni.

Pu Speaker, helaia ka sawi ve thin tawh ang khan he solar pump hi Mautlang-te, Sentlang te, Hmawngbu te sorkar a kan awm ve laia tui an harsat em avanga BADP special scheme atanga water pumping tura ruahmanna kha tunah hian a lo chhuak ta kha a ni a. Khatah khan solar-a tui pump-na tur atan Mautlang-ah ₹69 lakh hmanga a pump tur a ni a. Tuna he water-supply scheme hi chu Chamdur tlang atang niin gravity-a lak pheina tura ruahmanna a ni. ₹11,00,000/- khan pipe tlawn 300 a ni a, a thawktu Bungtlang BDO a ni a, kha pawisa kha engtingge an tih tak? Tin, tuna Mautlang solar pumping titu ten kha pipe tlawn 300 an hmanna pawisa kha an pe dawn nge, khati khan a tituten an fanghmano ei mai dawn?

SPEAKER : *Zawhbelhna* - Member zahawm tak Pu Lalrintluanga Sailo.

PU LALRINTLUANGA SAILO: Pu Speaker, ka lawm e. Reiek BDO Office chhe tawh tak mai khu sak that tumna a awm em? A dawtah chuan ka bial chhung Chungtlang, Rulpuihlim khua te hi BADP cover area-ah rinluh a lo ni ta aa lawmawm hlein ka hria. Hei hi PMJVK cover area West Phaileng BDO hnuaiyah khuan dah luh ve dan a awm em?

SPEAKER : *Zawhbelhna* - Member zahawm tak Pu Zothantluanga i lo sawm ang u.

PU ZOTHANTLUANGA : Pu Speaker, kar hmasa khan he House-ah hian “Sairang - Nghalchawm Lei dawh-ah rod *sut-3* hman a ni” tih a ni a. Kar hmasa Zirtawpni (Ni 4) khan kan Minister zahawm tak nen kan zuk en a, “he House-ah hian thudik tluantling lo hi kan sawi thin a ni lo maw” tih kan Minister-in min rawn chhan atan ka rawn zawhbelh a ni e.

SPEAKER : Aw le, a theih ang ang chhang turin a changtu Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, Member zahawm tak Pu C. Ngunlianchungza zawhna kha, BADP 2018-2019-ah Mautlang-a tui lakna tur ‘supply of water pipeline at Mautlang’ tiin 11 lakh sanctioned a ni a. Tahchuan pipeline bakah khan DPR-ah hian a laying la tihzawh loh a ni a, tui lak ni lovin water pipe supply leh laying a ni a. Kan hriat angin additional BADP vanneihthlak takin kan hmu hlah a. Chutia nih chuanin Mautlang solar water supply pump kha pump-house thleng bak kha pipe la bang zawng khan kan *lay* leh vek ang a, ‘chu mi tur chuan insiamrem mai teh u a’ tiin thurawn kan pe a. Chuvang chuan, a hmaa pipe awmte pawh tikhan kan lo hmang zel ang a, a daihlo a awm a nih chuan an la ruahman tlang zel turah kan ngai a, Chutiang tur chuan anmahni nen pawh inbiakfel a ni. A hmasaah khan tui lakna tur pipe supply chauh a nih vang khan kha mi kha an lo hmang rih a, a hnu-ah khaw chhunga tui a la thlen loh hret vang khan khatiang tur khan ruahmanna kan siam leh zawk dawn a ni. He lai hi hriatpawlh theih kha a ni a, a hmasaah khan ‘water supply scheme’ ang khan hriat palh theih a ni a.

PU C. NGUNLIANCHUNGA: Pu Speaker, a harsat dan hrechiangtu ka ni a. Khatih lai kha chuan kan bial chhunga BADP scheme siam tur hrim hrim kha MLA te min rawn thin a. Ka sawi tak ang khan kan Minister zahawm tak pawh a kal tawh ang a. Chamdur tlang atangin kha an gravity pipe khan pipeline laying chu a ni tho mai. Chamdur tlang atangin pipe kha an zam pheih ang a Mautlang-ah, kha ta va pe tura ruahman kha a ni. Engpawh chu ni sela, a pipe chu an *lay* a, a bak kha engtinge?

PU LALRUATKIMA, MINISTER: Pu Speaker, a lawmawm khawp mai a, an thahnemngaihna kha. BADP hi hun rei tak atang tawhin additional kan buaipui a, kan hmu hlah mai a. Tichuan, tunah hian hlawhtling takin tui tanky-ah kan pump lut tawh a, khata tang khan a sem darh lehna turah ruahmanna kan nei zel a ni.

Member zahawm tak Pu Lalrintluanga Sailo zawhna - “Reiek BDO Office hi sak that a tul hle tawh mai a, engtingge tih dan a awm em” tih kha, Pu Speaker, RD Block hi 26 kan nei a, maintenance leh renovation te sum harsatna vangin kan ti hlei thei lova. Amaherawh chu, a remchang changte pawtkhawmin tunah hian hmun thenkhata office-te chu ruahmanna kan siam a. Reiek BDO Office pawh ruahman zingah kan rawn telh ang e.

Tin, Pu Speaker, BADP, Chungtlang leh Rulpuihlim hi tun hnaiah cover tir a ni tawh a. Amaherawh chu PMJVK hian West Phaileng RD Block chauh a cover avang leh, Chungtlang leh Rulpuihlim hi Reiek RD Block hnuai anih avangin, a tul angin kan lo enzui dawn nia.

Pu Speaker, Member zahawm tak Pu Zothantluanga rawn tarlan zawhna kal taah khan, Nghalchawm-ah khuan RD hian foot suspension bridge cheng 30,40,000 sanction-in siam a ni a. Chutah chuan member zahawm tak Serchhip bialtu, Pu Lalduhoma khan, ‘hetah hian rod sut 3 hman a ni’ a tiin a rawn sawi a. A hmunah a bialtu MLA nen zuk kalin, engineer leh official eng emaw zat hruaiin March Ni 4 khan kan zuk kal a. Chutah chuan

SPEAKER : Ngawi lawk rawh aw. *Zawhna & Chhanna* hun kan hmang zo a, kan chhan zawh tir law law dawn em ni? Aw le, chhang zui rawh le.

PU LALRUATKIMA, MINISTER: Pu Speaker, ka lawm e. Chutah chuan uluk takin kan engineer-te’n an han endik a, *Plan and Estimate* ang thlapa thawh a ni a, rod chi hrang hrang hman a ni a, a sawi uar deuh khan rod *sut-3* kha an hmufuh a ni ang a, in kan sak pawhin sut thum hmanna te, sut ruk hmanna te a awm a. Pu Speaker, remchanna ka han la lawk ang a, kan thu dawnna hi uluk takin, kan han tih zung zunga a lo dik leh si loh hian a buaithlak thin a. Chuvang chuan, ‘dik takin he hna hi thawh a ni’ tih kha ka han sawi a ni e.

SPEAKER : Memberte thahnemngaiin ram tan House-ah an rawn auchhuak a, minister ten in umzui a, thil in ti zel hi a lawmawm khawp mai, hmasawna chi khat a ni.

Tunah chuan financial business-ah kan kal ang a, vawiin hian Minister zahawmtak Dr. K. Beichhua leh Chief Minister zahawmtak Pu Zoramthanga te demand kan sawiho ang a, pass nghal kan tum dawn a ni. Kan tihthin angin a rualin kan lakawp leh ang a. Tunah Minister zahawmtak Dr. K. Beichhua sawm ila, House dawhkanah a demand-te –

Demand No. 7 - Excise & Narcotics Department;

Demand No. 29 - Social Welfare Department;
 Demand No. 34 - Animal Husbandry & Veterinary Department;
 Demand No. 41 - Sericulture Department te
 House dawhkanah rawn submit turin kan sawm e.

DR. K. BEICHHUA, MINISTER : Pu Speaker, on the recommendation of Governor of Mizoram and with your permission, Sir, I move the Demand Nos. 7, 29, 34 and 41 for ₹2,79,89,48,000/- for meeting expenses during 2022-2023 in respect of the following departments: -

Demand No.	Department	Amount (in ₹)
7	Excise & Narcotics	49,24,95,000.00
29	Social Welfare	1,48,53,13,000.00
34	Animal Husbandry & Veterinary	64,71,48,000.00
41	Sericulture	17,39,92,000.00
TOTAL		2,79,89,48,000.00

Thank you, Sir.

SPEAKER : Tunah chuan kan Chief Minister zahawmtak Pu Zoramthanga, House dawhkanah a demand-te -

- 1) Demand No. 1 - Legislative Assembly;
- 2) Demand No. 2 - Governor;
- 3) Demand No. 3 - Council of Ministers;
- 4) Demand No. 5 - Vigilance Department;
- 5) Demand No. 9 - Finance Department;
- 6) Demand No. 11 - Secretariat Administration Department;
- 7) Demand No. 14 - Planning & Programme Implementation;
- 8) Demand No. 15 - General Administration Department;
- 9) Demand No. 32 - Horticulture Department;
- 10) Demand No. 45 - Public Works Department;

House-ah submit turin kan sawm e.

PU ZORAMTHANGA, CHIEF MINISTER: Pu Speaker, Mizoram Governor recommend-na ang leh i phalna angin, vawiinah ka demand hengte hi House dawhkanah ka rawn submit e –

Demand No.	Department	Amount (in ₹)
1	Legislative Assembly	31,22,02,000.00
3	Governor	30,60,000.00
	Council of Ministers	
5	Vigilance	6,63,71,000.00
9	Finance	31,12,17,34,000.00
11	Secretariat Administration	1,27,55,73,00.00
14	Planning & Programme Implementation	95,70,39,000.00
15	General Administration	92,11,45,000.00
32	Horticulture	88,09,71,000.00
45	Public Works	11,74,30,24,000.00
	TOTAL	47,35,13,53,000.00

Ka lawm e.

SPEAKER : Kan Minister leh kan Chief Minister zahawmtak ten an demand-te House-ah an rawn submit ta a, sawihona kan tan ang a. Member-te minute engzatnge kan inpek leh ang? Minute 10 chu tha kan ti em? Minute 10 kan inpe leh ang a.

Tunge han sawi hmasaber leh ang le? Sawi hmasa ber ding nalh hi chu hun inpekbelh ka pawti mi ah lo a nia. Member zahawmtak Pu L. Thangmawia ka sawm e.

PU L. THANGMAWIA : Pu Speaker, ka lawm e. Vawiin hian kan Chief Minister zahawmtak Pu Zoramthanga chan Demand No. 1 - Legislative Assembly hnuai Mizoram State Legislative Assembly hian kumin hian a kum 50-na, *Golden Jubilee* a lo thleng dawn ta reng mai a. Pu Speaker, i thahnemngaihna leh remhriatnain a lawmdan tur pawh hun rei tak kal ta atang khan tihchhoh mek a nih kha.

Golden Jubilee kum kan lo thlen takah chuan, Pu Speaker, he House zahawm taka Speaker hmasaber min la dampui Dr. H. Thansanga te, he House member lo ni tawh zawng zawngte, tuna ka member-pui zawng zawngte, hemi Assembly-a rim taka rorel khawlte tana lo thawktu - lo thawk tawhtu zawng zawng leh thawk mekte bakah Mizoram mipuite he House zahawm tak kaltlang hian chibai ka buk hmasa a ni.

Vawiin kan demand sawiho turah hian ka bial mipuite mamawh pawh sawi ka duh hle a, tin, Mizoram mamawhte pawh, demand pawimawh tak tak an ni a. Kan sorkar chak takin hripui leng kara a hmalakna han fakna tur leh lawmthu sawina tur tam tak a awm baw a. Amaherawhchu, Pu Speaker, i remtihhain vawiinah hian kan Chief

Minister zahawmtak chan Demand No. 14 - Planning & Programme Implementation hnuai Science & Technology chungchang bik sawinana he ka hun neih hlu tak hi pek ka duh a. A chhan a awm a, ka hmuh theih ang ang record hluite ka han en a, a pawimawh dan ngaihtuahin he House-ah hian duh ang sawi a hlawh tam tawk lo hle a. Chuvang chuan vawiinah hian ka hun ka ui viau naa, ka han pe ve dawn a ni. Ka sawi zo hman lo deuh anih pawhin, Pu Speaker, hun tlem min pek belh theih chuan ka lawm ngawt ang.

Pu Speaker, science leh technology pawimawhna leh tangkainate hi kei aia hre zawk vek innih ka ring a. Tuna kan session neih meka tawng rinna sound system te, live a mi min lo thlir theihna te, nitin kan khawsaknaa kan hmuh hi sawi dawn ila darkar khat sawi daih a ni ang a. Tunlaih chuan pa te leh pa lian kha incho ngawt chi a ni lova, science thiamna hmanga pistol-a min tin tawh chuan ban phar mai kha a ngai thin a ni. Chutiang zelin indo thuthangte pawh kan hria a, heng zawng zawngah hian sipai an ngah leh ngahloh ai chuan, ralthuam an neih that leh thatloh kha, science hmanga sawi dawn chuan sawi tur a tam a. Khati chinah khan ka han rek bung ang a.

Mizoram-a science leh technology lo thanchhoh dan leh a thawkrim mi thenkhatte rawn tarlan ka duh a, kan hmasawn zelna tura rawtna te pawh rawn thlen ka duh a. Khawngaihni nang leh House Leader, leh ka member puite pawhin ngaihtuahna min lo sen saka, bawhzui theih a awm chuan min bawhzui sak kha ka ngen nghal bawh a ni.

Kan hriat theuh angin kum 1894-ah sap missionary ten *A*, *Aw*, *B* min siam sak a, he House zahawmtak hnuai Committee on Estimates Report 2-na (1975-1977) ah pawh, Mizoram-a sap missionary lo lut hmasa pahnih ten kum 1895-a Biak-ina zirtirna an pek tan thu he House record ngeiah pawh a chuang a ni. Kum 1906-ah primary school exam neih tan a ni a. Kum 1973 hmalam kha chuan Mizoram-ah science zirna tak tak hi a awm lova; middle school-ah GK angin Biological Science a awm a, 1973-ah a rawn inthlak a, UNICEF leh India sorkar inremna angin India sorkar laipui leh Mizoram UT sorkar-in thuthlung an nei ta a. Chutah chuan primary school 50 leh middle school 30-ah science zirna tan a ni ta a ni. Chumi tihhlawhtlin nan chuan Pu Speaker, Science Promotion Officer/Science Consultant dah a ni a.

Pu Speaker, ka rilruah Padma Shri A. Sawihlira a rawn lang a, ‘*Science* chu, a tiha tih a ni’ tiin Science tan an lo campaign a, Mizote’na subject hara kan ngaih, thenkhat fiamthu duh deuh phei chuan, “mi ang manglo zir tur..., science zir leh mathematics zir hi chu tlem in an ti deuh chhuih e’ tih te pawh kha a awm thin a ni. Mahse a nihloh zia chu Pu Speaker, i hriat ka ring a. Vawiin nia kan hmasawna tamtak hi kan science mite avang a ni.

Chutichuan, MBSE alo ding a, Academic officer-te an han la a, ni 26.4.1977 khan khatih laia Chief Minister Pu Ch. Chhunga khan MBSE office hawnnaa a thusawi hi a saptawng chuan ka sawi lo mai ang a, a mizo tawng hian ka dah a, ‘science leh mathematics zirna lamah MBSE hian theihtawp a chhuah dawn tih hre tho mah ila, a bik taka ka sawi duh chu, Mizoram hmasawna kal zel hi zirlai ten science leh mathematics zir an hlamchhiah chuan a thuanawp phah thei a ni’ tiin kan Mizoram Chief Minister khan Mizoram Board of School Education office a hawnnaah a sawi a ni. Chuvangin kan hotu hmasate pawhin an ngaih pawimawh a, subject har em ema kan ngaih lai hian, science lama mi hlawhtling tam tak tarchhuah tur an awm naa, mi pahnih han tar chhuah ka duh a - Rev. Dr. Zairema kha ka sawi lo thei lova. India independent hma 1940 khan B. Sc. (Chemistry) honour alo zo tawh a ni. Tichuan Pathian-in a ko anih ka ring a, Kohhran leh Bible lehlín leh thildang dangah a ‘scientific thinking’ kha vawiin niah kohhran zawng zawngina kan chhawr a ni.

A dawt lehah chuan Kum 1955-a B. Sc (Mathematics) pass, Dr. LN Tluanga, Mizoram Education-ah pawh a bul tannaah Joint Director te pawh lo ni tawh, missionary-a kal ta kha a awm bawk a. Ka pian kum chiah 1974-ah Ph. D alo zo der tawh a ni. Hengho hian, “science leh mathematics hi mizote thluak hian a pha a ni” tih an lo show (an lo tilang) a, an chungah pawh lawmthu ka sawi duh a.

Chutichuan, School te alo thang chho zel a, tunah hian UDISE+data-a alan danah chuan, 2020-2021-ah khan Higher Secondary level-ah Science zir theihna 49 a awm mek a, Arts zir theihna 189 leh Commerce zir theihna 24 te a awm a, hei hi 2020-2021 data a ni. Amaherawhchu kan sorkar hian science zirna a ngaipawimawh a, hemi hnu pawh hianin Ngopa te, Ch. Chhunga High School te khang lo pawh a awm chho a, tun data tharah phei chuan hei ai hian Science zirna a tam tawh a ni. Tin, Govt. Zirtiri Residential Science College pawh hi tuna kan House Leader, Chief Minister zahawm tak a chief-minister hmasak zawk khan Residential Science College-a leh a ni tih te pawh kha Zoram mipui ten kan la theihngihl awm lo e.

Tin, Pachhunga University College kha 1958-a din a ni a, Science zir tan kum chu 1973 a ni. Tunah hian Zirtiri Residential Science College te, Govt. Lunglei College te, Govt. Champhai College te, Govt. Serchhip College-ah te leh Govt. Kolasib College-ah te Science zirna hi dah mek a ni. Mizoram University kha 2nd July, 2001-ah alo ding a, a tahtawlin science zirna an ti chho a, tunah hian science zirna M. Sc. (Master) mai nilo, Ph. D thlengin kan ramah kan lo nei ta a. Hemi atana theihtawp chhuahtute pawh he House zahawm tak kaltlang hian lawmthu kan hrilh a ni.

Tin, hun hmasa lamah kha chuan Pu Speaker, Higher Secondary School te a la awmlah avangin zirlai ten pawl 10 an pass chuan college an lut mai thin a. Vawiin nia

kan Dy. Chief Minister pawh hi 1960 leh tih kuma Intermediate Science lo la ngat kha a ni a, zalenna sualin kal lo ta se, Scientist ropui tak emaw, officer lian takah hian a chhuak tho tho ang tih ka ring a. Hetiang mi, Science background nei hotua kan lo nei hi a lawmawm ka ti a. Tin, tun 8th Assembly hi Science background nei kan tam ber tum a ni awm mang e. ‘MNF Party hian *Science* hi alo ngaipawimawh mang e’ ka ti a. Medical Science lamah member zahawm tak tak - Dr. ZR Thiamsanga te, Dr. K. Beichhua leh i vei lama mi Dr. BD Chakma te an lo awm a. Tin, Engineering lamah Er. Lalrinawma te, Er. H. Lalzirliana te an lo awm bawk a. Tin, General Science lam pawh mi 3 lai - Kei ka ni a, tin, Dr. K. Pachhunga leh Dr F. Lalnunmawia, ka bul chiaha thu pawh hi an ni bawk a ni. Tun tum hi Assembly kal tawh zawng zawnga science background nei kan tam ber tum a la ni awm e. Mizorama Science chawilarna atan leh a tul anga thawk turin tlawmngai pawl tam tak a lo ding tawh a. Mizoram Science Society kha 1975 kumah a ding a, tin, 1986-ah Science Teacher Association of Mizoram a lo ding bawk a, 1995-ah Mizo Post Graduate Science Society (MIPOGRASS), tunah erawh chuan “Mizo Academy of Science” tiin pawl hming thlak a ni a. Tin, Mizoram Mathematics Society te leh pawl dang dang Geology-ah te pawh a lo ding a, hengho hian nasa takin Mizoram-a Science thanchhoh nan hna an thawk a ni. STAM te phei chuanin Science Journal an chhuah a.

Tin, “National Science Congress” an ti a, seminar leh workshop te, tin, science tihlar hrim hrimna expedition te pawh an ti thin a ni. Rih Dil thuk zawng te, Phawngpui leh Lengteng san zawng te pawh kha science hmangin an teh a. Tin, Science Quiz te, puithuna athlak umbo tura beih te, nature camp te, polythene project te, STAM proficiency award te siamin lehkhabu tamtak an publish a, Mizoram University leh NIT lo awm theihna atan pawh an thawk anih kha. An ti tha em em a, an chungah pawh lawmthu ka sawi a ni. Tuna “Mizo Academy of Science” lo ni ta pawh hian college-ah science zirna tha zawk kan neih theih nan te, Higher Secondary level-a Geology subject telh anih theih nan te, tunlai khawvel boruak inthlakthleng, ramngaw leh nungcha humhalh kawnga inzirtirna Environmental Science zirna telh anih theih nan te leh thildang tam tak an thawk a ni. Ka sawi vek dawn chuan hun ka la tam dawn a.

Tichuan, Mathematics Society pawhin Mizoram zirlai ten mathematics kan hlauhna tihreh nan theihtawp an chhuah a, mathematics competition te leh summer-camp te buatsaihin theihtawp an chhuah a, heng zawng zawngah hian theihtawp an chhuah a ni. Ka sawi kimloh pawh a la awm.

Pu Speaker, heng zawng zawng ka sawi chhan hi ka thleng dawn chiaha a. India independence hnu 1947-ah Prime Minister hmasa ber Pu Nehru khan, “ram hmasawna tak tak thlen tur chuan Science lamah hmasawn a ngai hle a ni” tih a rawn changchawi a. Sorkar laipuah Deptt. of Science & Technology leh Deptt. of Bio-Technology te a

awm ta a, tun Covid hrilengah pawh Bio-technology Deptt. te kan hmang tangkai khawp mai. Deptt. of Space te, Council for Scientific & Industrial Research te, Defence Research & Development Organisation te, a dang pawh a tam a, sawi vek sen a ni lova, khang kha an din a ni. Mizoram chuan hma kan lak tanna a tlai khawp mai. 1985-ah Mizoram Council of Science Technology & Environment hi a lo ding tan a. Scientific Officer pakhat leh peon-in office an luah tan a ni. Ka hriat sual loh chuan Dr. Vanlalzara hi a hmasa ber a ni a, tunah chuan a retired tawh a. 2011-ah Directorate-ah hlankai a ni a, vawiin thleng hian Planning hnuaiiah Cell pakhat angin a awm a ni. Chuvang chuan, House-ah pawh hian sawi a hlawh khat viau a ni.

Pu Speaker, he House kaltlanga House Leader ka ngen duh chu - Meghalaya tih lohah chuan India ram State hrang hrang hian department puitlingah an hlangkai deuh vek tawh a, Mizoram hian department 48 kan nei mek a, Science hman tangkai miah lohna department hi a awm manglo a ni. Horticulture Deptt. te, Agriculture Deptt te, PWD te, a dang dang pawh ala awm; Language te kan buaipui a, kan Chief Minister zahawm tak thu angin. Hei pawh an han tih tak tak chuan ‘linguistic’ chu ‘Science’ alo ni daih mai a n, a tawp lam chu Science ah a lut leh thin a ni.

Awle, ka sawi thui lutuk tawh lo ang; hun ka pel thui lutuk ang a, member dangte an zahawm e. Hna tam tak an thawk a, kan Mizo puan te hi an lo ‘patent’ ti ila, geo-tagging te an lo ti vek tawh a ni. Ziakin nakinah Pu Speaker, rem i tih chuan House property-ah ka rawn pe tho ang a. Tichuan, Remote Sensing te, MIRSAC te, Mizoram Science Centre Lunglei lamah te pawh hian kan ti pheidi dawn a ni. Hei kan sorkar hian a ngaipawimawh a, Lunglei lamah pawh Science Centre ang chi hi an nei dawn a. Hengte hi ka rawn inbuatsaih vek naa, ka sawi tawh lo mai ang a. Tuna kan dinhmunah chuan Niti-Aayog-in India Innovation Index a tihchhuah tharah Mizoram dinhmun a la sang lo viau. Tin, All India Level Entrance-ah Science lam kan la hniam viau bawka, kan result enin.

Chuvang chuan Pu Speaker, thil pahnih rawn rawt duh ka nei a, rawtnaah min lo ngaihsak ula. Pakhatna-ah chuan - Department puitling anih ve a hun tawh a ni. Pahnihna-ah chuan - Indian Parliament hian Department related Committee hi a nei a, mahse an kal dan chu a dang deuh hlek a. Anni chuan Supplementary demand te an lo en thin a. Hei an report pawh hi Pu Speaker, pakhat chu ka download a, hei hi ka chhiar a, hemi hi “Department related parliamentary standing committee on science and technology, Environment Forest and Climate Change” tih a ni a. Mizoram-ah pawh hian Pu Speaker, MNF-ina kan tum chu, ‘Zofate rorelna pakhat hnuaiiah dah’ tih a ni a. Hemi huna kan mamawh tura chu kan ram venhimna leh a dangah pawh *Science* tho tho a ni. Chuvang chuan Pu Speaker, thil kalhmang anih, Parliamentary practice anga kalh loh chuan he House zahawm takah hian ‘Department Related Committee on Science &

Technology’ te hi nei ve ila, department hrang hrang Horticulture department te, PWD department te ‘an day-to-day a va inrawlh tur’ tihna ni lovin, a *scientific* lai tak kawng tha zawk kan neih nan te, tharchhuah tam zawk kan neih nan te, an funding te leh rawtna sorkar-a thlen turin, chutiang tur chuan *parliamentary practice* a kal loh chuan India ramah pheih chuan, Principal Scientific Adviser, Prime Minister pawhin a nei hial a, tikhan an kal a, keini aiin in hre zawkin ka ring a.

Mizoram-ah pawh hian Committee nei ve ila, kha committee khan department, science telna zawng kha chu ko thei vek ila, an hmalak dan leh a ‘scientific’ laia kha lo enpui ila, an day-to-day activities a va inrawlh chu a nalh lo ang a, chu chu ka rawn rawt a ni e. Ka khat-liam deuh a, hun min pek belh nasa a, ka lawm a.

Hei, tuna ka thusawi tlangpui ka rawn ziakehhuak a, hei hi House property atan kan pe ang a, vawiin nia demand sawi chakawm tak tak department te, a changtu minister-te leh ka bial mipuite ngei pawhin min lo hriatthiam ka rawn ngen e. Pu Speaker, ka lawm e.

SPEAKER : Tun Session-ah hianin minute 5 ve ve member zahawm tak Pu VL Zaithanzama nen in hmang pel a ni. Tunge sawi leh ang le? Kan insawm chhung hian hun a kal duai duai mai si a. Awle, Member zahawm tak Pu C. Lalmuanpuia ka sawm e.

PU C. LALMUANPUIA : Pu Speaker, ka lawm e. Vawiinah kan House Leader demand-te leh kan Minister zahawm tak demand-te kan han sawi tur hi a phur awm hlein ka hria a, amaherawhchu kan hun neih te a tlem avangin kan han kal thuak thuak dawn a. A tam thei ang ber han sawi chu kan tum ang a, amaherawhchu kan luhchilh thuk hman dawn lo a ni. Demand No. 34 - AH & Vety-ah hian han lut nghal phawt mai ila.

Pu Speaker, he department pawimawh tak hnuaiah hian SEDP pilot project, chhungkua 1020 zette hnenah kalpui mek a ni a, a lawmawm hlein ka hria a. Tun covid-19 hripui karah pawh vawh vulh te, arvulh te kalpui a ni a, amaherawhchu kan tum leh duh ang tak erawh chuan hriin min tibuai nasa a, he pilot-project hi duhthusam tak chu la ni theilo mahsela a hlawhtling em em a, a lawmawm ka ti khawp mai a. Kan Minister leh department te chungah lawmthu kan sawi a ni.

Tin, Veterinary Department hi a thang khawp mai a, district hrang hrangah district hospital pasarih lai sak zawh te a ni a, district thar 3 tan ruahmanna siam a ni bawh hi a lawmawm khawpin ka hria a. Kan ram hi saa kan intodelh a ngai a, sa-thianghlim te mihringin kan mamawh a, hriselnaa tan a tha a, chung enkawltu tura heng

hospital lo awm te leh, kan ran vulhte a sa ei chi kherloh, mihring ina kan ranvulh pawimawh tak tak Ui leh zawhte thlengin hospital hi kan mamawh vek tawh a ni. Chung rante an damloh hritlan pawha an pan mai tur hospital thar duhawm tak tak sak puitlin an ni te hi a lawmawmin a chhuanawm ka ti khawp mai.

Tin, Vety Dispensary pariat lai mai sak zawh an ni ta te hi a lawmawm khawp mai a. Tin, kan ramah rinloh tak maiin vawk hri, African swine-fever a rawn leng chiam mai a, harsatna chihrang hrangin min run a, kan vawkte an thi nasa khawp mai a, kan Minister zahawm tak leh department ten theihtawp chhuahin an han bei a, tunah erawh chuan he hri pawh hi control a ni ta a, thihbelh an awm ta lovin ka hria a, a lawmawm khawp mai a. Tin, a thi bang tam tak a la awm a, heng atang hian intodelh tura hmalakna chhunzawm zel a ni a, a lawmawm ka ti khawp mai.

Tin, kan Minister zahawm tak khan leh kan House Leader ten min lo hriatpui se, Mizoram-in vawk-pul hri (ASF) kan tuar nasa em em a, hetah hian SEDP kalpui anih hunah pawh Mizoram tan ruahmanna thar, a tam thei ang ber awm thei se, vawk vulh hi a tul a ni. chutiang chuan SEDP-ah pawh kalpui-nat nithei sela a lawmawm ngawtin ka ring a ni.

Tin, a pahnihna-ah chuan, Social Welfare Deptt. hi a ropui khawp mai a, an hmalakna - Eklavya Model Residential School (EMRS) pawh 11 lai tunah ruahmanna siam a ni a, central atang zirna thatak kan neih theihna tura an sa mup mup te hi a lawmawm ka ti khawp mai. Tin, Tribal Research Institute hnuaiyah Kelsih-ah sawn ruahmanna siam a ni a, Tribal Research Institute tan cheng nuai 2000 chuang zet maia ruahmanna siam a niin, an han sa mup mup te pawh saw lawmawm kati a, a department chungah pawh lawmthu ka sawi duh a. Tin, he department hnuaiyah hian Community Hall te, leh Tribal Girls' Hostel eng emaw zat sak a ni te hi a ropui khawp mai a, hmasawna a kal chak ka ti takzet zet a, a lawmawm kati hle a ni.

Tin, 'Aganwadi' kan tih te hi kan tu leh fate an bul tanna tak tak a ni a, Aganwadi Center thawm that leh siam that a ni te hi a lawmawm ka ti khawp mai. Tin, kan House Leader zahawm tak hian a ngaihpawimawh em em chu, *ruih-hlo ngaite enkawlna* a ni a, Jordan Center tunah hian ruahmanna a kal a, *ruih-hlo ngaite enkawl mek* an ni a. Heng hripui leng karah pawh chawl lova an kal thei hi a lawmawm ka ti a, a chhinchhiah tlak hle a ni.

Tin, Demand No. 41 - Sericulture-ah hian ka han kal thuk thuk ang a. Mamit leh Siaha District bikah *project-base* a SEDP kalpui a ni a, chhungkua 900 te tana eizawna siamsak an ni mek te hi a lawmawm khawp mai a. Sericulture hi kan la hmelhriat lutuk lova, mahse Mizoram mil tak mai leh kan farmer-te tan pawha

inngahna-tlak tak a ni a. Tin, Sericulture hnuai cocoon silk hralh lamah pawh hian India ramah harsatna kan nei lova, ‘a market a tha em em a ni’ tih kha ka han tarlang duh bawk a.

Demand No. 7 - Excise and Narcotics Deptt. hi kan sawi leh duh a. Excise hi a changtu minister pawhin a vei em em a, tunlai kan ram dinhmunah chuan helai atanga kan hnaih ber Rangvamual pawh a hmel a danglam sawt hle in ka hria a. An hah a, theihtawp an chhuah a, nitin mai khuan an feh chhuak a, an hmalakna te Mizoram pum angah pawh a lawmawm ka ti a. Tin, zu kan han khap a, chumi kenkawhna kawngah chuan an vir buai thin khawp mai a, amaherawhchu, Excise Enforcement staff-te hi duh ai chuan an tlem deuhin a lang a, heng te pawh hi kan Minister zahawm tak khan min lo hriat sak sela. Hetia zu khapna dan te kan kalpuia, theihtawp kan chhuah zel dawn anih chuan, a staff te pawh hi tihchaka, enforcement te pawh hi lak belh theih ni sela a lawmawm ngawt in ka ring a ni.

Pu Speaker, Demand No. 9 - Finance-ah hian ka han lut ang a. Kan CM zahawm tak chan, (rin aiin hun a tlem dawn hle mai, Pu Speaker) kan CM zahawm tak hi a fakawm hlein ka hria a. A budget pharha a speech te han ngaihthlak khan kan sum dinhmun, central atanga kan sum beisei cheng vaibelchhe 2632.58 lai mai kan hmu lo chungah kan ram enkawl hautak tak mai, hripui karah vawiin ni min thlenpui thei hi a chhuanawm ka ti a, a ngaihtuahna te a seng nasa ngawtin ka ring a. Hei, kan sum hmuhloh han en hian a tam khawp mai a, deptt. pahnih/khat ang hi a bo ang tluk a ni. Chuvang chuan, ‘engtin nge kan kala, hma kan lak’ tih hi ngaihtuah tham tak a ni a. Chumi karah chuan hei, kan CM zahawm tak hmalakna kan flagship program-ah kuminah hian SEDP hnuai cheng vaibelchhe 700 dah a ni te hi a lawmawm ka ti a, Zo-khaw lama kuthnathawktute lam a hawi suau mai a, a thlamuan thlak hlein ka hria a. Tin, hei ‘Prime Minister Development Initiative for Northeast’-ah hian kan han hmu kuau mai a, kan budget-ah. Aizawl by-pass road siamna tur vaibelchhe 500 leh pilot project for construction of bamboo link road vaibelchhe 100 kan han nei te hi Union Budget-ah a han lang kuau mai te kha, “kan CM hi thil a ti mai a ni lova, a tak takin a sawi tawh hi chu a bawhzui zel a ni” tih Pu Speaker, a lang Chiang em em a. A chungah lawmthu ka sawi a, kan hmabakah hlawhtlinna engin min hmuak se ka duh a.

Hripui karah pawh kan tang tang tang a, a lawmawm ka ti a. Kan CM Zahawm tak ho hian engtik niah emaw chuan kan ramah hian hmasawna kawh a lo eng ngei dawnin a lang a. Vawiina kan demand rawn sawi te, kan Minister zahawm tak tak demand kan rawn sawi pahnih te hi he House zahawm takah hian ‘i pass ang u’ tiin ka rawn thlawp a ni e. Ka lawm e.

SPEAKER : Tunge sawi leh ang le. Aw, Member zahawm tak Dr. BD Chakma ka sawm e.

PU B.D. CHAKMA : Pu Speaker, ka lawm e. Tun tum budget discussion hi kan tui lo em maw ni, ka ti deuh a, engmah sawi tur ka hre vak lova. Eng pawh ni se, upside-down in ka tan ang a.

Pu Speaker, kan Chief Minister zahawm tak Demand No. 45 - Public Work Department hi nichin lawk, *Zawhna & Chhanna* hunah pawh khan kan sawi a, mahse a zawng zawng kha ka sawi hman lova. Borapansury - Chawngte road hi NABARD hnuaih kum 2010 vela laih tawh kha a ni a, mahse tun thlengin black-topping tih a la ni lova. Khawngaihin hei hi ‘min ngaihtuhsak dan a awm em’ tih kha Chief Minister zahawm takin wind-up ah khan min lo hriat sak se la.

Tin, PMGSY road quality material chungchangah tlem han sawi ka duh a. Chawngte - Longpuighat PMGSY road hi Tuichawng Lui, Luilung atangin tunah PCC tih mek a ni a. Mahse monitoring hma khan a contractor ten rora tlem tlemin an pawlh thin a, ‘kha kha departmental approved material a ni em’ tih kha ka zawhna a ni a. Tin, Parva-II - Kamtuli road hi tunah lai zawh tawh niin ka hria a, mahse, ka hmuh dan leh mipuite sawidan pawhin a kawng hi a kual nasa lutuk a, Pu Speaker. Khawngaihin PWD lam atangin expert team min rawn tirh sak in ngun taka en ni thei se. A chhan chu, ‘*time is money*’ tih a ni a, chute lain a short cut zawk awm reng sia khita han kal kual ringawt kha chu mipuite tan pawh hun khawhralna a ni dawn a, tin, a sorkar tan pawh sum a hek mai mai a. Chuvangin, hei hi khawngaiha min lo ennawn sak turin ka ngen a ni.

Tin, Demand No. 9 – Finance Deptt-ah ka lut ang a. Kan area hi CADC anih avangin CADC-a financial distribution leh management chungchang hi *Supplementary Question*-ah pawh ka zawt tawh a. Tun thlengin Lai, Mara leh Chakma ADC te hian State Consolidated Fund atanga an sum hmuh hi 7:9:11-a sem thin a ni a, a percentage lakin CADC-in 25.92% a hmu a, MADC in 33.33%, LADC-in 40.74% niin, a funding distribution hi 7:9:11-a kal a ni. Mahse 2014-2015 budget kan en chuan CADC hi budget short-fall in kum tin a kal a, tun thlengin a la ni a. Kan District Council Chairman hi hi accounting expert a ni a, ‘a comparative statement hi lo siam teh’ ka ti a. Tichuan lehkha pakhat min rawn thawn a, 4th March, 2022-ah, hetiang hian a zia k a. Pu Speaker, hei hi House property atan ka rawn submit ang a.

Tin, SEDP head dik tak a awmlah avangin finance-ah hian SEDP chungchang tlem sawi ka duh a. SEDP vs NLUP, hmana political analysis kan neihah chuan, he flagship programme pahnihte hi 100% a hlawhtlinloh avangin sorkar ministry kum 10 danah thlak zel a ni a. Congress hunlaiin NLUP - ₹30,000/- sem tih a ni a, a hnuah MNF

sorkar hnuaiiah SEDP project - ₹50,000/- sem tih a ni leh a, vanduaithlak takin chutilai chuan mautam a rawn thleng a, ₹50,000/- pek an intiam laiin ₹1,000/- chauh pek a ni a, a term lehah MNF kha an tla ta a ni, Pu Speaker. Tichuan a dawta Congress ministry-ah khan NLUP revised a ni lehin, ‘cheng nuai khat, chhungkaw tinah’ tih manifesto an rawn tlangzarh leh a, mahse chu pawh chu an term kum 10 chhung khan 100% tihhlawhtlinloh a ni leh a, tichuan anni pawh kum 2018 term tawp lam khan an ral ta diak a, a term leh election-ah 34 nos. MLA atangin seat 5-ah an tla ta a ni.

Pu Speaker, chutiang bawkin tun MNF ministry manifesto-ah khan SEDP - nuai 3 sem a lo ni leh ta a, kum li a liam a, ₹50,000/- tih a ni leh ta a ni. Chhungkaw tina nuai 3 kan sem dawn chuan term 6 an mamawh tihna a ni a, mahse India politic-ah hian a zawna term 6 tling an awm miah lova. Chuvang chuan, hei hi chu MNF tan chuan *Pandora Box* a niin ka hria; SEDP hi ‘mother of all problems’ a ni. ka biala chhungkua 200-300 an awm laiin SEDP hnuaiiah chhungkhaw pakhat chan chauh pek a ni a, a tu ber nge dawng dawn dawn, an VCP te pawhin an sem ngam lo a ni. Chuti laiin tunah *Covid* hri a leng leh ta si a, hmanah pawh MNF hun laiin *Mautam* a thleng tawh bawk a. Hei hi ‘good sign’ a ni lova, term leha MNF bona tur sign a ni, SEDP vang hian.

Hei, Chhim lam atanga kan Minister, Dr. Beichhua demand hi pali lai - No. 7, 29, 34, 41 te a ni a, memberte’n sawi tur leh zawh tur pawh an neil lova, han react e mem tur ama tan pawh a awm lova, a awm chhun pawh ruling lam thusawia react tur a ni mai a. Chuvangin, keima lamah pawh zawhna react tur engmah ka nei lo a ni. Engpawh chu ni ta sela, Animal Husbandry hnuaiiah artui an sem tur hi chu lawmawm ka ti khawp mai, Pu Speaker, MLA zawng zawng aiawhin lawmthu ka sawi a ni. Mahse, chutih rual chuan, amah pawh a khawngaihthlak a, African swine-flu hi a leng a, vawk note tam tak an thi a, ‘compensation pek ni se’ tiin central-ah fund an dil a, engmah chanchin a awm lova, central-in a pawm leh pawm loh pawh hriat a la ni lova, chutiang dinhmunah chuan kan Minister zahawm tak hi a awm a ni a. Chuvangin sawi tur emaw zawhna emaw pawh ka nei vak lova.

Demand No. 29 - Social Welfare-ah zawh tur tlem ka nei a. Tun tuma pitar/putar (old-aged) pension hi a buaithlak khawp mai a, tuman an sawi lova, an laklohna hi a rei lutuk tawh a, a bikin CADC-ah pawh engmah lak a la ni lova. Malsawmna kan dawn laiin tarte harsatna tawn hian rilru a khawih em em a. Chuvangin Pu Speaker, hei tal hi ‘a chhan engnge’ tih kan Minister-in min lo react thei se. Khati zawng kha ka sawi theih ni mai se. Ka lawm e, Pu Speaker.

SPEAKER : I thu ka awih a, ‘umm’ ka ti lo a nia aw. Tunge sawi leh ang le? Pu Nihar i sawi dawn em ni? Hun a liam zel a, tunge sawi dawn le? Awle, Dr. K. Pachhunga.

DR. K. PACHHUNGA : Pu Speaker ka lawm e. Vawiina kan Demand No. 1 -Legislative Assembly hi an entawntlak tak zet a, eng emaw chhut sual neuh neuhte pawh awm ve thei a ni a, nimahsela an sincere a, an biang biak pawh a nuam tak zet a, an chungah lawmthu ka sawi a ni.

Demand No. 14 - Planning & Programme Implementation-ah hian, nichinah khan member zahawm takin Science & Technology a rawn sawi a, tlem a sawi belh pawh ka duh a.

Hei, khawvel hi kan hriat angin engkim mai hi miin chik takin an lo zir a. Kan pi leh pute pawhin thil an lo chik a, damdawi zuar leh doctor an awm hma pawhin kan mamawh hnim hnah atangin damdawi te an hria a. Chutiangin mipakhat thawhrimna vangin vawiin niah electric-eng hnuaiah kan awm a. Tin, miin theihtawpa a zir avangin thlawhna te, motor te an hmuchhuak a, mipui tan malsawmna an thlen a. Tin, kan mamawh damdawi te kan damlohin ‘ramhmul damdawi’ kan tih te ramhnuai hnim hnah atangin damdawi te siam a ni a.

Tichuan, Science hi mahni tawnga zir te an hlawhtling a, Japan te, Korea te, China te, German te leh English te pawh an tawnga science an zir avangin an hrethiama an hlawhtling em em a, khawvela ram-ropuiaah an chhuak a, chutiangin Mizoram-ah pawh a theih chin chin chu Mizo tawnga science thiam hi a pawimawh takzet a. Zirtirtu thiam tam tak an awm laiin, thenkhat erawh chuan a subject *head and tail* hre lo hi kan awm a, chuvang chuan Maths te a lo har a, Chemistry te, Physics te a lo har thin a ni. Tin, khawvel ah ram thang chak tak China kan hria a.

China President hi engineer a ni a, chutiang in Pu Nehru-a pawh kha M. Sc a ni a. Ramhruaitu hi eng subject background pawh ni sela, science and development tarmit a vuah thiam a ngai a. Chutiangin ram hmasawmna thawk turin mitin kan tangkai a, a te ber atanga a lian ber thlengin kan inchuktuah thiam a ngai tak zet a ni.

Tin, hei Mizoram-ah Science and Technology Deptt. kan nei a, nichinah an lo sawi tawh a, tangkai zawka hna an thawh pawh a beiseiawm a. Tin, university leh college-a mithiamte pawhin kan rama thil awm, resource kan neihte ‘engtin nge kan hman tangkai ang’ tih te research an beih pawh a tha a, kan ramngaw chungah hnimhnah tam tak kan nei a. Sikkim-ah pawh pharmacy, damdawi company eng emaw zat a ding thei a, ‘Mizoram-ah pawh a ding ve thei a ni’ tih te pawh kan ngaihtuah a ngai a.

Khawvela ram hausu kan tih te, petrol leh lungalhthei nei te an ni a, nimahsela, kan ram hausakna chu *ramngaw* a ni a. Kan ramngaw hausakna thing leh maute leh

hnimhnah damdawite ‘hot-spot’ Northeast-ah kan ni a. Chuvang chuan, kan mithiamte pawh a theoretical lo deuhin mipuite tangkai nan pawh a research kan tih hi a tha hlein ka hria a. Entirnan: Kan maute pawh hi animal feeds, ‘bawng-chaw leh vawk-chaw ah te a hman theih em’ tih te, ‘research topic tlak a ni’ tih te kha ka sawi tel duh a.

Demand No. 32 - Horticulture hi kan hriat angin kan CM department a ni a. Thawktute, kan Horticulture Officer leh staff tlem mah se an dedicated a, theih tawkin hna an thawk a, field-works pawh an ti tha a. Tin, kan production dragon fruit kan tih te, thlai leh thei ah te nasa takin hma a sawn a. Covid lockdown avanga harsatna kan tawha, kan thenawm cachar lamin highway te an tihpun pawhin eitur nei lo ni lovin hnianghnar takin kan awm thei a. Hengah te pawh hian kan production hi ‘nasa takin a thang a ni’ tih pawh hi mipuiin kan hriat a tha a. Hengte hi department leh mipuite thangharha, ‘an taimakna a ni’ tih kha ka sawi duh a.

Tin, Demand No. 45 - Public Works ah kal ila. Kan hriat angin, harsatna karah he sorkar hi a tlalut a, kan hre vek a. Nimahsela, kan CM-in mipuite mamawh chhanna, ei leh bar engkim kan phurh leh kan kalna kalkawng te, a bikin Lunglei leh Aizawl te pawh a lo tha ta a. Hmun tinah kawngpui tihzauh te leh siamthatna hna nasa takin an thawk a, hei hi chu zep rual lovin a tha kan ti tlangin ka hria a. Kan thiante pawhin ‘MNF an sorkar hi chuan kawngpui hi chu a tha a ni’ tih te an sawi thin a ni. Chutih lai chuan kawng zawng zawng erawh chu a tha famkim thei lova, theihtawpin sorkar-in hma a la te hi a lawmawm tak zet a ni.

Tin, Demand No. 7 - Excise & Narcotics Deptt lamah kal leh ila. Kan hriat angin kan ram hi a location a tha lova, chhak lamah Myanmar nen km 510 laiin border kan share a, rawn luhna kawngka a tam em em a, ven sen pawh a ni lova. Khawthlang lamah Bangladesh nen thui tak kan in ri bawk a. Tin, khawchhak ram lam atangin engkim a tha leh chhia a rawn chhuak a, drugs chi hrang hrang kan ramah rawn lutin India khawpui hrang hrangah te a kal a, han indem em em theih pawh a ni lova. Khawthlang, kohhran leh YMA hruaitute nen pawh theihtawpin kan tangkawp a, drugs supply te pawh kan ti rem hleithei lova. Khawpuiiah chauh drugs hi a awm lova, ka bial thingtlangah te pawh, hmuntin ah a lo lut a, hrehawm kan ti a. Tin, mihring nun a tihchhiat dan pawh kan hria a.

A bikin Tawihpui tlangdungah drugs addict emaw, rukru emaw YMA-in an manin a phurna a awm lova, Lunglei Excise te kan han phone thin a, ‘misual an mante phurhna a awm lova, lo dah ta che u’ an ti thin a, YMA te tan khatiang an man te Lunglei-a han dah zel kha a harsa a, hmanni bial ka fan pawhin YMA-in an sawi a ni, an harsatpui ziate. Chuvang chuan, YMA leh Kohhran-te nen tang tlang leh ila. SRS, ‘Supply Reduction Scheme’ kan tih te pawh hi kalpui leh a ngai a. Kan ram hi

ruiththeihah kan fihlimloh chuan eng ang pawhin develop mah ila, *hnam-boral* kan ni thei a ni.

Demand No. 34 - AH & Veterinary Deppt-ah kal leh ila. Kan hria a, sa kan duh em em a. Bawngsa hi a to viau tawh a, tui pawh kan ti a, mahse bawng vulh hi kan intihhmuh lo angreng khawp mai a. Mizote hi ar leh vawk hi chu ‘vulh rawh’ tih ngai lovin kan vulh mai a, leipui pawh ‘nei rawh’ tih ngai lovin kan nei mai a, kan traditional practice a ni a. Bawng leh sial te kan sorkar-in SEDP atang tein vulh tir tuma project kan nei te pawh hi hmalam kan pan a, a lawmawm ka ti a.

Tin, SEDP-ah ar leh vawk vulhna te min pein, kan bialah pawh kan kalpui tan a. Nimahsela, kan hriat angin African Swine Flu te pawh Mizoram sorkar-in dan a tum ngar ngar a, kan vety depts. lam te pawh theihtawpin an tang a, Champhai leh Assam lam border-ah te theihtawpin tan an khawh a. He ASF hi tunhnaia awm thar a ni lova, kum eng emaw zat khawvelah lo leng kual tawhin, kan ram pawh a lo thleng a, mahse chanloh khanah Lungsen, Bangladesh lam atangin a lolut nia hriat a ni a. Ka bialah pawh mi eng emaw zatin vawk 20 te, 30 te an chan a, kan tawrhpuoi takzet a. Sorkar-in theihtawp a chhuah a SEDP atang tein, vawk te pawh kan vulh leh thei turah ka ngai a.

A tawp berna atan Pu Speaker, Demand No. 41 - Sericulture-ah hian lut ila. Sericulture hi kan hriat angin pangang vulh lam a ni a. Han intihluih theih pawh a ni lova, pangangte hi a thenin kan hlau a. Nimahsela, khawvela thawmhnao manto, ‘saree manto’ kan tih te hi *Muga silk* atanga siam te a ni a, a nuai tel a ni a. Mi hausate hak thin chu silk kawr te a ni a. Tin, bamboo shirt leh fabric te a ni bawka a. Sericulture lamah pawh Mizoram-in hma kan sawn ve zel a. (Pu Speaker, ka zo tep) SEDP hnuaiyah ka bialah te pawh kan kalpui a, hmasawmna a awm zel turah ngai ila.

Tichuan, Pu Speaker, kan CM zahawm tak Demand-te leh Minister Dr. K. Beichhua Demand-te hi tha ka tiin ka supoport a, ‘pass ngei nise’ tih kha ka sawi theih a ni e. Ka lawm e.

SPEAKER : Tunge ding leh dawn? Member zahawm tak Pu Nihar Kanti Chakma.

PU NIHAR KANTI CHAKMA: Pu Speaker, ka lawm e. Pu Speaker, i hriat tawh angin Assembly hi kuminah *Golden Jubilee* nangma kaihhraina hnuaiyah kan hmang chho dawn a, a lawmawm ka ti hle mai. Vawiiin hian chibai buk pahin, MLA ni tawh zawng zawngte leh Mizoram mipuite chungah a hmasain zahna ka lan tir a.

Awle, Pu Speaker, a hmasa berah chuan Demand No. 15 - General Administration Deptt. chungchanga ka sawi duh chu, Mizoram House hrang hrang leh Circuit House hrang hrang enkawltu department a ni a. Hei, keini chu chhim lam bialtu kan ni a, eng emaw thilahah Lunglei-ah te riah loh theihloh a ni a. Lunglei Circuit House hi a chhe nual tawh a, renovate emaw, sak emaw a hun tawh a ni. A inchung rawngte a khawk nasa a, a chhe nasa tawh a ni. Chuvangin, Pu Speaker, Minister zahawm tak hi sincere se ka duh khawp mai a.

Khami ruala ka sawi duh chu, ka bial context-ah kumtin kum 18 tling te electoral roll-a thun tur hi dan angin Form 6-ah an thehlut thin a. Mahse a roll hi a vaiin an thawn ngai lova, kha kha pawl ka ti hle mai a, hei hi engnge a chhan, India mi leh tui diktak an ni a, democracy-ah kan awm ve a ni. Engvang nge, Birth Certificate an nei vek a, nu leh pa pawh an nei vek a, engkim an neih hnuah dan anga ziakin form 6 hmangin an thehlut thin a. Mahse, an thun ngai lo thin hi engnge a chhan ka hre duh a. Entirnan, Pu Speaker, i phalnaa ka sawi duh chu - Ka bial chhungah Sojita Chakma, a pa hi Kandor Singh, Electoral roll no. pawh a nei vek a, 0076285 a ni a. Vawi eng emaw zat dilna a thehlut a, tunthlengin electoral roll-ah a hming hi a lang lova, a pawl ka ti hle mai. GAD Department hnuiah election hi a awm avangin hei hi ka sawi lang a ni.

Chumi rualin Pu Speaker, Tlabung hi a kum 150-na lawmnaah kan Chief Guest nangmah ngei hian helicopter Tlabung-ah a service tur thu i puang anih kha; a lawmawm ka ti khawp mai a. December thla atangin helicopter hi Tlabung-ah a service chho ta a, a lawmawm ka ti a. Chuvangin, Tlabung bialtu ka nihna angin Chief Minister hnenah leh nangma hnenah pawh lawmthu ka sawi a ni.

Demand No. 45 - Public Works Department-a ka sawi duh chu - Kan lifeline, National Highway-30 (Lunglei - Tlabung) siam hna hi a chak hle a, an lai zung zung mai a, nakuma zo turin kan beisei a, a lawmawm ka ti khawp mai. Chumi rualin, ka bial chhungah PMGSY hnuiah kawng an lai nasa a, a lawmawm hle rualin, Tlabung ral lehlamah sawn Leilawn a awmluh chuan he PMGSY kawng hi a hman tangkai theih dawn lo a ni. Chuvangin, PMGSY road-ah hian leilawn siam hi a tel nge tello tih kha kan CM zahawm takin min react thei se ka duh khawp mai. A tel chuan Diplibagh - Chengkawl Lui-ah leilawn 2 lai siam a ngai a. Tin, tunah hian Khawthlang Tuipui-ah pawh leilawn kan la nei lo a ni. Leilawn neihloh chuan Mauzam - Phunkai leh kan veng, Tlabung - Mansuri a awm bawk a, leilawn a awm loh chuan tui a kai theih dawn lova, awmzia a nei dawn lo a ni. Kha kha min lo chhinchhiah sak se ka duh khawp mai. Chu chu Public Works Department a ka sawi theih ni se.

A dawt lehah chuan, Demand No. 34 - Animal Husbandry & Veterinary Department-ah hian, Pu Speaker, Mizoram pumpuiah a bikin thingtlang lam mi, ran

vulha ei zawngtute an tam em em a. Mahse, a bikin vawk vulhtute hian vanduaina African Swine Flu avangin Mizoram hmun hrang hrangah harsatna kan tawk a, vawk hi an thi nasa a ni. Mahse zangnadawmna hi tun thlengin a lak theihloh a, Minister zahawm tak hian eng emaw zat hi compensate thei se chu kan duh khawp mai, kan eizawmna ber a chhia a ni.

Tin, Excise & Narcotics Department hi a te naa, a hnathawh hi a ropui a. Nitin news-ah kan hmu thin a, hmun hrang hrangah heroin leh drugs man chungchang kan chhiar thin a. Amaherawhchu, he department hian manpower tamzawk a mamawh a, manpower awmluh avangin a department hian a tuar a, duh ang hian a thawk thei lova, chu chu sawi lan ka duh a.

Demand No. 9 - Finance Department-a sawi ka duh chu, pensioner-te hian hun takah pension hi an dawng ngai lova, a paw ka ti hle mai. Ka bial chung middle school-a Grade-IV pension hamthatna dawng lovin a boral a, a paw ka ti hle a ni. Pu Speaker, churangin pensioner-te an pension velah hamthatna an dawn theih zawng zawng pek thei ni se ka duh khawp mai.

Awle, Pu Speaker, khati zawng kha ka sawi theih ni se. Ka lawm e.

SPEAKER : Tunge sawi leh ang? Member zahawm tak Pu Lawmawma Tochwawng aw.

PU LAWMAWMA TOCHHAWNG: Pu Speaker, sawi tur a tam a, kan kan sawi vek hman dawn silova. A hmasa in Demand No. 45 - PWD chungchang han sawi ila.

Covid hripui hnuaiyah pawh PWD hian Zoram hmun tinah vung an chhuah a, in an sa a, kawngpui an sial a, leipui an dawh a, ram rohlute zinga a langsar pakhat an ni. An tihsual palh emaw, thawktu inthlahdah hlek an awm pawhin an langsar hma hle. He House-ah PWD chung changah nichin lawkah pawh kan House Leader hnen atanga kan ngaihthlak tawh thil pakhat kha, tender chhannaah hian inchhan hniam siak kan uar ta a, hniamte, work-quality awmlu lutuk, hemi tihbo nan hian inkaihruaina rate pawm chin, contractor ten an chhanna a a rate pawm chin, khatiang te kha a awm em, neih a ni em aw tih te hi ngaihtuahnaah a awm a. Neih a nihloh chuan siam a tha awm mang e. Tichuan, kan ramah hian contractor te leh hnathawktu ten mumal takin, tha takin rate bithliah nein hna an thawk thei ang a, ‘a hniam ber pek tur’ tih ringawt hian min tichhia em le tih te pawh kha ngaihtuahna leh zawhna lianpui awm thei a ni.

Ram pumpui sawi tur awm teuh laiin kan district lamah sawi tur a awm nual a, lawmthu sawina tur pawh kan nei a ni, he session chungchang hian. Lunglei khawpui

chhung kawngpui saw tunah sawn a tha tawh lo hle mai a. Lunglei khawpui, Mizoram khawpui pahnihna hmel lanna ber pakhat a ni ve bawk si a, chuvang chuan, ‘kan Chief Minister zahawm tak PWD changtu ni bawk hian black-topping emaw, resurfacing emaw min siam sak leh thei ang em aw’ tih kha inthlahrung tak chungin kan han sawi leh dek dek a ni.

Tui pump khawl panna Pialthleng approach road leh Khawivah Electric Power Station panna min siam sak dawn tih kan Dy. Chief Minister zahawm tak, PHE Department changtu ni bawk leh Power & Electricity Minister zahawm tak te pahnih hnen atang khan kan ngaithla tawh a, kan lawm tak zet zet a, kut kan beng a ni. Tin, Lunglei by-pass road sawi nawn leh fo thin a tul a, hun rei tak atanga lo ruahman tawh, bul tan tawh bawk a ni a, saw saw tihputlin ni thei se kan duh mai ni lovin, a mamawhin kan mamawh tawh a ni. Khawngaih takin min hriatsak thei sela kan duh khawp mai.

Kan sawi ve fo tawh pakhat thilthar deuh Lunglei chhuahlam eastern side by-pass road pawh saw a theih dan ang angin bul tan hram nisela a lawmawm ngawt ang. Tin, nichinah khan kan MLA zawhawm takin a sawi a, Lunglei Circuit House saw ruahmanna min siam thar sak sela kan duh tak meuh meuh a ni. A khaw mite kan thleng ngai lova, amaherawhchu hmun dang atanga lo kal kan miliante leh ram pawn atanga lo kalte pawh an thlenna hmun a ni a. Lunglei hmel lanna, Mizoram hmel lanna, kan hmel chhiat leh kan hmelthat lanna a ni a, siamthar, sak that, sakthar a ngai tawh tak zet zet a ni.

Pu Speaker, Demand No. 15 – GAD-ah hian thildang tam tak sawitur a awm a. Amaherawh chu thil pakhat chauh ka han sawi duh chu - India ram khawpui hrang hranga kan House neih te, a bikin Delhi Mizoram House te khu a theih ang anga thumthara, cheithata, electric lam leh tuikhawihna te, air-conditioner te khu mumal taka hnatawk thei tura enfel a duhawm hle a ni. Khua a lum leh dawn a, damlo an awm a, mi hrang hrangte thlenkhawmna a ni bawk si a. Khu khu kan ram pumpui hmel lanna a ni tel a, chuvangin ngaihsak thar leh zual a ngai hlein ka hria.

Social Welfare Department-ah hian lo kal leh lawk ila. Social Welfare Department hi ‘huapzo-department’ a ni a, Naute a pian hma atanga thlan a luh thlenga enkawltu, vantlang that tlanna tura kan taksa leh rilru putziate siamthaa, siam dika, nunhona tlak ni tura ram leh mipuite buatsaihtu department a ni a, an huam a zau hle mai. Tin, hmeichhe dinhmun, naupang leh tarte ngaihsaka, thalaite kawng thalo atanga chhanchhuaha, mitangkai ni tura chherchhuah te, taksa leh rilru lama tih hrisel te an hma mek a ni. Chutih lai chuan politician-te kan dinhmun tha zawk leh zahawm zawka rorelna kalpui anih theih nan te pawh hian hma min rawn lakpui ta sela, ‘a tha awm mang e aw’ tih ngaihtuahnaah a awm a ni.

Pu Speaker, thudik ziktluak lo leh fiahna tak awm chiah silo, chutiang vel chawhpawlha mipui fah te, mahni politician puite *Archuk tui lova* lantir tuma thiamthu sawi vak vakte hian a sawhkhawk an tuar tlang vek a ni, politician zawng zawngin. Ram mipuite hian mizopa tumah an rinloh phah a, mizopa leh mizopa kan inrintawn tawhloh vek chuan rahtha hmuh tur a awm lovang. Politician-in a politician puite nuiza siam nan a hmana a endawng hle hian ama zahawmna ngei pawh thui tak a thaichhe thin a ni. Chubakah kan insawichhiat bawi bawi hian miten min zuam a, rorel khawl zahawmna kan ti bawrhbang a, kan zavai hian kan tuar tlang leh tho si a, *mahni lu chungga meiling chhekkhawl ang* chauh kan ni. Heng thilah te pawh Social Welfare Department taksa leh rilru lam a mi zawng zawng huapa hnathawk mek tute hian kan thatlanna tura zirtir, kawhhmuh leh kaihruai thin an nihnaah hian, an ni hian Legislator-te, Political Party Leader-te political training min pein kawng dikah te pawh hian min kaihruai turin hma la ta sela kan tangkaipui phian awm mang e aw ka ti, hun lo la kal leh zel turah leh kan House Session, tuna kan neih mekah pawh hian.

Pu Speaker, Excise & Narcotic - Demand No. 7 ah han kal leh lawk ang e. He department hnathawh hi kawng hniha thliar theihin a lang a, ram hian kawng hnihin a hlawkpui niin a lang –

Pakhatnaah chuan - Mizoram sum bawmah hian cheng nuai 81,45,975/- Ni 31.12.21 thleng khan an chhunglut tawh a, Sorkar sum hnar pawimawh tak te zinga mi an lo ni a.

A Pahnihnaah chuan - Ram tana kan tangkaipui lehna chu, Mizo thalai tam tak nunna an humhim hi a ni. MNF Sorkar pian hma zuchhe in vanga zu zawrh lai khan thalai leh venghimtu sipai leh police sang tel teh meuh kha vui liam an ni hman a. A dik tak chuan he kan Covid hrichhia ai hian zu khan min suat hnem zawk fe a ni. Kan CM zahawm takin ‘tangka ai chuan nunna a hlu zawk’ tih hriain zu khapna Dan min hmanpui ta a. Kar tin veng hrang hranga thalai vuiliam pawh a khat ta pharh mai, Zuhkapna Dan kengkawhtu Excise & Narcotic te hah tak leh hlauhawm pawh pawisa lova an thawhrim rah kan seng mek a ni. Fing thiam taka an chet thin avanga ruihhlo an man leh teuh thin hi thil lawmawm ni hauh lo, lawmawm bawk si, ‘paradoxist’ an tihte zinga mi niin a lang. A chhan chu, manlo ta sela heng ruihhlo te hi engzat takin thih phah ang i maw, chhungkaw engzat tak hi buai leh ang i maw tih kha zawhna awm thei a ni. Chutiang taka hnathawktu Excise and Narcotic kan nei a, kan Minister hovin rim takin zan pawh sawi lovin, ramhnuai pawh sawi lovin, veng thlabirh pawh sawi lovin an thawk mek a ni. Amaherawhchu, nichina kan ngaihthlak tak ang khan ram tana an tangkai teh lul nen thawktu an tlem lulai deuh a, a tangkai tur tak ang pawhin an tangkaiin an thawk theilo a ni a, hmanraw tha zawk a thuum belh pawh an mamawh tak zetin ka hria.

A tawp nan, Animal Husbandry & Veterinary-ah hian. Anni hi department hlun leh tangkai, tunhma atanga department tangkai an ni a. Ranvulhtute inngahna ber an ni a, mipui ten sa thianglim kan ei theihna tura an beihna te, kan intodelhna tur atana an tih fat fat te hi an fakawm a. Mahse heng hnate hi anmahni chauha tih theih a ni lova, mipui nena thawh hona atanga tih chi a ni a, chuvangin, mipuite pawhin an remruatna te, an kaihhraina te zawm hram hram hi kan tihmakmawh a ni e.

Ram pum huapa an hnathawhte hre phak vek lo mah ilangin, Lunglei-a an hmachhawp leh an ruahmannate saw a hmuhdawm tham a, artui tum khata sangnga keu theihna tur khawlpui din a hawn a ni ta te saw, Lunglei lam chauh nilovin chhim bial pumpui tan a hlu hle dawn a ni. Ran vulhtute tana tangkai em em tur Vety Hospital sak zawh a ni tawh a, Lunglei ah sawn, a lawmawm khawp mai, kan tangkaipui hle ang tih kan ring a. Vawk leh Kel vulh hi 'uar zawka kalpui ni ta se' tih ngaihtuahna a awm a. Hei hi kan hmasawna tur ber zinga pakhat, Mizo-in kan duh em em bawk si a ni. Kan Minister zahawm takin (thil la awm ngai lo a ni hial awm e) vawk pul hri tuarte tana compensation tur a han sawichhuak te kha thil lawmawm tak a ni a, a tak ram a thlen thuai theih beisei a ni. Pu Speaker ka lawm e.

SPEAKER : Member zahawm tak Pu Lalrinsanga Ralte i lo sawm ang.

PU LALRINSANGA RALTE: Pu Speaker ka lawm e. Hei, vawiinah kan Minister zahawm tak te, kan Chief Minister zahawm tak te Demand sawiho leh theihna hun kan nei hi a lawmawm hle mai a, vawiinah hian department ngaihpawimawh tak tak leh sawi chak tak tak pawh a tamin ka ring a, amaherawhchu kan hun neih danah hian kan sawi vek seng dawn si lova.

Demand No. 29 - Social Welfare Department hi han sawi ka duh a. A department chungah te, a changtu kan minister chungah te lawmthu sawi tur kan ngah hlein ka hria a. Sorkar hmasaah khan EMRS, 'Eklavya School Central School' kan tih kha 6 chiah sorkar lokal tawhah khan Mizoram hian kan hmuin ka hria a, tun kan sorkar chung hian kan minister te thahnemngaihna te, taimakna te avangin tunah hian 11 kan hmu ta a, a lawmawm hlein ka hria a. A hmaa 6 nen, tunah hian 17 kan nei ta niin ka hria a. Tin, kei pawh hi ka bialah Eklavya hi min dah sak ve a, Bilkhawthlir-ah an sa mup mup mai a, tun kum te hi chuan sak zawh hman kan inbeisei viau a, hei hi kan lawm tak zet a. Thingtlang 'zirna tha thlen phaklohna' kan tih thinah pawh school tha kan nei dawn ta hi a lawmawm tak a.

Tin, 'Anganwadi' kan tih, ram tawh tak tak te min han chei that sak a, kan lawm tak zet a, ruihhlo ngai enkawlina Jordan Center kan House Leader-in a ngaihpawimawh

em em kan Minister-in a han kalpui te hi a ropui ka ti a. Tunah khuan kan bial kalkawng a ni a, kan chawl ve fo a, khutianga an function tha leh te khu a ropui ka ti a. Ruihhlo ngaite enkawlna hmun tha tak a ni a, ‘an nunkawng siampuina hmun tura hmun pawimawh tak a ni’ tih kha ka han sawi duh a.

Tin, Article 275 atanga hian project Mizoram tana hmasawwna tam tak an lo pawt lut tawh a, a lawmawm hlein ka hria a. Kan Minister-in min lo hriat sak se ka duh chu, Article 275-ah hian project kan thehlut tawh a, amaherawhchu, kum hmasa lamah te khan central lamin ‘project thar siamloh tur’ a tih avang kha niin ka hria a. Hei hi a kaltlang lova, tih leh theih te anih chuan Bilkhawthlir-ah khuan ‘Inter-State Cultural Centre’ tiin kan thehlut a, hei hi min ngaih pawimawh sak se a tha awm e.

Demand No. 34 - AH & Vety-ah hian Bilkhawthlir-a RAHC kan neih te Dispensary-a min hlankai sak avangin lawmthu kan sawi .a Doctor indaihlo chungin Bairabi doctor-in min rawn hmui thei a, ‘kan lawm takzet a ni’ tih kan sawi duh bawk a. Tin, ‘Licence in Regulation of Private Ltd. & Veterinary Hospital and Clinic Act, 2021’, India rama hmasa ber tur kan han nei te hi a lawmawmin ka hria a, a ropui takzet a. Hetianga ngaihtuahna sengtu sorkar leh a changtu minister chungah hian lawmthu ka sawi duh a ni.

Tin, Demand No. 7 - Excise & Narcotics Department hi tawitea han sawi ka duh chu, kan hre theuh a Pu Speaker, Sorkar hmasaah zu an zuar a, kan zu-zawrh avangin hmeithai leh fahrah tam tak kan ram in kan neih belh phah a ni. Kan han sorkar a, kan Chief Minister zahawm tak hian zu chhiah it avanga sorkar kalpui lova, “Pathian leh kan ram tan titu zawk kan nih avangin, he zu chhiah sum hi it lovin ram i kaihruai ang u; hmeithai leh fahrah siamtu he zu hi kan rama Dan anga zawrh hi a tha lo e” tiin thutiam an lak tlai niin ka hria a, (a tuk zawk nge) tah khan zu zawrh an han ti tawp nghal a, a lawmawm hlein ka hria. Pathian-in kan ram mal min sawm a, kan ram hruaitute inpekna te mal a sawm a, zu chhiah tel lovin vawiinni thleng hian kan ram min kaihruai thei hi a lawmawm ka ti tak zet a ni.

Tin, Demand No. 1 - Legislative Assembly hi sawi kai ka duh a. Pu Speaker, Assembly staff-te an thawkrim thin hle mai a, session lai pheichuan an hah tak zet a, tlaivar ten hna an thawk thin a, a ropui ka ti a. Tin, Assembly Sectt. a kan official-te kan officer-te an efficient-in sorkar hnathawk dangte entawn tlak hian an awmin ka hria a. Kan inkaihhraina te, kan hnathawhah te ka sawi fo thin a. Assembly Committee-ah pawh hian ka sawi fo thin a, sorkar hnathawk dang department dangte hian training nei se, ‘kan Assembly Sectt. te anga efficient thei tur hian zirtirna pek a tha mang e aw’ tih hi ka sawi fo thin a. Pu Speaker, i kaihhrainain he Assembly hi vawinah pawh tluang

takin kan han hmang chho leh a. Tin, kan Assembly Secretariat te pawh theihtawpa hma laa hmasawn zel thei turin duhsakna ka hlan a ni.

Tin, Demand No. 32 - Horticulture Department hi han sawi leh ka duh a. Department hmalakna hi a fakawm hlein ka hria a. A bik takin ka bialah khuan kan lawm takzet a, mau hi Thingthelh-ah khuan Horticulture Department hmalaknain min chin tir a, chhungkaw 63-in tunah khuan an buaipui a, ‘kan lawm takzet a ni’ tih ka sawi duh a. Heng mau chingtute hi a tiak kan pek bakah sum leh pai nen tin, an mamawh tur tanky te, tui pipe te an rawn pe a kan hlawhtlin pui ngei kan ring a, a khua ang pawhin lawmthu kan sawi duh a. Chutihrual chuan ka bial Thingthelh, Hlimen leh Saipum te khu ‘Mizoram-ah hei aia mau chinna tha hi a awm bik lovang’ tih tur khawpin a hmun hma a ni emaw, a boruak emawin a zir khawp mai a, churang chuan kan House Leader Horticulture changtuin min hriat saka tana ka duh chu, North Hlimen leh Saipum-ah te khuan a compact anga chin leh hi kan duh a, ruahmanna min siam sak theih chuan a lawmawm khawp ang tih kha ka han sawi duh bawk a ni.

Tin, Demand No. 9 - Finance Department hi han sawi leh ka duh a. A lawmawm hlein ka hria a, kan Chief Minister, Finance changtu ni bawkin ruahmanna, ngaihtuahna tam tak sengin kan ram tana tha ber turin ruahmanna, sum leh pai enkawlah a ngaihtuahna zawng zawng a sengin ka hria a. Kum hnih chhung covid-in min tibuai a, ramri nen, lirnghing nen, buaina namen lo kan tawk a ni. Kan ramin chuti chung chuan ka ngaihtuah thin a, Finance Minister hi ni ve ta ila, lu a hai duh ngawt in ka ring. Amaherawhchu, chung harsatna zawng zawng chu Pathian ring chungin, Pathian-in finna a pe niin ka hria, harsa tak chung pawhin wawiinni hi min kaihruai thleng thei a, hetiang a sum enkawl thiam Finance Minister kan nei hi lawmawm ka ti tak zet a ni.

Pu Speaker, kan sawi thin a, i veilam a miten, “budget kan han en thin a, Finance Minister-in a chang veka lawm; department-ah a dah lo; sorkar hnathawk hlawh tur bak a dah lo...” an ti thin. Kei ka lo ngaih ve danah chuan, hun hmasa lama an lo tih dan thalo kha kan Finance Minister hian a hriat avangin vawiinah chuan a tih dan tharin, a khawnpui atangin a tul ang zelin kan ministerte a sem chho hi a tha in ka hria a. MLA rualte pawh hian kan bial chhungah SEDP atangin emaw, eng scheme atang pawhin kan Finance Minister hian hmasawna pawisa min pe thin a, a lawmawm tak zet in ka hria. Hetiang a sum enkawl thiam finance minister-a kan nei hi a lawmawm tak zet in ka hria.

Kan ramri chungchangah Covid len nasat hun lai takin harsatna namenlo kan tawk a, sorkar sum pawh a indaihloh nasat ziate pawh kan hria a. Chumi chung chuan ramriah harsatna a lo thlen avangin tih tur tam tak a lo awm a, sum tam tak a lo ngai a. Kan Chief Minister zahawm tak, Finance changtu ni bawkin kan han bia a, “Ram leh

hnam tan anih phawt chuan, kan neih ang ang hi kan tichhuak tur alawm, kan ui tur a ni lo” tiin ruahmanna min siamsak zel a, chuvang chuan tun hun hi kan thleng thei a ni.

Chulaia ka lawmna em em ka sawi lan duh chu - 2010 bawr vel khan Saihapui-V leh Buarchep-ah khuan Assam hovin sikul an sa a, an rawn chei tha a. Buai kan hlauh thin avangin sorkar kal ta ten kan ngawih ral pui mai mai, kan ram chhunga Assam sikul, Assam sorkar enkawlah khan vanduaithlak takin bomb a puak a, chuvang chuan chei that a ngai a. Kan Chief Minister, Finance changtu ni bawk hi kan hrilh-hre vat a, a zan la lain Education Minister zahawm tak Pu Chhantea’n file a kaltir nghal a, kan Chief Minister zahawm takin a zan la lain min approve sak a, kan chei tha nghal vek a. Vawiinah chuan Mizo sikul-ah kan let tawh a, a thawktu Assam sorkar-in a dah thin pawh kha Mizo zirtirtu kan dah ta a ni. Kawng pawimawh tam tak min laihsak a, electric supply min thlun sak a. Hetiang sum harsatna kara kan Finance Minister zahawm takin ramri a ngai pawimawh hi kan lawm tak zet a ni tih kha ka han sawi duh a. (Pu Speaker, hun a laklawh a, chawlh mai ai chuan a uiawm angreng si a. I remtihna ka han hmang tlang law law mai ang a.) Kan Finance Minister-in theihtawp chhuaha ruahmanna te a han nei a, vawiinah chuan ramriah hmasawna tam tak kan han hmu ta te hi a lawmawm hlein ka hria a. Kan ramri venna tur te, hmasawna tur te, ramri dep khua a hmasawna a thlen ve theihna tur, sum neilo chung chunga kan Finance Minister-in ruahmanna min siam sak thin hi kan lawm tak zet a ni tih kha ka han sawi duh bawk a ni.

A tawp berah chuan lawmthu sawina hlang ka sawi dawn a. PWD-ah hian engmah dil ka tum lova. PWD lama hma min laksak nasat avangin lawmthu kan sawi duh a.

Kan official-te pawhin PWD-IB hi, ‘kum 20 chhung vel kan sa tawh mang si lo a’ tih khawpin an han sawi a. Amaherawhchu, ka bial min duhsak avangin kan Chief Minister, kan Finance enkawltu leh PWD changtu chungah kan lawm tak zet a. Bilkhawthlir-ah PWD-IB cheng nuai 400 chuvingin kan han sa ve a. Tin, Buarchep kawng PCC flooring km eng emaw zat kan han siam thei a. Tin, ramri chungchang a ngaih pawimawhna ka han sawi lang leh duh bawk a. Buarchep te, Saihapui-V te ruah vawi khat a tlaka motor pawh kal hlei theilo kha vawiinah chuan kan hotupain ruahmann min siamsakin PCC flooring-in kan ti ta vek a. Saihapui-V phei chu a khaw chhung internal road meter 750 khu PCC flooring min tihsak a ni. Tin, Bilkhawthlir-ah ‘second-lane’ kan tih 1971 vela an lo laih tlang tawh, khawih tawhloh kha tunah hian min han chei that sak vek a, kan lawm tak zet a. Dawr Veng atanga Chemphai kawng te PCC min tihsak zel a.

Tin, lawmawm deuh ka han sawi leh duh chu, National Highway-306A Phainuam - Zero Point, Saipum inkar kawng siamna tur hi sorkar hmasa pawh khan

DPR te thehlutin Highway-ah pawisa an lo dil thin tawh a. Khulai khu tifuh hleithei lovin, an lo ti sual a. Kan Chief Minister zahawm tak PWD changtuin ruahmanna min han siampuiin, nikum khan kan han hmu ta a, hei hi cheng nuai 5,000 chuang a ni a. Hei hi a pawimawhna em em chu, Baga-balu khu to deuh deuhin kan la thin a... (**Speaker:** Kan hun pangngai a tawp a. A thaw a laklawh em mai, sawi zawhtir lawk mai ang aw.) A pawimawh em a ni, Pu Speaker. Hei hi kan ram hnuk tak tak a ni dawn a. Chuvang chuan kawi li/kawi nga law a Baga-balu tha tak anga kan sawia kan lakchhuah hi, he kawng kan siamchhoh hi chuan Serlui lei bulah khuan balu kan lo la ang a, kan rep ve thei tawh dawn a ni. Chuvangin, hei hi 'kan ram sorkar leh kan mipuite sum dinhmun siamtu tur a ni' tih kha ka han sawi duh a.

Pu Speaker, vawiina kan Minister zahawm tak Pu Beichhua leh kan Chief Minister zahawm tak Pu Zoramthanga Demand te hi tha ka ti a, ka rawn support a ni e. Ka lawm e.

SPEAKER : Aw le, kan chawl rih ang a, dar 2-ah kan lut leh dawn nia.

2:00 PM

SPEAKER : Awle, Pu VL Zaithanzama, kan sawm e.

PU V.L. ZAITHANZAMA: Pu Speaker, ka lawm e. Vawiinah kan Minister zahawm tak tak pahnihte demand kan sawi ho dawn a. A hmasa in demand No. 29 - Social Welfare-ah hian Aganwadi ringawt pawh hi Zoram tan thil hlu tak a ni. Naupang leh kuttualleichham te tan an tangkai em em a, ruihlo tuarte tan thlengin nu leh pa chan an chang a ni. Nikum ai khan ka chhut sual loh chuan 8518 lakhs in budget a tlem a salary ah nikum aiin a tlem bawk a ni.

Zawhna pakhat ka han zawt duh a. Nimin *Starred Question* chhanna pakhatah khan, 'Old-age pension, March 2021 thleng pek tawh a ni' tih kha kan hmu a, kum khat zet pension an la tawh lo a ni. An nghakhlel em em mai a, hemi chung hian min boral san te an awm ang tih a hlauhawm em em a ni. Chuvangin, 'engtikah nge kan pek ang' tih kha kan zawt nghal bawk a ni.

Demand No. 34 – AH & Veterinary hi department pawimawh tak a ni a. Kan hre vek a, African Swine-fever avangin vawk tam tak a thi a, hei hian an pawimawhna a tizual a. Chutihlaiin an budget hi kuminah a tlahniam leh a, pek belh atan a itawm em em a ni. Amaherawhchu, SEDP atang te la hmuh belh ve leh tura ngai ila, a hma pawhin SEDP pilot project atan November, 2020 khan chungkaw 220 vawk-vulhtute hnenah

sum pek an ni tawh a, ‘heng an sum pek hmanga vawk-vulhtute hi ASF-ah khan an him em’ tih ka han zawt duh a ni.

Kum 2021-a Veterinary doctor zir zote khan internship an zo tawh a, tunah hian post-graduate zir turin an lut leh tawh a. Khang ho khan internship lawmman (January - December) an la dawng lova, heng hi “pek theih an ni tawh em, suma harsa tak takte an ni a, an nghakhlel hle a ni” tih kha kan zawt tel bawk a. Tin, Ran-talhna hmun Mualpui leh Bawngkawn Brigade-a awmte kan hmang tangkai em em mai a, chutih laiin Lunglei, Champhai, Serchhip te (a hmun a hlat deuh vang nge ni) kan hmang tangkai vak lova, hei hi ‘engtia hman tangkai tur nge’ tih ka han zawt bawk a ni.

Demand No. 32 - Horticulture *Supplementary Demand*-ah khan central sum 350 lakhs chauh a ni a, 1,785 lakhs dil belh a ni a, heta tanga 7,970 lakhs hi NABARD atanga lak belh a ni. NABARD sum hmanga an thawh tur zingah khan Warehouse Collective Center sak tur hi “khawi hmunah nge sak an tuma, hna tan a ni tawh em” tih kha min chhan theih chuan ka lawm hle ang.

Tichuan, Horticulture Department ah hian Dragon-fruit hi a tir khan SEDP-ah a tel lova, mahse ngenna avang khan kan Chief Minister zahawm tak khan a telh leh ta kha a ni a. Nimin *Starred Question No. 138*-ah khan, Tuiripuk Zau atangin mi 20 te hnenah cheng 60,000/- theuh pekna kha kan hmu a, Tuiripuk Zau-ah hian mi 50-in hma an la a, chu mite hnenah chuan tanpuina pek a ni a, mahse 20 chauh hian an dawng a ni. Mi 30-te khan an la dawng ve lo a ni. Tichuan, heng mi 20 hi kan han chhuikualin Thenzawl khua pakhatmah an awm lova, an address-ah hian ‘Thenzawl’ tih a ni nanga, an awmna *Zau* hming hi an zia mai a ni. Aizawl atanga huan va nei te vek pek hmasak an ni a, hetah hian “induhsak-bikna a awm a ni lo maw; hei hi party thil nge ni a, Aizawl leh Thenzawl inthliarna” tih leh, “engvangin nge Thenzawl bik chauh dawng lo list-ah an tel’ tih hi ka zawhna a ni e.

Tin, Demand No. 1 - Legislative Assembly, hei hi MLA ho inpui ber a ni a, fak an phu a, kan fak mawlh mawlh thin a. Khawr takin, a vawikhatna atan kan rawn lawi lut ve a, engkim min thawhpuiin min lo ngaihssak em em mai a, khawi room-ah pawh tlangnel takin kan lut a, vawiinah hian thawktute zawng chungah lawmthu ka sawi a ni.

Demand No. 49 - Public Work Department hi a budget han en hian a pung nasa em em mai a, a lawmawmah ngai ta ila, kawng tha kan nei dawn a ni. Kan Chief Minister zahawm tak hian kawng a ngaipawimawh em em mai a, tichuan, kawng tha tak nei thei turah inngai ila.

Ka bial chhung thil han sawi duh ka nei a. New Capital Complex-ah sawn Maubawk ramri atangin Lawipu bula kawng rawn phei saw motor kal theiha siam a chakawm hle mai a, ‘Biakmawia-lo-kawi to New Capital Complex Road’ tih a ni a, New Capital phei chu laih zawh tawh a ni a, a bak pawh saw motor kal theih sawih sawih a ni tawh a ni. Saw kawng saw a tlang chuan Lawipui, Maubawk, Reiek, Ailawng leh a thlang lamte tan khatla kawng traffic jam rawn pal tlang lo hian mar takin office dawr turin an rawn thleng thei dawn a ni. Saw kawng saw min ngaihtuah sak theih chuan ‘ka lawm hle ang’ tih kha bial mipuite aiawhin kan sawi a ni e.

Tin, Finance kan House Leader-in a enkawl a, chhungkuaah hian sum bawm hi pa-berin a enkawl a, a thenah nu-berin a enkawl a. Kan Chief Minister zahawm tak hian pa-enkawl hi a tul niin a hria a, engkim hi a enkawl a, a hneh viau bawk a ni. Amaherawhchu, Mizoram sum dinhmun budget hi ‘a realistic lo’ ka han ti teh ang. Finance Department hian sum hmanna tur department-a dah mai lovin khawnpuiah a dah tam hian sum siksawi a ti nasa a, supplementary demand a ti tam bawk. Hei hi Accountant General Audit pawhin sum enkawl dan kawng harsatna an hmuh a ni. *Projection* leh *actual* inthlau thei lutuk hi a ngaihpawimawh thu report-ah a ziak bawk a. Kan sum puk hi capital receipt niin, ‘capital leh revenue expenditure-ah kan hmang pawlh nasa’ tih hi audit report-in a tarlan a ni. Chuvang chuan, “CAG duhdan anga inher-rem hi Mizoram tana thil tha turah ngaiin, insiam-rem nan kan hmang thei ang em” tih kha ka han zawt bawk a ni e. Pu Speaker, ka lawm e.

SPEAKER : Member zahawm tak Pu KT Rokhaw ka sawm e.

PU K.T. ROKHAW : Pu Speaker, ka lawm e. Pu Speaker, a hmasain Assembly Demand No. 1 hi ka sawi phawt ang a. Pu Speaker, he House zahawm takah hian tun hi Member ka nih vawi 3-na, Pathian leh ka bial mipuite zarah a ni a. I kaihhruaina hnuaiyah hian opposition leh ruling-te min thliar hrang lova, ang khatin min en a, i rorelna hi a lai a, a hmasain lawmthu ka hrilh duh che a. Tin, Pu Speaker, he Assembly office-ah hian Assembly staff-te, Peon atanga Commissioner thlengin an hnaah an inpumpek a, an hna an tlin bawk a, dawr an nuam a, MLA-te ngaihpawimawh kan hlauh a, ‘kan lawm hle a ni’ tih a hmasain ka sawi duh a.

A pahnihaah chuan, Demand No. 15 - GAD hi han sawi ka duh a. *Order of Precedence* chungchang kha District Council & Minority Affairs Department Demand sawihonaah khan ka han sawi tawh a, mahse hei hi GAD chan anih avangin kan Minister khan min chhan theihloh tur thu min hrilh a, kan Chief Minister portfolio GAD-ah hian han sawi lan a angaiin ka hria a, khawngaiha kan Chief Minister pawhin min ngaihpawimawh sak ka ngen a.

Mizoram chhunga ADC, Autonomous District Council-te hian State Government chung a lungawilohna lantirin, Republic Day leh Independence Day-te a hranin an hmang thin a, hei hi sorkar hian a hrelo lui ni te hian ka hre thin a. ADC hruaitute vuivaina leh ngenna te hi Mizoram sorkar hian enzui vat thei se a tha hlein ka hria. Hetia kan kal zel chuan inrunluihna lam thil a tichhuak tam palh ang tih te leh, Mizoram chhunga kan in-unauna lam te thleng a tichhe palh ang tih hi ka hlau thin a ni. Kan Council hruaitute vuivaina leh thil phutte hi thih hlawhtlin harsa lo tak a ni a, kan State thenawm ADC, Autonomous District Council nei ve te pawhin an Council hruaitute chu dinhmun sang zawkah an dah a, “hei hi Mizoram sorkar pawh hian a ti ve thei mai lo em ni’ tih hi ka zawt duh a. Ram khata cheng, State rorelna hnuai a awm ve tho, hnam tlem zawkte dinhmun, kan State-a nu leh paten an hrethiam theilo tlat hi lungchhiat-thlak ka ti a, hnam tlem zawkte ngaihsak duhlohna leh rahbehna angh pawh a ngaih theih hial a ni. Chuvangin, ngaihtuahna fim tak hmanga, hnam tlem zawkten an chanvo leh dinhmun tur an thlen hi ngaihpawimawh saka, mipui aiawh/elected an nihna angin, *Order of Precedence*-ah hian dinhmun tha zawk leh sang zawkah dah ni se a lawmawm ngawt ang. Hei hi khawngaihin a rang lama ennawn sak ni se tih ka ngen a ni.

Demand No. 9 - Finance hi tlem han sawi lan ka duh chu, Lai, Mara leh Chakma Autonomous District Council-te population hi Mizoram population atanga chhutin 15% vel kan ni a, kan budget ve thung tuna kan hmuh hi chu kan population atangin 9% chauh a ni a. Chuvang chuan, Finance changtu kan Chief Minister hian he kan population Mizoram-a 15% kan nih ang hian, budget-ah pawh hian 15% min pe ve tawh se tih ka ngen a ni.

Pu Speaker, Public Works-ah hian tlem han sawi lan ka duh leh chu, Tipa PWD office hian luahlumtu SDO kan nei lova, office khi a ruak ti tih a, staff pawh kan nei lova. Tichuan, SDO hi Tipa-ah hian dah ve ni se, tin, a office building assam type a hlui tawh tak mai khi khawngaihin a thara min sak sak turin ka ngen duh bawk a ni. Tin, Tipa khi Mara Autonomous District Council-ah chuan kan sub-Headquarters a ni a, a khawchhung link road-te khi metal loh a ni a. PWD SDO thut hmun a ni a, civil SDO thut hmun a ni bawk a, khawngaihin internal road black- topping leh pavement te min tihsak ve se tiin ka ngen duh bawk a ni.

Tin, Pu Speaker, Siasih road tih hi a lar em em a, Chakhlei - Siasih road hi central fund hmangin siam mek a ni a, km 20 siam a niin, KR Construction-ten hna hi an thawk a, hna tam zawk chu zawh tawh a ni. Tunah khian pavement, side-drain leh culvert-te an siam mek a. He road hi Beino (Chhimtuipui Lui) thleng kal thei se kan ti hle a, he kawng tawpna Siasih leh Beino inkar hi metre 400 vel chauh a ni tawh a, kawng

hi laih zawh vek tawh a ni a. Kan Chief Minister hian Siasih leh Beino inkar metre 400 chauh hi chu khawngaihin pavement min siam sak thei se la kan lawm viau ang.

Tin, Pu Speaker, Laki - Vahia road hi NABARD sum atanga laih a ni a, an laih zawhna pawh a rei tawh a, kum 2/kum 3 a lo ni tawh a, a mipuite kan lawm viau a, khawthlang lam kalkawng ber a ni a. Chuvang chuan Phura zone te, Salah zone te leh Palak dil kalna kawng, kawng pawimawh lutuk a ni a, tunah khian black-topping tih a la ni lova, pavement siam a nihloh avangin fur laiin pick-up chauh a kal thei a, motor dang a kal thei lova. Chuvang chuan, Laki - Vahia inkar kawng hi khawngaiha pavement min siam sak turin ka lo ngen nghal bawk a ni. Pu Speaker, Vahia - Phura road hi November 2017-a laih a ni a, pavement pawh siam tan tawh niin, tunah hian km 4 vel chauh zawh a la ni a. Engpawh ni se, contractor te hnenah a rang thei ang bera an hna hi thawk turin ka rawn ngen bawk a ni.

Pu Speaker, Demand No. 7 - Excise & Narcotics hi kan hriat angin, MNF-in sorkar-na an siam ve leha a hnapui ber chu, 'zu-khap' a ni a. He total-prohibition hi kum 3 lai kan lo hmang ta a, 'a hlawhtling lo a ni' tih chu Mizo mipuite hian kan hrechiang em emin ka ring a. Mizoram Sorkar hian Zu khap hi 'a ti tak tak lo nge ni' tih hi min ngaihtuah tir thin a. A dik tak chuan tunah hian Excise hian, (ka hriat dan chuan) an Office Mizoram puma thawk enforcement hi 400 chuang hret an ni a, Mizoram pum Zu-khap tura hma la tur chuan an tlem lulai lutuk a ni. Chuvang chuan, 'enforcement lam tihchak hi a ngai tak zet a ni' tih ka rawn sawi duh a, kan Minister pawh hi a khawngaihlak a. Chuvang chuan, enforcement hi tihchak a ngai a, lak belh ni se. Tin, vehicle pawh hi an nei tlem em em a ni.

Tin, Pu Speaker, Palak bialah khian school hostel pakhatmah kan nei lova, a bik takin thingtlang lam atanga khawpui zawka zir tura lo kal ten awmna tur an nei lova. Chuvang chuan, 'Tipa-ah khian Tribal Hostel khawngaihin min din sak hram se' tih kha ka ngen duh bawk a.

Pu Speaker, Demand No. 34, AH & Veterianary-ah hian, Siaha District khaw chhak lam tlang dung Chhaohlo, Siata, Chakhei-ah te hian Sial an vulh nasa a, a hlawhtling hle a. Hetihrial hian sial-vulhtute'n harsatna lian tak an neih chu, an ran tlatna hmun an hung theihloh avangin an sial rualte hian mi ram, huan leh lo a tihchhiat sak thin a, a neitute hian hrehawm an ti hle thin a ni. Kan Minister zahawm tak hian khilai tlang dunga sial-vulhtute tan hian an ran tlatna tur hmun 'grazing ground' hi hung chhuak vek turin khawngaiha hma min lak sak turin ka ngen duh bawk a ni e. Ka lawm e.

SPEAKER : Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e. Ka rawn sawi hmasak ber duh chu Demand No. 1 - Legislative Assembly hi a ni a. Mi sawiloh ang deuhhlekk zawngin rawn sawi ka duh a.

Session kan neiha piang hian keini ho hi member 40 kan ni a, a ken tel kan driver-leh kan PSO-te nen mi 80 kan ni a. Budget Session-ah pheichuan kan rei thin a, kan naute hian thutna nei lovin khulaiah khuan kham takin an ding a. Tin, nimin lamah pawh a takin ka zu hmu a, Zun-in han inthiarna mai tur chungchangah office chung leh recess room-a inthiar te an inthlahrung a. Helai hnaivaia zun-in te an han pan a, lo hau tawkte an awm a. Hei hi, thutna man pawh a to lem lova, i kaihhruaina hnuaiah ‘Session lehah chuan kan ngaihtuahsak a tha em aw’ tih ka ngaihtuahnaah a lian hle a ni.

Chutihruual chuan member dang ten an sawi ang khan, helaiah ‘*chenna ngailoh ram*’ tih ang deuh khan keiniin kan rawn fang ve a ni a, Commissioner leh Staff-te, a bik takin Assembly a thawktute an fakawm hlein ka hria a. Mi chi hrang hrang, mi inanglo tak tak kal khawm kan ni a. Min enkawl danah hian ‘fak hi an va phu tehlu em’ tih ka rawn tarlang duh a.

Demand No. 9 - Finance chungchangah hian, helamah hian experience nei miah lo mah ila han sawi ve duh lai ka nei a. Kan Budget chhunga mi ngei mai, he House-in kan passed ni bawksi, Covid-19 vanga central sorkar-in cheng vaibelchhe 2,600/- chuang min pe kim theilo chungka kan Finance enkawltu, kan House Leader zahawm tak min kaihhruaina hi a lawmawm ka ti a. Financial command fel tak neia min enkawlnaah hian lawmawm ka ti a. Department hrang hrang chanvo pek chhuahte pawh pawtlet hauh lovin wawin min kaihruai thleng a, hei hi a bik takin a lawmawm hlein ka hria a. Keini MLA leh minister te mamawh, bial leh ram mamawhte leh ngaihtuah lawk miahloh ramri buai chungchanga thil lo thlengah te pawh rang takin hma min laksak thin a, ‘harsatna awm lovin kan kaltlang a ni’ tih a taka kan hmuhah hian a lawmawm tak zet a ni. Chutihruual erawh chuan i veilama mite hian financial management thiam lo em em hian an sawi a. Vawikhat pawh la minister lo, chhungkaw budget pawh chiangkunga la pharh chiahlo ten budget wawitak lo pharh tawh, wawin nia kan CM zahawm tak, term tam tak budget lo pharh tawh an han sawisel hi chu a zialo deuh ka ti a. Hei hi politics a thatna ni te pawhin ka hria a, a chhan chu, Pu Speaker, mi thatna lai leh mi thiltih that hmu thei miah lo i veilama mite nen rorelna pakhat hnuaiah, kan duh emaw, duh lo emaw, Dan-in atih sia vanga kan han thu te hi a lehlamah chuan a lawmawm hle ni te pawhin ka hria a ni. Wawin niah hian i kaihhruaina hi a lawmawm

ka ti thin a, ang khatin, treatment khat min pe thin hi a lawmawm tak zetin ka hria a ni.

Demand No. 29 - Social Welfare-ah hian, nichina Serlui bialtu zahawm tak sawi ang khan, he Department enkawltu minister chak tak kaltlangin ka bialah thil la awm ngai lo Eklavya School cheng ₹2,400/- ngawta bul tana hma kan han la hi, ‘thil tha hmu ngailo ten min han hmuhsak se ka duh ngawt mai’ tih ka tarlang duh a. Tin, chutih rual chuan, ruihhlo ngaite chhanchhuahna atan kan House Leader-in ngaihtuahna thui tak a lo sen tawh, a taka tihhlawhtlinna awm zel, Sethawn-ah chak taka hmalak a lo ni te hi lawmawm ka ti a. Chutih rual chuan Article 275 hmanga Project kan siamte hi min lo umzui sak se ka duh khawp mai a. Keini hi *aspirant district* kan nih rualin PMJVK cover area kan ni a. A bikin Education, Health-ah te mithiamte hmanging project kan siam a, hei hi a changtu minister hian min lo enzui sak turin ka ngen tel a ni.

Demand No. 41 - Sericulture-ah hian Mizoram pumah ka bial hi ‘potential area kan neih a ni’ tiin official-in min declared sak a, department kaltlangin central-ah te pawh a bik taka enkawl turin hma min laksak thin a ni. Vawiin niah heng farmer-te hi an lawm hle a, hma min lak sakna zawng zawngah lawmthu ka rawn sawi a. Hun lo kal leh zelah pawh khulai khu a bik taka min enpui zel turin ka ngen a ni.

Demand No. 15 - General Administration chungchangah hian lawmthu sawi tur ka nei a. Police Outpost kan mamawh hle mai a, Law & Order situation chungchangah harsatna kan tawk thin a, South Sabual lam atanga West Phaileng han pan chu hla tak a ni. Hmanhmawh thilah Kulikawn Outpost kan han pan a, anniin min lo register sak hleitheh lova. Chuvang chuan chung harsatna chu hriain kan House Leader-in helaiyah hian Outpost dah phalna min pe a. Kan Home Minister chak takin a department kaltlangin hma min lak sak mek a, luah theih maia kan han peih ta hi lawmawm ka ti tak zet zet a ni tih ka sawi duh a. (*Dy. Speaker-in Chair a la a*)

Tin, Mizoram pawn lamah kan zin ve zeuh zeuh a, a bikin helai hnaivaiah GAD enkawl Silchar Mizoram House leh Shillong Mizoram House hi ka ngaipawimawh hle a, mizo fate kan thlen hnaihna a ni a. A bikin Silchar khu, ka hriatsualloh chuan 1984-1985 vela mi kha a ngai reng a la ni a, vawiinah hian kum 40 a lo hnaih ta a, hei hi renovate a hunin, ‘han thuam that deuh te pawh a tha mang e aw’ tih ngaihnan ka nei a. Tin, Shillong Mizoram House phei khu chu, member zahawmtakin a a sawi ang deuh khan, kan House Leader tan chuan ‘a baby tak tak’ a ni a, a hmun lei atanga a building sak thlengin, renovate lohin kum 20 lai a lo kal leh ta a, a bang te pawh lo tlabal tan lai te a awm a. Heng hi, Pu Deputy Speaker, han thuam that deuh a tha mang e, kan state hmel lanna a ni si a.

Tichuan, ka bialah a luhloh theihloh a, ka bial thlang lamah khuan khaw 19 a awm a, bial kan han fang a, a chang chuan official ten min han zui lo thei lova, bial pawimawh thilah te, Chakma chhuatah kan la mu a ni. Khulai Marpara-ah khuan a bikin tunhmain DC Resthouse a awm thin a, tunah chuan a chhe vek tawh a, khungah khuan Resthouse eng emaw tak chu GAD kaltlang hian min ngaihtuahsak thei em tih ka han tarlang tel duh a. Hei hi kan ram leh hnam tana kan thawh zelna kawngah, keini chang nilo official-te pawh a tul angin kal ta se la harsatna tam tak awm thei thil a ni tih ka sawi duh a.

A dawt lehah chuan, Demand No. 32 - Horticulture hi ka sawi duh a. A lawmawm hle mai a, kan biala thil la awm ngailo hmun hnihah a lo lang a. West Phaileng RD Block area-ah khuan Block Horticulture Officer hmun luah theih turin min buatsaih sak a, a office hmun te pawh felfai takin kan nei tawh a, a lawmawm hle mai a. Tunhmaa Tuidam pan thin khan, pan a ngai ta lo a ni. Development kha kan kawtkaiah kan House Leader kaltlang hian min rawn chhawp hnai ta a, kan lawm a. Chutiang bawkin Reiek Block huam chungah BHO min han chhawp hnaih sak bawk a, kan lawm tak zet a. Amaherawhchu, a bikin Reiek-ah hian hmun hi kan la nei mumal lova, Agriculture Block Office hmun tur pawh kan la nei chiah lova. Amaherawhchu UT kan nih laia PWD-IB hmun zau tak mai khu then hran ni sela, PWD kha dah chuang chuang lova, a hmun zau khu sorkar ina heng development department Agriculture leh Horticulture Block office hmun atan hian a remchang hle in ka hria a, chung chu kan House Leader hian min hriatsak se ka duh khawp mai.

Demand No. 45 - Public Works hi kan lo belh ve thin department a ni a. Nichina member zahawmtakte'n an sawi ang khan, kan ram, kan hnam thanna turin chuan he department hi a pawimawh a, technical-department a nih ang hian thui tak politics pawh a inrawlhloh theihlohna chen a awm thin a ni, hna chungchangah te. Helaiyah hian kan House Leader zahawmtak sawi ang khan, a bik takin tender-a hnapek thin a ni a, **(Dy. Speaker:** Minute khat i la nei e.) a chhang hniam, a 'lowest' ringawt pek hi a work lovin ka hria a, kei pawh contractor ka lo ni ve tawh thin a. Sorkar hian ngaihtuahna tak tak senga, tender rate chungchangah hian fixed eng emaw a neihloh chuan a hna quality-ah te, a thawh hun chhung rei chungchang (duration)-ah te a tha lovin ka hria a. 'Tute emaw sorkar tibuai duh hrim hrim ang chi te pawh hi an awm e' ka tihna pawh ni lovin, thil awm thei a ni a, churang chuan a rate felfai taka fix-a, 'kha ai hniama chhan awihloh' tia huai taka kan kalpui a hun tawh mang e aw ka ti a ni.

Lawmthu sawina duhna ka nei a, Pu Deputy Speaker. Kan Chief Minister zahawmtak hian kan bial harsatnate min ngai pawimawh a, Kanghmun, Darlung via Bawlte, km 19 hi kal theih ngailoh a ni. Kum sawm chung kha Presbytery-in agenda-ah an nei ziah a **(Dy. Speaker:** I hun a tawp a) vawiinah chuan kan sukiang ta a,

amaherawhchu, tun Presbytery dawnah khan la tihloh km 4.11 kha tunah hian tlawmngaiin a bain kan thawhtir mek a, heng te pawh department lamah AA ni tawhin, hei hi min lo hriat sak se ka duh a.

Reilote, Pu Deputy Speaker. West Phaileng-Marpara hi 'km 80' angin PWD record-ah a awm a, amaherawhchu, khawvel thang zelah border fencing thawktute'n kawng an lo lai lian a, bridge tha tak mai bailey-bridge te pawh an buatsaih a, PWD-ah an hand-over tawh a, khung enkawlina khu PWD-in official-a an lak tak siah chuan Marpara Chakma chenna lam, 'North' kan tih lai tak km 5 khu PWD hian an work map-ah hian telh tawh se la ka duh a. A nihloh chuan, Mizo-ban thleng chiah mai kan black-top thin a, hei hi tha ka ti lova, min ngaihtuhsak a tha ka ti khawp mai.

A dawt lehah chuan, lawmthu sawina baw. Rawpuichhip-South Sabual, km 70 pawh Zawnah ka siamah khan a lo lang a, 'hmalak tum a ni' tih te, West Phaileng-Dampui road hi sorkar hmasa Pu Zoramthanga sorkar tho, 1990 kum khan BADP suma laih a ni a, kum 10 chhung enkawllah a ni a. Vawiinah hian vanneihthlak takin Power Minister zarah electric ban lian phun a ngaih avangin, khulai kal tawhna ngailoh kha cheibawl that a ni a, motor te pawh a tlan leh thei ta a. Hei hi tlema han chei chuan Phaileng leh a chheh vel, Mamit District chhunga mi ni si khaw 42-te tan khuan a tangkai hle dawn a. A nihloh chuan, Phaileng atanga Dapchhuah thleng tur hian km 18 kal a ngai a, chuta tanga km 12-ah Dampui a awm a, km 30 kha a lo-thlawnin kan kal thin a ni. Helai kawng ka sawi lai hi km 8 lek a ni a, hei hi awlsam taka hma lak theihna mai a ni a. Pukzing - Silsuri te, heng hi PMGSY hnuaiah tunah hma lak tum niin ka hria a, a lawmawm hlein ka hria a.

A tawp berah chuan, Pu Deputy Speaker, Tlawng Lei hi sorkar hmasa hun chanveah khan company pakhatin a thawk a, vawiin thlengin a thawk zo lo mai a ni lo, **(Dy. Speaker: I zo dawn tawh em aw?)** ka zo tep e.... abutment pawh a la zo hlei thei lo a ni. Chuvang chuan, kan PWD official-te pawhin uluk taka ena, a tul anih chuan terminate hial thain ka hria a. Hetiang work zawh theihloh hian ka bialah harsatna min thlen a, kuthnathawktute tan harsatna tam tak min thlen a, 407 truck tak ngial pawh hian Reiek khawpui a thleng hleitheilo a ni. Chuvang chuan, supply kan lakna kawngah te pawh Rawpuichhip lamah kal kual a ngai a, a tul lovah km 50 vel kan kal a ngai thin a ni. Helai hi km 20 lek anih laiin, khu bridge khuan kan bial tan harsatna namen lo min thlen a ni.

Hengte hi vawiinah zalen taka ka sawi thei hi ka lawm a. Chuvang chuan, kan House Leader zahawmtak leh Dr. K. Beichhua, kan Minister zahawmtak demand-te hi ka thlawp a, lungruah taka pass turin ka rawn ngen sak a ni e. Ka lawm e.

DEPUTY SPEAKER : Tunge kan han sawm leh ang le? Member zahawmtak Pu Zothantluanga i lo sawm ang u.

PU ZOTHANTLUANGA : Pu Deputy Speaker, ka lawm e. Vawiinah kan House Leader, kan Chief Minister, Finance changtu demand leh kan Minister zahawmtak Dr. K. Beichhua demand-te sawina hun kan nei a, lawmawm hlein ka hria a. Demand number han en hian a thahnem khawp mai a, minute 10 chhunga han sawi zawh chu a huphurhawm hle a ni. Chuvang chuan, sawi chho mawlh mawlh mai i la a tha awm e.

Demand No. 7 - Excise & Narcotics Department-ah hian kan sorkar hmalakna a ropui a, sawrkar tirh te atangin Mizoram kohhrante, NGO-te leh mi nawlpuite'na an duh loh em em zu-zawrh titawpa, a chhiah pawh kan hnam tan 'a thalo a ni' tih avanga it lova, zu-zawrh tihtawp a ni kha kan hnam hian hma a la sawn phah zel niin ka hria a. Sum leh paiah covid leh thil chi hrang hrang, vairam Silchar lampang nena kan intihbuai avanga road block te a awm chung pawhin harsatna em em tawk lovin, Mizoram mipuite riltam lovin kan awm thei hi a ropui a, chuvang chuan he department pawimawh tak mai hnathawhte hi kan hriatchian a pawimawh a.

Ka hmaa mite sawi ang khan, total prohibition a lo nih takah chuan thawktute an indaihlo hle a, lirthei te pawh an mamawh belh nasa a, heng atan hian kan hotuten a tul ang zela hma an lak ka beisei a. Zu-zawrh avanga hmeithai leh fahrah tam tak awm te tihtawpin a lo awm a. Tin, zan lama kan khawlai pawh a him ta te hi a nuam a, a man a tam hlein ka hria. Chuvang chuan, he sorkar-a kan hmasawnnain a tawrh dawn pawha kan hnam tana thil thalo nia a hriat dova, zu-chhiah lak titawpa total prohibition kan kalpui ngam hi a ropui hlein ka hria a ni. Chutih lai chuan zu avanga chhiah kan lak thin kum khatah crore 100 dawn lai kan chan erawh chu 15th Finance Commission pawhin kan ram tana an ruahmanna chhiah avanga kan income tha thinah khan kan tlakhniamna te awm mahse, kohhran mite tawngtaina avangin he sorkar hi mualpho lovin a awm niin ka hria a. Tin, a lehlamah chuan kan hmuh tur ang kan hmuhlohna te chu malsawmnaah a chantir a, kan hmuh ngailoh budget ruahman hma pawha central lamin a special taka sum min pek te han hmuh hian a malsawmna kan dawn niin ka hria a. Chu zawng chu Excise chungchangah ka sawi duh a.

Demand No. 29 - Social Welfare hi sawi leh ila. Kan Minister leh department-a thawktute an fakawm hlein ka hria a. A bik takin ka bial Aizawl West-I hian kan tangkaipui hle a, Tribal Welfare atangin Girls Hostel pathum min sak sak mek a, Old Age Home kan mamawh em em a, building thar cheng nuai 350 velin min sak sak hi a ropui ka ti a ni. Zotlang-ah high school building sak nan cheng nuai 100 lai min pek te hi kan lawm hle a ni.

Tin, Anganwadi hi a pawimawh khawp mai a, naupang sikul la kal pha silo, puak-beh reng rual ni tawh bawk silo ten zirna bul an tanna hmun a ni a. Ka bialah hian Anganwadi eng emaw zat min pe a. Ka bial ami ten thahnem an ngai a, kan sum hmuhin a daihloh avangin kan MLA fund hian a lo tuar ve zel a. Khang kha chu kan hmasawna tur anih avangin a paw kan ti lo a ni. Social Welfare-ah hian lawmthu sawi tur a tam hle a ni.

Tin, Wheelchair te, hearing-aid te hi kan mipuite'n an mamawh si a, sem leh theih ni se a tha hle mai. Kan Minister zahawm tak hian min lo hriatsak se.

Tin, AH & Veterinary hi han sawi leh ila. Ka bialah khuan Zoram Poultry Development Society (ZPDS) a awm a, hma an sawn chak hle a ni. Ar awp-keuna no sing hnih atangin singli-ah a kaichho a, tunah hian nuai khat tihkeu theihna turin an inbuatsaih mek a ni tih hriat a ni te hi a lawmawm a. Mizo te hi kan pi leh pu atanga ranvulh chi kan ni a, Sial, Bawng, Vawk, Ar leh Kel te, heng kawngah hian hmasawna tam tak kan nei a ni. African Swine-fever te kha awmlo se chuan vawkah te pawh 'kan intodelh chho dawn ta a ni maw' tih tur kan ni tawh laia harsatna kan han nei hi a paw em em mai a, mahse hma ka sawn chho zel ang tih ring ila a tha nge. Kan intodelhna tur hian Vety Department te pawh hian hma an la zel a ni tih han hriat hi a lawmawm ka ti tak zet a ni.

Tin, demand No. 34 - Horticulture hmalaknaah hian hmasawna tam tak kan hmu a, chawhmehah te, thlai leh thei chungchangah te hma kan sawn em em a. Chutihlai chuan kan bialah te khuan nul an siam tam tak a awm a, chu chu eizawna atan an hmang a, a season-ah chuan tam tak kan hmu a ni. Mahse off-season ah hian engtingge kan tharchhuah theih ang tih hi ngaihtuah a ngai a ni. Hman deuhah khan Sairang Dinthar-ah kan Chief Minister hovin Horticulture Officer ten cold-storage changkang tak mai sak a ni a, chu chuan khang kan harsatna kha min puhruk turah ngai ila. Cold-storage changkang tak, Covid SoP avanga kan la hawn theihloh kha tunah chuan hawn theiha peih tawh a ni te hi he House hi ka hrih ve duh hrim hrim a.

Pu Deputy Speaker, ka han sawi zung zung ang a. Demand No. 45 - PWD hi kan hria a, kan Chief Minister zahawm tak PWD changtu ni bawk hian development hrang hrang zingah kawng hi a ngaipawimawh em em a. MNF a sorkar chuan kawng a tha thin a, tunah pawh hian Vairengte atanga Sairang thleng four-lane tihna tur NHIDCL-in hma ala mek a. Chhim lamah va kal ila, kawng tluanin hmasawna avangin kawng a khu a ni, tun atanga reiloteah hian Mizoram kawng hi a tha hle dawn tih kan hria a ni. Hengte hi kan hotupa hmalakna leh inpekna a ni a. Thil reng reng hi vei chuan a hrin theih a, kan hotupa hian a vei a, vei loa awm mai mai hi chuan a hrin theihloh a ni. Kan hotupa hian a vei a, 'a lo changkang zel a ni' tih hi ka sawi duh a ni.

PMGSY chungchang te kha kan hre tawh a, contract hmuh hrim hrim policy-a nei eng emaw zat hi an awm a. Contract chu hlawkna duh avanga hmuh tur ni awm tak, mahse rate hniam deuh deuhin an chhang a, an tihlawhtling leh hleithe i lova. **(Dy. Speaker:** I hun a tawp e) Pu Deputy Speaker, ka zo tep e, min lo hrethiam teh. Ka dil belh ngailoh che kha. Tun tum chauh chu min lo hrethiam teh. Kan kawng hian nasa takin hma a sawn tih kan hria a. Hmanni deuh khan ka fapa khawthlangah a kal a, nimin khan alo haw a, Kanhmun atangin darkar 4-ah Aizawl alo thleng anih chu maw le! Darkar 8 vel kan kalna thin kha a ni a. A veitu hian kawngtha hi a hring zel a, ‘a hring zel dawn a ni’ tih hi ka beisei dan a ni. Chuvang chuan, he sorkar chhungah hian kawng chungchangah hmasawna tam tak kan hmu a, a thlamuan thlakin a lawmawm hle a ni.

A tawp berah chuan, western side-ah budget siam hma atangin central-in an la tih ngai reng reng loh, by-pass road, Sihhmui - Muallungthu tur kha a landan chu a ni a. Khami atan khan crore 500 lai mai min han pe te hi kan zu-zawrh loh, chhiah kan lakloh rah te kha lehlamah ‘a malsawmna kan dawng a ni ang’ tih kha kei ka rindan a ni a. Pathian-in khami lamah khan hma min lak sak a ni. Tin, tunhmaa la awm ngai reng reng lo, crore 100 lai mai Bamboo link-road atan min han pe te hi, kan mau tam ber hi luipui kamah a ni a, a tha si a, chumi phurhchhuahna tur kawng chu kan mamawh a ni. Chuvang chuan a veia vei, a tul anih chuan nawr peih, a dil a ngaih pawha dil peih chief minister kan nei a. Chu malsawmna chu heng harsatna tamtak karah hian leh Kohhran ho leh NGO tena an duh loh em em, an do em em zu-zawrh tihtawpna avanga chhiah kan chan tur te pawh kha, a lehlamah chuan Pathian-in malsawmnaah a rawn chantirah ka ngai a ni. Pu Dy. Speaker, hun tha min pe a, ka lawm e.

DEPUTY SPEAKER : Tunge kan han sawm leh ang le? Awle, Member zahawm tak Dr. F. Lalnunmawia ilo sawm ang u.

DR. F. LALNUNMAWIA: Pu Dy. Speaker, ka lawm e. Vawiinah hian Kan Chief Minister zahawm tak leh kan Minister zahawm tak Dr. K. Beichhua demand-te sawi theia ka awm hi a lawawm hlein ka hria a, lawmthu ka sawi a ni. Department a thahnem deuh a, a vaiin ka sawi seng lo anih pawhin minlo hriatthiam kha ka han beisei a. A hmasain kan Chief Minister zahawm tak demand atang hian kan sawi ve ang a.

Pu Dy. Speaker, a hmasain Demand No. 15 - GAD hi han sawi ka duh a. Kum dangah GAD hi ka la sawi ngai lova, tun tum chu ka han sawi ve dawn a ni.

Hei, an website-ah te kan en a, a lan danah hianin GAD hna, an mission, an vision-ah hianin a tlangpuiah chuan sorkar department hrang hrangte khaihawmtu leh an hnathawh dan te enpuitu a ni a. Tin, sorkar chak, (efficient and effective government) a awm theihna tura hmalatu pawimawh tak a ni a. Tin, sorkar Dan, (Rules and

Regulations) te ‘zawma kenkawh a ni em’ tih te an en a, tin, a tul huna discipline pawh kengkawhtu an ni. Tin, district administration hrang hrang enpuitu a ni a, DC te pawh enkawltu a ni. A tum ber chu, ‘Mizoram-ah sorkar-tha a awm theihna atana sorkar department hrang hrangte enkawl’ kha a ni.

Pu Dy. Speaker, helaiah hian kan sawi tel hram duh chu, Pu Zoramthanga kaihhruai sorkar hi kan sorkar tirh atang khan Assembly Session kan neih hian Thawhtanni apiangin MNF Legislature Party ten devotion kan nei thin a. Chutiang hunah chuanin Kohhran hrang hranga Rawngbawltu leh Pastor-te devotion min neih pui turin sawm thin an ni a. Anni chuan sorkar-tha a awm theihna tura a tha thei ang bera ram kaihhruai tura thurawn te, fuihna te min pein, min tawngtaisak thin a ni. Hei hian kan sorkar hruaitute pawh an hnathawhnaah a puiin a kaihruai hlein ka hria a ni. Hei hi a lawmawm ka ti a, chumi rah pawh chu a ni ang a, tluang takin he kan sorkar hi ‘kan Kohhran te, mipuite tawngtai rah a ni’ tih kha kan sawi duh a. Tin, Pu Dy. Speaker, hman lawkah i vei lama thu kan opposition unaute hian Mizoram sorkar hi ‘sorkar kaihhruai thalo’ tiin an sawi em maw ni; President rule-a dah tur khan BJP kaihhruai khan an han rel khawm laih laih kha a ni a. Chutiang chuan theihtawp an han chhuah a, mahse a point tak kha an hmu ta lo te pawh a ni ang e. Khatiang sorkar demna ang chi, thu belhchian dawl lemlo social media-ah te, print media-ah te a awm kan hre fo a. Amaherawhchu, Pu Dy. Speaker, chutiang beihna leh sawiselna karah pawh chuan kan sorkar support-tu an awm belh zel hi a lawmawm hlein ka hria a ni. Ka bial chhungah ngei pawh hian sorkar lai party-a rawn tel ve duh hi mi eng emaw zat chu an inkau mek a ni tih kha kan sawilang ve duh hrim hrim a ni. Chuvang chuan lawmthu ka sawi a ni.

Tin, GAD hnuaiia Aviation Wing hian Airport chei-that hna an thawk a, hei hi a lawmawm ka ti a. Pu Dy. Speaker, tunhnai lawkah khan USA-a awm ka thiante nupa an lo zin a an sawia chu, “Airport chei-that hna an thawh te hi a ropui mang e” te an rawn haw chu, Aizawl Airport chu a hoin a beitham thei riau a, “hetianga khualzin tam zawk dawngsawng thei tura chei that a ni hi chu a van lawmawm tak em” an rawn ti ve a ni. Chutiang chuan thlawhnaa zin te hi mihausa chauh nilo, mi nawlpuite pawh hian kan kalkawng a ni tawh a. Hetianga kan ram mamawh covid hri len laia Runway siamthat a ni te, Airport tihlen a ni te hi a lawmawm hlein ka hria a ni.

Tin, Demand No. 9 - Finance department hi tawitein kan han sawi ang a. Kan sorkar leiba tihnam tura kan Chief Minister zahawm tak Finance changtuin ngaihtuahna a seng hi a lawmawm hlein ka hria a. Pu Dy. Speaker, Budget Speech-a kan hmuh ang khan kan sorkar leiba ‘date to GSDP ratio’ hi titem turin kan Finance Minister-in ngaihtuahna nasa takin a seng a, Finance hotute nen exercise pawh an bei nasa hle ang tih ka ring a. Kan leiba ‘date to GSDP ratio’ hi kum 2018-2019 khan 41.89% a ni a, tun

sorkar-kum lo awm turah hianin 31.81% ni tura chhut a ni. Chumi atanga chhut chuan 10% laia hniam tura chhut a ni hi thil lawmawm tak niin ka hria a.

Tin, Pu Dy. Speaker, mi thenkhat ten kan Chief Minister hi financial management thiamlo leh leiba pawh ngah lutuk angah te sawi a awm thin hi a dik lovin ka hria a, sorkar leiba hi Budget Speech-ah te kan hmuh angin cheng vaibelchhe 12,553 ni tura chhut a ni a. State dangte ai pawha leiba ngah bik ang hiala sawi te hi a dik lovin ka hria a. RBI Annual Report, 2020-2021-a a lan dan hian North-east State zingah Sikkim dawtah chuan leiba nei tlem ber kan ni. Chuvang chuan, leiba hi ‘State dang aiin kan ngah bik lo a ni’ tih kha ka han tarlang duh a, hei hi thil lawmawm tak niin ka hria a. Kan Chief Minister zahawm takin hetiang a sum ren-chemna kawngah te leh financial management-ah mithiamte nena exercise nasa tak neia ngaihtuahna an seng hi a lawmawm a, lawmthu ka sawi a ni.

Tin, Pu Deputy Speaker, kan Chief Minister zahawm takina kawng hrang hrang, central atang te leh source danga tang tein fund a dap khawm a, hrileng karah pawh kum kal taah te hna tamtak kan thawk thei hi a lawmawm hlein ka hria a ni.

Horticulture-ah nasa taka hmalak zel a ni a. Kan CM kaihhrainain kan thlai leh thei tharchhuahte a pung zel hi a lawmawm hlein ka hria a. Chutihruah chuan pipe mamawhna hi a nasa khawp mai a. Pu Dy. Speaker, pipe hi mipuiin an sawi nasat ai hian kan sawilang tam lova, pipe mamawh thu hi an rawn sawi sup sup mai a. Chuvang chuan, ‘sorkar kumtharah chuan tui lakna plastic-pipe hi thahnem zawk neih nise’ tih kha kan Horticulture changtu kan Chief Minister zahawm tak hnenah hian kan thlen nghal ni sela.

Tin, Planning & Programme Implementation-ah hian, hei a hnuaia awm kan MLA-te khan an rawn sawi nual a. Kei pawhin, ‘Science leh Technology hi department tangkai zawka hman ni se, tin, scientific innovation lam te hi uar ni se’ tih ka han sawi duh bawka a ni.

Tin, PWD leh a hmachhawp ropui tak takte sawi vak ka chak a, mahse hun a awm tawh si lova. Minister zahawm tak Dr. K. Beichhua demand-a han sawi leh lawk ka duh chu - Zu leh ruihlo dona kawnga Minister zahawm tak leh a department te hmalakna hi ka fak duh a. Chutih rual chuan, Excise Constable leh staff tam zawk an pek belh hun hi ka nghakhlel hle a ni. Tin, kan tarlan hram duh chu, Champhai, Hnahlan leh a chhehvela grep chingtute harsatna hi han sawilan sak ve ka duh hrim hrim a. An grep tui te awmzia nei zawka an hralh theih hun ka nghakhlel hle a ni. Sorkar pawhin an harsatna hi uluk zawka ngaihtuaha, awmze nei zawka suma an chan theih dan hi a ngaihtuahpui ka beisei a ni.

Tin, Demand No. 34 - AH & Veterinary hi mi tam tak innghahna a ni a. SEDP hnuaiah ranvulh hmanga eizawngtute nasa taka hma lakpui tum a ni hi vawiin hian lawmthu ka sawi duh a. Vawk pul hri vangin vawk in a ruak hei huai a, heng kan vawk in ruakte hi vawkte te nena bul tanpuia, hmalak hun a nih hun ka nghakhlel hle a ni. Chutiang bawkin ar leh ran dang te pawh. Heng ranvulhtute nasa taka tanpui an nih hun hi ka nghakhlel a, chu chu kan tarlang ve duh a ni.

Demand No. 29 - Social Welfare hmangin ka biala hnathawh a tam khawp mai a. Ka sawi vek seng tawh lo ang a, Sericulture lamah te pawh. Chuvang chuan, heng kan Minister zahawm tak pahnih-te demand hi pass pui a phurawm hlein ka hria a, 'phur takin i pass pui ang u' tiin ka rawn thlawp a ni e. Ka lawm e.

DEPUTY SPEAKER : A lawmawm e. Awle, Member zahawm tak Pu Lalrindika Ralte ilo sawm ang.

PU LALRINDIKA RALTE: Pu Deputy Speaker, ka lawm e. Demand No. 45 - PWD atang hian tan ka duh a.

Kan bial chhun khuan kawng pawimawh tak mai a kal a. BZ Road, 'Bairabi-Zamuang Road' tih khu. Khulai kawngah khuan sum hi a lut hnem tawh khawp mai a, 'mimal kawng ni ta se, a neitu hi engtingge a awm ang aw' ka ti a, ka suangtuah thiam vak lova, a zawi ve raih chuan ka ring a. Khulaiah khuan bridge pawimawh tak mai a awm a, 'Teirei Lei' kan tih khu. Tunah hian siam mek a ni a, a tira ruahman ang khan a zau zawnga khu mt 80 a ni a. Amaherawhchu, a lui kam te tuilianin a la deuh bawk nen, a tizau a. Tunah hian mt 102-in ruahmanna siam mek a ni a. A foundation khu tunah hian an buaipui mek a. Khu khu kan nghakhlel khawp mai a. Tin, a foundation a khu pile-test te pawh an nei tawhin ka hria a. A hnathawktute khu an muang kan ti a, mipuite chuan. Khawngaih takin kan House Leader hian min lo nawr chak sak se a thain ka hria a, 'an zawh hlan kan nghakhlel hle a ni' tih min lo hriat saka hma min lo lak sak turin ka ngen duh bawk a ni.

Tin, PMGSY hi tukin zingah khan kan House Leader khan a buaithlak thu te a sawi a. Ni e, PMGSY hi kan buaipui khawp mai a, sum tam tak kalna a ni a. Amaherawhchu, ka rilrua a awmdan chuan, 'PMGSY-ah hian keiniho hi inrawlh lo ila a fel duak mai awm ma nge aw' tih te ka rilruah a awm deuh a ni. Chuvang chuan, nichinah te pawh kan rawn sawi a, politic khelh nan te kan lo hmang thin anih chuan, chung kan hmana vang te chuan PMGSY hi a lo buar chuar ta niah ka ngai a. Chuvang chuan, agreement fel tak nen contractor ten hna an thawk a, agreement fel tak a awm a. Chutichunga a la buai anih chuan, 'kan thiamloh chu a ni ngei ang' tih ka ring a. Action kan la ngam lo nge, kan la duh lo nge, engnge a chhan ka hre lova. Chuvang chuan, kei

ka rilruah chuan, PMGSY chungchang hi a nawlpui chuan kan hre vek a ni. Chuvang chuan, kan inrawlhlohna turah hian inrawlh lo ila, ram leh hnam tana kan inrawlhna turah hi chuan na takin inrawlh thung ila kan ram hi chu a fel duak ka ring. PMGSY pawh hi, ‘kan inrawlhna tur chinah inrawlh ila, kan inrawlh lohna turah inrawlh lo ila a fel duak ang’ tih hi kei chuan ka rin dan a ni. Chuvang chuan, a buaithlak kan tih zawng zawnga te kha a fel duak theihna tur ka rawn chhutchhuah ve dan chu a ni.

Tin, Demand No. 9 - Finance, Demand No. 11 - Secretariat Administration leh Demand No. 15 - General Administration-te hi a sawikawp theih deuh vekin ka hria a.

Ni e, sorkar-tha hi mipuite pawhin kan mamawh a. Chuta pawimawh em em chu sorkar hnathawkte hi anni. Mipui chuan an aiawhin sorkar an siam a, Govt. servant-te an awm a. ‘Sorkar’ kan tih leh sorkar hnathawkte inlaichinna tha hi a awm loh chuan ‘sorkar tha hi mipuite kan chhawpchuah sak lovang’ tih hi ka rin dan a ni. Chuvang chuan, sorkar hnathawkt leh sorkar hi kan inlaichinna a that a ngai a. Tin, sorkar hnathawkte hian sorkar tan, kan mipui tan ‘phur takin engtin nge hna an thawh theih ang’ tih te hi a pawimawhin ka hria a. Vawiina kan awmdanah hian ‘kan sorkar hnathawkte hi an phur ang em’ tih te hi ka ngaihtuah a ni. ‘Hlawh pe mang lo hian hlawhfa chhawr ta la, i hlawhfate hian phur takin i hna an thawk ang em’ tih te rilruah a awm a. Chuvang chuan, kan sawrkar hnathawkte hlawh hi kan ngai pawimawh hmasa tur a ni. Tin, sorkar hnathawkte hian an dam mawh hritlanah te, eng emaw harsatna an neihah te sum leh paiah an mahni hlawh atangin an lo khawl ve, mamawh huna hmanah tia an lo dahhran ve te, chung pawh hmang thei lova vawiina an han awm te, mahni pawisa pawh hmang thei lova vawiin nia awmte an ni kan sorkar hnathawkte hi. Chuvang chuan ‘an phur ang em’ tih hi rilruah a awm a. Chu chu a ni a, finance hi a pawimawh em em chhan, kan House Leader chan hi a pawimawhin ka hria a. Tin, State te-ah chuan (tun hma lam khan a sawi a) ‘finance hi chu Chief Minister hian chang se’ tih te a sawi a, a dikna chin pawh a awm ang. Amaherawhchu sorkar-tha siam tur chuan chulai chu a ngaihpawimawh awm a, kan sorkar hnathawkte hi kan ngaipawimawh tur a ni a, chumi kawng chu ngaithuah chian a pawimawhin ka hria a. Sum leh pai hi kan inrenchem a, tin, sorkar hnathawkt ten hlawh an lak hleih theihloh laia thil danga sum kal tam lutuk te pawh kan hre vek a, heng hi “tih reh dan te a awm em, kalphung tha zawk te pawh a awm em” tih te kan sawi duh a ni.

Tin, a tawpah chuan Demand No. 34 - Animal Husbandry & Veterinary-ah hian ka sawi duh chu, vawk-pul hri a leng a, kan bialah pawh vawk-pul hri avangin vawk 675 lai a thi a, chhungkua 216-in harsatna an tawk a. Minister hian ‘zangna dawmna te hi ngaihtuhsak kan tum e’ tih kha a sawi a. Hei hi kan nghakhlel khawp mai a, kan bialah harsatna an tawk a. Engpawh nise zangna-dawmna kha ‘central lamah kan dil

mek e' tih te a awm a, kha kha a chak thei ang bera hma min laksak turin kang ngen duh bawka ni e. Ka lawm e.

DEPUTY SPEAKER : Awle, tunah chuan MLA pharsa kan lo nei a, member zahawm tak Pu K. Laldawngliana i sawm phawt ang.

PU K. LALDAWNGLIANA: Pu Speaker, ka lawm e. Kan Chief Minister zahawm tak leh kan Minister zahawm tak Demand sawina hun tha tak kan nei ve leh thei hi ka lawm hle a ni. A hmasain Demand No. 32 - Horticulture Department chungchang kan sawi duh a.

Hripui vanglaia, total-lockdown kan tiha kan Chief Minister zahawm tak ruahmanna leh kan Addl. Chief Secretary kaihraina hnuaia nodal-department Horticulture kaltlanga Commerce & Industries te leh Mizofed te hnathawh dan kha kan la hre vek ang a, a ropui kan ti a House kaltlang hian ram tana an hnathawh zawng zawngah khan lawmthu kan sawi duh a. Khaw hrang hranga sum an han lakluh ringawt pawh vaibelchhe 3,53,000/- lai mai leichhuah a ni kha. Khatih hunah khan *Vegetables and Fruits Supply-chain* mai piah lamah khan 'sangha te, sa thlengin buaipui a ni' tih kha kan sawilang tel duh bawka ni.

Tin, chhungkaw 135 Tualte khua ho tomato an lakna nikumah pawh khan cheng nuai 247 ngawt lakluh a ni te, Sialhawk lakhuih thei atanga cheng nuai 95 lak a ni te, zikhlum atang ringawt pawha cheng nuai 262 lak a ni te kha a ropui hle a ni. Ka bial chhungah ngei pawh tunah hian NEC hnuaiah chhungkaw 18-te, Lungdai atanga chhungkaw 100-te leh SEDP kaltlanga tuna bamboo-development project atanga lolut tur, heng zawng zawngte hi a lawmawm ka ti hle a ni. Hmasawna tam tak bial chhungah leh rampumah kan han hmu thin te hi a lawmawm tak zet zet a ni.

Demand No. 45, hei tak hi Zoram mipuite phunchiarna, sawi tam em em leh sorkar mualphona thin pawh a ni a, amaherawhchu thil lawmwm em em chu, MNF sorkar apiangah chuan kawng siam thar a ni a, kawng laih that a ni a, 'MNF chuan an ti tha leh mai' tih a awm zel hi a ropui ka ti a. Vawiin niah hian duhthusamin la siam zo theilo mah sela, tha taka siam a ni zel hi, a changtu kan Chief Minister zahawm tak leh department hotute chungah lawmthu kan sawi a ni.

Tichuan, kan hriat angin tunah hian nikum November thla hian ka bial chhunga Khamrang - Buichali kawng tha taka siam a ni te avangin lawmthu kan sawi duh bawka a. NHIDCL atanga kan hriat angin, kan tlan thla a tunlai chu Vairengte panin, Kawnpui, Bualpui, Thingdawl Hmarveng thlenga kawng khu, a tawlh hian kan tawlh zel zel mai a ni. Khung zawng zawng hmalakna te khu a lawmawm ka ti a, lawmthu kan sawi duh

bawk a ni. Nichin khan zawhnaah kan sawi tawh bawk a, National Highway km 15, Kawnpui - Khamrang tun thal chhunga zawh tura a han awm te pawh hi lawmthu kan sawi duh bawk a ni.

Demand No. 9 - Finance Department hi, tlemtea han sawi ve ka duh chu, hei hripui nasa takin kan tuar a, chutah chuan Mizoram mipuiten kan hriat tul em em chu, 'finance a thiamlo' kan ti fo mai hi a pawl ka ti a. Kan ramin vaibelchhe 2,600/- vel lo lut tur la lut lo chung pawhin vawinah hetiang hian sorkar te pawhin kan hlawh leh engkim mai, 'a changin a tlai deuh' tihloh chu kan la char char thei hi kan finance lama kan hotu leh mithiamte an inpekna zawng zawng hi a ropui ka ti a, tun dinhmuna finance budget te tlema tlahniam hret avanga kan leiba tlahniam tura ruahmanna an siam te hi a ropui ka ti hle a ni.

Demand No. 7 - Excise Department hi ka sawi duh bawk a. Kan hriat angin MNF sorkar ve leha zu-zawrh tih tawp a ni kha, kum 2018 atanga December 2021 thlenga revenue hmuhte State sorkar-a chhunluh a ni thei te hi a lawmawm tak zet zet a ni. Kan hriat angin ram leh hnam humhalhna tur atan hi chuan, ruihhlo hi a nasa a, ramri hrulah nasa takin tunah hian an tawlh nasa a ni. Chuvangin, hemi kawngah te hian 'tan kan lak thar leh a pawimawh em em a ni' tih kha kan sawi duh a, 'hei hi kan ram leh hnam damna tur a ni a, kan ngai pawimawh tur a ni' tih kha ka sawilang tel duh bawk a.

Tichuan, helam Vairengte atanga lo kal si lovin, Serkhan - Bagha Road atanga a ruka lo kalte an tam thin avang hian hei hi kan Minister zahawm takin min lo hriatsak sela, Serkhan-a by-pass-a an lo kalna hmunah hian Excise Outpost emaw, mobile check-post emaw hi dah a tul hlein ka hria a, 'hei hi min lo hriatsak se' tih kha kan sawi duh bawk a ni.

Demand No. 29 - Social Welfare hi kan sawi ang khan ruih-hlo ngaite kan sorkarin a ngaipawimawh a, a buaipuina tur tunah hian Sethawn, ka bialah 'Jordan Center' buaipui a ni a. February Ni 7, 2022 khan hman hawn a ni a, rei tak 3C atan hman a nih avangin, tunah hman tan leh a ni ta a. Tunah hian mi 31 admit niin, harsatna nei mi 6 an chhuak a, tunah hian mi 25 enkawl mek an ni. Doctor leh mithiamte'n uluk taka an enkawl a ni a. Member-te bial hrang hrang enkawl kan ni a, harsatna nei kan awm anih chuan hei hi hman tangkai turin House-ah kan inhriattir nawn leh ni se a tha awm e.

Ka bial chhungah hian Social Welfare Minister in min lo hriatsak se ka duh chu, Thingdawl Block-ah hian hmun tha tak kan mamawh em em mai a, Eklavya Model Residential School te hi min rawn sak sak ve turin ka rawn beisei bawk a ni.

Demand No. 34 - AH & Veterinary hi han sawi veleh ka duh a. Hetah hian hmalakna hrang hrang kan nei a, kan sorkar pawhin kan ngaipawimawh hle mai a. Kan ranvulh mai bakah kan eitur sa enkawltu department a ni a. SEDP atang hian kum kal ta atang khan ₹1895 lakh chhungkaw 1020 tana pek a ni te hi lawmawm ka ti a. Tun 2022-2023-ah hian chhungkaw 4000 tanpuina tur SEDP Board thahnemngaihna atanga kalpui mek a ni te pawh hi a lawmawm ka ti hle a ni.

Tichuan, ka sawi duh chu, nodal-department MULCO hnuaiiah hian dairy sector hi a pawimawh khawp mai a, ram changkangah pawh an ngai pawimawh a. Hemi kawngah hian bawng vulhtu ten harsatna tam tak an tawk a, hei hi kan sorkar-in an ngaihpaawimawh zual nan ka han sawi tel duh a. PIGFED te pawh hi Vety Department hnuaiia awm a ni a, ran-chaw siam te hralh chhawngin an zuar mek a ni tih kha ka han sawi lang tel duh bawk a.

Tichuan, ka sawi duh pawimawh lai ber chu AH & Veterinary hnuaiiah hian ram pawn atanga ran lo lut te hi uluk takin a chhia leh a tha lo venna animal-checkgate khaw 10-ah kan dawh tawh a. Hei hi nichina kan sawi tawh ang khan Vairengte-a kal lo, Bhaga Road atanga lokal ru te lo venna tur hian Bukpui tlangdungah emaw Serkhan-ah emaw hian animal-checkgate hi dah ve theih ni se kan ram hian kan mamawh hlein ka hria a ni. Kan sawi ang khan Serkhan atanga Bukpui tlangdung saw hmuna tha a ni a, a nuam em em a. Chuvangin sawlai hmuna sawn 'Pig-multiplication Farm' hi a khawi berah emaw sawn min din sak ve turin ka han ngen bawk a ni.

Demand No. 41 - Sericulture hi ka sawi ve leh duh bawk a. Kan hriat ang khan a ram pumah hian chhungkaw za vel hian eizawna atan kan hmang a. A nodal-department hnuaiiah hian SERIFED a awm a, SERIFED Board mumal tak nen nasa takin hma an la a. Heng te pawh hi tih changtluna ngaihsak hi a tul hlein ka hria a.

Ka bial chhung Kawnpui-ah pawh hian sericulture farm a awm a, hei pawh hi changtlung zawka min han tihsak turin ka ngen bawk a. Tin, pangang khawi tam tak an awm bawk a, a hmuna te pawh ka enpui a. SEDP kaltlanga tanpuina kan han siam te hi a ropui ka ti a. Chhungkaw tam tak tan eizawna pawimawh tak a ni tih kha ka han sawi duh bawk a ni.

Awle, kan Chief Minister leh kan Minister zahawm takte demand kan han sawite kha 'pawmpui ngei turin ka rawn support a ni' tih ka rawn sawi a ni e. Ka lawm e.

DEPUTY SPEAKER : Tunah chuan member zahawm tak Dr. Vanlalhlana i lo sawm ang u.

DR. VANLALTHLANA : Pu Dy. Speaker, ka lawm e. Vawiina kan demand sawiho hi Dr. Beichhua leh kan Chief Minister te demand a ni a. Dr. K. Beichhua, kan Minister zahawm tak budget hi 13%-in a tlahniam a. Kan Chief Minister zahawm tak hi 143.37%-in a pung thung a ni. A hmasain Dr. Beichhua demand ho-ah khan han lut ta ila, Excise & Narcotics-ah hian.

Rangvamual-ah ‘drone hmangin kan en dawn’ tiin hma an la a, hei hi ka fak duh a. Thiltha niin ka hria a, a hlawhtlin tur leh tur loh chu thudang ni sela. Mi pawhin an fiam nasa a, amaherawhchu, tha-tina lamah a kal a, a bei pawp a, a fakawm ka ti a ni.

Tin, Mizoramah hian hmun hrang hrangah zu hmuh awlsamna bik hi a awm a, kan hre theuh awm e. Hetah hian kan endan te hi tih danglam a ngaiin ka hria a. Excise Department hian Rural Department hnuaiah State Rural Livelihood Mission te an nei a, UD & PA hnuaiah National Urban Livelihood Mission te a awm a. Tin, LESDE hnuaiah Skill Development and Entrepreneurship te a awm bawk a. Chu bakah Social Welfare Department lamah te pawh thil chi hrang hrang a awm a ni. Chutiang te nena kan en hoa kan buaipui a ngai tawhin ka hria a, ka han sawi tel duh a.

Tin, Social Welfare-ah khan ka han lut leh ang a. A hmasa berah chuan, ‘tarpension kha i pe tawh teh ang’ tiin ka rawn ngensak a ni. Scheme tangkai leh tha tak tak a awm a, hengte hi Mizo tawnga daha, lehkhabu-a siama PDF-ah te daha internet atanga download theih tur hian siam turin Minister zahawm tak kha ka han ngen duh a.

Tin, Drug-demand Reduction-ah hian NGO te aia sorkarin hma kan lak hian ‘a effective lo zawk em aw’ tih tur hian a awm thin hi kan inenfiah deuh chu a ngaiin ka hria.

Demand No. 41 - Sericulture-ah ka han lut leh ang a. Intodelhna lamtluang atana Mizoram-in kan hman tangkai theih tur Sericulture Department kan sawi dawn a ni a. A pawimawh khawp mai.

Pu Speaker, kan bial nuho tahchhuah ka rawn keng leh a, Mulberry atanga kan tah a ni a, puan bih tur a ni a, kan handloom project a ni. Hei pawh hi a plain a ni a, kan minister leh department-a hnathawkte hnenah lawmthu ka sawi duh a. MoU an neih kaltlangin kan biala nuhovin silk a thlawnin an lo dawng a, nakinah hei hi department-in min chansak leh dawn a. Eizawna mumal an nei a ni a, market nen khan a in connect avangin a lawmawm ka ti a.

Tin, silk hi ka fak duh a, allergy nei, vun lama harsatna neite tan a tha em em a, lukhamah hian an hman nasa a. Hmeichhia tan pheichuan sam a tibuai lo deuh bawk

a, allergy siam thei thil tam tak kha a hnawt bo ve bawk a. Chutiang chuan tangkaina tam tak kha ka aiin kan minister khan a hrechiang zawkin ka ring a, a bak kha chu ka sawi lutuk tawh lo ang a. Silk Emporium hi rawtna ka siam duh chu, Bawngkawn South kawngchhakah sawn a awm a, Chanmari atanga Treasury Square inkarah hian dah dan awm thei ta sela tih kha rawtna ka han siam ve leh a nih chu.

Tin, cocoon thleng hian department hian a la a, a *post-cocoon* hralhna lamah hian hma kan lak tel a ngai khawp mai a. Kan minister pawh hian a veiin ka hria a, an hmalak zelna turah duhsakna ka hlan tel duh bawk a ni.

Veterinary kha chu nakinah SEDP ka sawi dawn a, nakinah lut ta mai ila a tha ang e. Kan Chief Minister zahawm tak Pu Zoramthanga Demand-ho ka luh hmian, Laipuitlang leh Ramhlun South thlanmual kalkawng hi a hmian ka sawi tawh thin a, min han siam sak a, an la zo lo deuh niin a hriat a, lawmthu ka han hrih duh a. Laipuitlang PWD quarter saw ka sawi thin bawk a, a chhe lutuk a, eng emaw thutah lirnging te pawh awm thut sela thil hlauhawm a nih avangin min en sak vat turin ka ngen duh a. Tin, Ramthar Galili Veng UPC Biakin bula lei saw a buk thei titi ang tein a lang tawh a, hmanni paw khan ka han en a. MLA Fund-a tih theih mai a ni si lova, chuvang chuan min lo endik sak turin ka han ngen duh a ni.

Member zahawm tak Pu Lalrintluanga Sailo sawi kha kei ka tawmpui a, driver leh PSO-te thutna leh inthiarna turte kha ngaihven sak thei ta se tih kha ka sawi ve leh duh a ni.

Finance Department, Demand No. 9-ah hian ka lut ang a. *Pension charges*, pension-ho tana sum sen tur hi a rawn sang awk mai a, kan pensioner-te tan thil lawmawm tak niin ka hria a. Pension pawh an dawng tha thei deuh tawh ang chu.

Tin, IFMIS hi kan hre tam lo khawp mai a, kan Chief Minister hian min rawn hrihfiah sela ka duh khawp mai. ‘Sorkar-in eng angin nge hma a lak, eng angin nge a nghawng dawn’ tih hi mipuiin kan hriat a ngaiin ka hria a, Cheng nuai 1,000 dah a ni a, tin, NABARD hnuaiah cheng nuai 15,749 dah a ni bawk a. Sorkar hnathawk hlauh kan sawi thin a, pa-berin pawisa a kawl a, inah chuan pa-ber emaw nu-berin, ‘*sawma pakhat* hi kan pek ngei ngei a ngai a ni; kan dah hran a ngai; kan nulate hlauh dah hran a ngai’ an ti a, thla tirah an dah hrang thin a ni a. Amaherawhchu tuna kan sum enkawl danah erawh chuan RBI-ah khan, ‘kan indaih leh lo, ways and means advance-in pawisa kan lo la leh lawk’ an ti a, an rul zo lawk a, ‘kan mamawh leh a ni e’ kan ti a, kan zuk lak leh a ngai a. Achhan chu, thil dangah ka sawi fo thin *restricted tender* tein kan lo induhsak ve a, khangah khan sum sen te a lo ngai ve a, a hlauh tur lamah pawisa kan lo indah seng leh si lova. Khatah khan kan sum puk pawh kha a sang ta a ni.

Prof. Mawitea, MLA zahawm takin sum puk chungchang kha a rawn sawi a, a dikna chen a awm. Amaherawhchu, a amount te kan sawi ta law law bawk a, Congress an sorkar chhung khan an leiba, khami, a chhunga mi RE atangin ka teh a kei chuan, khatah khan vaibelchhe 4716.26-in a tam belh a. Tun kum 4 chhung hian tuna kan budget estimate nen hian cheng vaibelchhe 4,500/-in a punbelh dawn a ni. Kum 4 chhungin; kum 10 a ni lova. A hmain vaibelchhe 4,700/-in a pung a, tunah vaibelchhe 4,500/- a ni ta a. Sum kan enkawl thiam dan chu a lang mai awm e.

Planning & Program Implementation-ah ka lut leh ang a. Chhim lam chhuak deuh kan nih avang hian HPC Lunglei minor works 500 a awm hi a lawmawm khawp mai a. A tlakhniam te kha ka lo hlau deuh zawk a, a ngai chiahin a la awm a, a lawmawm ka ti a. SEDP hnuaiah *Sustainable Development Goals* te an han enkawl a, a pawimawh a. He thil hi kan ngaihven tam lo a naa, thil pawimawh deuh a ni a. Tin, Entrepreneurship Development Scheme, Planning-in a nei a, he thil hmang hian Mizoram pawh kan lo hmingtha tawh thin a. Zawhna ka zawh vawiinah pawh a rawn chhuak a *Unstarred*-in, hma an lo la nasa khawp mai a. Khangah khan minister changtute pawh a ni ang chu, a hnathawkte pawh an hnathawhna a ropui ka ti hle a ni.

PWD-ah ka lut chho leh ang a. Kawng chhawng atangin contractor chhawngah kan han lut chho chu a ni dawn a. PMGSY hi kan sawi nasa thin khawp mai. Indaihloh thilah *Internal Auditor* kha kan han pui ve hlauh mai a, tumkhat chu, sawi tur a tam khawp mai. A tibuaitu tam ber chu ‘party mite kan ni’ tih hi ka sawi duh, a bak chu remchang dangah kan la sawi ang. An va chuh a, a document te nen thlenga fel lo, ‘chu chu a fel lo’ tih kha party mi leh sa an ni a, ‘lo ngaidam mai ru’ tihsak ngaite pawh kha an awm a ni. Chuvang chuan kan inenfiah a ngai tak zet, a sorkar tu pawh ni rawh se, PMGSY-ah chuan puh tur dang an awm lo.

Ka lut zel ang a. ‘Restricted tender’ te kan ti thin a, ‘kawng chhawng’ te kan ti a, ‘airport’ te kan ti a, *Kamrul-a* hi kan sawi lo thei lo. A tir atangin ka sawi ka sawi, ka lut lo thei lova, a chhan chu kan thenawma awm thin a ni. Tuna mi Pu Dy. Speaker, i ding lama mite an sorkar hnu hian keini chu thenawm hnai kan ni a, thingpuite kan in ho thin a, a ni pawh a rawn leng pheii ve a, ngaih ti-thalo deuhin a tawngkam kan hriat te pawh kha a awm ve a. ‘CM hna ka thawk a, a fapa nen chhim lamah pawh kan zin dawn’ tih te a ni. Chuvang chuan kan ngaih a tha lova, a hming kan sawichhuak a ni.

Lengpui Airport siamna atan hian SEDP-ah vaibelchhe 12 chuang hman a ni a, thil dang atangin vaibelchhe 35 chuang hman a ni. Vaibelchhe 47 chuang hi airport siam nan hman a ni a, chu chu PWD hnuai a ni. Department 48 awm zingah hian department 21 hian vaibelchhe 47 budget-ah an nei phalo, chu chu tunah khuan airport-ah kan vawm ta a ni. Work-order pawh awm hmain hna an thawk a, airport chei pawh endik a har em

em a, khulaiiah khuan dan neuh neuh te a awm a. Chuvang chuan, ‘eng emaw chu a awm a ni ang’ tih kha rilruah a awm a. Nimin mai khan Pu Dy. Speaker, i dinglama mite khan Police-ho kha an fak a ni. An fak a, ‘an tan chuti khati’ tiin an sawi a, nuam an ti a, an mut pawh a tui viau maithei. Kan Police Force-te, Excise Department lampanga thawkte hi ngaihven an ngai a, lirthei namen lovin an indaih lova, border-ah duty thenkhat ‘silpauline hnuaiah te pawh an mut a la ngai’ tih te kan han hria a. Puan in hi ₹50,000/-aia tlem lovin tha deuh a lei theih a ni. Amaherawhchu, Airport restaurant-a thing a cheimawinaah khuan cheng nuai 15 kan seng thei, ‘kan police-te tan engnge awm ve, engginge kan pekchhuah theihloh, engnge harsa ta em em’ tih kha ka han sawi duh a.

Thil lawmawm deuh mai chu, a hmian ka sawi thin a, budget speech-a kumthar thuchah-ah ‘Ei leh bara-intodelh’ a awm a, amaherawhchu, SEDP-ah engnge lang ka ti a. Ka sawi thin a, kuminah chuan a rawn lang ta lova, ka ngaih a tha. Agriculture-ah te pawh tam chho turah ka ngai, tun thlenga SEDP-a vaibelchhia 764.91-ah hian Agriculture-ah cheng 1% vel a awm a, Horticulture-ah 1.85% a ni ang chu. Commerce and Industries ah phei chuan naia 65 chauh a awm, LESDE-ah cheng khat leh naia 96 chauh a awm bawk. Mi harsa te te dawm kan ngai, intodelh duh, bana kaih ngai ho enkawltu department an ni a. Amaherawhchu, pa-ber department PWD-ah 41% chuang a kal ta daih thung si. Kan thianpa Sport & Youth Services changtu pawhin 3% kha a rawn chang pha thung a ni. Hei kuminah hian vaibelchhia 350 dah a ni a, hengho atan hian Agriculture, Horticulture, Commerce & Industries leh LESDE-ah te hian a sang chho lo a nih, chuan nakum lamah chuan helaiah hian dawhkan kan beng ring viau tawh ang.

A lawmawm lamah, hei, Home Department lamah a chan te SEDP-ah a rawn chhang chho a, School Education te 5% a rawn ni chho hi a lawmawm a, Higher & Technical in naia 15 chauh an han chang thung erawh hi chu kan khawngaih deuh hlek a.

A tawp berah chuan SEDP-ah nuai 862 lai an lo sem tawh a, Veterinary hnuaiah hian. Khangte kha ‘engnge a hlawhtlinna ni ang’ tih hi kan rawn thlir zel dawn e tih kha kan sawi duh a ni e. Ka lawm e.

DEPUTY SPEAKER : Awle, tunah chuan Member zahawm tak Dr. Vanlaltanpuia i lo sawm ang u.

DR. VANLALTANPUIA : Pu Deputy Speaker, ka lawm e. Kan Chief Minister zahawm tak leh Dr. K. Beichhua demand te kan sawi dawn a. Department 14 lai a ni a,

kan Chief Minister hian Department 10 a chang a, Pu Beichhua hian department 4 a ni a, sawikim a har viau dawn mai a.

A hmasa berin Demand No. 1 - Legislative Assembly hi sawi ka duh a. MLA-te kan lawina ber department a ni a, anni hi fakloh theih ni lovin ka hria a, an efficient em em a, he hmuna hnathawkte hi chuan min ti lawm a ni, keini MLA ho zawng zawngte hi. Chuvang chuan, kan sawi danah pheih chuan “Legislative Assembly a hnathawkte ang vek Mizoram sorkar-a office a hnathawkte hi ni selang chuan, Mizoram hi a nuam ngawt ang” kan ti thin a, chutiang khawp chuan an efficiency level hi ‘kan ngai hlu em em a ni’ tih kan sawi duh a, kan Chief Minister in a enkawl naah hianin kan lawm a ni.

Thil pakhat chu, Parliament-a an neih ang chiah ‘*Reference Section*’ hi tun hnaiah hian kan Library-ah hian kan nei a, MLA tam takte pawhin kan hre lo mai thei a, kan duh ang chiah document ho kha, zu chungchanga inhnialna a ni emaw, Act kan neih tawh ho te pawh, in duh apiang hi Library-ah khuan zuk pe ula, an lo pe zel thei che u a ni. Chutiang system chu tunah hian introduce a ni a, kan reference section a hi ‘hma a sawn em em a ni’ tih ka han sawi duh a.

Tin, kan Assembly House hi rawtna pakhat siam ka duh a. Kan session nikhua hian traffic a jam nasa thei em em mai a, mipui ten kan kal khawm hi an tuar nasa a ni. Chuvang chuan, Assam Rifles te pawh kan chhuah tir dawn tho niin ka hria a, kan Assembly House hi ngei ngeia sawn ka rawt a ni. Security reasons-ah te leh traffic management atang te pawhin kan Assembly House hi ‘sawn ngei nise’ tih hi kan House Leader hnenah pawh hian rawtna ka han siam duh a ni.

Tin, pahnihnaah GAD, Civil Aviation bikah hian thil lawmawm deuh he House-ah pawh ka sawi ve thin a awm a, chu chu Pawan Hans Helicopter service hi a tha viau a, Mizoram-ah chuan, ‘hei hi a tha zawka thlak dan te a awm em’ tih kha kan han *raise* ve thin a, chuvang chuan Civil Aviation hian Ni 17.12.2021-ah khan tender tichhuakin, helicopter service tha zawk Mizoram-a a awm theihna turin tender an han tichhuak hi a lawmawm ka ti em em a, kan House Leader, kan CM zahawm tak hmalaknaah hian leh GAD zawng zawngte hmalakna hi ropui ka ti a, tih hi he House-ah hian ka sawichhuak duh a ni.

Tin Finance Demand No. 9 hi kan sawi ve leh lawk ang a. Mizoram mipui tena kan nghahfak, a tir atanga he sorkar-ina kan siam, sorkar thar a lo piana tanga nghahfak chu SEDP hi a ni a, mipuite’n ‘engtingge hma kan sawnpui theih ang’ tiin kan thli a ni. Chutah chuan, tun budget-ah hian vaibelchhe 700 lai reflect a ni a, tin, a hman dan tur pawh Chiang taka ziah a ni a, ‘mipuite fairelbel khawih zawngin hei hi hmalak tur a ni’ tih lo lang hi a lawmawm hlein ka hria a, Mizoram mipui ten hetah hian hmasawna

ropui tak kan hmu dawnin ka hria a ni. Tin, kan Leader zahawm tak pawh hian nakinah a sawi duh takin, budget hi vawi 3 lai hei, pharh a lo ni ta a, sum hi a hun chhung hian tih-*lapse* a la ni miah lovin ka hria a, hei hi a lawmawmin ka hria a ni. Chuvangchuan, Ministry hmasaah te sum tam tak a huna hmanloh *lapse* a awm thin niin ka hria a, kan Finance Minister zahawm tak hian hei hi vawikhat mah a la tilo niin ka hria a ni.

Tin, Sports Infrastructure tam tak tunah hian siam a ni a, kan vei lama thute hian Pu Dy. Speaker, thil kan sawipawlh nasa ang reng thin a, *budget* sawi hian *tender* chungchang te pawh kan sawi a. Amaherawhchu, engkim hi *head of accounts* mumal taka siam a nih avangin Sports Infra. tur na nana kha chu hmun danga *liquidity* maintain nan kha chuan a theih maithei e, amaherawhchu hmun danga va hman pawlh theihloh thil a tam avangin, khang ho kha chu hunbi neia tih te a lo ngai a. Tun hnaiah pawh PMGSY-ah te pawh vaibelchhe 800 emaw lai tlanchhuahna tur atan vaibelche 100 vel UC kan pek te a lo ngai a ni, chu chu a huna tih ngai vek thil te a lo ni a, chumi a nih avang chuan sawipawlh lo hram hram ila a thain ka hria a. *head of accounts*-ah fel taka dah anih thin avangin, kan sum te hi mumal takin kan official ten an lo zir Chiang a, chutiang chuan min monitor sak a ni tih hi hre ta ila. Ministry-in a duh duh dana thlahdah taka lo hman pawp pawp ang hi a ni lemlo tih hi kan hriat a tha a ni.

Tin kan budget system-ah BE a awm a, RE a awm a, Supplementary for Grant a awm a, chuvang chuan BE-ah hian sawifel hleithei a ni vak thin lova, kan thian thenkhat hian a number hi kan sawifo thin a. Amaherawhchu, a tak tak lo la thlenglo, projection ang mai anih avang hian a lo insawifelna hi chu kum tawp lamah te emaw a lo ni chauh thin a. Chuvang chuan, kan budget sawi danah hian tlemin hei ai hian technical thei deuh i la thain ka hria a. India ramin a inenkawlna tun thlenga a neih tha takah hian ‘supplementary’ tih te pawh mumal takin, ‘dan leh hrai fel tak hnuaiah tih a ni thin a ni’ tih te hi kan hriat a thain ka hria a ni.

Demand No. 14 - Planning & Programme Implementation-ah hian han sawi ve leh ka duh chu, Covid-19 in kan ram nasa taka min nuai atangin ‘kan dinhmun a chhe em em a ni’ tih kan hria a, kan budget hmuh tur tam tak pawh kan hmuh theilo tih a Chiang reng a. Mizo mipui hian thil hi kan chhut Chiang lovin, kan hre reilo em em thin a, dinhmun tha deuh hleka kan awm hian kan nihna pangai kha a ni emaw kan ti leh mai thin a, kan harsatna tawh zawng zawnga hi sawi leh hi kan tum tawh thin lova. Chuvang chuan tuna kan hun khirh tawh hi ‘a rei em em a ni’ tih hi kan hriat a thain ka hria, chu harsatna namenlo chuan min tuam a. Chumi anih avang chuan, chumi kara kan Finance Minister zahawm takin Planning Department a enkawlna hnuaiah fel taka engkim allocations pek a ni thin hrim hrima te hi a lawmawm ka ti em em a ni.

Tin, 'NITI-Aayog' hi kan hre vek a, India ramah Planning Commission thiah anih atangin NITI-Aayog chu '*think-tank*' angin a function mek a, chuvang chuan kan Planning Department pawh hi tun aiin thahnemngaihna aw kan chhuah ang a, a thawktu ho pawh an fel em em a, thahnem an ngai em em a, tun aia tha zawk hian, tun aia ngaihtuah ril zawk te hian, '*think-tank*' tak tak ni turin Mizoram economy zir chiang tak tak tura kan buatsaih pawh a tulin ka hria. UN hian 2015-ah khan SDG goal-17 a siam a, chu chu, 'sustainable development goals' an ti a, UN ram zawng zawngte hian '2030 agenda' an ti a, chumiah chuan, "heng goal-17 te hi kan tihhlawhtlin chuan, ram zawng zawngte hi an lo ropui hle theuh dawn a ni" tih a awm a ni. Chung chu SDG-17 mil te pawh chuan kan kalpui a hun hlein ka hria a, Mizoram-a kan policy lak hrim hrima hi SDG-17 mil te hian kan Planning pawh hian her rem thei se a tha hle a ni tih rawtna ka thlen duh baw a ni.

Demand No. 7 - Excise & Narcotics-ah hian sawi lawk duh ve ka nei a. Mizoram-in kan buaipui em em chu, ruihhlo - Met Amphetamin te, No. 4 te, alcohol tih te hi kan man nasa viau mai thin a. An thawkrim em em a, tunhnaiah phei chuan No. 4 te hi an man tha em em mai a, Mizo thalai nunna tam tak suattu hi min vengin ka hria a, ka lawm em em a, 'he department hmalaknaah hian kan lawm hle a ni' tih ka sawi duh a. Tichuan, rawtna pakhat siam leh ka duh a, thahnemngaih thuaah - A bik takin ruihhlo kan man ho-ah hian alcohol bika hi, ruihhlo dangte hi chu ka sawi lo ang a. Alcohol bik, state danga tanga kan lakluh te hi chu state dangah zuar an awm tho avang hian engtin emaw thawn leta, sorkar-to-sorkar anga indawra, vaw keh mai lo leh leihbaw mai lova 'sum leh paia chantir dan hi a awm lo maw' tih hi kan Minister hnenah hian rawtna ka siam duh a. Kan ram hi a retheih avangin kan resource neih ang ang hi kan hman thiam a tulin ka hria a, chuvang chuan, alcohol ang te phei hi chu seal vek a lo ni a, state dang atanga lak a ni a. Chuvang chuan, 'sorkar anga han inthleng tawn theihna dan te hi a awm lo maw, leih bua leh vaw keh mai lo hian' tih te hi thahnemngaihnaah kan sawi duh a ni.

Tichuan, a tawp berah Demand No. 41 - Sericulture Department-ah hian, kan hriat angin Mizoram hi *Eri* leh *Muga*-ah hian potential nei tha tak state kan ni a, global-warming te avangin tunah hian Mizoram chu dinhmun tha takah kan ding mek a ni a, theihtawpin bei ila a thain ka hria. Department-in Ministry-ah DPR te an thelut tha a, theihtawpin nasa zawkin hma han la ila, mulberry leh tassar-ah te hi chuan tlemin kan dinhmun hi a tha lutuk lo deuhin ka hria. A bik takin '*eri* leh *muga*-ah hian tan la ila theihtawpin' tiin thahnemngaihna aw kan chhuah duh a.

A tawp ber tak takah chuan Pu Dy. Speaker, Demand No. 34 - AH & Veterinary-ah hian, SEDP pilot project-ah chhungkaw 1020 hnenah vaw leh ar-vulhna an lo pe der tawh mai tih te kan hmu a kan lawm hle a ni. Veterinary Hospital 7 lai sak a lo ni

tawh a, tin, African Swine-Fever (ASF) te pawh control lo ni ta, department anga an lo control thei ta hi a lawmawm kan ti em em a, kan ngaihlu a ni. Mizo hi sa ei-hnam kan nih avangin, ‘han tang zel teh se, an department te hi kan lo support zel ang’ tiin kan sawi duh bawka. Tichuan, kan Minister zahawm tak te, kan Chief Minister zahawm tak tena an Demand rawn putluh hi ‘lo support theuh ang u’ tiin ka rawn sawi ve a ni e. Ka lawm e.

DEPUTY SPEAKER : Tunah chuan Member zahawm tak Pu C. Ngunlianchunganga i lo sawm ang u.

PU C. NGUNLIANCHUNGA: Pu Dy. Speaker, ka lawm e. Sawi tur a tam nasa si a, hun in a daihlo leh nasa dawn hle mai a. A hmasain, kan Chief Minister zahawm takin min react tura ka duh chu - Kan Chief Minister zahawm tak hi han dawr leh han kal te hi a ti nuam a, tin, elected-te ngaipawimawh mi anih kan hria a. Ni 18.1.2022 khan District Council-a kan Ex-CEM te, kan Ex-Chairman te Mizoram House an thlen ve nah ‘official anga treatment pek ve nise’ tih kha ka va dil a, ‘Ni e, kan lo ti dawn nia’ a ti a, wawiin thleng hian order engmah kan hmu si lova, kha kha min mangnghilh sak ta em ni aw ka tia, khawngaih takin min react hram se. Uiawm pawh a ni lova. Kan hotute anni ve a, Mizoram House-a an thlen khuan sorkar thil a ni emaw, eng emaw pawh, thil hrim hrimah khan private anga thlen tir annih khan an khawngaih thlak khawp mai a. Kha kha khawngaih takin wawiinah hian min hriat sak se ka duh a.

Tin, a pahnihna-ah chuan, District Council sawn kan sawi tawh angin anmahnia Dan siam theihna te, hlawh siam theihna te an nei a, DC & MA Demand kan sawiah khan ka sawi tawh a. Wawiinah hian Finance anih angin, Demand No. 9 hi ka sawi duh chu, District Council ten an *Pay & Allowances* dan an siam, hlawh an inpun vena kha kan sorkar hian pe ve hram se, an siam ang diak diak a nihloh pawhin, sawipuia, ‘tun dinhmun aia hma an sawn ve theihna turin’ tih kha District Council-a kan member lo ni tawh te tan ka han sawi a ni.

Tin, Demand No. 5 - Vigilance Department-ah khan Lok Ayukta kha 2019-ah din a ni a. Chair-person chauh hi ala awm a. Kha, *Unstarred Zawnha*-ah pawh kan hmu a, khalaiah khan judicial aiawh te leh non-judicial tur kha member *pathum* tur an nih laiin member *pakhat* chauh a awm a. Hei, tunah pheih chuan kan hmang tangkai chho viau dawn niin a lang a, Lok Ayukta-a member turte kha judicial aiawh leh non-judicial aiawh pathum ni tur khan ‘*full-phase*-a a kal theih nan hmalak ni hram hram se’ tih kha kan sawi duh bawka ni.

Tin, kei hi Finance-ah nge ni ang a GAD-ah, Finance lam pawh a ni thei tho ang a, GAD zawng pawhin a ni thei tho turah ka ngai a. Mizoram House chungchang hi sawi ka duh a.

Mumbai-ah khuan hei, kei hi cancer inenkawl lai, Kohhran-ho tawngtaina Pathian-in a chhang a, tunah chuan harsatna ka nei tawh lova. Mumbai khu Mizo hian kan pan tam em em mai a, kan House neih khu a chep a. Tin, Society In-luah a ni a, Mizo ho chuan dangpui te kan duh a, khanghu te, kha kha building pakhata awm kan nih avangin harsatna a tam em em mai a. Tin, hei, tunah covid hri te a leng a, heng velah hian khatianga thleng khawm na nana kha chu harsatna tam tak a awm a. Khulai khu Congress sorkar hmasa khan Mizoram House sakna tura tan ruahmanna thui tak a kalpui tawhin ka hria a, khang te kha engtingge bawhzui anih dan? Mizoram House khu kan neih a ngai a ni. Hei, Kolkata-ah chuan pahnih kan nei a, Guwahati-ah kan nei a, Delhi-ah te pawh. Mumbai khu cancer ve lo tan chuan kan hre vak lovang a, cancer tan hian a hlut zia mai khu a lang chiangin ka hria a. Chuvangin, tunah pawh khuan flat pathum lei tur crore 10-in a awm a, Mizoram sorkar hnenah hian dilna te pawh an lo siam tawh a. Engpawhnise, kan Finance Minister, kan Chief Minister ni bawh hian min ngaihpaawimawh sak se kha ka duh khawp mai.

Tichuan Demand No. 32 - Horticulture Department hi, hmanni khan question hour-ah khan ka zawt tawh a, ka zawhna a chhuak hman lova. Amaherawhchu, Pu Dy. Speaker, i hriat angin zawhna kha a hnuah a chhanna min rawn pe ve leh a, chulaiah chuan, Lawngtlai-a dragon fruit chin chungchangah khan, “department-in field staff-te a hmuna kala endik vek a ni a, chutiang chuan thlan an ni” tih lai tak kha kan Chief Minister hian ‘thu min hrilh dik lo a ni’ ka tihna ni lovin, department lam zawk hian member te hi ‘a chhanna dik min pe thin rawh u’ tih hi ka sawi duh a ni. A nihna dik tak kan hre Chiang si a. Field staff-te a hmunah an kal a, ‘tui an nei tha a, a location a tha a, kawngpui atangin a hnai a’ tiin mi paruk an thlang a, a ban pawh an phun tir vek tawh hnuin chu an thlana chu chunglama thuneitute atangin thlak leh vek a ni.

Chuvangin, vawiin a ka sawi duh em em chu, department hotute pawhin kan minister-te emaw, kan CM emaw pawh ni se, a chhanna dik hi pe thin ula, he ram hi Kristian ram anih angin a kal theiin ka ring a ni. Dik mang lova inchhan fo mai hi; kan mitin a hmu a, kan bengin a hria a ni. Vawiinah hian a hmunah kal ila a taka hmuh theihin a awm. Helai a inchhan-mam mai mai ang chi kha chu ‘a tha lo a ni’ tih kha ka han sawi duh a ni.

Demand No. 45 - PWD hi chawhma lamah khan kan zawt belh teuh tawh a. PWD chu ni chiah lo mahse, kalkawng chungchang anih avangin nikum November Session khan Chief Minister hnenah ka sawi tawh a.

Ka bial Diltlang - Parva Road, BRTF enkawl lai 'Defense Road' hi a chhe em em a, social media lamah pawh kan lo hmuin ka ring a. Hmanni pawhin ka zuk kal a, tunah chuan thal a nih avangin a kal theih mai a. Fur a nih chuan eng ti zawng mahin an kal dawn lo. Bialtu ka nih angin an Chief Engineer hnenah te pawh ka phak ang tawkin ka han ziak ve a. Kan Chief Minister pawh min ngenpui turin ka han ti a. Helai hi min hriatsak leh hram hram se ka duh a. Chuti a nihloh chuan kumin fur a thlen hian engti zawng mahin Vaseikaiah lirthei a kal dawn lo. A chhan chu motor-in tuihawk a hleuh a ngai a ni. Saibawh atanga Vaseikai hi a chhe zual em em a. Khawngaih takin kan Chief minister zahawm takin, PWD enkawltu a nih ang pawhin min hriatsak a min umzui sak ka duh em em a ni.

AH & Veterinary Department lam hi sawi pawh a phurawm vak lova, kan bial hian a tuar nasat em vang a ni. Kan hun lai khan 'Rural Health Animal Centre' tih hi mamawhna avangin kan dah ve a, regular post te a awm theihloh vangin *wages* atang tein dah a ni a. Diltlang South-ah te, M Kawnpui-ah te, Vathuampui-ah te, Kar Lui-ah te, Hmawngbu-ah te dah a ni a, he sorkar a lo din hian min withdraw sak vek a. Hmanni lawkah pawh social media-ah te in lo hmuh chuan Vathuampui leh a chheh velah phei chuan Ui-hri a leng nasa a, mithiam an awmlah avangin a lungchhiatthlak khawp mai a ni. Kan hunlaia Vety building kan lo sak ve te, hna-nghet kan pek theih loh, wages atanga kan lo chhawr ve te kha min bansak fai vek a. Budget-bu, Demand No. 52 kan han en chuan, wages hi nikum lam aiin kuminah a pung daih zawk a. 'Min dahsak rawh se' pawh ka ti lova, a dah dawn chuang pawhin ka hre lova, thuphungin ka han sawi duh a ni.

Thil vanduaithlak tak mai chu Veterinary Department hi nikum aiin *salary*-ah hian cheng nuai 722.35 lai maiin a tlahniam a. *Wages*-ah hian nuai 54,46,000-in a pung thung a. Kan Vety minister-in a chhannaah hian, dispensary ruak tam zia *Unstarred Zawhna* a chhannaah te hian kan hmu a, 'Hmun ruak thawktu awmlahna a awm em' tiha a chhanna chu - 'Aw, awm e. Checkgate 50-ah officer an awm lo, Dispensary 56-ah an awm lo' tih a ni.

Kan bialah Chawngte-ah te Doctor kan nei thin a Hhe sorkar-ah hi chuan a awm tawh lo a; Sangau-ah a awm thin a, tunah hian Vanlaiphai nen kawp tir a ni a; Bualpui 'Ng'-ah Dispensary a awm thin a, tunah chuan a awm tawh lo a ni.

Pu Deputy Speaker, pakhat chauh min han hrilhfiah leh tura ka duh chu - Governor's Speech-ah khan, vawk-thite tanpuina turin compensation vaibelchhe 11,96,000/- kha central-ah dil a ni tih kan hmu a. Kan Minister-in Pu C. Lalsawivunga Zawhna a chhanna, *Starred Question No. 199*-ah hian, vaibelchhe 10,25,000/- chauh dil

angin a lang leh si a. Helaihia hian nuai 1600 vel *difference* a awm a. Khalai “Vety lam chhanna leh Governor’s Speech kha engnge a awmzia ni ta” tih ka han zawt duh a.

A tawp berah chuan, kan hunlai pawh khan PRRS avangin vawk tam tak a thi a, keini pawhin compensation tur kha central-ah kan dil ve a, mahse kan dil hlawhtling hleithe i lova, tam lo hle mah se, NEDP atangin vawk-thite kha compensation kan pe a ni. Kan ran vulhtu mi harsate khan an hloh zo ta a, bul an tan lehna atan chuan SEDP atang talin pek ve dan te a awm ve lo em ni? Kan Minister hi Central-ah a va kal a, ‘disaster’-ah puang ula tanpui dan kawng te pawh a awm mahna’ an lo ti a. STA lahin ‘disaster’-ah a puansak duh baw k si lova, kan minister hi a khawngaihthlak a ni. Kan bial min sawisa viau mah se a khawngaihthlak ka ti. Chuvangin, ‘SEDP atang hian vawk-thite hi tanpuina pe ve hram hram se la’ tih kha ka ngen sak a ni e. Pu Deputy Speaker, ka lawm e.

DEPUTY SPEAKER : A ngaihtuah ngei turah ngai ang. Tunge kan han sawm leh ang aw? Member zahawm tak Er. H Lalzirliana i lo sawm ang u.

ER. H. LALZIRLIANA : Pu Deputy Speaker, ka lawm e. Vawinah kan Minister zahawm tak takte pahnih, Dr. K. Beichhua leh Pu Zoramthanga demand sawi theia ka awm avangin ka lawm hle a ni.

Demand No.1 - Legislative Assembly hi an chung a lawmthu sawina tlem han chhakchhuah ka duh deuh a. An vawikhat tihna a ni lo tih a hriat a, he culture hi tun hnai maia an adapt a ni lo tih a hriat a. Assembly Secretariat hi an efficiency a sang a, MLA-te min take-care dan hi a lungawithlak ka ti a. Session hun rei tak awm leh schedule tight tak karah an manage dan hi a faktlak ka ti a, *corporate-culture* kan hmuhna awm chhun a ni ang em aw ka ti a. Dr. Vanlaltanpuia sawi tak ang khan, hetiang hian kan department zawng zawng hi function ta i la, ‘Mizoram-a kan department hrang hrang hi kan efficiency a sang ang a, a nuam ngawt ang’ a tih kha thil pawmawm tak a niin ka hria a ni. Kan department hrang hrang hi ‘kan efficiency a sang ang a, lawmawm ngawt ang’ a tih kha thil hlimawm tak a niin ka hria a ni.

Demand No. 9 - hi, Pu Dy. Speaker, i vei lama thu te hian a changtu minister hi ‘financial dictatorship a ni’ te an han bawng bawng mai a. Hun harsa tak karah, he sorkar a lo pianna rei lo teah hripuiin min nang a, ding leh vei pawh thliar hlei thei lo, tluk leh dingawn fawmin he sorkar hi a kal chho a ni. Central atanga kan hmuh tur ngawih ngawih nia kan beisei kan budget chhunga mi eng emawzah hmuhloh te kan han nei a. Helai karah hian sorkar hnathawk ten a hun taka hlawh an lakloh chang te an awm a, paw i kan ti hle mai a. Chuvangin Planning pawh a buai ang tih ka ring, paw i kan ti. Chutih lai karah vawiin ni thlengin hlawh han la ta lo emaw, department function

tha thei lo emaw sawi tur a awm lo hi, a changtu minister hi financial management-ah faktlak hlein ka hria a ni. Thil thar hlak mai 'PM-devINE', a hmawin kan CM in *peace-bonus* la awm ngailo, 'ka phuahchawp' a tih, central-in an siam, budget pawn lam atang sum hailuh hi thil awlai a ni lova. Kan Chief Minister hi nawr na tak anih avangin, tuna hming thara pawh hi 'kan Chief Minister in a nawr vanga rawn piang chhuak a ni ang em aw' ka ti hial a ni. North-East State thenkhat pawh an lawm viau ka ring a ni.

Tin, leiba chungchang kan sawi a, bat-loh hi chu a tha ber mai a, mahse ba-uchuak taka kan han sawi erawh hi chu a lainat thlak deuh hlekin ka hria a ni. Data a awm vek a, state hrang hrang han khaikhinnaah India ramah pawh keini aia tlem chu Sikkim leh Pondicherry an ni a, churang chuan heti em ema han demna tur hi a awm chuang em ni ka ti a ni.

Tin, GAD-ah hian Civil Aviation chungchang kha an han sawi a, kan sorkar tirh khan vai rama han zin thlawhna ticket man kha a sang thei hle mai a, vairam atang han haw pawh kha a huphurhawm thin a ni. Amaherawhchu, hun reiloteah thlawhna te kan han nei belh a, airport te renovate te a lo ni bawk a. Tunah chuan thlawhna zin pawh ticket flight-fare pawh a reasonable ta hle mai a, hengte hian mipui a chhawk hle a ni. A nihloh chuan thlawhna tlem te sector limit takah an thlawk a, tah chuan ticket a to thei em em anih kha, medical treatment la tur tan phei chuan a hautak em em a ni. Kan senior Pu Nguna sawi, GAD chungchangah 'Mumbai-a Mizoram House' a tiha kha kei pawh a tul ka ti khawp mai. State dangah hi chuan kan nei tha viau mai a, Mumbai khu 'financial capital' a ni a, cancer treatment a tan phei chuan a hmunpui ber a lo ni si a, nakinah cancer hospital te kan nei tha ve dawn a, kan la kal zel ang em chu ka hre hauh lova, state khat ve reng ruang chuan House mumal tak neih chu a itawm khawp mai. Hetah hian sorkar pawh hian ngaihtuahna nei ta se la a thain ka ring.

Tin, PWD-ah hian, member ten an sawi tawh ang khan kawng hi tha ber nilo mahse, kan nei tha viau a ni. NHIDCL hnuaiyah hian kan highway zawng zawng hi chu a lut a ni deuh ber tawh a. NHIDCL contractor te hi an survive thei lo an ti a ni hmun tam tak ah hian, a chhan chu contractor ten tender an chhan hian *25% below* te, *28% below* tein an chhang thei tlat mai a, hei hi a pawl khawp mai a, hei hian quality a tichhe em em a ni. State thenkhatah chuan margin an siam sak a, 15% ai sanga an chhan hniam chuan an cancel tawp mai a ni. Khatiang system kha kan adopt ve vat loh chuan changtu Minister pawhin central lamah tihtheih dan a awm chuan thlen ve dan awm sela. Hei hi kan siam ve loh chuan kan quality kan maintain thei dawn lo a ni.

Kan beisei, kan beisei ngam siloh, NH-44A a contractor phei chu an machinery zawng zawng nen an chhuak vek tawh a, an revised-estimate chhuak theilo, CM pawhin vawi duailo DO letter a thawn a, department thenkhat-te nen kan zuk kal ve a Delhi-ah,

CM-in DO letter min ziah sak a, vanneihthlak takin kan hlawhtlinpui ta hlahu mai a, tunah hian kan bei tha leh dawn a ni. Kan Chief Minister hian min duhsak a, ka bial mipuite hian min en turah kan ngai a, “special centre assistant for capital assets” tih hnuaiah hian Mamit ina kan sawi ve fo mai, ‘Mamit Link-Road’, kan naupan lai atang NBCC-in an laih tlang nel nual, tlang tak tak thei chuang silo, sorkar awm tawh apianga kan sawi, mahse hlawhtling thei silo chu tunah hian kan Chief Minister hian sum te min pein min tihlawhtlinsak dawn a, kan lawm hle a ni. NH-44 junction - Mamit playground pawh min tihsak dawn niin kan hria a, kar leh lamah chuan department te nen sawi hovin hma te pawh lak tan vat kan tum a ni tih kha kan sawi duh a ni.

Tin, Excise & Narcotics hi tlem sawi ka duh a. An thawkrim a, sipai an indaih lova, State boundary te, international boundary-ah te kan awm si a, hengah hian staff-te inpekna a ropui a, an chungah lawmthu kan sawi a ni. Tripua leh Assam boundary-ah kan awm a, ruihtheih thil lakluhna remchang tak a ni. Chutihlaiin Mamit-ah khuan office mi in luah mai maiin an awm a, sak ve theih ni sela tiin kan sawi sak ve duh a.

Tin, Vety Deptt-ah hian, a minister leh department te hnenah kan lawm hle mai a, Lengpui khuaah khuan Dispensary thar tunah khuan min sak sak mek a, Mamit-ah Vety hospital min siam zawh sak tawh a, Satellite min hawn sak tawh bawk a, kan lawm hle a ni.

Tin, ASF len chungchangah khan a tuar ber bial leh district kan ni a, Lengte leh Nghalchawm te, kan hriat angin ‘cluster area’-ah kan puang a, vawk farm lian tak tak a awm a ni. Vawk 700 - 1000 dawn dawn awmnaah an thi vek a, a bul atangin tunah beih tan leh a ni. Tin, Lengpui, Lengte, Nghalchawm a bik takin tuar nasa khua an ni. Department-in theihtawpin hma an han la a, hriheng anih avangin contained a har a, amaherawhchu an thawhrimna zarah tunah chuan hrite’n min kiam san niin kan hria a, an thawhrimna chungah kan lawm a, lawmthu kan sawi a, an kal zelna turah duhsakna kan hlan a ni.

Tichuan, wawiina kan demand sawi - Dr. K. Beichhua leh Pu Zoramthanga chan te hi ka thlawp a, hlawhtlingpui ngei turin ka support a ni e. Ka lawm e.

DEPUTY SPEAKER : A lawmawm e. Tunah chuan Member zahawm tak Pu Ramthanmawia i lo sawm ang u.

PU RAMTHANMAWIA : Pu Dy. Speaker, ka lawm e. Wawiinah kan Chief Minister leh kan Minister zahawm tak Dr. K. Beichhua te demand kan han sawi dawn a. Department pawimawh ve ve a ni a, sawi tur a tam a, amaherawhchu kan fawmkim thei dawn lo a. A hmasa berah Public Works - Demand No. 45 hi ka ti hmasa duh a.

MNF sorkar apianga thil thalo theiloa sawi chu ‘kawng’ hi a ni tlat a ni, a lawmawm ka ti a. Chuvang chuan, PWD-a thawktute zawng zawng officers te, a hnuai lama mite zawng zawng, vawiinah hian lawmthu ka sawi a, kan ram chhim leh hmar, chhak leh thlang kawngpui tam tak an enkawl a, an lai a, an siam tha a, an repair bawk a, a thar an lai bawk a, hah tak leh rim takin an thawk a, chungte avang chuan kan ramin hmel thar duhawm tak tak kan hmu a. Heng hi PWD changtu minister chak zia leh a team te an thawhrim leh taihmakna avang hian kan Mizoram pawh hi ram nuam tak, kawng tha tak min pe a, kan lawm em em a ni.

‘Tun ang reng renga Aizawl khawpuia kawng that rual hi a la awm lovang’ an ti a, kan thiante’n. Pu Dy. Speaker, thlak te min lo thawn a, a rem chuan, a ropui khawp mai. Chaltlang kawng chho te hi tunhma a motor pakhat kal theih tawk tawka kha motor lian pawh a inpel thei ang a, thenah chuan, a tle hen hun mai a, a dum hen hun mai a, Durtlang chho te pawh chutiang bawkin, Chanmari West peng te a lo zau ta a, Saron Veng - Bazar Bungkawn kawng lai nei reng reng lo thin kha, a bawn em em a ni. Kan kal thin ang a, tunah hi chuan hei a mam-dum hun mai te hi a ropui hle mai a. Saron Veng - Chhinga Veng tih te, Vaivakawn - Chawlhmun tih te pawh hi lo ziaawm ta khawp mai a, lawmawm ka ti a. Ka bial te chu in hria a, kum 17 zet kha kawng tha ngai lo a ni. Kan Chief Minister zahawm takin min ngaihpawimawh sak a, min vei a, hma min lakpuina zarah tunah chuan Aizawl atanga han kal vang vang pawn bial chhung kawng thlen hlan hi kan nghakhlel tawh a ni. Tun hma chuan kan bial chhung kawng thlen kha kan huphurh thin a, tunah chuan kan bial chhung kawng thlen hlan kan nghakhlel a, kawngpui tlangdung te pawh tunah hi chuan a nuam ve ta khawp mai. Kan lawm a, kan hlim a ni. Dungtlang - Farkawn kawng te hi a dum hlurh mai a, Leithum - Thinghrangkawn tih te, Leithum - Dungtlang tih te hi motor leh bike te a accident fo ang tih hlauhawm khawpin tunah chuan kawng mam-tha, kawng-nuam he sorkar tharin min pe hi keini East Tuipui bial mipuite chu kan lawm a, ‘kan theihngilh tawh dawn lo a ni’ tih ka sawi duh a.

Kan Chief Minister zahawm takin theihtawpa ngaihtuahna senga hma min lakpuina hian tunah chuan rah-tha a chhuah a, media-a lang mi khua te kan lo ang ve ta hi kan lawm tak meuh meuh a ni. A kawngpui tlangdung piah lamah tlema han penhle deuh, sorkar hmasain kawng a lo laih, mahse chhunzawm tak siloh hi a awm a, chu chu Pu Deputy Speaker, Melbuk - Hruaikawn leh Khuangthing - Thekpui hi PMGSY kha a ni a, furah a diak thei khawp mai a, helai hi a remchang hmasa berah min lo hriatsak se, kan mamawh khawp mai. Tin, Vaphai - Chawngtui East hi kawngpui atanga penhleha awm a ni a, Chawngtui hi furah chuan kal ngam awmluh khawpin a nal thin a, SEDP fund emaw, sum remchang min la ngaihtuah sak se a lawmawm khawp ang.

Tin, Khawbung-ah hian Resthouse leh Farkawn-ah hian PWD-IB a awm ve a, a hlui tawp khawp mai a, chei-that dan awm se la, riah chang te a awm thin a. Keini te pawh kan riak ve thin a, a lo hlui ve tawh lutuk a, 'ngaihsak a ngai hle mai' tih hemi pahnihah hian ka sawi duh a. Champhai South Sub-Division khi a bial a zau khawp mai a, ruah sur leh furah kawng clear ngai a tam thin a, JCB te hi a remchan chuan 'pakhat tal kawl thei se' tih kha ka han tarlang bawk a ni. PWD-ah chuan sawi tur a tam a, mahse ka duh tawk mai ang a.

Demand No. 32 - Horticulture-ah, ka biala Samthang te, Farkawn te hi zikhlum leh vai samtawk chinna hmunpui a ni a, churang chuan cold-storage hi Dungtlang velah khian min dahsak thei se, a tawih hma thei si a zikhlumte hi, a remchan chuan tiin ka han sawi lang bawk ni sela. Khankawn kha ka sawi hmaih a, Khankawn te nen, khaw 3 khian an bei nasa a. Tin, tunah hian Farkawn-ah pilot project atan a-Alu kan han chintir a, quintal 150 Shillong a mi kan chah a, tunah khian an bei mek a, khingte khi a that theih chuan Leisenzo-ah te leh hmun dang dangah chintir kan tum bawk a ni tih kha ka sawi duh bawk a ni.

Demand No. 9 - Finance Department hi an fakawm hi ka ti a, tun ang hun-harsa, central atanga sum kan hmuh tur anga kan ngaih budget-a awm tawh, kum 2 chhunga vaibelchhe 2,600/- zet kan han hmu lo hian, 'kum khatah vaibelchhe 1300/- zet' tihna a nih chu, chutiang chung chuan ti hian min kalpui thei a, a bul ber chu kan Chief Minister zahawm tak, kan Finance Minister ni bawk remhriatna leh finna Pathian-in a thuamna hi a lo langin ka hria a. Vawiin thleng hian harsa lutuk lovin, harsa chung siin, thiam taka min enkawlina avang hian Mizoram kan dam khaw chhuak niin ka hria a. Kan sawi tak ang khan sorkar hnathawk hlawh pek theihloh tak tak a awm lova, thla hnih/khat te chu a tlai chang deuh te chu a awm mai thei e. Amaherawhchu, hetiang ang hun harsa tawng miah lo, sorkar hmasaah khan han let leh lawk ila, an sum hmuh tur ang zawng zawng an hmuh bakah, thla tina zu-chhiah an hmuh kha a tam em em a ni. Vaibelchhe 40/50 te thla tin an hmu chungin, khang lai khan GPF te pawh an duh duhin an withdraw thei chuang lo, sorkar hnathawkin, a then 'minister lehkha a ngai' te an ti a, kan thiante pawhin, 'minister kan zuk ziah tir dawn' te an ti tho a ni. Sum leh paia harsatna a awm lo chung pawh khan harsatna sorkar hnathawkte pawn an tawk ve tho mai, keinih te phei chuan, 'tawk tur kan ni a lawm maw le, kan tawk lo khawp zawka lawm' tih hi ka ngaihtuahna a awm thin a ni.

Sorkar hmasa leh MNF sorkar hmasa-ah khan an budget sawi hi ka hre thin a. Chutah chuan, kum khata an budget kha 3-digits chauh a ni a, sang a tling lo a ni. 2008-2009-ah khan nuai 1,000 leh tlem budget an pharh thei a, mahse, chu chu an hmang hman lova, vaibelchhe 1,000 tling lovin kum 10 chhung he ram hi a lo kaihruai a. Ka rawn sawi duhna chhan chu, kum hnih chhunga vaibelchhe 2,600/- kan hmuhloh hi a

tam lutuk, ‘vaibelchhe 2,600 pawh hmulo khan engtin nge min kalpui theih’ tih hi a ni ka zawhna chu. Hei hi Pathian hruaina lo chuan a theihloh. Chuvang chuan he ram hi Pathian-in a hmangaih a, vawiina helai i ding lama thute hi a fel ber ber, a tha ber ber kan ni hauh lo, amaherawhchu, Pathian-in he hun atan hian min ruat a ni. Hun harsa leh hun khirh tak karah pawh he ram hruaichhuak turin, he hnam hmangaih leh duat taka enkawl turin keini mifel lo leh tlinglo hi ‘min ruat mai a ni’ tih hi ka rawn sawi duh a.

Demand No. 29 - Social Welfare-ah hian sawi tur a tam khawp mai a. Khawbung-ah khian EMRS kha 2019 khan kan dil ve a, Social Welfare leh Tribal Affairs kaltlangin 2020-21-ah khan min rawn pe ve nain, central-ah khuan kalphung leh an guidelines te an lo tidanglam a, kan nghakhlel em em a. Kan Minister zahawm tak hian Khawbung-a kan EMRS khi ‘engtikah nge vung a chhuah ve theih ang’ tih kha min rawn react sak ve se la ka duh khawp mai a. Tin, contractor te pawh hi i kutah a awm tawh lova, Delhi-ah contractor an thlang a. Delhi atangin tender an chhuah a, vai-contractor in an thawk dawn ni awm tak a ni. Engpawh ni sela, a hlawhtlin hi kan duh ber a, ‘kan nghakhlel em em a ni’ tih kha ka rawn sawi duh a.

Tin, Social Welfare Department hi kan hriat angin 2019 khan directorate pahnihah then a ni a. Directorate of Social Welfare & Tribal Affairs-ah hian Staff mi 2000 chuang lek neiin Mizoram hi an enkawl a ni. Kan hriat theuh angin he department hian a hnathawh pui ber chu mihring enkawl, nau piang-hlim atanga kum upa leh ‘vohbik’ kan tih mai rual-banlo thleng hian an huam vek a ni. Heng ka rawn sawi duhna chhan chu, an hnathawh a tam zia leh thawktu an indaihloh si zia hi House-ah hian ka tarlang duh a. Tunah hian sanctioned-post hi 81 a nih laiin 37 chiah staff an nei a, 44 hi vacant a ni. Chu mai chu ni lovin Director charge la-tu Joint Director hi kumin August thlaah a pension dawn a ni. Dy. Director, a thachhang dawltu pakhat zawk chu kumin tho October-ah a pension dawn bawk a, a thacahhang dawl lehtu Deputy Director chu nakum 2023-ah a pension leh dawn bawk a. Officer ho kha an kal liam vek dawn a, engtinngan an kal zel ang tih lai kha rilru a lo hahpui ve deuhhlel a. Hengte hi kan sorkar leh kan minister-in a hriat vek tho ni mahse, thahnemngaihna ka rawn aupui ve a ni.

Tin, SEDP kalpui chungchangah hian party thenkhat chuan hun eng emaw lai khan an sawi thin a, ‘an sem dawnlo, sum an neilo’ tiin kan mite nasa takin an bei a, an lo lungngai em em a. Hun a lo kal deuh a, khangho tho khan ‘sem thuai thuai ta che u’ an ti leh a, sem dawna kan han lan velel ‘nuai thum pe ta che u’ an ti leh a. Kan kal dan tur hi min lo relsak zung zung mai a, a lawmawm khawp mai. Engpawh ni sela, ram pumin hun chep leh hun khirh, hetiang hripui laka dam khawchhuahna kan buaipui laia kan mirethei lamte hawia, a tam emaw, a tlem emaw, he sorkar, mirethei hmangaihtu te’n ke an han pen ta hi lawmluh rual a ni lo. Thenkhat chuan ‘thatloh theihlohna bawm’ an ti a, an zuar a. Ka rilrua lo lang chu, kawng hi MNF sorkar apiangin ‘thatloh

theihlohna Ministry’ ti ila, thatloh theihlohna kawngah hian he sorkar hi miin min hmu a ni. A taka hmuh tur a awm avangin ‘thatloh theihlohna bawm ai chuan mipuiin min ring zawk lo maw’ tih kha am takin ka rawn sawi duh a ni.

Hei hi House property atan ka hlan ang e. Ka lawm e.

DEPUTY SPEAKER : Member zahawm tak Pu Vanlalhlana i lo sawm ang u.

PU VANLALHLANA : Pu Dy. Speaker, ka lawm e. Tun tum chu tawngkam thenkhat kan hman thin lar ta lo deuh deuh a awm a, kan hriat vak loh te kan hre lar leh tain ka hria a. Session hmasa lamah chuan ‘PAHOSS’ tih te, ‘Assam Rifles chhuak tur’ tih te, ‘kawng-chhawng’ tih te, ‘fly-over-bridge at Bawngkawn’ and ‘Vaivakawn’ tih te kha chhungtinin kan sawi thin kha a ni a. Tun tum chu a hming hrim hrim pawh hi kan lam ri lo ta deuhin ka hria, Pu Dy. Speaker.

A hmasa berah Legislative Assembly-ah hian ka han kal ve ang a. A lawmawm khawpin ka hria a, i kaihhruaina hnuaiah kum 50-na kan han thleng a, hma pawh kan sawnin ka hria a. Member-te hian an hre tho ang a, an sawilo te pawh a ni mai thei a; kumin budget document sem ni khan pen-drive in sem tel a, ‘pen-drive ah khan engnge awm’ tih kha member dangte hian an hre ve tho ang chu maw. ‘Statement on Salary data’ tih a ni a. Tunhma chuan chhah em em mai, bu-hnih, bu-thum chhah em em mai, rit lawih tham kha a ni a, kuminah chuan pen-drive in min pe a, a mamawh leh a duh tan chuan computer-ah a en theih reng a, a zangkhai khawp mai. Min kaihruai a, min zirtir a ni. Tin, he Legislative Assembly hrim hrim pawh hi less-paper a kal in tum tih te kan han hria a, a lawmawm ka tiin mi a cho-phur a.

Tin, kum 50 lai lo function ta chu changtlun pawh a changtlung khawpin ka hria a, staff-te pawh an inzir chakin ka hria a. Keimah ngei pawh hian a mimal takin ka chhawr em em a. Thil ngaihven deuh mai pakhat ka nei a. Assam Legislative Assembly atang khuan helaia Member pawh lo ni tawh Dr. JV Hluna hian Mizoram Independent MNF ten an soal a, 1966 hnua Assembly debate zawng zawng kha a collect chhuak a, a titha khawpin ka hria a. Chutiang bawkin, Assembly lama kan Research Wing te through in Parliament-a Mizoram chungchang an debate zawng zawng collect ka tum a, ka collect nual tawh a, eng emaw chen chu ka nei tawh nghe nghe a ni. Amaherawh chu, Parliament debate-ah thenkhatin hindi-in an sawi a, khangte kha translate a ngai a, a ngaihnaawm khawp mai a. Kha movement-a Mizo-mipuite Parliament level-a Member ten min lo hmuh dan leh min lo comment dan zawng zawng te, tam tak Newspaper Reports-ah te kan hria a. Parliament-a an debate dan tak kha kan hrelo tlangpui deuhin ka hria a, a ngaihnaawm khawp mai a. Chungah te chuan in kaihhruaina hnuaiah helai

atangin information tam tak kan dawng thei a, a bengvar thlakin, ‘kan chhawr hle a ni’ tih kha ka rawn sawi hmasa duh a ni.

A dawt lehah chuan, kan sorkar hi sorkar-tha a nihna chin te pawh a awm ang a, ‘a tha lo’ ti zawnga en tan pawh, a thatloh dan te pawh a awm ang, chutiang turah chuan ngai ta ila. Amaherawhchu, *neutral* deuhin han thlir ta ila, tun sorkar hi eng sorkar nge a nih? Mizoram-ah chuan ‘kan economy hi sorkar hnathawkah a inngat’ kan ti a, sorkar hnathawk pawl lian tak pawh a awm a, ‘Federation of Mizoram Government Employees Association’ tih a ni a, chu chuanin thla hmasa maiah khan nawrh an tum a ni. Nawrh an tumna chhan point pakhat chuan - Hlawh a hun taka lak an duh; a hun takah hlawh an la thei lova, chuvangin nawrh an duh a ni, an lungawi lo a ni. Pahnihna-ah chuan - Central sorkar-ah chuan DA a hun dik takah a pung a, central chuan DA 33%-a pung an hmu mai, amaherawhchu, Mizoram sorkar-a hnathawk ve te chuan 17% a pung an hmuh tur pawh chu an hmu ve thei ta lova, chuvang chuan an lungawilo a ni. Chumi avang chuan nawrh an tum a, badge dum te pawh bel an tum a.

Chutianga sorkar hnathawk lungawi lo thawm an hriat chuan, Sorkar-hnathawk Pensioner Association chuan, ‘keini pawh kan pension kan hmu theilo, sorkar hna kan thawk a, kan pension chhuak a, zin te kan duh a, in sak te kan duh a, kan pension benefit pawh kan hmu theilo, in nawrh dawn chuan kan rawn zawm ang che u’ an ti ve ta a ni. Khang kha politics pawh ngaihtuah lo, sorkar hna rim taka lo thawk mekte leh pension-te an ni a. Sorkar an hmuh dan chu, sorkar chak lo, an thawh hlawh pawh pe theilo, pension pawh pe theilo-ah an hmu a ni. ‘Khatiang kha sorkar tha a ni ang em’ tih lai kha; ‘a tha e, a tha lo e’ tih avanga *chhia* emaw *tha* emaw a ni lovang, amaherawhchu, kha kha ‘tehna pakhat chu a ni ve a ni’ tih kha min hriatpui turin ka duh che a ni.

Veterinary Deptt-ah hian ka han kal daih ang a. Member thenkhat khan an sawi a, ka pawm khawp mai a, vawk-pul hri a leng a, vawk an thi chuah chuah a, a sing bi, nuai thleng dawn kha an thi a, channa nasa tak a thleng a ni. Hripui a leng a ni ve mai. Chuvang chuan compensation kan vawk-vulhtu ten an hmu hi a awm hle mai a, kan minister bengvar tak pawhin Delhi-ah te a han nawr vat vat a. Amaherawhchu, ‘natural disaster a ni e’ tih kha state level-ah kan puang ve bawk si lova, puang si lova central-a benefit hmu tura han nawr kha a har deuh em maw ni dawn le? State level-ah hian ‘natural disaster a ni’ tiin puan khalth ta ila, ‘khami denchen khan central-ah nawr ni ta se la chuan a zia deuh lo ang maw’ tihte kha ka ngaihtuahnaah a awm ve bawk a.

Vawk-thi a manganthlak viau rual khan, thil tha deuh mai Durtlang North-ah khian a awm a. Vawk-vulhtute vawk tam tak vawk-pul hri avangin an thi a, phum a ngai a, vawkpui han phum te chu a na mailo, lei laih a ngai nasa lutuk, Durtlang-ah te, Leitan-ah te JCB te an hire hial a ni. Chungah chuan JCB hire-na tur nei lote, hire tur awmlohna

hmunte pawh a awm si a. Durtlang North-ah khian ‘*Thenrual*’ inti, thian-inpawlkhawm sawmhnih rual hian an khua a vawk thite chu, a tuartute hrethiamin vawk thlan kha an lai a, an phum char char ringawt mai a ni, hlawh pawh an beisei lo. YMA emaw, Upa Pawl emaw hming pawh a ni chuang lova, thian-intiamrual kha an ni. Mangan tawpkhawkah pawh thil tha hriat tur hi a awm ve leh khauh thin a, an ti ropui em a, he House-ah hian ka han tarlang ve duh a ni.

PWD lamah ka han kal leh ang a, hmanni khan helaiah kan sawi deuh thwak tawh a. Vairengte - Sairang ‘four-lane’ tih kha, chumi ina a paltlang tur chu Bualpui te an ni a. Bualpui-ah chuan NH-306 (four-lane) siam turin a tan tlang a. Bualpui-ah chuan YMA-in thlanmual ram an nei a, pass pawh fel tak an nei a ni. Chu thlanmual ram chhungah chuan National-highway chu paltlang tur a ni a, a paltlang tur YMA ramah chuan mimalin pass an lo nei ta a ni. Tichuan, mimalin pass an neih chu YMA hruaitute chuan police hnenah FIR thehlutin an complain a, amaherawhchu, police-te hian hma an la thei tlat lo a ni, a mak khawp mai. YMA ram a ni a, National highway-in a paltlang a, compensation hmuh tur a awm anih chuan YMA-te chuan an hmu ve tur pawh a ni ang, YMA lo pawhin anmahni ram an paltlang anih chuan an hmu tur a ni. Amaherawhchu, mimalte’n a rugin pass an lo nei a, thil diklo anih avangin FIR hmangin an complain a, police hian an bawhzui thei tlat lova, hei hi chu thil mak tak a ni tih kha ka han tarlang duh a.

Kan hre vek ang a, Bualpui-ah hian Soil Department-in coffee-plantation area a nei a, Revenue atangin land-lease pawh fel tak a nei a ni. Chu land-lease hmunah chuan mimal thenkhatin pass an nei leh a ni, he compensation beisei hian; a khawchhunga mite, Soil Department-a mi thenkhatte leh Revenue-a surveyor thenkhatte’n. Chu chu thil awm dan a ni a, he House-ah hian ka han hriattir duh a ni.

Tin, PMGSY Mizoramah a awm a. *Unstarred Question*-in ka zawt a, ‘PMGSY hnathawh mek hnathawh la zawhloh hi engzat nge awm’ tiin. Chutah chuan, ‘a awm zat chu 137 a ni’ tih hriattir ka ni a.... (Dy. Speaker: Minute khat i la nei e) ‘Engatinge an la zawh loh’ tih ka zawhna min chhanna chu hetiang hi a ni a –

- 1) Fur a rei avangin working season a tlem;
- 2) Covid avangin lockdown a tam;
- 3) Covid avangin vai labour an haw; hna a thawh theih lo;
- 4) Covid avangin bungrua a lakluh theihloh;
- 5) Ramri buai vang.

Khangte kha kawng laitute’n harsatna an neih, a hun taka an zawh theihlohna chhan a ni a. A pumpui thuin ‘September, 2022-ah hian zawh vek tur’ tih kha a ni a. Engpawhnise, ‘sum avangin kawng-laih hi thawh tlai a ni a, pawisa a awmluh avanga

thawh zawhloh a ni lo' tih kha a chiang a ni. Chutilaiin kawng-that thu kha member zahawmtak takte khan an sawi a, a ni khawp mai a. Kawng chu 'MNF-in an ngai pawimawh lo' tih rual a ni lo, amaherawhchu, YMA-te hian kawng-thalo hi an vei em em a, Champhai YMA Conference-ah te pawh kawng-thalo an vei thu an tarlang a, tuna kan Chief Minister ngeite pawh hi YMA-ten an hmu a, agreement te pawh kawng chhe lutuk enfel turin, joint-committee ang deuh te pawh dinin, joint-verification te pawh an nei thin a ni. Chuvangin, MNF hian kawng an ngai pawimawh a, a chhiate pawh a awm a, a thate pawh a awm ang chu, chung chu thil nihphung a ni a. Amaherawhchu, 'an insawi ang leh an inngaih ang em em hi chu an ni bik lo a ni' tih kha khang kan han sawi atang khan a lang thei awm e. Hun a tawp a mi? (**Dy. Speaker:** Aw, a tawp tawh e.) ka dil belh lo mai ang che, Pu Dy. Speaker.

DEPUTY SPEAKER : A lawmawm e. Tunah chuan Member zahawmtak Pu H. Biakzaua i lo sawm ang u.

PU H. BIAKZAUA : Pu Dy. Speaker, ka lawm e. Sawi tur a tam khawp mai a, tin, demand a tam bawk si a. Kan Chief Minister zahawmtak leh Veterinary Minister zahawmtakte demand wawiina kan han sawi thei hi lawmawm ka ti a. Demand sawi hnuhnun ber ni a lo ni bawk a. Sawi tur a tam thei khawp mai, hun a tawi thei si a.

A hmasa berah chuan, Finance hi a ni a. Kan ngaithla theuh mai a, kan Chief Minister zahawmtak finance enkawl dan hi keini hi chuan tha tawk hleah kan ngai a. A chhan chu, heti khawpa khawvel pum huapa covid-hrileng leh ramri-buai te kan han nei a, harsatna hrang hrang - raltlan te, vawk-hrileng te, lirnghing te, khawvel hmundanga harsatna an thlen piahlahmah kan tawn pawh hian kan Chief Minister zahawm tak hian harsatna leh mangannate mipuiin nasa lutuka kan tawrhloh nan sum leh pai te a tulna leh harsatna zawna mamawh ang zela hman tur a theh-chhuak thei zel hi lawmawm ka ti a. A sum enkawl (manage) danah hian thenkhat chuan sawisel leh demna tur te zawngin bei mahse khairual tak leh a tha thei ang bera Mizoram enkawl leh department hrang hrang enkawltu minister-te khairual taka enkawl thei *Chief Minister* kan nei hi kan vannei ka ti a ni.

PWD-ah kan sorkar tirh khan kawngpui a chhe em em a, chu chu hna hmasaah neiin tunah hian kan kawngpui a tlangpuiin a tha deuh vek tawh a ni. Hmun hla leh kilkhawr zawk chu a tha lo deuh te pawh a awm mai thei a. Mahse khawpui deuh deuh leh kawngpui dung kan en chuan tunhma nena khaikhin chuan a danglam hle a ni. Chuvang chuan, kan Chief Minister hnenah hian lawmthu ka sawi a ni. Hemi chungchang hi sawi tur a tam khawp mai a, sawi zel dawn chuan a rei lutuk dawn a, chumi chin chu duhtawh mai ila.

Nichinah khan Lawngtlai West bialtu MLA zahawm tak khan a rawn sawi tawh a, ADC area-a awmte hi kan interest te a inanna lai hi a awm thin a. MDC member zahawm tak tak te leh EM, CEM, Chairman, Dy. Chairman leh Office a thawktu zawng zawngte, pensioner zawng zawngte salary hi a tang rei tawh khawp mai a, hei hi ngaihven deuh chu a tul khawpin ka hria. Keini pawh hi mahni chanchin insawi kan ang a, pension-ah khan kan tel ve theuh mai a. He bill hi a tang rei tawh hle mai a, committee hran siama ngaihtuah mek a ni a. Kan CM zahawm tak hian a ngaihvenin ka hria a, lawmawm pawh ka ti khawp mai.

Kan bial theuh kan sawi hian bial 40 kan sawi kha a ni deuh mai a, mahni biala luh ve hi a tul deuh bawk si a, Demand No. 15 - GAD hi sawi ila.

Sangau Civil Sub-Division hi kum 20 chuang kan nei tawh a. Hei hi BDO-in charge a la a, kum 20 chuang hi a tak taka office *run* leh thiltih a awm thei lova. Hei hi budget session kan neih apiangin ka sawi a, ziak te pawhin ka ti tawh thin a. A building awm se, a hrana harsatna awm tawh lova kalpui theih mai niin a lang a. Lawngtlai-ah District Headquarters a awm a, Sub-division Sangau chu Myanmar border bulah a awm a, hei hi a pawimawh takzet a, kan Chief Minister zahawm tak hian min lo hriatsak leh se tih ka ngen a ni.

A dawt lehah chuan, Sangau RD Block huamchhung tho hi sawi leh ka duh a. Saiha District hnuaiah PWD Division-in a enkawl tlat mai a, Lawngtlai district ni si kha Saiha-in an awp tlat mai a. Chuvangin 'Lawngtlai EE hnuaiah PWD hi dah ni ve tawh se' tiin wawinah hian kan Chief Minister zahawm tak hnenah ngenna ka thlen bawk a ni.

Pu Dy. Speaker, Demand No. 34 - AH & Veterinary Deptt. hi sawi leh lawk ila. SEDP pilot project atangin vawk leh ar vulh chhungkua 1020-in tluang takin an kalpui a. Tin, Vety hospital 7 hi district hrang hrang ah sak zawh a ni a, dispensary 8 sak zawh a ni bawk a, tin, RAH centre 37 dispensary-ah hlankai a ni a. Chubakah Animal check-gate 10 siam a ni bawk a. Ka bialah pawh RAH Centre min hawn sak a, Lawngtlai District Hospital hawn a ni tawh bawk a, a enkawltu Minister hnenah lawmthu ka sawi a ni. Chutiang anih lai chuan Sangau leh Vanlaiphai, Lawngtlai District leh Hnahthial district hian doctor kan intawm a, a buaithlak khawp mai a, 'Sangau-ah hian Vety doctor kan mamawh khawp mai' tih kha min lo hriatsak sela. Tin, Bualpui 'Ng'-ah pawh sawn an awm lova, VFA pawh kan nei tha hlei thei lova, doctor hmun anih angin 'doctor min dah sak se' tih kha ka sawi duh bawk a ni.

Demand No. 29 - Social Welfare-ah hian lawmthu ka sawi leh duh a. District hrang hrangah a block-wise in EMRS school hi dah a ni a, Sangau-ah sawn EMRS

School hi awm ve turin beiseina kan nei a, kan Minister zahawm tak hian min lo hriatsak se ka duh khawp mai. Tin, Anganwadi centre sak-that leh repair te tun term-ah hian kalpui mek zel a ni a, tin, Article 275 atangin kawng hrang hrangin thingtlang lamah pawh development kalpui a ni a, Social Welfare Deptt. hian an ti-tha khawpin ka hria a ni.

Chutihrual chuan Pu Dy. Speaker, Social Welfare & Tribal Welfare hi directorate 2-ah an inthen tawh avangin an hnathawh a inang tawh lova, Child Development lam chauh hi Lawngtlai-ah sawn kan nei a, Tribal Affairs lam hi kan nei tel lova, Lawngtlai-a Child Development office saw a chungah vertical extension siama Tribal Affairs tan awm theihna remchang deuh mai a awm a, chu chu kan Minister hian min lo hriat sak se ka duh a ni.

Tin, Excise & Narcotics Department-ah hian hmalakna a lang nasa hlein ka hria a. Zu leh ruihhlo dang tam tak an man thin a. An chanchin hi kan hria a, Rangvamual leh hmun dang dangah te ruihhlo-ngai ang chi tunhmaa hluar viau ang kha a reh sawt khawp mai a. Ruihhlo-ngai te tan he department hi department tha tak a ni a, an va check a, an man a, an man te tan chuan a nuamlo mai thei, mahse department tha tak, mihring nunna tam tak chelh-dingtu department niin ka hria a, an fakawm hle pawhin ka hria a ni. He Department hi Lawngtlai District pawhin kan nei ve tawh a, mahse mi in luaha office atana hman a ni a. Hemi atan hian sum leh pai tam tak sen reng ngai a ni a. Tuna ram tha deuh mai an neihah sawn he office building tur hi a hma lama min ngaihtuah sak turin kan Minister zahawm tak hi ka ngen a ni.

Pu Dy. Speaker, a tawp ber atan chuan Demand No. 32 - Horticulture Department hian Lawngtlai district hi min ngaihven khawpin ka hria a. Tanky siam te, thlai chi te, tui pipe te, rannung thahna hlo te min sem thin a, huan-siamtute'n an hlawkpui hlein ka hria a, kan inngahna leh department pawimawh tak niin ka hria a ni. Kan Chief Minister zahawm takin a enkawl avang pawh hian 'hmasawna rah duhawm tak tak hmuh tur kan nei a ni' tih hi ka sawi duh a ni.

Tichuan, kan Minister pahnihte demand hi pass a chakawm ka ti a, ka support khawp mai. Ka lawm e.

DEPUTY SPEAKER : Tunah chuan Member zahawm tak Pu Lalchhuanthanga ilo sawm ang u.

PU LALCHHUANTHANGA: Pu Dy. Speaker, ka lawm e. Demand No. 29 - Social Welfare atang hian kan tan ang a.

Eklavya Model Residential School hi kan veng Tlangnuam-ah a rawn awm ve dawn a kan lawm hle mai a. Veng mipuite, vengchhung atanga km 3 vel hlaa a awm an ni a. Kawng ruh awm sa a ni a, helai hi tha taka motor ina a zawh theih nan PWD Minister zahawm tak, kan Chief Minister ni bawk hi ka ngen duh a. Khilai khi a hmun te a nuam a, khawpui chhunga EMRS school tha tak ni turin kan buatsaih chho a, kan Minister zahawm tak nen pawh hianin kan sawi thin a, kan phur khawp mai. Chutihruual chuan water connection te pawh khi kan la mamawh dawn a, khi sikul khi *sikul entawntlak* taka buatsaih kan tum a ni.

Demand No. 34 - AH & Veterinary, nichin te khan an han sawi tawh nual a. African swine-flu ram pumin kan tuar a, chhungkaw tamtakin mei-alh kan en a ni. Vawk thi hi 33,417 a ni a, tin, vawk suat hi 10,910 niin, a vaiin 44,327 a ni. Hetiang ang chhiatna lian tham tak mai hi kan State te *disaster*-a an puang lo hi a pawl khawp mai a. Henga vangte pawh hi a ni ang e, central lama zangnadawmna kan zuk dil te pawh hi a hlawhtlinloh hmel viauin a lang a, a pawl khawp mai. Amaherawhchu State Planning lamah zangnadawmna an dil leh niin ka hria a, kan state sorkar hian lo ngaihtuah sak thei hram sela a lawmawm khawp ang. Heta ran thi hlut zawng hi cheng vaibelchhe 60.82 ni anga chhut a ni a, a tam tham khawp mai a. Nimahsela State sorkar chuanin pe thei turah te pawh ngai ta ila, ngaihpawimawh te pawh hlawh ve tawh sela, kan ran vulhtute pawh an khawngaihthlak awm khawp mai.

Ranchaw chungchang hi kan sawi leh ang a. Ramrikawn-ah khuan sorkar-in ranchaw-herna an siam a, ranchaw vaimim te hi Bihar-ah 13/kg, Aizawl atangin 21/kg tein an lei thin a. Ranchaw siam hi a pawimawh khawp mai a, he ranchaw siamnaah hian a pawlh tur '*Behusis*' an ti a, hei hi pawlh a ni ve thin lova. Chuvang chuanin ran te pawh hian an ei duhloh phah a, bakah kan ranvulh te an than a tha thei lo a ni. He a pawlh tur an tih *behusis* hi pawlh ve nisela tih kha ka rawn sawi a ni.

Tin, Demand No. 41 - Sericulture Department hi nikum lamah pawh khan ka sawi tawh a, department lian lo tak, hna pawh hautak lo tak a ni nachungin hmasawmna lamah hianin a kal chak lo khawp mai a. Pangang khawi te hi thil hlawk-tham tak, hausakna chu a ni miahlo naa, amaherawhchu eizawmna tha tak a tling a ni. He hna hi tar chaklo deuh te, hmeichhia te pawh ina an thawh theih a ni a. Tin, a transportation pawh a awlsam em em mai bawk a, patling pakhatin cheng sing tel man hi awlsam takin a khai theih mai a. Chuvangin keini ang state-kilkhawr, inkalpawhna thalo tan pawh hian pawimawh tak a ni a. Department hi diktak chuan an chaklo a ni. Development thil-ah hianin an chaklo khawp mai a, kan Minister zahawm tak hianin department hnathawh hi han vil deuh sela a that deuh ka ring a. Hmanni lawkah te pawh khanin Central Silk Board atang te pawhin tanpuina te pawh an dawng a, amaherawhchu hei

hian an cocoon tharchhuah a tipung em tih pawh hi ngaihtuah tham tak a ni. Chuvang chuanin he department hi enpui an ngai viau niin ka hria.

Tin, pangang-chi siam chungchang hi, *Mulberry* hi siam a ni a, a dang *Muga* leh *Eri*, a pawimawh zawk leh hlawk zawka hi la siamloh a ni a. Heng a chi siamna te pawh hi ngaihtuah pui ta ila pangang ching hote tan pawh hian chhenfakawm tak tur a ni.

Demand No. 45 - Public Works Department hi tun Session-ah hianin a budget a pung tam khawp mai a, department tam zawkah a tlem zawnga a kal laiin he department-ah chuan a let thawk aia tam, 109.62% in a pung a ni. PWD-ah hian pawisa a tam thin khawp mai a, hei tunah pheii chuan a let aia tamin a pung a ni. A punna hi sang far far tak a ni, department dang ngaihtuah chuan. Hetianga pung a san tawh chuan, improvement hi mipui hian kan lo thlir dawn a ni. Kan ram angah chuan rail te a awm lova, motor kawng hi a pawimawh em em mai a, development-ah te kawng engkimah kan kawng hi kan enkawl tha tawh lovin ka hre thin a. Hei, kan han zin nikhuaah te pawh hian kawng repair te chu an awm ve nilnial a, amaherawhchu side-drain siam hi kan ngaihsak miah lo mai a, ngaihsakloh chu sawiloh, kan side-drain te hnimin a bawh khat vek a, motor insut te pawh hlauhawm khawpin. Hei hi a pawii khawp mai a, kumkhatah vawikhat te hi chu an sam ve thin niawm tak a ni a, amaherawhchu kumkhat a vawikhat sam hi chu a tawh lo viau a ni. Chuvangin kan kawng hi a chhiat tak tak hma hianin a maintenance lampang hi ngaipawimawh ila, kawngkam side drain te pawh hi tifaitha ila, tin, a hnim lutuk ringawt te pawh hi a mualpho thlak a, a nalh lova bakah accident tamtak te hi a siam ve tlat a ni kawng sir hnim hian. Kan sawi tawh a, PMGSY hna hi heti em em hian engatinge hna hi a chak loh le? Kumkhat kum hnih leka zawh tur niawma lang si, kum ruk/kum sarifah pawh la zawh loh hi a tam em em mai a. Tuna ka hma lawka an rawn sawi atang pawh khan a hriat a. **(Dy. Speaker:** I hun a tawp a.) Pu Dy. Speaker, PMGSY road hi thingtlang leh thingtlang khaw kar kawng siam-hna a ni a, thingtlang mite hi kan zuk hmusit bik em maw ni le tih tur hial khawp a ni a, kan hnathawh chakloh dan em em te hi. He PMGSY hnathawh hi kan CM zahawm tak hian min enpui deuh sela, thingtlangah kawng kan nei tha lo va an khawngaih thlakawm khawp mai.

Tin, Pu Dy. Speaker, a tawpna atan Demand No. 32 na hi ka han sawi leh lawk ang a. Horticulture department hi a pawimawh em em mai a, kan ram hi horticulture-potential area a ni vek mai a, hei hi anihna ang hian hmasawanna kan nei lova, hmasawanna te chu han nei ve bawh thin mah ila, kan department hmalakna hi a chaklo ka ti a. Horticulture atang ringawt pawh hian kan ram hi *developed state*-ah kan siam thei a, chuvang chuan kan sorkar hian tan la leh zual sela, cold-storage te pawh hi changtlung deuh leh lian deuh te pawh hi MINECO-ah te hian a din theih lawm ni ka ti a. Tin, Khamrang-ah khuanin mega-food park a awm a khung te khu kan state sorkar

pawh hian kan chhawr tangkai ve thei lawm ni kan huan thlai neitute tan chhawr tangkai ve theih dan tur te a awm em tih te kha kan zawt a ni. Pu Dy. Speaker, ka lawm e.

DEPUTY SPEAKER : Dar 5:30 PM-ah luh leh kan hman ang em aw? Anih chuan, 5:30 PM-ah luh leh tum ila, tichuan rorel kan chhunzawm leh nghal dawn nia.

5:30 PM

DEPUTY SPEAKER : Awle, Member zahawm tak Dr. ZR Thiamsanga i lo sawm ang u.

DR. Z.R. THIAMSAंगा: Pu Dy. Speaker, ka lawm e. Vawiinah kan Chief Minister zahawm tak leh kan Minister zahawm takte demand kan sawi tur hi a lawmawm ka ti hle a.

A hmasa-in Demand No.1, Legislative Assembly hi sawi ka duh a. Pu Dy. Speaker, *first-timer* kan ni a, kan vanneih hlein ka hria a. Kan rawn thut ve kuma Speaker leh Dy. Speaker fel tak kan han nei hi che u hi a lawmawm ka ti a. Opposition leh ruling pawh thliar lova thu lai tak la thei Speaker leh Dy. Speaker kan nei hi a lawmawm a. Han sawi belh duh deuha hun han lak belh duh deuh pawha min hrethiam hi a lawmawm ka ti a. Tunah pawh hian ka lo sawi pel deuh hlek anih pawhin min hriatthiamna ka ngen a ni.

Chu mai ni lovin staff-te, Commissioner leh a thawktute reng reng hi in fakawm a, engkim mai kan hriatlohte min hrilh zung zung a. Tin, hna ni se kan sawi ngai lovin engkim mai hi min hrilh zung zung thin a, a lawmawm ka ti a. In inpekna avangin he kan House Assembly pawh hi tluang takin a kal thei thin a, a lawmawm ka ti khawp mai.

Tin, a dawt lehah chuan he House chhunga roreltute, ram leh hnam tana hun leh tha min petu mual min liamsan tate vawiin hian kan ngai em em a, ram leh hnam tana an inpekna kha kan hre reng dawn a ni. Tin, helaia thu thei lo, lo pension tawhte pawh kha kan hre reng a.

Tin, ka hmaa mite pawh khan an lo sawi tawh a. Helaia thawktu mai bakah hian kan driver-te, security leh police-te pawhin felfai takin min lo tawiawm a, him takin he Assembly rorelna hmunah te min han veng thin te hi a lawmawm ka ti a, sawi tur tam tak karah kha kha ka han sawi a ni.

A dawt lehah chuan Demand No. 9 - Finance pawh hian a huam theiin ka ring a; Pu Dy. Speaker, I veilama mite hian ‘Mizoram hi leiba kan ngah’ an ti an ti a. Kan hria a hei, GSDP atanga chhuta kan ram leiba hi Northeast-ah te phei chuan a tlem ber pahnihna kan ni a. State lian tak tak Punjab te pawh hi a percentage zawng chuan leiba an lo ngah khawp mai a, State hausa anga kan ngaih te pawh hi keini ai hian an sang daih a ni. Mizoram hi 31.2% kan nihlai hian Nagaland te chu 44.2% a ni a, Punjab ‘ram hausa’ kan ti pawh hi 53.3% daih a ni a ba kha.

Chuvang chuan, hetiang covid karah pawh kan Finance Minister, kan Chief Minister ni bawh hian sum harsa em em karah pawh financial management a thiam avangin tun dinhmun hi kan ding ta a ni. Lehlamah khan kan sawi thin a, ‘a zempui amahin a kawl... chuti khati’ an ti a. Covid a lo thlen khan ‘a zempuiah lo dah lo ila engtin nge kan chet ang’ tih kha a ni, thil awmdan zawk chu. A tul apiang leh emergency tana a lo dah avang te hian, ‘financial management thiam tak a ni’ tih hi i veilama mi te pawh hian an hria, amaherawhchu han sawisel ve hrim hrim kha kan duh dan a niin ka hria a. Chuvang chuan, hun khirh tak karah hetiang tha taka Zoram ala kal-chho thei hi financial management-ah pawh hian kan tha hle a ni tih kha ka han sawi duh a ni, Pu Dy. Speaker.

Tichuan, Finance chungchang a ni tho a, healthcare hi ka sawi ka duh a. A chhan chu kan CM hi Mizoram Healthcare Society Council-ah hian a hotu ber anihna angin. Kan hria a, 2008-ah khan MNF sorkar chuan crore 50 kha a dah ta a. Chung hunlai chuan Bajaj company, a financial implement tak tak kha khamite hnuaiah khan a ni. Amaherawhchu, 2011 khan MNF-in sorkarna a chanloh chhung khan hlamchhiahin a lo awm chho ta a, tichuan, 2018 MNF sorkar khan crore 50 kan dah ta a ni. A tirah vaibelchhe 117.8 kha corpus fund-ah dah a ni a, tichuan, a vaiin tunah hian crore 17.8 vel a ni a, amaherawhchu, khami corpus fund pung nen khan chuan crore 250 ang vel a ni. Congress hunlai khan a corpus atan khan pawisa kha lo dah ve thin ni se chuan Mizoram hian miretheite leh kan vaia tan hian healthcare system hi mumal takin a kalpui tur a ni a. Tunah pawh hian, ‘leiba chuti zat kan nei, chuti zat a chuang kan nei’ kan ti. Damloin hemi atana enrolment fee hi chu tlemte a ni, mi pakhat tan 500/- te, 1000/- te, 100/- kha BPL a ni a, kha khan awmzia a nei lova, mahse khang khan cheng nuai 2 thleng a bill thei bawh si a.

Mizoram MLA-te pawh tun kan han sorkar a, kan hlawh atanga 1% hi healthcare atan hian kan dah a. Midang a thlakipa hlawh bi neite pawh hian keimahni tan leh miretheite tan hian kan hlawh atanga 1% hi dah ta ila, a pumpuiah chuan vaibelchhe 500 vel a lo ni dawn a, kha kha corpus-ah dah ta ila, Mizoram hian healthcare-ah hian harsatna kan nei lovang. Chuvang chuan, hetiang ang hun khirh tak karah ‘an ba an ba’ intih te chu, a dik tak chuan kan sorkar, kan CM pawhin theihtawp a chhuah a, Health

Minister-in theitawp a chhuah bawk a ni. Chuti chung chuan ba kan neilo theilo, kan balo theilo a ni kha kha. Pu Dy. Speaker, a sum dah lamah khan dik tak chuan Congress hunlai khan kum tin lo dah ve se chu kan ziaawm deuh tur a ni a, kum 10 chhung kan dah miah lo kha a pawl khawp a ni. Chu chu ka han sawi ve duh hrim hrim a ni.

Tin hei, thu belhchian-dawl lo ang chi, social media-ah te leh he House ngeiah pawh hian mahni rinthu te, eng eng emaw chiangkhang vak lo tea sawi kan awm thin hi a pawl ka ti a. Keima mimal chungchangah leh MNF party tihmingchhiatna tur pawh hian tunah hian, “Hualngo bulah In lian tak a awm a, kawngpui hnaih deuhin a awm a, a satu chu, a neitu chu maw...” tih te, (*Warning-bell a ri a..*) Pu Dy. Speaker, nichinah khan... min ngaithiam thei tak i ni ka tih kha. “...saw building saw Dr. ZR Thiamsanga, MLA ta a nilo” tih hi he House zahawm tak hmaah hian ka sawi duh a ni. Hei, a LSC pawh, Joseph Lalhmingthanga ta a ni a, loan lain a sa a, a lakna pawh Rural Bank-ah a awm vek a ni. Amaherawhchu, media te pawh an lokal a, ka lo sawi thin a, “ka ta a ni lo’ tih kha an sawi duh lova. MNF party leh mimal intihmingchhiat nan kan hmang thin hi diklo ka ti a, a pawl khawp mai. “B. Sc (Nursing) College, BN Foundation Society-in a din a, saw building saw luah-hawha tan a hauh mai a ni” tih kha, House hmaah hian thudik hi sawi ngaiin ka hria a, ka rawn sawichhuak a ni e.

Hei, PWD kawng chungchangah Champhai kawng kan hria a, darkar 12 kal thin kha tunah chuan darkar 6-ah kan thleng tawh a, Mizoram dung leh vanga kawng hi a phe hen hun tawh mai a nih hi. Amaherawhchu, nakinah fur a lo thleng leh ang a, ‘kawng a chhia’ an ti leh dawn. A chhiatna chhan tur kha chu kawng kan siam vang a ni tih te kha lo hria ang che u. Chu chu in lo hriat a ngai a ni, Pu Deputy Speaker. A bik takin khi double-lane te min han siam sak a, a thil tam tak a awm a.

(*Speaker-in Chair a la a.*)

Pu Speaker, kha ka lo sawi a, helaia Assembly rorelna in lo chelh a, i hun ngeia kan lo ding ve thei hi ka lawm khawp a. Rorelna felfai tak in nei a, churang chuanin han hmang belh deuh mah ila, a tawp na helamah ka nei bawk si a min lo hriatthiam ka ngai a. Minute 5 chu min pe thei ang chu maw. Tichuan, PMGSY te pawh kha, dik tak chuan a tam bera hi chu tunhmaa sorkar in a lo pek a ni a, an chhan hniam lutuk avanga zo thei lo an ni. Sawi sawi ngai pawh hian ka hre tawh lova.

Tichuan, mahni bial te pawh han sawi ta ila. Champhai PWD hnuaiah Eastern Circle te kan dil ve a, khang kha min han tihsak theih ve ngei pawh kan ring a. Tin, Champhai khawpui kawngte khi tunah chuan resurface a ngai ve tawh a. Tin, kan kawng pawimawh tak, tui kan lakna kawng te pawh khi PWD hian an road map/road statistic-ah te min han dahsak ve ta se tih te kan ngen duh bawk a.

Tin, horticulture lam pawh hi sawi tur a tam khawp mai a amaherawhchu kan sawi seng dawn si lova. Thil hrang hrang - tomato te, dragon fruit te leh thildang pawh covid-19 karah vegetable supply-chain te kan han ti a. Tomato tharchhuahah pawh tunah hian Mizoram khaw te reuhte teah pawh hian sum tam tak kan han nei chho thei ta hi a lawmawm a.

Excise & Narcotics-ah hian Pu speaker, Rangvamual hmel te a lo danglam ta a, a lawmawm hle a. Excise hi a thawktute tlem hle mahse sorkar hmel tunah hian a lang tan khawp mai a. Tichuan, zu vanga nunna chante pawh an lo tlem tawh a ni tunah hian. Zu-chhiah tel lo pawha vawiin ni thlenga kan ram kan han kal thei te pawh hi a lawmawm ka ti a, amaherawhchu Excise staff-te tlem lutuk erawh hi chu tih-changtlun a ngai ka ti a.

Tichuan, Social Welfare & Tribal Affairs hnuaiia EMRS Eklavya School kan han sa te, tin, Tribal Research Institute Kelsih-ah cheng nuai 2028 senga kan han sa te, Community Hall leh Tribal Girls Hostel tam tak kan sa te, sawi tur hi tam tak a awm a ni. Tin, Article 275 hnuaiia department hrang hrangah thil tam tak kan khawih bawk a, tin anganwadi centre te leh covid karah nutrition te pawh tha taka kan han sem thei te hi a lawmawm khawpin ka hria a.

Ran chungchang kha kan han sawi a, a sing tel kha a boral a, amaherawh chu a nuai tel hi kan doctor-te leh a department hian an tidam ve a ni. He hripui hlauhawm tak karah pawh Vety Deptt-in theitawp a chhuah a, an thawhrimna a pawimawh khawp mai. Tichuan SEDP project-ah chhungkua 1020-in vawk leh ar hlawhtling takin an vulh a ni tunah pawh hian, kum thum kan sorkar chhungin Vety District hospital 7 din a ni a, tin, AH & Vety dispensary leh animal checkgate te pawh (**Speaker:** Minute 4 i hmang tawh a nia) Awle tlemtein. African swine-flu pawh tunah hian control a ni te hi a lawmawm khawp mai a. Chutihlaiin tunah hian central sorkar-ah tanpuina pawh kan dil a, sorkar hian zangnadawmna pawh pek a duh tih kan hria a ni, kan ran-vulhtute hi, amaherawhchu hei, covid-19 avangin sum lamah kan harsa a, tunah department leh sorkar ang te pawhin tanpuina central sorkar-a kan han dil te pawh hi hlawhtling ngei turah kan ngai a.... (*Warning bell*)

Pu Speaker, a tawpna atan tak tak. India ram state zinga hmasa ber tura Mizoram-in 'Licensing and Regulation Private Veterinary Hospital and Clinic Act, 2021' kan nei thei te hi a ropui a, Vety doctor, VFA leh Staff indaihlohna erawh hi chu puhruk chhoh zel ni se a tha ang. Tichuan, Pu Speaker, Minister zahawm tak pahnihte demand kan han sawi te hi za a za ka thlawp a ni. Ka lawm e.

SPEAKER : Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, tun tum kan sorkar zet chu Assembly House-ah mahni insawifiahna te kan sawi ta nawk nawk mai chu a ni a, eng kan ti zo ta nge, insawifiah a ngai tam a ni ang e.

Kan budget session chu hei, a hrilhaithlak hle mai a, member tam berin an rawn sawichhuah kha chu, ‘department te budget, nikum aiin tun kumah a hniam’ tih kha a ni deuh vek mai a. Pu Speaker, hetiang a kan kal dawn anih chuan kan sorkar hi a collapse mai ang tih a hlauhawm khawp mai. Finance Minister budget speech-ah khan cheng vaibelchhe 1,12,553.08 kha kumthara kan leiba tlingkhawm tur tih kha Finance Minister-in a rawn sawi a. Ka zawhnaah chuan, vawiinah K-Deposit pawisa awm zat, leiba pawn lama tanga kan pukte ni lo keimahni sorkar-in pawisa kan dawn tawh, supplier te, contractor te, bill chi hrang hrang tlingkhawm hi cheng vaibelchhe 1,686.5 an ni ringawt mai a, a buaithlak khawp mai.

Tin, kan budget hi nikum lamah pawh kan sawi tawh a, tun kumah pawh hian kan sawi tura hi Minister ten an chanpual ‘*Demand for Grants* discussion’ tih a ni a, amaherawhchu Demand han sawia han discuss tur hi a awm tlat lo mai a. Office inrelbawlina tur hi vawiin nia kan chai, kan pass tur hi a ni leh ringawt mai a. Kha, ruling MLA i ding lama mite khan an han sawi a, ‘he system that zia hi’ an han ti a, minister-te hi an thik em maw ni chu aw ka ti a. “Minister-te demand-a hnathawhna tur awm miah lo hi keini tan chuan a tha zawk; Chief Minister-ah direct-in kan kal a, kan duh kan huichhuak theia lawm’ an han ti te phei chu minister-te dinhmun hi a tihnam lutuk a ni. A tlachawpa kal sorkar budget kan han pass ang a, chumi hnu-ah Minister-te hian an department hotute nena an mamawh an sawiho kha Chief Minister-ah, finance-ah an la dil dawn chauh a ni a, a manganthlak khawp mai. MNF sorkar hmasak khan Pu Speaker, thil lar deuh mai chu, ‘kan police te kut an phuar a ni’ tih kha a ni a, Law & Order-ah khan an han fail nasa reng bawk a. Tun sorkar-ah ve thung chuan thil lar deuh mai chu, ‘minister-te kut an phuar a ni’ tih hi a ni. Minister-te kut hi phuarin a awm tak tak a ni, tun kan budget han hmuh atang hian.

Nichina kan sawi tawh ang khan, ruling MLA tena minister pawh dawr ngai tawh lova CM atanga thil sawichhuah theihna, minister-te kal-kana pawisa han dilchhuah theihna sorkar vawiinah hian kan thleng a ni a. Tuna kan awm dan hi chu a nihna takah chuan ‘Financial Dictatorship’ kan tih hi a ni tlat mai a ni. A awmna bawm a dikloh hi chuan thil kalphung hi a dik lova, bawm tha a ngai a ni, Pu Speaker.

Hei, covid chungchangah te, 'covid avanga sum kan hmuh turah kan beisei kan hmu lo' an ti a, covid avanga an beiseiloh an hmuhte hi an sawi ve leh duh bawk si lova, 'covid avanga sum tam tak an hmuh hi a tam ve a ni' tih kha Pu Speaker, sawihawanna atan karawn sawi duh a.

Demand No. 45 - PWD hi tawite rawn sawi ka duh a. Kan House Leader zahawm tak khan min lo chhinchhiah sak sela - Lunglei by-pass road atan sorkar hmasain vaibelchhe 10 a daha kha mi tam tak hian a hre lo; tunah hian D3-ah a awm a, pawisa hi investigation tih nan te eng emaw zat hman a ni a, hei kum li a liam dawn a, hna la thawh tan loh a ni a, pawisa a awm reng si a. Hei hi kan Minister zahawm tak hian department lamah te lo nawr se la, tuna pawisa awm hi chuan a vaiin a daih dawn lo tih chu mi zawng zawngin kan hria a. Amaherawhchu bul kan tan ang a, kum thar lehah pawisa an dah belh leh ang a, vawikhata dah teuh khan kum khat chhungin an hmang zo chuang lo, a daih tawk anga dah kha sorkar hmasain financial management thiam taka a kalpui dan kha a ni. Tin, Lunglei Civil Hospital crore 15 dah te pawh kha vawiin ni thlenga la tihloh a ni a, hengte hi kan sorkar hian hma min han laksak sela ka duh a.

Pu Speaker, i dinglama mite khan thil hi an hrelo ang reng ka ti a, zawhna te kan zawt a, sorkar atangin chhanna kan hmu a. Champhai kawng hun rei lote chhunga kan siam mek te hi tun sorkar emaw, PWD emaw thawh-thatah an han sawi a, chawhma lamah te khan Silchar atanga National Highway kalkawng that tawh zia te kha an sawi bawk a, hei hi an inzir ve a ngai ka ti, Pu Speaker. *Unstarred Question No. 246*, National Highway chungchangah hian, 'Mizoram/PWD' a inti a, PWD hian National Highway-54 leh National Highway No. 6 kawng laih-zauh hna hi a enpui lo, heng hnathawktute hi NHIDCL an ni. "Central sorkar-in NHIDCL hi he hna enkawltu tura ruat anih avangin Mizoram PWD-in a enpui lo a ni" a ti a, a chiang. Vawiin niah infak vak a ngailo, thudik hi chu a lang mai. Hengte hi kan member te hian 'inzir-chiang ila' tih hi ka sawi duh a ni.

Healthcare-ah hian kan House Leader zahawm tak hi Chairman a ni a, hmannah pawh kan sawi tawh a, tunah leiba crore 59 chuang a awm a ni. Hei hi insawi-thiam chi a ni lova, healthcare kan kalpui tawh anih chuan, mipuite hnenah pawisa kan la a, kan ba hi chu kan pe mai tur a ni. A nihloh chuan, engvangin nge healthcare te hi kan la kalpui? Pawisa kan neih lo anih chuan mipui hnenah i la lo ang u.

Pu Speaker, *Starred Question No. 154*, Pu Vanlalhlana zawhna an rawn chhanna hi hmannah pawh zawhnaa ka rawn sawi kha a ni a. Policy year, October Ni 1, 2021-March Ni 31, 2022 inkarah healthcare scheme-a inziak-lut chhungkaw chu ti zat an awm tih a ni a. Ka rawn sawi duh chu - kan policy hi engatinge October atanga March Ni 31

anah? Thla 6 chhung healthcare scheme la thei lova mipuite kan siam ringawt hi chu mipuite sum hmanga inchhekkhawl tumna a ni a, ‘mipuite hmangaihna a awm lo a ni’ tih hi Pu Speaker, ka sawi duh baw a ni.

Demand No.1 - Legislative Assembly hi Pu Speaker, keini pawh engmah hre lovin helai House-ah kanrawn lut a, Legislative Assembly-a kan staff ten kan hriatlohte min zirtir a, kan thiamlohna zawng zawng leh tihturte min hrilh a. Vawiin nia kan session te pawh nizanah dar 10 dawnah vawiin business hi minrawn pe a a lawmawm ka ti, an thawkrim a. An thawhrimna hi Pu Speaker, nangmah leh i thawhpuite chungah hian vawiinah hian a mimal tak pawhin lawmthu karawn sawi duh a. Mimalin harsatna kan neih, keimahni family-ah te pawh harsatna kan nei, chung zawng zawnga min tanpuitu an ni hi vawiin niah hian sawiloh theihloh niin ka hria a karawn sawi baw a ni.

Pu Speaker, Excise & Narcotics - Demand No. 7 hi karawn sawi leh zawk ang a. Kan sorkar hi nichina ka sawi ang khan, a mak khawp a, dan anga zu-zawrh khap a ni a, dan loa zu-zawrh phal a ang khawp mai, kan kal dan hi. Dan ang chuan zu-zawrh chu an khap a lawm, dan loa zu-zawrh hi chu an phal Chiang a ni. Han en ula, nichinah member zahawm tak Dr. Thiamsanga’n arawn sawi a, Rangvamual-ah te pawh vawiin niah hian thalai tam tak nitin an chhuk a, traffic jam khawpin an kal a ni. Amaherawhchu, sorkar-in engnge a tih le! Khutah sum tam tak an zuk seng a, Mizoram sorkar ve thung chuan hetah Hunthar thlen dawnah checkgate a lo siam a, harsa tetea an zuk lak sa te kha an lo man khawm sak lawi si a, a hmunpui berah an man thei si lova, kan thalai tam takte thin hi a rim a ni tuna kan kalpui dan hi. Kan ti dawn anih chuan engatinge thapuaia kan tihloh? Kan Minister-in hemi tihrehna tur, Rangvamual duty-na drone a lei te kha he House-ah ropui takin a sawi a, ‘kha drone khan funte engzah nge maw a man tawh le’ tih te hi minrawn hrilh thei sela. Chuvang chuan Pu Speaker, kan sorkar kal dan hi a letling a, “sorkar pangngai kal dan ang lovin an kalna department apiangah hian an kal a ni” tih hi ka sawi duh a.

Animal Husbandry & Veterinary - Demand No. 34 hi ka sawi leh duh a. Kan hriat theuh angin vanduai thil a ni a, sorkar thiamloh pawh a ni lo, hripui ‘African Swine-Flu’ an tih kha a leng a, a bik takin a bul tanna chu kan bial Lungsen a ni. Lungsen mai ni lo, Mizoram pumpuiah mi tam takin eizawna atan an lo hman ve, an vawk-vulhte chu a thi a ni. Kha kha tu thiamloh mah a nilo, sorkar thiamloh pawh a ni lo, ‘mahse’ ka ti duh, engatinge heng tanpuiate hi hetiang mi harsate neih, thinglung khawnga an lo tih ve tang tangte hi kan state sorkar hian vawiin ni thlenga tanpuina a la pek theihloh? Zawnha kan zawt a, “central-ah kan dil” an ti, an dil chhung hian sorkar hi a tla mai dawn; an khawngaihthlak lutuk kan mipuite. Congress sorkar lai pawhin bawng-hri a lenga lawm, vawk-hri pawh a leng ve, mahse sorkar-in kan budget atangin

tanpuina a pe a ni; a tam emaw, a tlem emaw an lawm a ni. Vawiin niah chuan mirethei, miharsa zawkte tanpuina tur sum hi Pu Speaker, kan budget atangin an ui em em a, mahse eng rul-rula te hnathawhna atan chuan vaibelchhe tel an thehchhuak leh ur ur si. Mirethei hi an hmangaih lo, Pu Speaker. Chuvang chuan, hengte hi kan budget, keimahni pawisa atang hian tanpui dan ngaihtuah ve hram teh se tih kha kan Minister hi ka rawn ngen duh a ni.

Tin, a windup-naah heihi min rawn sawi sak se la, zawhna ah ka zawt tawh a, ‘i zawt diklo’ min ti nge ni, min chhang tha duh lova. England (engnge ni, ‘rampawn’ kan ti zawk dawn) atanga ‘vawkte’ kan ti dawn nge, ‘vawk chu’ kan ti zawk dawn, vawk hrim hrim an rawn lakluh Delhi-a quarantine-a dah Aizawl-a an rawn lak thlen kha, ‘Vawkte pakhat Aizawl thlenna atan engzat nge an hman’ tih kha ka rawn zawt duh a. Tin, ‘hei hi engzat nge la dam’ tih kha min rawn hrilh turin ka ngen duh bawk a ni.

Tin, Pu Speaker, Demand No. 5 - Lok Ayukta hi tihchak a tul ka ti em em mai a. Tun dinhmunah hian staff an nei tlem si a, hnathawh tur an ngah si a. Congress Thalai ten corruption chungchangah Lok Ayukta-ah an va kal a, ACB-ah an refer a. ACB-in tha takin investigation te an ti a, Lok Ayukta hian judgement a siam ngam tlat lo mai a ni. Lok Ayukta ha neilo kan nei em ni he sorkar-ah hian? Chu judgement chu CBI chhui turin an ti leh daih mai a ni. Chu CBI chu kan sorkar hian chhui phalna a pek leh pekloh chu kan Minister zahawm tak Vigikance Department changtu hian khang ‘Lok Ayukta-in emaw, CBI in emaw ‘chhui rawh se’ an tih hi, phalna a pe reng em, phalna a pe lo anih chuan, ‘engatinge Lok Ayukta hian judgement order hi a siamloh’ tih hi min hrilh turin a wind-up naah ka ngen duh bawk a ni.

Pu Speaker, a tawpna atan chuan Demand No. 32 - Horticulture Department hi, sorkar alo pian tirh khan kan intodelhna tur mau/rua kan tuipui em em a, *tissue culture* tih dan te (Bangalore atanga an monu damloh avanga a chi a rawn thlen tlai te kan hria a) kan Budget Speech-ah khan a rawn lang ta miah lo mai a. Tin, SEDP an rawn sem dawn a, thingtlanga SEDP hnuaia Mizoram intodelhna tura an thlan chu khaw tin maiah *bekang* a ni fur mai a. Ruling MLA-te pawh zawtin, ‘in khuaah bekang in ching ngai em’ ka ti a, ‘kan ching ngailo’ an ti vek mai a. Bekang ching tur hian a la ching ngailo te hi intodelh tir min tum a, sum tam tak senna tur a ni si a. Chutilaiin sorkar hian *telhawng* a han tuipui bawk a, a mangan thlak khawp mai.

Pu Speaker, hun ka la rei a. Horticulture Minister zahawm tak hian sum tam tak senga mau kan chin tawh hi eng ang chiahin nge hma a sawn tawh? Lengpui-a ka zuk kal venaah chuan an beidawng khawp mai a, an chinna hmun nga/hmun ruk lai ka tlawh ve a, han sawi tur a awm lo, an khawngaih thlak khawp mai a. Amaherawhchu, kan hriatloh lamah te hlawhtlinna a lo nei nge ni min han sawifiah sak turin ka duh a.

Chutiang khawpa thil tha chuan SED-ah hian Zoram mipui zawng zawng hi min han chin tir mai se la, IAS-te pawh an ban phah mahna. Ka lawm e, Pu Speaker.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, ka lawm e. Demand No. 14 atang hian ka han tan ang a.

Mizoram hi state kan nih hnuah kum 36-na kan hmang mek ta a, hemi chhung hian party pahnihin kan ramah ro an inrel chhawk a. Chung party pahnih sorkarna lo siam tawhte chuan ngaihpaawimawh bik flagship programme an nei ve ve a, chu chu ‘Sem’ policy a ni. 1989-ah Sem-policy hi Congress-in Mizoram-ah a rawn ching-chhuak a, cheng sing-thum sem an tiam a. Term hnih an sorkar a, kum sawm chhungin RD Block pakuaah chengkhat mah an sem hman lova, RD Block sawm leh pahnihah tlem tlem an sem hman a. Kum sawm chhungin cheng sing-thum dawng chhungkua pakhat mah an awm lo a ni.

1998-ah kan in thlang leh a, MNF ten thikin ‘Congress sing-thum hi kan luahlan a ngai a ni’ an ti a. “Min thlang tling ula, MIP hnuaiha cheng sing-nga kan pe ang che u” an ti ve leh ta a. Tichuan a bu-a an siamah “MIP chu programme hlawhchham ve thiango” tiin an ziak nghe nghe a ni. Term hnih (kum sawm) an sorkar chhungin cheng sing-nga an sem lova, cheng sang-li leh cheng sang-nga in an sem. Chu pawh chu mihring tlemte hnenah a ni leh a. Tichuan 2008-ah kan inthlang leh a, Congress ten, “MNF cheng sing-nga hi a letin kan lan loh chuan” an ti leh a, NLUP kha hming thar vuah in ‘NEDP’ an ti a, cheng nuia-khat sem an rawn zuar ve leh a, kum 10 an sorkar pui leh a.

Chumi chungchangah chuan Synod Social Front-in zir chianna a nei ta a, chu Synod ina a hmuh dan chu ka han sawi ang a – “Hemi kum chhung hian chhungkua pasarih chauhin cheng nuai-khat an dawng; 29% te hi an trade thlan nilo pek an ni; 88.6% hi Congress-ruling party atanga beneficiary” an ti a. Heti hian ziaikin - “Party-a fee pelo chu telhloh tur ang zawnga insawithaihna a awm; chu chu khawpuih aiin thingtlangah a hluar; party-a tel tura innawrluihna laka fimkhur tur leh Kohhran duh dan hre renga dodal tlat ngam turin kan inchah a ni” an ti a ni.

Tichuan CAG report kha ni 15.5.2017-ah he House ah hian laid a ni a, CAG chuan heng thil 3-te hi a rawn sawi leh a –

- 1) NLUP thiltum pali-te zingah hlawhtling pakhatmah a awmlo;
- 2) Beneficiary 9% chauhin an hlawhtlinpui;

3) YMA-in khaw 813 atanga baseline survey hmanga beneficiary tur an thlante chu a vaiin NLUP Apex Board-in a hnawl vek tih a ni leh ta a ni.

(Speaker: Pu Duh, kan Dan-ah hian thil-hlui vak vak kha kan ti lo ang e, a hma lamah i kal thei em?) A hlui lo, a hlui lo hei hi Pu Speaker, khami la inchhunzawm zel kha a ni a... **(Speaker:** Congress thin kha ka ni a, ka la hmangaih deuh nge maw ni le) Kan ram kum 36 chhunga party pahnhin min..., **(Pu Larintluanga Sailo:** Kum 36 chhunga party a zawm zat kha Pu Speaker, sawi tel sela) he House hian kaltlang hian mipuiin an hriat a ngai a ni.

Tichuan, 2018-ah kan han inthlang leh ta a, MNF chuan, ‘Congress nuai-khat hi a let-thuma kan luahlan a ngai’ an ti ta a, bungrua ang leh ran ang maiin heng party pahnih-te hian mipui hi min thlir a, min lilam thin a, a chhang huai zawk zawk lah hi kan vote sorkar ziah bawk a, mipuite pawh kan inenfiah a ngai a ni. Tichuan, 2018 inthlanpui-ah chuan, a lo thlen hma khan, inthlanpui thlirlawknaah khan an president chuan heti hian a sawi a, “Director-te, Secretary-te kan rawn dawn lo, ziaksain kan nei vek, Bawngpui-insi ang maiin warm-up awm lovin, mei kawha tan phat thei turin kan inbuatsaih” a ti a, chu inbuatsaih chu tunah hian sem an tum tan chauh a ni.

Tin, Kolasib-ah, 2013 March Ni 4-ah party-president bawkin thu a sawi leh a, “NLUP hmu tah leh la hmulo zawng zawng chhung tinin in dawng vek ang” a ti a. Hmanniah Kolasib-ah bawk a sawi lehnaah chuan, “MNF-unit tinin thlan tur lo en ula, Congress te, ZMP te leh party dang chu in thlan ka ring lo” a ti leh ta si a ni. 2013-a a sawi chu, “kum hnih/khata sing hnih/khat tih a ni ve lo, nuai-thum aia tlemlo, nuai-thum chuang in dawng vek ang a. Pu Zoram, i sawi chu NLUP te nena tehkhin chuan a kar a va hla ve, ‘Petera ai chuan Lal Isua chu u-tak a ni’ tih kha a va ang ve’ min la ti ang. Mosia awm tura a nu hlawhfa an ruai ang mai kha in ni dawn” tiin. Tichuan nuai-thum chunglam chu vawiiinah ₹50,000/-in sem kan tum tan ta a, ₹50,000/- kum-nga chhunga miin an dawn hian thlatin ₹883/- hlawh ang an ni a, nikhatah ₹27/- hlawh ang an ni. Nuai thum atangin kan tla thla nasa em em a ni.

Tichuan, Horticulture Department hian State Award a lawm ni khan engnge kan sawi leh tak le - “Sorkar hnathawkte aia sum in lakluh tam zawk dawn avangin IAS-te pawhin an hna an bansan duh hial ka ring; sorkar hnathawk ten dawn veloh in lo hlau ang e, kei pawhin tih ka tum; Secretary pawh, IAS pawh kan sem vek ang. ‘E khai, sorkar hna ka thawk peih tawh lo, ka bang dawn’ an tih turin kan siam dawn”. Kan thil sawi leh a taka thil thleng hi a inthlau mah mah thin a ni.

Tichuan, tuna kan sawi lehah chuan - “Sorkar hnathawkte chuan an dawng ve thei lovang kan ti leh ta si a ni. A chhiarkawp hi han chawk ta ila, 2011 census-ah khan mihring 2,21,077 kan awm a, tunah crore 350 sem tur a ni a, chu chu ₹50,000/- zela kan

sem chuan chhungkua 700-in an dawng dawn tihna a ni a, a dawng ve lo hi chhungkua 1,51,077 an awm dawn tihna a ni.” Engpawhnise, Pu Speaker, sem vat vat se kan duh khawp mai a. A chhan chu, ‘ka dawn ve leh ka lo lut ang’ ti hi kan dawng hnem angreng si a, thenkhat chuan, ‘ka dawn ve loh phawt chuan ka lo lut ang’ an ti bawk si a, sem thuai thuai se tiin kan nghakhlel khawp a ni.

Le, kan ram kan hrui dan hi, kan kal dan hi kan thlir let a dikin ka ring a. Mihring tute emaw an retheihna denchhena ‘Sem’ policy hmanga an duhthlanna leh an zalenna hmang ngam lova, chumi policy-a kan ram heti chen kan tuam hi a paw em em, a taka ka experience pawh hi a tam khawp mai. Public meeting kan neihnaah pawh, “a list-ah ka awm ve si a, a langa karawn thut ve si chuan min paih leh si ang” tih hlau reng reng, thinlunga duh vang nilova dawn ve a duhna avanga, retheihna avanga ruling party a inpe, heng hi kan hria a. Nichinah pawh kohhran report pawh kan ngaihthlak tawh kha. Chuvangin hetiang hi ‘politics-aiawt’ a ni a, Chakai kan chiaha Aiawt-ah sa, Chakai kan hmangaih vang a nilo, a Chakai man kan duh vang a ni. Hetiang politics-aiawt hmang hian kan ram kan inhrui rei lutuk tawh a, hei hian kan rilru leh kan thlarau thlengin a tipiangsual zo vek tawh a ni. He ‘Sem’ policy hian Bible zirtirna a kalh a, kohhran duhdan a kalh bawk a ni. Chuvangin, tun atang chuan Pu Speaker, tumahin hetiang hi zuar tawh lo turin ka inngen takzet a ni.

Tichuan, Demand No. 24-ah hian han kal ila. Hei, ‘Kamrula’ kan sawi fo a, Kamrula hi Class-I contractor a ni lova, chuti chung chuan 2019 June Ni 24 leh 2021 December Ni 9 (kum hnih leh a chanve) chhung hian hna vawi 13 a hmu tawh a, nuai 100 chuang vawi 10 a hmu tawh a, a vaia kum hnih leh a chanve chhunga a thawh hi vaibelchhe 11,643 (Vaibelchhe singkhat, sangkhat, zaruk sawmli leh pathum) man a thawk tawh a ni. Hei hi MLA-te min chhanna document atang veka ka lak a ni. Hmanniah kan CM zahawm takin contract hmu tam zualte hnathawh min rawn sem a, khatah khan Kamrula thawh hi vaibelchhe 115.69 ang chauhin a rawn sem a, a diklo viau a ni, kha kha chu. Tunah hian Kamrula’n kum hnih leh a chanve chhunga contract a hmuh hi tun kan budget pass tura department 27 te budget aiin a tam zawk vek a ni. Ruling party pawh inngaihtuah Chiang rawh u, in lunga awi chiah em. Nuai 1959 man Airport-a a thawh phei chu nikum April, Ni 21-ah khan a thawk a, chutah chuan work order ala awm lo reng reng. Kan thalai ten September Ni 13-ah an zuk tlawh a, hna a lo thawk teuh tawh. Tichuan, ‘work order’ ti mai ang, ‘work order’ pawh a inti lo, a inziakah chuan ‘notice to proceed’ tih hi a inhmang a, a copy ka nei a. Chu chu Ni 20.9.2021-ah khan an pe chauh a, sorkar-in ‘thawk rawh’ a tih hma khan thla 5 a lo thawk tawh a, a lo thawk uaih tawh a ni. Restricted-tender a hna sem kan sawisel a, chu chu la tha tak a ni. Work order pawh la awm reng reng lovin miin hna an lo thawk mawlh mawlh thei a, an thawh tawh hnuah ‘proceed rawh’ tihna order an zuk pe chauh a ni.

Chutiang chu a ni a. Hei, Pu Zoramchhana pawh hian kum-hnih leh a chanve chhung hian cheng vaibelchhe 9,062.99 man a lo thawk hman der tawh a, kan Chief Minister-in minrawn semah kha chuan vaibelchhe 129 man chauh thawk angin a rawn in show a ni. Meidum leh Hortoki inkar hna kan en phei chuan December thla-ah work order an hum fur tawh a, nikhatah mi pakhatin contract pathum/pali te an hum thei a, a ni inthuhmunah. Tichuan, hna an han thawk dawn a, restricted-tender a pek ni si, hmanhmawh thlak ni si kha, a lo hmanhmawh thlak reng reng lova, survey pawh an lo la ti lo reng reng a, an work order an hum a, hnathawh ngaihna pawh an hre lo, bul an tan thei miah lo, sorkar ala inpeih lo. Chuti chung si chuan original-estimate man te kha an chhutchhuak vek a, he sorkar-ah hian survey ti miah lovin engtingge estimate hi an siam chu le, khawvelah ka la hre ngai lo hei hi. Work-order an hum tawh hnuah survey tunah khuan an ti dawn a, contractor pakhat chuan 'Kel singkhat man a talh' tih te pawh kha news-ah in lo chhiar ve ka ring. Work-order hum vek tawh hnuah survey han tih chu ava nuam dawn em! Hetiang dan hi CPWD-ah emaw, eng manual-ah mah a awm lo. Kan induhsak dan hi 'a uchuak lutuk deuhhleka ni' tih hi ka han sawi duh a. Restricted-tender (hna-hmanhmawh) ti si, vawiin thlenga kutthlak theih loh a ni a.

Chutihlain lehlamah kan sum a harsa em em a, mi-tenau hlawh pawh nei mumal lo, lawmman mai mai dawng 'ASHA' kan tihte pawh vawiinah hian kan bat sak a, tunah hian an nuar mek a. Sorkar-in biak pawh in tum lo, heng mite te, hlawh pangngai pawh hmu ve phak lo te sum vawiinah hian kan hreng a. Tichuan, tar chawmna kan hreng a, hnuchham chawmna, rualbanlo chawmna, chutiang zelin, RUSA a Assistant Profession te pawh kumkhat vel hlawh kan pe thei tawh lova, tichuan Healthcare tihmasak-ah Reliance Company an ruai a. damlo mi 4922-te bill kha vawiin thlengin a thamral ta a, an ba ral a, a vaiin nuai 741.22 an ba ral a, Synod Hospital, Durtlang ami pawh khi nuai 86.88 Reliance Company khan min bat ral sak a ni; a fail khawp mai. Vawiin niah tihdan dang kan han ti leh a, tunah crore 59 an ba leh tawh, helaia damlo mangang ngawih ngawihthe kan hnenah an rawn kal a, an mangang a ni. Retheia vangin a hun lovah an thi mek a, chung mite pawisa heti chen chen bat sak sia, helaia contract lo inpek mawlh mawlh si hi kalphung dik ani thei em? Chu chu a ni, kan hriatthiam loh chu ni.

Chuvang chuan PPE thuina mai mai pawh khati khawpa nasa a nawrchhuah a ngai a, tichuan LESDE hnuai PMKVY Training provider te ta pawh tunah hian kum 2 chhung bill a tang a, pek a la ni lova. Mahni sum ngei deposit te pawhin tunah hian an lachhuak thei lova, sorkar hnathawk ten GPF an withdraw dawnin Minister-in a recommend a ngai a, tlatlum fe lo tan chuan GPF pawh a withdraw theihloh. Lunglei-ah Covid a vanga damlo, chaw pe theitu, chaw supply tute tunah hian nuai 35 bat sak a la ni. Lungdar-a nikum lama tuisemte kha vawiin thlengin bat sak a la ni, an harsa a sin. Chu chu a ni Pu Speaker, ka sawi zui lovang, hun ka bawhpel lovang.

Amaherawhchu, a tlang kan kawm duha chu - kan kaldan hi, hawh u, i thlak tawh ang u. Sem ringawt mai, mi retheihna denchhena an duhthlanna pawh hmang thei lova hetiang kan ti hi a diklo, kan Bible zirtirna pawh a kalh a ni. Thu-tha, dikna leh huaisennain kan ram hi kaihruai ila, tichuan miretheite hi ngaihsak hmasa ila, contractor-te chuan lo nghei deuh zawk rawh se, lo nghak deuh zawk rawh se; damlo bill te hi pe hmasa phawt ang. Chutiang tur chuan he kan Budget kan pass tur pawh hi hman nise kan duh a, kan ngen bawh a ni. Ka lawm e.

SPEAKER : Awle, tunah chuan Dr. K. Beichhua, Minister zahawm takin kan sawihona te rawn wind-up turin kan sawm ang a, sawifiah ngai a tihte rawn sawifiahin, tin, a demand-te House-ah pass rawn dil nghal se. Tunah kan sawm e.

DR. K. BEICHHUA, MINISTER: Pu Speaker, ka lawm e. Vawiinah hian ka rilrua thil lian tak ka neih chu, Zoram-in hun harsa, Covid 19 a vanga harsatna te, Ramri buai a vanga harsatna te, Vawk-pul hri a vanga harsatna te, lirnghing a vanga harsatna te leh refugee a vanga harsatna kan tawh mek te hi ngaihtuah chuan a vanduaithlak mang e tih theih tur a ni.

Mahse, Pu Speaker, heti zawng hian ka ngaihtuah a. Kum 2018 MLA General Election dawn khan kan Pathian chuan vawiina kan hun tawn tur hi a lo rel lawk vek a ni. Chutiang chuan i veilama fing tak tak te, tawngthei tak tak te, thil hrethei tak tak te, hengho hi Pathian hian Zoram enkawl tur hian a lo ruat lemlo a ni. Pathian-in mi tlawmte te, Pu Zoramthanga leh a thuihhruaite hi ‘he hun khirh taka ram enkawltur hian min ruat a ni’ tih keimaha ka chiang a, ‘hun khirh leh thil harsa kan tawh pawh hian chung chuan chakna min pe thin a ni’ tih a hmasain ka sawi duh a ni, Pu Speaker.

Vawiinah hian ka demand-te member tam takin an sawi a, a ropuiin a lawmawm ka ti a. Hun hman tam tum lovin Pu Speaker, Demand-ah ka lut nghal mai ang a.

Demand No. 7 - Excise & Narcotic hi Pu Speaker, member 15-in an sawi a. Khangah khan a tlangpuiin kan phuloh fakna te leh lawmthusawina te a ni a, react tur a tam vak lem lova. Helaiyah hian react tur ang deuha ka han chhinchhiah chu, Pu Speaker, member zahawm tak Pu KT Rokhaw’n, ‘a hlawhtling lo; zu-khap hi a ti tak tak lo a ni’ a tih leh, ‘enforcement 400 vel lek hi chu an tlem deuh a ni; hei hi tihchak ni se’ a tih hi a dik khawp mai a, keini pawhin hei hi kan duhthusam a ni. Chutiang tur chuan 2019-ah khan kan Chief Minister zahawm tak department lama kan hotute nen hmuin, ‘enforcement min tihchak sak rawh le’ tiin kan va thlen a. Ani chuan, “kum khatah chuan vawilehkhatah tam tak a tih thut theih loh ang a, kuminah hian Constable 45 leh Inspector 50 vel la phawt ila, nakumah hma kan la chho zel dawn nia” tiin min chhang

a. Tichuan hma kan han la chho a, vawiinah hian Constable 45 lakna turah physical fitness kan ti vek tawh a. Covid-19 avang khan mi 2000/3000 written exam pawh conduct hleithei lovin kan kal-chho a. Tunah hi chuan written Exam kan conduct tawh a, reilote-ah result pawh chhuak mai thei turah kan inbeisei a ni. Chutiang chuan boruak te a that chuan kan Chief Minister hian enforcement lam tihchak hi a tul atih zawng tak a ni tih kha ka chhanna a ni.

Tin, Member zahawm tak Pu K. Laldawngliana rawn sawi, ‘Serkhan Outpost siam ni se’ a rawn tih kha, Serkhan Outpost hi nichina ka rawn sawi tak ang khan tun dinhmunah chuan duh viau chungin kan la ti thei rih lo a ni tih kha ka chhanna a ni.

Member zahawm tak Pu Zodintluanga khan ‘Dan lova zu-zawrh’ ti leh ‘Drone khan funte engzatnge a man’ tih te kha a sawi a. Khawvelah hian drone hmanga funte an man hi ka la hre lova, drone hmangin pakhatmah kan la man lo keini pawhin. Tin, ‘Dan lova zu-zawrh’ tih kha Dan lovin tute emaw hian Zu an lo zuar thin tehreng emaw ni dawn ni; member zahawm tak pakhatin kha ti taka alo lana kha awm pawh ka tihpui tho e; a na ve em bawk a ni. Kha kha Excise-ah a tlangpuia ka react theih ni se, member thahnemngai taka rawn sawitute chungah lawmthu ka sawi a ni.

Tin, Member zahawm tak Dr. ZR Thiamsanga khan Pu Speaker, MBBS kan zir lai kha chuan ka hming hi a lam thiam viau a, kan chhuah hnu Gynae a practice hnu hian khati khan ka hming hi a lam tlat tawh mai a. Ka hming a lam dan kha MBBS kan zirho laia a lam ang khan lam leh tawh se tih kha ka sawi duh a.

Pu Speaker, achievement tlangpui a tawi thei ang berin ka lo sawi ang a. ‘Excise & Narcotics’ kan tih chuan Zu leh ruihhlo man hi a ni mai a, kumin Financial Year chhunga kan achievement hi tawitein han tarlang ila -

- Kum 2018 atanga vawiin ni thlenga Heroin kan man hi kg 33.022 a ni a, a sum zawng chuan ₹11,55,78,475.25/- a ni.
- Methamphetamine hi kg 191.676 kan man a, a pawisaa chantir chuan ₹28,75,14,000/- a ni.
- Foreign liqour hi bottle 1207 a ni a, a pawisaa chantir chuan ₹96,560/- a ni.
- Foreign beer hi 20 a ni a, pawisaa chantir chuan ₹1,600/- a ni.
- Foreign-imported canned beer hi 11,877 a ni a, a pawisa zawnga chantir chuan ₹71,00,2,620/- a ni.
- Foreign FML hi litre 5.950 a ni a, a suma chantir chuan cheng 357/- a ni.
- Foreign imported wine leh BEDC te hi tam tham tak man a ni bawk a ni.

Khangte kha Excise-in hma kan lakna tlangpui ka rawn tarlan theih chu a ni a. Kan hriat angin Enforcement kan tlem a, mahse kan thupui chu – ‘Quantity’ ni lovin, ‘Quality’ ni

zawh rawh se” tih hi Excise Enforcement hian tunah hian kalpui mek a ni. Kan thawktute hnenah hian he House kal tlang hian lawmthu ka sawi duh a, an thawhrimna te, an taimakna te leh ram leh hnam tan ke an pennaah hian fakawm ka ti a, kan staff zawng zawngte chungah lawmthu ka sawi a ni.

Demand No. 29 hi member 15 an rawn participate a, a tam zawh atang hian fakna te, lawmthu te kan dawng a ni. Lahlam taka ka ngaihtuah chuan a inthlahrunawm ang reng a, kan hmalakna beitham te teah lawmthu kan han dawn hian a inthlahrun awm zawh em em a ni. Mahse vawiinah hian ‘kan lawm tak tak a ni’ tih kei leh ka department-a thawktute hian kan sawi duh a ni.

Pu VL Zaithanzaua leh member dangte pawh khan an lo sawi a. Old-age chungchang hi department lam pawh hian hreawm kan ti a, vawiin ni thlenga kan la pe thei lo hi pawh kan ti tak meuh meuh a ni. Hmanni khan bialah ka va kal a, pitar pakhat (ka ni tur a ni a) a lokal a, “mama, tar-pension hi i ei zo tawh em ni” min ti ringawt mai a, hreawm ka ti khawp mai a. Pu Speaker, hei hi tunhnai maia buai thut a ni lova, 2014 atanga he harsatna hi tawh-chho tawh kan ni. Kum 2014 atang kha Ministry of RD ina list min rawn siam sak leh keimahni department ina proposal-list kan siam hi mismatched a awm tlat mai a ni. Kum 2014-ah khan (a figure chu ka sawi lo mai ang a) Indira Gandhi *old-age pension* atan hian min pe a, chubakah chuan *widow-pension* leh *disabled-pension* atan tam tham tak min a pe bawh a ni. ‘Kan proposal ang khan an lo ti a ni hi’ kan ti a, kan lawm viau a, a kum lehah chutiang ang proposal chuan kan han kal tir leh a, chumiah chuan a aia tlem daih min lo pe a ni. Chutiang anih takah chuan anmahni nen inrawnin old-age pension, a exceed-na *80-above* anih chuan, *80-below*-ah adjustment kan siam thei a, tin, old-age pension an lo tam khan, widow-pension leh disabled-pension-ah adjustment kan siam thin a ni. Chutiang chuan kum tam tak kan lo kal-chho a, anmahni pawhin ‘a thaa lawm’ an ti a, chutiang chuan kan kal-chho a ni.

Tichuan, tun hnaiah first-quarter min rawn released sak a, November-ah state sorkar-in expenditure min han pe-chho a, tunhmaa kan tih ngailoh dismissed quarter-a chhunluh a lo ngai a. Treasury-ah bill kan thehluh a, Treasury lamin ‘dismissed quarter-a thun a ngai, lo siam tha leh rawh u’ an ti a, tichuan kan han siam-tha leh a, chulai teah chuan actual angin Ministry of Rural Development atangin min rawn released sak si a, dismissed -ah upload a ni bawh si a, chulai harsatna chuan pension hi sem thei lovin min dah a ni. Hmanni khan Ministry-ah kan zu intir a, ‘proposal rawn thehluh ula, kan lo en ang a approval kan siam sak ang che u’ an ti a, Ministry-ah kan in tir-thla a proposal pawh chu kan thehluh a, tunah hian beiseina nen kan lo thlir mek a ni.

November 2029 atang khan old-age atana state sorkar-ina a tum thin cheng 50/- chu cheng 100/-in tun sorkarin a tipung a, *widow pension*-ah pawh khan cheng 50/- kha

cheng 100/- a lo ni ta a ni. *Disable* ah pawh chutiang tho chu a ni. Hei hi pawl kan ti a, a dawngtu turte pawhin khawngaih takin min lo dawh hram hram sela, “tun atanga reilote, kan inpek theihna beiseina nen kan thlir mek a ni, an tan ke kan pen mek a ni” tih kha Pu Speaker, nangmah kaltlangin Zoram mipuite hnenah ka hriattir duh a ni.

Pu Speaker, Pu KT Rokhaw, Member zahawmtak zawhna – ‘Tribal Girls Hostel Tipa-ah min dah sak thei em’ a tih kha, Pu Speaker, 2019 - 22-ah pawh khan project thehluh a ni a, vanduaithlak takin Ministry lamin ojection an lo siam ta tlat mai a, a leh pekah pawh kan thehluh leh ngei a. Term hmasa, i veilama kan thut lai khan MLA “contituancy zawng zawngin Higher Secondary an nei vek a, Tipa chauh hi Higher Secondary nei lo awm chhun anni, Pu Speaker, hei hi chu ngaipawimawh teh ang u” tih kha ka sawi a ni a. Tunah chuan thei tawp chhuahin Ministry of Tribal Affairs atangin kan nawr-chhuak tawh a, building pakhat saw nuai 50 sengin tha deuhin kan sa tawh a, nuai 150 kan la nei a ni. Tin, ‘hostel pawh kha kan la nawr sak zel ang che u’ tih kha kan hrih duh a. Tin, a bulah sawn EMRS pawh admission kan hawng tawh a, tuna tanga reiloteah naupang 480 awm thei tura ruahhman niin, Residential Hostel pawh awm nghal tur a ni.

Pu Ramthanmawia, Member zahawmtak zawhna – ‘Khawbung EMRS hi engtikah nge tan theih a ni ang’ tih kha, Pu Speaker direct-a State sorkar-a min rawn pek hian awlsam tein kan tan nghal mai thei a. Mahse tunah chuan DCL company hian an duh khirh khawp mai a, land-lease nei fel thlap a duh a, awlsam tea han chin fel mai theih a ni lova, mahse tunah chua kan peih fel tawh a. Forest clearance peih fel tawhin kan thawn thla tawh a, ‘an rawn tan mai kan beisei a ni’ tih kha ka chhanna ni se.

Pu H. Biakzaua, Member zahawmtak Lawngtlai East bialtu khan, ‘Sangau EMRS min ngaihtuhsak se’ a tih kha, EMRS guidelines-ah chuan population mi singhnih, 50% tribal an awmin EMRS a neih theih a ni. Tunah hian 17 kan neih tawh a, zirtirtute hlauh zawng zawng hi anmahni tum tur a ni a, hei hi Hindi kan thiamna tura kailawn a ni a, ‘kan tu leh fate hian chinese tawng te, burmese tawngte hi an thiam zawk dawn tlat’ tih chhuanlamin uar deuhin kan zuk dil a ni. Tunah hian 9 kan dil leh mek a, min rawn pek turah hian Sangau hi a tel dawn nge dawn lo ka hre lova, tel ve ngei turah ngai ila. Tin, ‘BDSW Lawngtlai-a awm saw vertical extension-in ICDS office saw min hman tir ula’ tih kha, ‘deptt. lama kan hotute nen kan lo enho ang e’ tih kha kan inchhanna ni se.

Chulovah chuan Pu Speaker, lawmthu sawina te, fakna te a ni deuh vek a. Member 15, he Social Welfare demand participate tute chungah lawmthu ka sawi duh a. Pu Speaker, kan achievement hi a tawi thei ang berin ka han sawi ang a.

Social Welfare leh Women & Child Welfare Department hi bifurcate a ni tawh a. Tunah Social Welfare-a kan hmalakna tlangpui han sawi ta ila. Member tamtak khan EMRS in rawn sawi a. ‘Eklavya Model Residential School’ kan tih hi sorkarna kan chan tirh khan paruk lai mai, on-going construction te nen kan nei a, tunah hian chungte chu admission te pawh tih vek a ni tawh a. A hnua 5 kan zuk dil-belh kha min rawn pe leh a, construction pawh chak taka kalpui mek niin a chanve aia tam kan zo tawh a. Nakum lamah chuan hengte pawh hi kan zawh theih kan beisei a. Chumi piah lamah chuan 6 dang min rawn pekbelh leh a, a vaiin 17 a ni ta a ni. Tunah hian a dang pakua kan dil-belh leh mek a ni.

Tin, Pu Speaker, ‘Support to Tribal Research Institute’ tih hi Ministry of Tribal Affairs-ah khuan kan nei a. Chutah chuan thil tha tak mai, ‘Construction of tribal research institute building at Kelsih’, tuna kan kalpui mek saw cheng nuai 2,228.50 sengin tunah hian kan sa mek a. Kan beisei dan chuan, *India Independence* a wawi 75-na lawmna ni pah fawmin July thla velah chuan kan hawn theih mai kan inbeisei a ni.

Tin, Tribal Freedom Fighter, ‘Ropuiliani Museum’ pawh tunah sak mek a ni a, cheng nuai 1,500/- niin, a zahve aia tam sak-zawh tawh a ni bawk a ni. Tin, Zofate festival hrang hrang, heng – Pawl Kut, Lai-lam Kut, Mara-lam Kut te, Chakma-lam Kut, Paite leh Hmar-lam Kut te pawh la tih vek kan tum a. Heng hi kum 2019 khan kan tan tawh a, mahse Covid-19 avangin kum-hnih chu kan chhonzawm thei tawh lova, boruak that ve leh hengte pawh hi chhonzawm kan tum a ni.

Pu Speaker, *Central of Excellence* te pawh tuna tanga reiloteah Tlangval NT. Biakkima, Boxer te khuaah hian neih theih kan inbeisei a, central lamah kan nawr mek a ni. He Central of Excellence hi Sports, a bikin Boxing lamah a ni.

Tin, Pu Speaker, kum 2019 atanga tun thleng hian ‘Special Central Assistance to Tribal Sub-Scheme’ hnuaiah project tam tak kalpui a ni a, Article 275 (clause 1) atang pawh hian thil tam tak nawrchhuah a ni. Kan hun tawnin zirlo hle mahse, Pathian hian mal min sawm nasa hle hian ka hria a, ka sawi seng lova, tam tak kan dawng a ni. Mahse, nikum atang khan he scheme hi central-in a rawn titawp a, ‘Special Central Assistance to Tribal Sub-Scheme’ kha ‘Special Central Assistance to Tribal Development’ tiin a khua (thingtlang lam) identify sa vekin ruahmanna a rawn siam a, chu pawh chu tunah hian kan thawn thla vek tawh a, tuna tanga reiloteah chuan ‘member-te in bialah theuh khan hei hi a rawn haw dawn a ni’ tih, vawiinah hian kan inhrilh ni se.

Tin, ‘Institution of Support from Marketing & Development of Tribal Produce Scheme-ah pawh hian cheng nuai 470/- chuangin thil dang dangah hma kan la a, ‘hengah pawh hian hmalakna ropui tak kan nei a ni’ tih ka han sawi duh bawka.

Tin, nichina ka han sawi, ‘GIA under Ministry of Social Justice and Empowerment’ tih atang khan ‘National Action Plan for Drugs-Demand Deduction’ kan tih te, ‘National Plan for Senior Citizens’ kan tih te, ‘Scheme of Grand-in-Aid to Voluntary Organisation working in schedule caste’ kan tih te, ‘Disable Rehabilitation Scheme to promote voluntary action for persons with disabilities’ tih te, ‘Assistance to Disable-persons for purchase-fitting of aids and appliances’ tih te, hengah te pawh hian hma lain kalpui mek a ni.

Tin, GIA: Under Ministry of Tribal Affairs hian thil tam tak NGO leh DO te tana hmalak ‘welfare of schedule tribes’ tih tunah hian kan kalpui mek bawka. Tin, nichina member-te rawn sawi, ‘Jordan Centre’ kan tih Sethawn-ah khuan nikum lam atang khan luah theih tura kan inpuahchah tawh, kan Chief Minister zahawm tak pawh ina min hawn sak tawh mahse addict hote dah hleitheh lovin covid vei hote kha kumkhat zen-zawn kan dah a ni, Pu Speaker. Mahse tunah chuan boruak te a zia-chho a, tunah chuan addict te kan in admit tan tawh a. Bultan nan mi 30/40 vel kan admit a. Hei hi member zahawm tak takte pawh khan lo hria se, nangmahni biala tanpui ngai, khatiang kha an awm chuan ‘admit theih a ni tawh e’ tih kha he House kaltlangin kan inhrilh ni ta se.

Mizoram Social & Rehabilitation hnuai a ‘demand-reduction’-ah hian tunah hian nasa takin hma kan la mek zel a. Tin, treatment & rehabilitation atan Ministry of Social Justice & Empowerment atanga fund hmuh anih angin MSD & RD chuan IRCA ‘Integrated Rehabilitation Centre for Addict’ kan tih ang chi atan hian hma kan la mek zel a ni. Tin, ‘National Social Assistance Programme’ kan tih hi old-age pension te, widow-pension te leh disabled-pension te hi an ni. Person with Disability Act, 2016 hmang hian disabled tan economic rehabilitation te, ‘unemployed allowances to uneducated employed person with disabilities’ tih te kaltlangin *unemployment allowance* kum tin mi 25 hnenah thla khatah cheng 650/- zel pek a ni. Tin, ‘Stipend to handicapped students’ te pawh hi a awm a, heng te pawh hi ‘kan kalpui mek zel’ tih kha Pu Speaker, ka sawi tel duh a ni.

Pu Speaker, Social Welfare Department hian naupang thla-ruk annih atanga tar-pension thleng a huama vangin sawi tur a tam lo theh lova, chutichung chuan a tawi theh ang bera sawi ka tum ang a.

Anganwadi centre hi ram pumah 2244 kan nei a, Covid-19 hluar lai pawh khan tha takin nutrition kan pe reng a, inrinni tin hian *take-home ration* kan pe a, chutiang

chuan ‘regular takin kan pe reng a ni’ tih ka sawi duh a ni, Pu Speaker. Tin, Early Childhood Care & Education (ECCE)-ah pawh hian chak takin hma kan la mek zel a. Tin, ‘National Creche Scheme’ kan tih hian a tum tak chu Nu hnathawkte, an hnathawh chhunga an fate awmna tur hmun siamsak hi a ni a, chutiang chu Mizoram pumah hian center 175 lai kan nei a ni. Kumin chhung hian mi 3901-in he centre hi an chhawr a ni. Tin, Anganwadi Training Centre pawh hi la kalpui zel a ni a, ‘PMMVY’ kan tih hi nu in a vawi-khat nau-paia cheng 5,000/- a dawn theihna hi kan kalpui mek a, hei hi kan ti tha hle a , mi 4737 hnenah third-instalment thleng pek vek tawh an ni.

Tin, *Poshan Abhyan* hi kum-thum atana Prime Minister-in March Ni 8, 2018-a a launched a ni a, a tawp hun hi nikum March, Ni 31 kha a ni. Chutah chuan India ram pumah Mizoram hi a ti-tha ber nihna (category-2) ah kan nei a, *Overall-excellence* ah pakhatna kan ni a, 1.5 crore lawmmanah kan dawng a ni. Tin, ICDS-ah pawh India ramah pakhatna kan ni bawk a, 1 crore lawmman kan dawng bawk a ni. Lawmmanna 2.5 crore kan dawn te chu ‘Anganwadi 600 chuang siamthat nan kan hmang a ni’ tih Pu Speaker, he House-ah hian ka sawi duh bawk a ni. Hei hian a tum chu, naupang than-thu te, under-weight te, ‘anaemia’ kan tih thisen tlachham te, malnutrition te heng zawng zawng umbo hi a ni. Chutah chuan a thawk tha ber kan ni a, district-ah Champhai an ti-tha ber a, Block-ah chuan Thingdawl Block an ti-tha ber a ni. Kan Anganwadi thawktu (ASHA) te hian cheng nuai 2.5 theuh central atangin lawmman an dawng a ni.

Tin, Integrated Child Protection (ICPS) pawh hi district tinah hlawhtling taka kalpui mek a ni, Pu Speaker. Tin, ‘State Resource Centre for Women’ kan ti a, hmeichhe tawhsual tawkte, pawngsual tawkte khatiang ho tana ‘*umbrella scheme*’ kan tih mai heng – ‘beti bachao, beti padhao’ kan tih te, ‘Mahila Shakti Kendra’ kan tih te, One-stop Centre te, Universal Women Helpline te, Swadhar Greh Scheme te hi district tinah tunah hian kalpui a ni a. Heng women-helpline te phei hi chu toll-free a ni a, a number hi 181 a ni. Tawhsual tawk an awm chuan *round-the-clock*-in phone theih reng kan ni a, ‘chutiang mite chu engtik lai pawhin kan tanpui thei a ni, heng *women-helpline* hmang hian’ tih kha mipui kan inchah ni ta se.

A dang kha chu chipchiar takin ka sawi lem lovang a. ‘Ujjwala’ kan ti leh a, a bik takin mihringa sumdawnna leh nawhchi-zuar tura intihluhna leh khatianga inchhawrna te tireh tur pawh hian theihtawp chhuahin hma kan la a, kumin chhung hian hmeichhia 22 lai kan chhanchhuak a ni, *Ujjwala* atang hian. Working-Women Hostel hi ‘Lunglei leh Aizawl-ah tunah hian kalpui mek a ni’ tih ka sawi duh bawk a. Tin, ‘Mizoram State Commission for Women’ hi chak takin kan la kalpui mek bawk a. Mizoram State Social Welfare Board pawh Central lam atanga instruction kan dawn danah chuan, hei hi tihtawp mai theih dinhmunah kan ding a, mahse kan hotuten an

ngaihtuah ang a, ‘engtika ti tawp tur nge’ tih kha chu kan la en zel turah Pu Speaker, kan ngai.

Awle Pu Speaker, Demand No. 34 - AH & Vety hi react lutuk tur a awm lova. Kan sawi ang khan member zahawm tak takte hnen atangin kan phuloh fakna kan dawng a, duhsakna leh lawmpuinate pawh a tel bawk a. A ropui kan tiin ‘tun aia nasa hian thawk rawh u’ intih mawlh mawlhna angah kan ngai a ni. React ngai lai - Zangnadawmna chungchang kha kan vaiin kan ngaipawimawh hlein ka hria a, keini chauh emaw ngaipawimawh kan lo ti a, i vei lama mite pawh khan an lo ngai-pawimawh ve tho a, kan vaiin kan lo ngai-pawimawh tlang a ni, a pawimawh em reng bawk a.

Pu Speaker, kan hriat angin he sorkarna kan han lak phat atang khan African Swine-fever leh PRRS te hi leng thei reng a ni tih kan hriat avangin vawk, rampawn atang lakluh kha kan khap a ni. Kan Magistrate lamin theihtawp chhuahin min pui a, Home lamin min pui bawk a, NGO lamte pawhin min pui bawk a, Assam Rifles lam thlengin. Chutiang chuan lungrual takin kan han kal-chho a, result tha tak kan hmu chho zel a. Chutihlai tak chuan Krismas vuakvet leh Kumthar dawnah chuan pressure a na thei khawp mai a, ‘vawk lakluh hi min phalsak mai rawh, min phalsak loh chuan chutiang khatiing’ tih te pawh kha kan dawng zing a, tawngkam hawihhawm lo tak tak te pawh kan dawng nasa a ni. ‘A, ngawi teh u, engpawh nise kumkhat harsatna hi chu, a kum 3-na atangin, thu kan awi chuan vawk hi chu kan intodelh dawn a ni’ tih hi ka policy a ni a, ‘chu chu ka tiam a che u’ tiin ka lo sawi thin a ni.

Chutiang chuan kan han kal-chho a, a zia-chho viau mai a, ‘kan tum angin achievement kan nei ngei dawn a nih hi’ te kan ti a. Chutih karah chuan kan hriatlohah tute emaw thuawilo fal bik hi an lo awm ve leh thin a, chungte avang chuan vawiin niah kan ramah vawksa te pawh ei hleithei lovin kan awm a ni. ‘Thuawih tak leh tihnuam taka in awm chuan in rama thil thate in ei ang’ Pathianthu chuan a ti a ni. Vawiin niah hian ‘tute emaw thu awihloh avang hian kan ramah vawksa kan ei theilo te hi a ni mai lo maw’ tih ngaihtuahna te pawh min pe a. Chutiang chuan kan han kal chho a, April Ni 21, 2020-ah khan ‘Lungsen-ah vawk a thi a ni’ tih kan hria a, Ni 25 ah information official-in kan dawng a. Tlabung atangin kan doctor-te kan tir nghal vat a, a hmunah an va kal-chilh a, ‘containment area’-ah an puang nghal a. Aizawl atangin investigation team April Ni 28, 2020-ah kan in tir phei a, chutiang chuan an niin theihtawp chhuahin Lungsen leh a chhehvel zawng zawng nen hma an la-chho a, kei leh ka team te May Ni 8, 2020-ah Aizawl atangin Lungsen-ah kan phei ve leh a, chutiang chuan FIR pawh chumi niah chuan kan thehluh ta nge nge a ni. Chutiang chuan sawlai area saw containment area-ah kan puang a, Lunglei lam te pawh nasa taka fimkhur turin kan inchah a, kan rawn chhoh lamah theihtawp chhuahin awareness campaign te pawh kan

nei chho zel a. He African Swine-fever avanga awareness campaign kan fehchhuah hi vawi 209 lai a ni.

Pu Speaker, chutiang chuan hma kan la chho a, a chak angreng khawp a. A thua kan lo hriat chauh kha a ni a, a taka kan han luh chiaah chuan mortality rate kha ‘100% a ni’ tih kha alo dik chiaah a. Zingah chaw an ei a, tlai lamah chuan an lo let leh tawp zel kha a ni a. Kan rilru a hreawm a, a tuara te kan tuarpui takzet zet a, muthilh hleih theihloh chang kha kan ngah viau a ni. Chutiang chuan kan kal chho a, tun dinhmun hi kan thleng ta a, pawl kan ti tak tak a. Theih chu ni se zangna-dawmna te pawh hi han inpek zung zung te kan duh teh reng nen, vawiin ni thlengin kan la inpe hlei thei lova. Hei hi ‘chhan hrang hrang vang a ni’ tih kha member-te pawhin min hriatpui a tha hlein ka hria a.

A *compensation* chiaha kan luh hmian member-te kan chian zawk nan, vawk thite hlut-zawng parameters depts-in a chhut danah chuan - *0 to 3 months* hi a hlut zawng cheng 7,000/- angin kan chhut a. *3 to 8 months* hi cheng 18,000/- angin kan chhut a, *above 8 months* hi cheng 28,000/- angin kan chhut a ni. Chutichuan, kan vawk thite (a suat a kan suat ni lo) chi-hniha kalpui a ngai a, hei hi, kan ngaihfin chuan ‘compensation’ kan tihah hian kan buai leh thin a. A vai chuan vawk 33,417 te hi ASF vanga thi an ni. Chung atanga kan economic-loss kan han chhut danah chuan - total economic-loss hma khan a vawka hrim hrim kan loss hi cheng 6,08,23,000/- a ni, vawk thi hlut zawng, a paramenter depts-in kan chhut ang chuan. Tichuan kan economic-loss hi ₹2,48,26,60,925/- a ni. Chu chu kan economic lost a ni, a nasa khawp mai. A tuartute vawiinah hian ‘kan tawrhpu tak zet a ni’ tih kha Pu Speaker kan sawinawn duh a ni.

Tin, heng ASF avanga vawk thi te compensation kan dil hi central lam ni lovin State-Disaster Management Authority hnenah kan thlen a, Disaster Management Authority-in a depts. Disaster Management & Rehabilitation lamah a thawn leh a. Tun dinhmunah chuan kan hriat theuh angin Pu speaker, sum leh pai harsatna avangin *calamity*-ah min la puansak thei rih lova, calamity-a puan phawtloh chuan Disaster Management atang khan khang compensation kha pek theih a ni si lova. Chu chu anih avangin tunah hian, ‘heti ringawt chuan a diklo ang e, Disaster Management lamin an tlinloh takah chuan Planning lamah hian i dil leh ngawt mai teh ang u’ kan ti a, Planning lamah kan dil leh ta a. Tichuan, Planning lam atang chuan beisei tur a ni dawn nge dawn lo tih February Ni 9, 2022-ah khan Planning atanga chhanna kan hmu a. “Submission of fund proposal for rehabilitation of victims of African Swine-Fever” a tih a ni a, a lehkha number a dah bawk a. Chutah chuan – “Rehabilitation of victims of African Swine Fever has been included in the state itself of project for further examination” tiin min lo thawn a ni. Beiseina lian tak nen han thlir leh phawt ila.

Chutiang chuan kan hotute lamah pawh theihtawpin kan la nawr zel ang a, beidawn chuan thil hi a tawp nghal mai a, beiseina te pawh hi nei zel ila. Tin, ‘dawhtheih te pawh hi kan tih tur a ni’ tih lai pawh kha vawiinah member-te leh Zoram mipui kan inchah ni se.

Chu lovah chuan, central sorkar-a kan dil hi chu ASF kai nia kan rinhlelh, ‘a dang a kai palh ang’ tih kan hlauh avanga kan suat (culled) ho hi a ni a, chu chu vawk 19,010 a ni. Kan *culled* ho hlut zawng hi hetiang hian central-in a kalpui tawh dan guideline, Govt. of India-ah compensation share hi 50:50 niin, “Govt. of India in 50% a tum ang a, State in 50% a tum ang’ tih a ni. Vawk kan *culled*-te hlut zawng hi –

Kg 15 hnuialam	-	₹2,200/-
Kg 15 – 40	-	₹5800/-
Kg 40 – 70	-	₹8400/-
Kg 70 – 100	-	₹12,000/-
Kg 100 chunglam	-	₹15000/-
A total	-	₹97,5,10400/- a ni.

Tin, government of India compensation share hi ₹4,87,50,200/- a ni a, chu chu vawiina kan kalpui mek a ni a, State lam chu ka sawi tawh a, Planning lam min chhanna pawh Pu Speaker, ka lo sawi tawh a. Central lamah September thlaah khan keimah ngei ka zuk kal a, “min pe ngei tur a ni hei hi chu; State rethei kan ni a, tin hei hi kan pi leh pu atangin vawk-vulh hi kan economy-a tangkai berte zinga mi a ni a, *economic loss* a tam em mai a, min ngaihtuahsak hram rawh u” tiin lehkha kan thehlut a, “kan lo ensak ang che u” an ti a. Chulai chuan engmah kan la hmuhloh avangin December thla tawp lamah khan ka zuk kal leh a, chumi hnuah 7th January-ah Union Minister, Fisheries Animal Husbandry & Dairying, Guwahati-a alo kal khan ka zuk hmu leh a, rei fe kan ti ti dun a, ‘lehkha zia kin lo thehlut rawh’ min ti a. DO letter ka zia k a, “19th January-ah i lekha ka lo hmu a, action la turin instruction kan inpe e” tiin Union Minister ngei pawhin lehkha min rawn thawn a ni. Chu chu vawiin a compensation chungchanga kan dinhmun a ni, Pu Speaker.

Tin, Sial-vulhtute, Chhaolo tlangdung hi sial thatna hmun a ni a, a hungna Pu KT Rokhaw, MLA zahawm takin a rawn sawi ang khan, khi lai khi ka hovin fodder hmun zau tak kan siam a, a kum khatnaah phei kha chuan kan duhthaw lutuk kha lo vah hunah kan vat lo a, June thla velah lo kan vat a, hal nghal kan tum a, a kang thei dawn si lova kan ti a, diesel litre 200 kan lei a, kan hal ta ringawt a. Chutiang chuan bul kan tan a. A kum khatnaah chuan kan hlawhtling vak lova, a kum hnihnaah chuan an mahni moral kha kan reform in kan hria a. Pu Speaker, mihringa pawimawh ber chu, kan sawi fo thin ‘ram kal dik tur chuan rilru a dik a ngai a ni’ tih kha. Kha diesel nena lo kan hal ni khan a hlawhtling dawn lo tih kan hria a, mahse a khuate hian nakumah chuan ‘hma

nasa takin an la dawn a ni' tih min hmuhtir avang khan, rilruah kha kha min tiphurtu a ni. Chutiang chuan khilalah khian hma kan la a, kuminah chuan vaimin tin-singkhath Chhaolo-in an nei a, Siata-in tin singkhath chuang an nei baw k a. Agriculture deptt-in a herna khawl min pe a, a hmunah a herna kan dah a, tunah chuan vawk-note sawlaia va kaiha vulh kha kan tih tur a ni tawh mai a, Pu Speaker. Chutiang chuan hma kan la nasa khawp mai a. Sial-vulh lamah pawh hian ka bial Chhaolo-ah pawh mi 300 chuangin an vulh a, Siata te, Chakhang te, Chapi te, Zyhno-ah te pawh an vulh a, sial vulh hi an tam tawh hle. "Palak bial chauh nilo, ka bialah pawh Sial-vulh an uar tawh hle a ni" tih Pu Speaker ka rawn sawi duh a ni.

Pu Speaker, Member zahawm tak Pu C. Ngunlianchnaga, 'Lal' tih ka han belh tep chu a, a thu-lal em a, Pu Speaker. "Regular post awm lova casual-a hnathawktu Congress hun laia dah, sorkar thara ban vek" tih kha, Pu Speaker, 2019 sorkarna khatia kan han kalpuiah khan department-in sum bang a neih *wages* atana hman casual-a hna a lakte kha March Ni 31, 2019 kha an tawpna a ni hrim hrim a, an term kum-khat period atan a tawpna a ni a. Chuvang chuan mi 17, khang hun laia an lak kha sum leh pai *wages* head-a kan neih tak silohah chuan pawh ti tak chungin kan chawlhthir kha a ni a. Chung Mizoram puma mi 17 an lakte chu - Lawngtlai atangin mi 11, ka bial atangin mi 10 leh Mizoram District dang atangin mi 6 an ni tih kha Pu Speaker ka chhanna ni ta se. Sum te kan nei anih chuan hei hi chu kan mamawh khawp mai. Staff indaihloh a na a, doctor pawh kan indaih lo, DFA pawh kan indaih lo, 4th grade staff pawh chutiingin; sum te kan nei anih chuan 'kan chhunzawm leh ang' tih kha Pu Speaker, ka sawi duh a. Nichinah khan, 'sawi sawi mah ila min tihsak chuang lovang' a ti a, Pu Speaker, 'muhil tak tak hi chu kaithawh an harsa lova, muhil der hi chu an kaiithawh tak tak theihloh' tih ang vel a ni.

Tin, vawk thi compensation chungchang kha chu ka rawn sawi tawh a. Pu Sawivunga zawhna kha nichinah ka rawn sawiah khan a Chiang maiin ka hria a, kha kha ring nghal mai ila, Pu Speaker. Member zahawm tak Pu Vanlalhlana khan ASF avanga Durtlang ho tan zia te a sawi a, lawmawm kan ti khawp mai a, an NGO te, VC leh Local Council te chungah lawmthu kan sawi a, Home lamah lawmthu kan sawi baw k a. Chutiang chuan Mizoram mipuite hnenah he hri kan dona chungchangah hian lawmthu kan sawi a ni.

Tin, Member zahawm tak Pu Zodintluanga zawhna, UK atanga vawk kan import chungchang kha - UK atanga Delhi a lo thlen kha 28th February, 2020 a ni a, Covid a leng chho tan a. Vawk kan lakluh zat hi 45 a ni a, JSR Genetics, UK atanga kan lak a ni. Mizoram-ah 28th March, 2020-a rawn phurh haw kan tum a, mahse Pu Speaker, Delhi atanga phur tur Star Firm Animal Carrier hmanga Govt. of India-a kan dilna hi 3rd April, 2020 a ni. Chutih lai chuan quarantine clearance te a lo ngai a, Quarantine

Clearance hi 17th April, 2020-ah kan dil a. Tin, Inter-state Animal and Goods phurh khapna Home Secretary atangin 12th April, 2020-ah khan a chhuak a ni. Chutiang anih avang chuan covid vangin kan rawn phur haw thei ta lova. Chuti chung chuan phurh talh kan la tum a, Covid boruak a zia deuh hnuah phurh phalna Ni 12.5.2020-ah khan kan dil leh a ni. Mahse chutih lai chuan African Swine Fever hi Assam leh Arunachal Pradesh-ah te a leng tawh a, Govt. of India-in khang ho state kaltlang kha an phal ta si lova, kan mangang ta hle mai a. Anmahni rawtna angin Punjab Livestock Farm, Nabha leh Hoshiarpur-ah Govt. of India-in transfer rih tura order a siam angin Ni 13.5.2020-ah khan kan transfer pheih ta a ni. Mizoram a rawn thlen tak hi chu kum-khat hnuah chauh a ni a, Ni 14.4.2021-ah PAMF Thingsulthliah a rawn thleng thei chauh a ni.

Hei hi, Pu Speaker, theihtawp kan chhuah a. UK farm atanga thlawhna tum-hmuna phurh man a lo awm a, thlawhnaa kal man a lo awm leh a. Chumi piah lamah Delhi a rawn thleng a, quarantine-charge a lo awm leh a, chutiang zelin feed-charge te, medicine-charge te, custom charge te, import-agent charge a lo ngai leh a. Chumi piah lamah bank transaction charge te, transportation-charge from Punjab to Mizoram te a lo ni leh a. Hemi chhung hian doctor leh supervisor kan tir a, covid len tirh lamah khan a ni a, an rawn haw thei lawk lova, anmahni pawh an zu damlo hrep a, tlema tlemah kan inchan lek lek a ni, mihring pawh. Chutiang chuan Punjab-ah kum khat a zu awm hnu, a puitlin hnuah kan rawn hawn thei chauh a, amaherawhchu vanduaithlak takin ASF avangin an thi fai vek a ni. (**Speaker:** Ngawi teh, hmanah khan i sawifiah tawh lo maw?) A senso hi Govt. of India-in 100% (nuai 88.275) min pek sak a. Northeast-ah a nodal-department kan ni a, keimahni through in Northeast state dang-te pawh pek an ni. A multiplication (dividend) te kha chu in lo tih ve mai theih ka ring a, Pu Speaker.

PU ZODINTLUANGA RALTE : Pu Speaker, nangmah kaltlangin kan zawt a, khatiang mai maia inchhang tur kan ni lo. Nichinah windup-na turah pawh ‘vawkte pakhat hi engzahin nge a lo thlen’ tiin kan zawt a)

DR. K. BEICHHUA, MINISTER: Pu Speaker, khata tang khan member zahawm takte khan, a harsa lo baw a, ‘lo chhut mai se’ tih kha ka ngen a.

PU ZODINTLUANGA RALTE : Pu Speaker, nagmah kaltlangin kan zawt a, he House-ah, khatiang mai maia min chhang tur a ni lo. Vawkte pakhat man kha kan zawt a ni. Keini chu min zah lo pawh nise i chair, *Speaker-Chair* kha a zah tur a ni. Speaker kaltlangin kan zawt a, churang chuan, Speaker hi a zah tur a ni. Pu Speaker, vawkte kha a lo thleng lo a ni lawm ni; a puitling a ni lawm ni a lo thleng kha?)

DR. K. BEICHHUA, MINISTER: Pu Speaker, i thu ka awihlo tih nagmahin tawngkam khatmah i chhuah lova, i thu ka awih hleah ka inngai a.

Tichuan, ka kal zel ang a, Pu Speaker. Kha kha AH & Veterinary Department deuh bik a ni ta a. Pu Speaker, achievement hi ka han sawi ang a, kan achievement hi a tawi thei ang berin sawi tum ta ila.

SEDP hi kan flagship program a nihna angin pilot-project kha kalpui a ni a, a hlawhtling viauin kan hria a. Tunah hian 3rd installment pawh pek mai theih turin district lamah pek vek a ni e tih kha ka rawn sawi duh a ni.

Pu Speaker, ‘Establishment of District AH & Veterinary Hospital’ hi nichina kan rawn sawi tawh ang khan district 7-ah hospital thar hi sak a ni a, 4 hawn tawh niin 3 hi tun atanga rei loteah kan la hawng dawn a ni. Ka rawn sawi tawh ang khan dispensary hi eng emaw zat sak a ni a, chu bakah Animal check-gate hi hmun 10-ah siam a ni bawk a, ‘Nuclear-Boar Semen Station’ kha Pu Speaker, Kawmzawl-ah khuan zawh tawh a ni bawk a, ‘Satellite Nuclear Boar Station’ te pawh hmun tam takah siam a ni bawk a ni.

Pu Speaker, African Swine-fever chungchang kha ka rawn sawi tawh a. Goat-breeding Farm pawh hi tuna kan kel neih lai saw 132 a awm mek a, Thenzawl-ah kel note 90 tunah hian kan nei a ni. Tin, Ar-awpkeuna (hatchery) tichangtlung turin nasa taka hma lak a ni a, ZPDS-ah khuan a vawi khatna atan arnote sing-hnih awpkeu theihna kha sing-rukah kan update a, tunah khuan nuai-khat awpkeuna atan hma lak mek a ni.

Tin, Pu Duhoma question-ah khan, ‘kelpa a awm lo’ tih kha a rawn sawi dan a ni a, ‘Thenzawl-ah sawn kel-pa kan nei e’ tih leh, ‘a no-thlahtu tur leh a note-te zingah a pa pawh a awm e’ tih ka sawi duh a ni. Pu Speaker, *Mithun* development-ah pawh hian hma kan la nasa khawp a, tunah hian Thenzawl farm-ah sawn ‘a chi-tha thlahtu tur 5 kan dah ran tawh’ tih ka sawi duh bawk a ni. Pu Speaker, Mobile-Veterinary Unit hi NADCP hnuaiyah Mizoram RD Block tinah dah turin unit 26 leina tur tunah hian kan nei tawh a, tuna tanga rei lo teah hian kan lei ang a, mobile-veterinary unit motor kan lei ang a, ‘block tinah kan pe dawn a ni’ tih kha Pu Speaker, member-te hnenah kan inhrilh e. Tin, Pu Speaker, “National Animal Diseases Control Program” kan tih ang chi FMD leh Brucellosis control-ah te pawh hian theihtawp chhuahin hma kan la chho mek zel e.

Pu Speaker, AH & Vety chauh pawh ni lovin department dangte pawh hi anni deuh vekin ka hria a, staff-indaihloh hi a nasa khawp a. Kuminah hian doctor 6 an pension dawn a, nikumah 5 an pension a. Tun anga kan la kal-chhoh zel chuan department hian harsatna kan tawk chho zel dawnin a lang a ni. Engpawh nise, heng hi chu, hun-thate a lo her chho turah ngai ila, sorkar lam pawhin heng kan harsatna te pawh hi min sutkian sak turin beiseina sang tak kan nei a ni.

Thil pawimawh deuh mai pahnih chauh ka han sawi leh ang a. Biosecurity Safety Level, BSL-2 hi tunah hian cheng nuai 350 kan nei tawh a, ran hrileng awlsam tea hmuhchhuahna tur hi tuna tanga rei loteah hian kan sa thei dawn a ni. Kissan Credit Card hi vawk-vulhtute, ran vulhtuten interest tlemtea loan an lak theihna tur mi 1286-te hnenah department kaltlangin pek a ni tawh bawk a ni.

Tin, MULCO-ah pawh hian Mizoram Milk-Producers Co-Operative Union Limited hi AH & Vety Department nen chak taka kalpui mek a ni. **(Pu Lalduhoma:** Pu Speaker, Thenzawl-a ‘Dilzaupui’ kan ti nge ni a hming kha, saw saw a mawi khawp mai a, a lun em em mai a. Saw mi saw a management pawh siam ve a ngaiin ka hria a, ni-khata sum-lut pawh saw a thahnem hmel khawp mai a. A piah lawkah *Vantawngkhawthla* leh *Tuirihiau* kan lo nei a, sawtah sawn lawngleng pahnih hmanni lawkah ka va dah bawk a. Saw saw, saw laia mite sawn tha an tih angin an lo enkawl ngawt mai nge ni a, department hian mumal deuh hlekin a guidelines-te a siam ve?) Pu Speaker, hei hi thil pawimawh tak a ni a. ka hmanhmawh deuh nge ka sawi thleng lova. Saw lo pawh saw thil tha sawi tur a tam mai a, hun awm se chuan kan sawi teuh tur a ni a. Pu Speaker, Member zahawm tak Pu Lalduhoma rawn sawi ang khan, saw laiah sawn Management Committee kan indin a, AH & Vety Department Secretary Chairman niin, a kaihruaina hnuaiah awmze nei taka chei that tum a ni a. Lawng te pawh pahnih lei tawh niin a dil pawh tihzau belhin, a kawng te pawh awmze nei deuha siam nise kan ti bawk a. Chu Management Committee chuan remruatna a lo siam ang chuan hma lak-chhoh zel kan tum a ni. Pu Speaker, Member zahawm tak Pu Lalduhoma’n lawng pahnih a lo thawh a, a lawmawm khawp mai a, lo thawh belh zel thei se kan lawm ngawt ang. Pu Speaker, a chungah ka lawm e.

Demand No. 41 - Sericulture hi chu a tam tawh lova, Pu Speaker. Member zahawm tak takte session kan nei rei tawh a, in zahawm riau tawh mai a, zawh vat ka tum ang a.

Sericulture-ah pawh hian han react em em tur a awm lova. Lawmthu sawina leh thahnemngai tura infuihna lampang deuh vek a ni a. Chung zingah chuan a bik takin Dr. Vanlalhlana chungah lawmthu ka sawi a. A ni hi a tui khawp mai a, Inah te pawh min rawn len chillh a, hmalakna turte pawh kan sawiho nasa thin a. Tin, silk puan te a rawn keng tel bawk a, a lawmawm takzet a, lo inthlahrung miah lo se, englai pawhin kan welcome reng a ni. Kan directorate hi an veng lampanga awm a ni bawk a, churang chuan inthlahrung miah lovin khang in hmalakna, Self-help Group-te an dinin ka hria a, MLA Fund atangin *zopuan-tah* anga silk puan tah te pawh an lo ti a, hei hi a ropui kan ti a, department hmingin lawmthu ka sawi nghal a. Kan kal-chhoh zelna turah pawh thawh ho zel kan tum ang a, inthlahrung miah lov in thil tha i hriat chu kei emaw,

directorates-ah emaw, kan Secretariat-ah emaw 'i contribution kan welcome reng a ni' tih ka han sawi duh a ni.

Pu Speaker, Dr. Vanlaltanpuia pawh khan a rawn sawi nual a. Kan ram hi potential area a ni a, *Muga* te pheih hi chu khawvelah Assam atanga originate a ni a. Tunah hian lower-Assam boruak khu chu a lum tak em avangin Mizoram hi central Silk Board-in min target deuh ber a. Chutiang chuan hmalakna tha tak neih-chhoh tunah hian kan tum mek a ni.

Kan achievement hi tawi tein ka rawn sawi ang a, a inthlahrunawm tawh viau nain. Tuna **Area of plantation during 2021 - 2022** hi -

Mulberry	-	acre 4,197
Eri	-	acre 845
Muga	-	acre 668
Tussar	-	acre 20 kan nei bawh a ni.

Production of cocoon during 2021 - 2022 hi:

Mulberry	-	metric tonne 434.269
Eri	-	metric tonne 7.224
Muga	-	12.675 lakh numbers
Tussar	-	1.52 lakh numbers kan tharchhuak bawh a ni.

Production of raw-silk, 2021 - 2022:

Mulberry	-	metric tonne 50.01,
Eri	-	metric tonne 5.772,
Muga	-	metric tonne 1.879,
Tussar	-	metric tonne 0.024 kantahrchhuiak bawh a ni.

Kha kha a tlangpuia Sericulture-a kan hmalakna he House zahawm taka ka rawn sawi theih chu ni se.

Tichuan, Pu Speaker, ka Demand-te member thenkhatin min sawipui a, a windup-na ka lo duhtawh tawh ang a. Ka Demand-te:

Demand No.	Department	Amount (in ₹)
7	Excise & Narcotics	49,24,95,000.00
29	Social Welfare	1,48,53,13,000.00
34	Animal Husbandry & Veterinary	64,71,48,000.00

41	Sericulture	17,39,92,000.00
TOTAL		2,79,89,48,000.00

te hi kum 2022-23 hman atan he House zahawm tak hian ‘min pass-pui se’ tiin kan rawn dil e.

SPEAKER : Awle, tunah chuan Minister zahawm tak Dr. K. Beichhua’n a Demand-te:

Demand No.	Department	Amount (in ₹)
7	Excise & Narcotics	49,24,95,000.00
29	Social Welfare	1,48,53,13,000.00
34	Animal Husbandry & Veterinary	64,71,48,000.00
41	Sericulture	17,39,92,000.00
TOTAL		2,79,89,48,000.00

te hi House-ah pass a rawn dil a. Pass remti apiangin, ‘remti’ ti rawh u le. Remti lo kan awm awm chuan, ‘remti lo’ ti ula. (*Member-te: Remti*)

Awle, tunah chuan Minister zahawm tak Dr. K. Beichhua Department enkawlte – Demand Nos. 7, 29, 34 leh 41-te hman tur, avaiia belhkhawm ₹2,79,89,48,000.00 te chu House-in lungual takin a passed a ni (**Dr. K. Beichhua, Minister:** Pu Speaker, ka lawm e.)

Awle, tunah chuan kan Chief Minister zahawm tak Pu Zoramthanga, kan sawihona te rawn windup turin kan sawm ve leh ang a, sawifiah ngai a tih te rawn sawifiaha, a demand-te House-ah pass rawn dil turin ka sawm e.

PU ZORAMTHANGA, CHIEF MINISTER: Pu Speaker, ka lawm e. Kan rei tawh bawk a, a hnuhnung ber ka ni a, rei tak han tih pawh a inthlahrunawm a. A theih anga tawia tih ka han tum ang a. Amaherawhchu, ahminga sorkarah Pa-ber chan chang chu kan mawhah thil a tlu tam bawk a, sawifiah turte a tam a. Engkim mai hi a nepnawi nena han bunkhawmna kan ni lo thei lova. Chuvangin, ka sawi turte pawh ka department leh ka department piah lam te, eng eng emaw han hrut tel ngai anih pawhin chungte chu ka han hrut tel ang a. Ramhnuaia kan nau, Siam-mihlima Pathian thu sawiin, “Genesis atangin Thupuan ka changthlan hrim hrim dawn” a tih ang deuh a ni a. A seilo thei lova, mahse a tawi thei ang bera tih ka han tum ang a. Member-tena an sawi hi a tlangpuia react ngai lai ka han sawi zar zar ang a.

A hmasa berin Pu L. Thangmawia, Member zahawm tak khan Science & Technology pawimawh zia a sawi a, kha kha a entawntlak thlein ka hria a. Department hran hran kan han petlawr lo thei lova, a tam a, kan duhthaw si a, tlem tetein han chuklawr a buaithlak a. Ani khan tih dan chi thar deuhin Science & Technology pawimawhna a rawn sawi a, tin, ‘department puitlinga hlankai pawh a tha a ni’ a ti a. Chubakah Parliamentary Committee-ah pawh department-related committee siam tha a ti a. Khangte kha kan ngaihtuahnaah pawh kan lo dah ang a, Science, a ropui zia leh a pawimah zia a rawn sawia ka rilrua awm reng chu - 1957 khan pawl 7 kan zir a, science chu IPS Pu Rokunga khan min zirtir a, ama *note* lakhawm dan min zirtir a. A bul bera kan vaia kan by-heart chu, ‘What is science’ tih a ni a, a chhanna pawh ka la hre reng a - ‘The word ‘*Science*’ is derived from the Latin’s word ‘*Scire*’ which means ‘to know’ or ‘knowledge’ tih a ni a. Kha sentence kha chu kan vai hian a bul ber a ni a, kan by-heart a. Amaherawhchu Zote khuaa kan thian pakhat khan zawhna lo chhuak kha pakhatmah thiam a nei lova, a mahin zawhna a insiam chawp a, kha kha a chhang ta a, a la siam sual leh nghal a, ‘What is Science’ tih kha ‘Where is Science’ a ti tal a, *science* pawimawhna a bula kanlo zir tan vena Pu Thangmawia’n an sawi kha, tunlai khawvel, Pu Malsawma Colney sawi dan takah, ‘the idea that moves the world’ a ni a, hei a ropui em mai a, a rawn sawi zawng zawng kha khami-ina a siamah kan kal a, a lawmawm tak takin ka hria a.

Member zahawm tak Pu Thangmawia thusawi kha ka lo hre reng a, ngaihtuah naah kan lo dah ang e. Member dangte khan lawmthu leh thildang in rawn sawi teuh a, a mal te tein ka sawi vek lo ang a, eng emaw a point rawn sawifiah tur lai tlemte chauh kha ka rawn dah tel tel ang a, a dangah memberte pawh hei, in hming a tlar a, mahsela lawmthu leh thildang point pawimawh awmlo kha chu ka rawn react lo mai ang a.

A dawtah chuan Dr. BD Chakma, Member zahawm takin, “Chawngte - Chhotrapansuri Road NABARD hnuiaia laih black-topping tih ni se, a diak em mai” a tih kha a dik khawp mai a, khang kha kan department lam pawhin kan hria a, ‘pawisa kan neih dan a zirin heng hi hma kan rawn la zel ang e’ kan ti a. Tin, Pharva lama kawng kual lutuk a sawi pawh kha ‘department-in kan lo en tha ang e’ kan ti a, kawng kual tak nilova kawng hnai zawka kal theihna a awm anih chuan ‘a funding dang te pawh zawnga laih kha kan rilruah a awm a ni’ tih kha tawifel deuhin ka han sawi leh ang a.

Tin, Pu Nihar khan, “Lunglei Circuit House siam that a ngai” a tih kha member dangte pawh khan an rawn sawi tho a. Kha kha a dik a, siamthatna tur pawisa pawh kha dah niin, kei pawh 2019 emaw, 2020 kum tir nge ka Chiang lova, khata ka va kal khan ka va enpui a, “Circuit House hluia saw thiat ila, hemi hmunah hian sa ila” an ti a, mahse, “a ngailo, hei, kawngthlang lama tanga ban rawn tian thiah lovin a sak zawh theih a, nakin thiah hunah hei hi chu a kawtzawlah tang zawk se” kan ti a. Kan DC pawh

khan, “Ka pu, a remchang khawp ang, mikhual thlenna buai hauh lova a thar a sak theih chuan” a ti a, sak turin kan teh diam tawh a. Amaherawhchu, Covid-in min nuai a, sum leh pai harsatna avangin development thil kha engmah kan khawi ngam ta lova, vawiin hi kan thleng a. Amaherawhchu, saw saw chu kan rilruah a awm reng a, tun tumah hian kan han inchhut ang a, *Special Assistance* atang hian kan tlin thei ang em, eng emaw zatin a bul tan ila, nakum lam financial year thara lo kal leh nen kan kawp thei mai awm mang e aw ka ti a. Chuta tang chuan a thei anih chuan ‘saw saw chu kan ngaipawimawh khawp mai, tih hram pawh kan tum e’ tih kha Pu Nihar kha kan han ti a ni.

Tin PMGSY lamah leihlawn an mamawh tam thu te kha a rawn sawi bawk a, a dik khawp a, khangte pawh kha kan theihtawpin kan lo en ang a. Tin a rawn sawi, “pension pawisa pending a rei, hei hi pek thuai ni se” a ti a, a dik khawp a. Dik tak chuan thla 3, thla 4 thla 5 pawh a ni ang chu, khalai bawr chho ah khan kan sum dinhmun a harsa em em mai a, nikum leh kumin kum tir te pawh kha a rawn thleng a ni. Kan sum dinhmun a harsat avangin hreawm ti tak chungin pension pawisa an chhuahpui turte kan pe tha hleitheih lova. Amaherawhchu, tunah kan ziaawm hret a, kan pe ta a, kan pe ta zar zar a, theih tawpin an pension pawisa pawh hi han clear chhoh theih zel kan han tum ang a. Amaherawhchu, pension pawh hi ‘la thei tura inngai engatinge an la lakloh’ tia miin an han vuipui theih tur, a taka han chhui chuan, office lama document tihfelloh mi eng emaw zat an lo la awm a, khangte kha an tihfel ran chuan theih ang tawkin pek hram hram pawh kan lo tum zel ang e.

Tin, Pu Lawmawma Tochwawng rawn sawi Circuit House chungchang kha chu ka sawi tawh a, kha kha ka chhanna ni sela. Tin, “contract rate hi siam ni mai sela, inchhan hniam siak ringawt maia kal hi a buaithlak” tih kha a dik khawp a. *Scheduled of rate* chu kan nei ngei mai a PWD khan, amaherawhchu, ‘khamsi anga chhan tur’ tih khan an vai chhan emaw a ni si a, thenkhatin a aia hnuaiin an rawn chhang tho si a, a tawpah chuan PMGSY tender-a han tih pawh khan a hniam lutuk a. A chhang kan pe dawn anih chuan, an thawh theihloh, ‘an thawh that theihloh takin’ tia a venna security deposit lam kha an chhan hniam poh leh kan ti tam a, khati zawng khan kan kalpui ta ringawt mai a ni, hemi PMGSY kan tan-chhoh khan. Engpawhnise, khalaia kha ‘5% below’ tih lai te pawh kha sorkar hmasa ah leh tuna kan sorkar-ah te pawh kan han ti nak nak a, a buaithlak lai tak a ni a. Amaherawhchu, helai hi chu kan theihtawpin a taka thawh theih ngei tura chhuak turin security-deposit tihsan talin emaw kan han kal fat fat a ni e.

Tin, ‘Pialthleng leh Khawwiva kalkawng’ tih kha, engpawhnise tih hram kan tum dawn nia Special Assistance atangin. Tin, Lunglei khawpui chhung kha chu a bik taka in rawn sawi kha chu AOC - Kikawn inkar kawng kha PWD lam pawhin an rawn hisap a, a resurfacing kha chu kan lo ti ang e. In rawtna kha a tam khawp mai a, engpawhnise,

ka la check hman lova, kan tihtheih chin leh theihloh chin tura kha chu, bichilh taka lokal a ni si a. A lehkhak tak hi kan la hmu lova, amaherawhchu Union Finance Minister Pi Nirmala Sitaram, ka zuk phone pawh ni lovin amahin mi rawn phone ngat a, “hei, Special Assistance to the State for Capital Expenditure-ah vaibelchhe 400 kan rawn pe a che” tih chiang taka min hrilh avangin sawi ngamah ka ngai a. Amaherawhchu, financial year thar tur ala ni a, an la ti bik lova, a lehkhak chu hmuh ngaihna ala awm bik lova, advance-a Union Finance Minister meuhin min rawn hrilh vang vang chu rintlakah ka ngai a. Khata tang khan ‘vaibelchhe 400’ chu a tam khawp mai a, khami hnathawh nana kan hman theih tur, kan ram tan min puitu tur ropui tak a ni a, khata tang khan a tul ang kan ti zel ang a.

Tin, Pu Lawmawma Tochwang rawn sawi Lunglei by-pass kha, Ni e, chhuah lama kal tur leh tlak lama kal tur, tlak lam kha chu a tlem deuh a, survey te pawh an ti a, chhuah lam erawh kha chu a thui deuh a, beih-puia beih a ngai ang a kha kha chu. Engpawhnise, Lunglei saw by-pass neilo theilo dinhmunah a ding ve tawh a, a chhan chu chhim lampang kawngpui atanga bungraw lo kal tur leh Tlabung atanga bungraw lo kal tur Lunglei kal tlang tur hi a buaitlak lutuk a ni. By-Pass hi khawi lam zawk zawkah chuan ti ngei ngei a ngai a ni. Member-te sawi ang khan a vaiin vawikhatah ti thei lo mah ila, a hmaa lo chhawp chin tiha kha, a bul lo tan kha kan tih theih chuan tih kan tum a ni.

Tin, Pu Lawmawma rawn sawi ang khan, Delhi lama kan House te leh hmundanga mite pawh ‘repair a ngai hle mai’ a ti a, theihtawpin kan repair ang a, a repair-na hi chu a tam lo ang a, a nuai-bi hian a thawk ve teuh mai a, kan House, Silchar leh Shillong-a mite repair hna kha GAD lam atangin hma kan han la ang e. Thil man to a ni lova, kan thei turah kan ngai a ni. Pu Zaithanzama’n, “Warehouse sak tur engzatnge ni a, khawihmunah te nge” tih a rawn zawt a, hei hi a sanction lo thleng tawhin, a hna hi kan la sem lova, mahse department ten ruatna an nei a. Heng ‘warehouse awmna tur an rawn tihte - Saitual, Hnahthial, Champhai, Aibawk, Zemabawk, Keifang, West Phaileng, Thenzawl, Chawngtlai, Zote, Mualpheng, Khanpui, Cherhlun, Khawhlailung leh Tuipang te a ni a, chung chu nuai 50 nuai 60 man bawr vel-te, a then chu nuai 10 lek te pawh a awm a, a intranstructure a zirin nuai 114 te pawh a awm a nih hi. Khang kha tuna sak tur kan neihte an ni.

Tin, “Thenzawl dragon-fruit loneitu 20-te hnenah chiah, Aizawl-a mite ni leh nghal si, pek an ni” a tih kha, a zawhna inkalthelh eng emaw a awm a, chhungkaw 61 velin saw saw an ti a, 20-te kha SEDP atanga pek an ni a, a dangte kha *head* hran atanga pek annih avangin pek tho an ni a. ‘SEDP atangin engzah nge an pek’ tih chhanna lo kal anih avangin khalaiia kha hriatpawlh palh a ni e.

Tin, ‘Lawipu, Maubawk lam kawng laih ni se’ tih Pu Zaia rawtna kha a tha khawp mai a. Mi tamtakin an rawn rawt a. Engpawhnise, ‘tithei dinhmunah kan ding em’ tih te kan han en ang a, theihtawpa ngaihtuah kan lo tum dawn nia.

Tin, Member zahawm tak Pu Rokhaw rawn sawi, ‘warrant of precedence’ kha an rawn siam chhin a, thalo kha an ti lutuk a, “ngawi ru, hei hi chu uluk taka siam a ngai a ni” an ti a, kan District Council hotute kha in nuar hma mah mahin ka hria a. Khata eng emaw *Day* hman loha lo tlaka kha. Dik tak chuan tuna mi hi hmanlai 1990-a siam kha a ni a, Congress hunlai a ni em aw, khata siam kha kan la hmang a ni a, chuvangin siamthat chu a hun tawh hrim hrim a, khami avanga nuarte kha, an ti hma mah mah a, ‘kan siam dawn e’ kan ti a. Engpawhnise ka ngaihtuah dan chuan, huaisen takin kan siam mai ang a, hetah hi chuan inrawn tlang deuh ila. Ka rilruah chuan tu huatthu suhah, mipui aiawha thlan politician-te chu khang *Order of Precedence*-ah chuan central lam tih angin kan dah pawimawh ang a, ‘kan dah-sang tur a ni’ tih kha ka ngaihdan a ni a, “chumi ngaihtuahna nen chuan siam i tum tlang ang u” tih kha wawiinah ka chhanna a ni e.

Tin, Budget te pawh kha population base-a inpek a ni tak tak lova. Budget hi population-a tanga chhut chuan, keini pawh hi India ram maktaduai sang aia maktaduai khat kan ni a, population-base chuan min pe ni se kan chang tlem dawn em mai a, kha kha a dik vek lova. Amaherawhchu, engemaw chenah chuan anih theihna lai chu a awm tho a. Engpawhnise, hei hi chu kan Finance Commission 11-in recommendation a han pe ang a, an duh zawngte lo thlen sela, kha mite recommendation kha a pawimawh tur a ni e.

Tin, Tuipang (Tipa) kawng black-topping te kha a rawn sawi tel bawk a, a dik khawp mai a, a chhe tawh a. ‘Hei hi a tul khawp mai’ member zahawm tak ten in tiha kha, tithei dinhmunah kan ding em, kan sum dinhmun nen kan han en ang a. Kan khawpui pawimawh te a ni a, kan lo en ang a. Chutiingin ‘SDO Office a chhe em mai, siamthat a ngai’ tih te pawh kha. Tin, ‘Beino, metre 400 vel black-topping tih ni se’ a tih pawh kha kan lo en ang a, metre 400 te chu a thui lo bawk a, man to lo turah ngai ila, a pawimawh viau chuan theihtawp kan lo chhuah ang e. Tin, Laki - Vahia road black-topping a tih pawh kha NABARD anih ka ring a, black-topping hi a man a tlem lo khawp mai a, kawng thui deuh phe chu. Engpawhnise, kan ti thei em kan lo en dawn nia.

A dang member zahawm takte ina an sawia kha, lawmthusawina leh thildang neuh neuh a ni a. Pu Lalrindika Ralte’n, “Teirei Lei hi nawr chak ni se” a tih kha, a dik a, kan department pawhin an lo nawr ngat ngat a, theihtawpin nawr chak kan tum ang

a. Khu kawng khu eng emaw thuta kan chak-lakna kawng pawimawh a ni si a, theihtawpin nawr chak kan lo tum ang e.

Tin, PMGSY-ah hian ‘sorkar lam hi inrawlh lo mai ula’ an ti a, inrawlh hi kan chak khawp mai a, PMGSY hi a buaithlak lutuk a. Khulam thu vek a ni a, ‘tender ngei ngei tur, heti chin kan phal, heti chin kan phal lo’ tih angte hi a formation, khulamin an rawn ti si thin a, ‘state khutah rawn dah se chuan kan buai lovang maw le’ kan ti a. Sorkar hmasa pawh PMGSY kha an buaina lai ber a ni a. Engpawhnise, central-in an control tlat avangin, a buailoh dan tur theihtawpin state-in kan tihtheih chinah chuan hma kan lo la ang e.

Tin, Pu Ngunlianchunga’n district council chungchang a sawi, ‘kan Ex-CEM te Mizoram House-ah *duty* anga thlen tir ni se’ a tih kha a tha kan ti a, mahse a tak taka han tih dawn khan inthik tur kan han zawng kual a, mal-thur chuan ‘a tha a lawm’ kan ti a. Duty ni hauh lova kal, duty tur subject a lo ni bawk si a, ‘kan ex-CM te anni a lawm’ kan tih chuan, a tlukpui thuak *Order of Precedence*-ah puh tel miah loh mahse, lal, pawimawhte kha an tam si a. Chuvangin ‘ngun deuha ngaihtuah a ngai a ni’ kan ti a ni.

Tin, “District Council hlawh hi min pawmpui mai ula, in theih ang chin chinin” an ti a, financial year tharah en ta ila. Dik tak chuan Covid avangin hlawh inpun kha a har khawp mai a, kan boruak a ziaawm deuh hunah kan lo en ang a. Cooperation-a kan Chairman pawh hi singkhat pawh hlawh lo, lawmman la lote an ni a, khangte pawh kha kan lo en ang e. (**Pu C. Ngunlianchunga:** Ex-CEM leh Chairman kha chu an tam lo khawp mai, official thila kan va kal ve pawh hian tam an awm lova, mi 10 pawh an awm tawh kher lovang. Delhi-ah office an va dawr ve chan te khan a ni a, kan tih zawk tak a kha chu.) Kan lo en ang a, sorkar hi a inthlak ngun ve si a, nakinah chuan an tam ve viau mai thei a ni a. FLAM Ex-MLA Association an din khan, Pu Hawla nen ‘Ex-CM Association kan din ve dawn em ni ang’ kan ti a. ‘An tlem si a’ tih khan, an inthlak an inthlak ve si a, rin aiin a tam viau ang tih pawh kan hlau deuh a ni a.

Awle, ‘Lok Ayukta member pathum nei thei ula’ tih kha, a tha a, mahse Lok Ayukta member-te te enkawl man hi a to khawp a, chuvangin neih tam hi a har a. Sorkar hmasa pawh khan “member pahnih, ngei ngeia chhiarkawp ngailo turin, member dangte chu” tih kha amendment an lo siam a, a aiah ‘Lok Ayukta’ tih khan thlaka amendment pawh siam a ni a, member pathum a ngei ngei tura chhawp kha chu a hautak lutuk a. Engpawhnise, member tur remchang kan neih chuan lo en ila, pakhat chauh lo en kha chu a tha chiah lova, mahse Lok Ayukta member tur, kan Chairman tur pawh hi an hautak khawp a, Guwahati High Court-a aiawhte nen kan han bei a, thu kan ti thlu thei hram hram a ni. Kan sorkar-in duh duh ruat kha a ni lova, fimkhur a ngai khawp mai a.

Chuvangin, kawng chi hrang hrang en chungin keimahniah ‘tunge qualify han dah belh turin’ han ti ila, kan tum lo deuh rawn sawi an awm si ang a, ‘Guwahati lam hi kan indah teuh mai’ tih te paw hi hlauhwm ve deuh a ni a. Engpawhnise, pakhat chauh lo deuh kha a remchan dana zirin kan lo en ang ang e.

Mumbai Mizoram House te pawh tihlen a tha, flat te pawh lei a tha. Amaherawhchu crore 10 man a lo ni a, sum neih tlem lai chuan kan ngam chiah lova. Ni e, Mumbai te khu chu cancer patient kal khawmna a ni a, floor khat te chu lei belh leh thei hram ila a tha khawp mai; kan ngaihtuahna te kan lo hmang ang e. Pu C. Ngunlianchnunga, Member zahawmtak zawhna “dragon-fruit ching tura mi 6 thlante kha an drop leh” a ti a. Nguntakin kan han en a, chhungkhat atangin share-hnih te an lo inthlanga lawm maw le! (**Dr. Vanlalhlana:** kha lai kha, a list a awm veka chu, unit khat te tein mi 6 te an thlang a, kha kha ‘false report’ a ni ang. Vawiin hian report ka lo keng lova, ka zawh ni khan kan lo keng thlapa sin le.) Ka neih hi a chiang khawp mai a, chhungkaw 6 thlannaah khan unit-hnih thlanna kha chhungkaw 4 an awm a, chhungkaw pakhat unit-hnih an thlang a, unit 4-ah khan, chhung-hnih kha chu pakhat te tein an thlang a, ‘henga vang te hi a ni ang’ ka ti deuh mai mai a, chhung neitute hi an pawmawh em em si a.

Pu Ramthanmawia, Member zahawmtak zawhnaah khan, “PMGSY road kan nei tawh hi black-topping tih ni se” a ti a, Delhi lamah theihtawpin black-topping turin kan lo nawr dawn nia. “Chawngtui khua hi insawn mai rawh u, tlang kham hnuaiah khaw hmun tur rem em em a awm si a” kan ti a, a duh bik si lova, tihian pan a ngai a ngai ta mai si a, an la awm duh tlat si chuan. Kan kala pianga tlawhloh theihloh chu tih dan kawng kan lo ngaihtuah dawn nia. Tin, IB cheithat tur Khawbung te, Farkawn te leh hmun dang awmte pawh cheithat turte zingah kan lo dah dawn nia. Tin, “Cold-storage Dungtlang-ah bun ni se” tih kha a dik khawp mai a. Horticulture product khilamah khian a tam a, a dahkhawmna (cold-storage) awm a tha khawp mai.

Pu Vanlalhlana, Member zahawmtak zawhna kha, PMGSY a buaithlak zia ka rawn sawi tawh a, an hlauh kha pe theilo chu kan ni lova, a hunah an hlauh kan pe lo vek bik chu a ni lova. A group tlema kha kan pe hmasa a, group liante kha kan pe hnunung a, a chhan chu ‘Chemtatrawta thawnthu’ ang deuh a ni a) ‘engatinge in pek tlai’ min ti a, ‘engatinge Delhi lamin min pek tlai’ kan ti ve a ni. a. A chhan chu, ni 15 hnu lamah te a hlawmin an rawn ti si a, kan lo nghak ve lo thei silova, a hlauh tam deuha te kha chu an lo nghak thei deuh si a kan ti a, financial year tawp dawna tam deuha min rawn pek khan kan inla mar a, khata tang khan a tirah avaiin kan inpe tan a, engtinng e kan tihtheih zel ang. A ruala hlauh lak theih tur khan tan kan han la zel ang e. Hlauh inpek hi, normal period-ah pawh hlauh inpek group hi a awm tam khawp a, a bul pakhat chuan central-sponsored scheme atangin Nurse min rawn pe teuh a, chumi

department-ah zirtirtu min rawn pe teuh a, tam deuh kan la a, a tawpah min bansan leh si a. Pitar-ho hla la an sawi ang deuhin, ‘hla sang tak takin in la a, min bass san leh si a’ an tih ang deuh kha a ni a. Hei hi a buaithlak lutuk a, zirtirtu atangin min rawn pe a, bul kan tan a, Nurse, health-worker group min rawn tan sak a, min tawp san leh si a, kha kha kan vahvaih-pui ve a ngai ta a. Hei hi kan harsatna lai tak, India ram State tam ber, keini chauh kan ni lo, kan buaipui khawp mai. ‘Kha kha atih hram dan engtin nge’ kan ti a, hlawh inpeka kan harsatna pawh central mawh hi a ni ve a, an pek pangaiyah pawh an rawn ti tlai thin a. Chuvangin, khalaia kha kan harsatna a ni fo a ni.

Tin, ‘pension an nawr a, an ti ta chauh a’ an ti a, a ni bawk e. Dik tak chuan kan sum dinhmun a harsa em mai a. Central-in DA emaw an tihsana pianga tisang ve zut zut tur kha chuan kan sum dinhmun hian a pha ngang lova. North East state tam tak pawhin an pha bik lova, la ti hleitheilo te pawh an awm ve a. Amaherawhchu, “kan thawktuten theihtawpa an han sawi hi chu a tul ve ngang tawh a ni ang e, a tihdan a awm lawm ni” kan ti a, finance pawh kan han committee a, kan ti leh rawih mai chu a ni a. ‘Engpawh nise harsatna lian lutuk kan tawk lovang chu maw’ tiin kan hlawh, kan DA tihsan te kan kal chho ve pawp pawp phawt chu a ni.

Tin, Bualpui ram pass chungchang leh a dangte kha chu a revenue thil em mai a, ka hre vak lova, nakin remchangah la inzawh chian ni se, Revenue Deptt. lam hriat deuh tur chi a ni a. ‘Chutiang khatiang lai chu buai a awm’ tih kha chu tuna han chhang mai turin min chhangtu tur revenue deptt. lam an awm si lova, chuvangin, khalam kha chu ka chhang thei lovah ngai ila. Tin, hetah hian ka rawn sawi duh chu kalkawng four-lane kan sawi taka zarah chuan, “four-lane kha Vairengte atangin a lo chho a, Khamrang alo thleng a, chuta tang chuan Mualkhang ramah kal se la, Sairang-ah lut se la” kan ti a. NHIDCL Consultant ten kawng pangngai ‘Tlawng kamah kal se la’ an ti a, kan inhnial nasa em em a. Ka tawngkam kha mawilo ni suh se la, Tlawng kama kawng *two-lane* pawh ni bar lo khu kan inenkawl hlei theilo a ni a, a changin a mual tawlh in a tawlh a, “four-lane in han lai phirsi tak tak ula chuan, in lai zo ang a, in haw vek ang a, keiniin kan buaipui leh dawn a. Kha chauh kha anih si chuan, kan lifeline hi han ping se la, ‘tu chief-minister hnuaiah nge he mi hi laihtir anih reng reng’ an ti ang a, nakinah thangtharte anchhia hi ka khum duh miah lo a nia” ka ti a, ka vau nasa ve khawp mai a. Tawngkam mawilo ni suh se, a chang chuan an aiawhte hnenah, ‘hei hi laih luih in tum pawhin, hemi laih remtitu chief-minister in neih hunah in lai dawn nia’ ka ti ngat a ni.

Tichuan, anni pawh an ngaihdan kha a phir ve a, a chhak kha tha ti pawl an awm ve tlat a, NHIDCL zingah. Tichuan, Technical justification nen, kan PWD nen an tang a, khutah an thawn thla ta a. Pu Nitin Gatkari khan, ‘i rawtna hi tha kan ti lo, kawng hluiyah a kal tur a ni’ tih lehkhah mi rawn thawn ngat a ni, chu chu thlakhat aia rei mah tawh a ni ang. Tichuan, theihtawpin kan bei a, technical justification zawng zawng, a

hlawkna nen, a remchanna nen kawng hlui zawkah lai ta ila, a laih chhung kawng ping tur nen, kan lifeline neihchhun ni bawk nen Sakawrhmutuai tlang lamah truck-lian a kal thei bawk si lova, vawikhat a pin pawhin mi anchhia kan la dawn tak tak a. A chhaka a kal chuan a thlang traffic tibuai miah lovin kawng pahnih kan nei ang a, pakhat a pin pawhin pakhat kha a la hawng ang a. Chutiang tur chuan nasa taka kan zuk tih hnuah hmanni khan ‘an remti dawn hmel e’ an ti a. Amaherawhchu kha kha han sawi tlakah pawh ka la ruat lova. Nichin kan chhun chawlh lai khan Nitin Gatkari PS-in min rawn phone a, “Ka pu-in khulamah a kal bo thu lo hrilh rawh min ti a, hei ka lo hrilh che a. I kawng rawtah khan Lui kam nilo, kawng thar zawk Khamrang - Sairang kawng laih kha ‘a rem ta e’ ka pu-in a ti lo ti rawh a ti a” tiin a PS khan min lo phone a, chu chu dik turah ka ngai a. Kha mi anga kal turah kan inngai a ni.

Tin, Pu Biakzaua khan Sangau-a SDO function pawimawh zia thu kha a rawn sawi a, khatah chuan theihtawp kan rawn chhuah ang a. Hei hi kan tih ngei tur niin kan hria a, a tul ang zelin kha kha chu kalpui kan lo tum dawn nia. BDO nena kawpa, a remchan dan anga siksawi kha chu kan ngaihtuah mai ang chu.

Tin, Pu Zodintluanga’n kan leiba leh GPF chungchang thu a rawn sawi kha, kan pawisa dahkhawm vel lakchhuah hi tunhmaa Congress an sorkar pawha an tihdan kha keini pawh kan tihdan a ni ve thova. A dil zawng zawng pek vek kha chu a harsa bawk a, kan sum dinhmuna zirin RBI-ah kan pawk a, kan pawklo deuh a. Mahse, tunah chuan kan sum dinhmun a harsa hrih em mai a, kum hnih chhunga kan hlawh, ‘hei hi budgetah lo dah rawh u’ central-in min tih ngat, min pek leh theih tak loh kha crore 2,600 chuang a ni a. Hmuh tur anga kan ngaih Covid avanga kan hmuh takloh kha chu hisap theih pawh a ni lova, kan telh miah lova, kha nen phei kha chuan kal ta sela crore 3,000 a hnaih thuak awm mang e, ka ti a. Covid avanga pawisa kan hmuh tur kha chu hlawm-hnih chauh a la ni a, a dang eng emaw neuh neuh kan hmuhtur kan hmuhloh hi a la tam khawp mai a. Kha nena tih phei kha chuan Mizoram-a kan chhiah khawn hmuh tur ang kan hmuhloh anga kan ngaih nen phei kha chuan chhut khawm tak tak ila chuan crore 3,000 a tling mai awm mang e, ka ti a, crore 2,600 kha chu awlsam taka a hlawmpui kan han chhutna mai a ni a. Khati chung chunga kan kal kha chu a hautak dan kha chu kan hre theuh ang a. Khatiang tel lova kum 2019-2020 budget (covid thlen hma kumkhat) kha kan hmang hman a.

Ka sawi ang khan Planning Commission control-na tel lovin tunah chuan NITI-Aayog a advisory-ah an tang a, a remchang ang anga hman theih a han nih kha chuan, kum 2019-2020 budget kan han kal kha chu, kum 1998-2008 (kum 10 chhung) ka chief minister-a budget, Planning Commission-in min earmarked sector nena min control-na hnuaiah kha chuan *digit 3* kan tling phalo a ni a. Kan budget pumpui a crore khan sang hnuaia a ni a, khati vela kan kal lai nen chuan kan dang hle a. Kum 2019-2020-a

‘vaibelchhe singkhat’ an han ti chu, ‘karei karei’ kan ti a, tam hi ka ti em em mai a. Khatianga kan han kal chuan, ‘Healthcare-ah crore 50 i dah ang’ ka ti a, kan dah mai a ni; khatianga kan han kal chho a, a nuam em em mai a ni. Mahsela, a kum leh 2021 a han ni chho a, covid-in min han nang chho a, vaibelchhe sang biin a han tlahniam ta a, tihngaihna a awm tawh lo reng reng a ni. Nichina ka han sawi ang khan, dam khawchhuah kan tum tlang a ni ringawt tawh mai a ni. ‘SEDP pawh kan ti ang in ti a, in ti theilo’ te min han ti kha chu, ‘a dik lutuk’ kan ti a ni. Kan dam khawchhuak hi kan lawm a ni, ka ti a. Mipuiin min hriatpui chin chu a awm, khang kan Vawk thi te, kan ramri buai te leh thil dang dangte.

Amaherawhchu, kan Finance Minister luhaina mipui hriatpui loh, kan buaizia mipuiin min hriatpui loh hi a va han tam tak em, mipuite demand la ngai reng si, a zat hriat ran mai baw k si, ‘covid eng tikah nge a zawh ang’ tih hre baw k si lovin kan han kalpui kha chu a hautak khawp mai. Engpawhnise, khang zawng zawng kan hotute’n, ‘in ti thei lo hi, GPF an la thei lo, pension an la thei lo, bill in pe thei lo’ tih zawng zawng kha a dik lutuk. Tunah ‘Healthcare-ah crore 50 crore in ba a nia’ min ti a, tunah chuan kha kha ‘crore 3-in inteite ang, crore 4-in inteite ang’ kan ti a, kan han ti zauh zauh a, 2019-2020-ah chuan ‘vawikhatah crore 50 dah ang’ kan ti a, tikhan a zo der. Kan situation hi a normal lo em avangin Zoram mipui leh kan hotute, kan member ten min hriatthiapui kan ngai, khatah kha chuan zep tur a awm reng reng lo. Amaherawhchu, tunah chuan kan ziaawm tan ta a, tlem tlemin hma kan sawn chho zel ang tih pawh kan ring baw k a ni.

Tin, ‘Healthcare thla-ruk’ tih kha, a chhut lehna tur kha thla-ruk laklawh lai hi a awm a, hei hi kan cover phawt ang a, a dawtah chuan kum-khat bi-ah a chhut theih nan thlaruk khalaiah khan zeh ngai kha a awm a, churang chauh chu a ni. Hemi thlaruk hi a karah kan han tla lawk a ni.

Mau chin te kan sawi a, SEDP-ah pawh hian anmahni in an duh ang trade an thlang ang a, chuti a nihloh chuan keimahni ina va tuk ringawt lo khan, kan hotute’n, ‘hun a bichilh tawh si a, lo lo vat ula, vaimim emaw bekang emaw ching thei turin hma lo la phawt mai teh u’ an ti a. Pu Robert-a bialah ‘nangni engzahnge ti thei tur lo zawng teh u’ an ti a, ‘E, keini ah chuan lo vah tur nei kan awmlo reng reng’ an ti a, khatianga khan Aizawl khawpuiah chuan a tih theihloh. Engpawhnise, a vat thei theiin lo vat sela, a tawl dawn chuang lova. Anmahniin an kalpui theih tur, vaimim emaw, bekang emaw, sapthei lam a ni emaw a trade a remchang tur anmahniin an thlan kha a hlawhtlinna ber tur niin a lang a, chutianga tih chu kan tum a ni.

Thingtlang lam chauh ni lovin khawpuiah pawh, entirnan: Lirthei, two-wheeler a eizawng tena an duh chi a awm ang a, taxi driver an duh chi leh tih theih ang chi a

awm ang a. Kutthemthiam thil sam siam te, lumeh te, pheikhawk siam te leh dawr thlengin an trade thlan anga kan puih theihna tur kawng, an tuina kha tihpui kan tum a ni. Pu Speaker, khang kha a tlangpuia ka react theih lai a ni a..

PU ZODINTLUANGA RALTE: Pu Speaker, *Point of Order* pakhat lawk. Lok Ayukta kha CBI-a an refer sorkar-in permission kan pe nge, thutlukna siam lovin CBI kha an refer zel ringawt mai a. Kha kha min hrilhfhah thei em?

PU ZORAMTHANGA, CHIEF MINISTER: Pu Speaker, hei hi Central lam danah khan CBI-in a lak tur chu State phalnaa lo kal chauh kha anih avangin, State-in CBI-a refer kan phal chin kha a kal a. A case a zirin a then chu CBI-in tun ang huna rawn chhui tir ngai lova kan ACB ten tha taka an chhui, an conclude titih tawhte pawh a awm a. Khangte kha a ngai lo kan ti a, mahse a case-a zirin, Mizoram State chauh connect lo te kha CBI-a pek chi a awm bawk ang a, a case-a zirin State-ah phalna an rawn dil ang a, kan recommend dana zirin CBI-ah chuan a kal mai dawn a ni. Kha kha a tlangpuia ka sawi ni sela.

Pu Speaker, kan budget tihdan pawh hi member zahawm tak ten “heti zawng hian ti ula” an tih te leh, “tunhma i sorkar hmasaka i sem dan leh Congress pawhin an sorkar hmasaka an sem dan khan ti ula, department-ah hian pe thlih thlih ula, Finance-a SEDP emaw a hlawma ti lo hian” tia rawtna te a awm a, “hetiang te chuan *financial dictator* i ni ringawt alawm” an tih kha a dikna lai chen pawh a awm a. Mahse keia ngaihndan chuan ti ta ila, kan sawi theih rual chu a awm lova. Congress term hmasa lamah khan Pu J. Lalsangzuala, Finance Minister-ah kan nei a, a tha thlawt a, sawisel tur a awmlo. Mahse thil tak tak chu, minister ve mai a ni a, a thiante minister vek annih avangin, khata pawisa authority control-na nena ti turin thuneihna final-in a nei lova, khatiang ti tur khan Chief Minister power a ngai tlat a ni. Chuti lo chu, ‘ani a duhsak bik’ tia inchuh kha, ‘ani i pe si’ tih kha Minister theuh theuh karah inthikna a awm thei a. Chuvangin Pu J. Lalsangzuala kha Chief Minister lo ni sela, (*interruption*)

PU LALDUHOMA : Pu Speaker, kan Chief Minister zahawm tak hian experience tam tak alo nei tawh a, a personal opinion kha genuine deuhin min hrilh se ka duh a. Kan kal-chhoh zel dan turah hian Chief Minister-ina finance a control hi kan ram tan tha zawkin i hria nge? Minlo hrethiam ula, tunhmaa finance minister hran kan neih ang, khatih lai kha ama experience atangin hun kal zela tan pawh kan mamawh tlan ka ring a. Hman deuh khan ka sawi thuak tawh a, mahsengin experience atanga in advice kha a tha ka ti a, ka hre duh khawp mai a, khalai kha.

PU ZORAMTHANGA, CHIEF MINISTER: Nia, kan sawi dawn chiah a, a entirna ka zuk la a ni. Pu Sangzuala kha finance minister-ah chuan a tha tawp a ni,

rinhlelhna pawh kan neilo tak tak. Amaherawhchu thuneihna tawp a nei lova, mitmei ven tur Chief Minister ala nei, chuvangin a mangan zia kha, 1997 budget speech a sawiah pawh, “kan sum leibat nasat zia hi, ‘Democle-a ngunhnamin ka nghawngah a tin a ni’ a tih kha, hei hi a copy pawh kan la nei a, ani pawh a mangang ve a ni. Chuvangin, kha kha thuneihna tawp nen finance kha han *challai* sela chuan khatiang khan a lut miahin ka ring lo.

Chuvangin, ka lo experience tawhah chuan, State lianpui, West Bengal, Maharastra-ah te chuan hna a tam lutuk a, Chief Minister ina en sen chi a nilo. Finance Minister an neih emaw, Chief Minister emaw pawhin lo keng mahse, finance lamah amah puitu tur a siam ngei ngei a ngai. Amaherawhchu keini ang state te tak te, han en ila a rel fel pawh awl em em, dik tak chuan tuten emaw an tih ang deuhin, keini ang state te-ah chuan Chief Minister-in taima takin, Submarine Commander anga a kil tin hriat peih a ngai a ni. Chutianga chuan, ‘efficient administration’ a awm a ni. Chuti a nihloh chuan finance minister dang nei ila, tun ang kan crisis-ah te khan Chief Minister ngaihtuahna tel lo chuan tumahin an ti ngam dawn lo reng reng. Amaherawhchu, kei chu a *Pa ber*, a tawpna ka ni a, a chhiat a thatin ka mawh a ni a, midang bel tur an awm chuang lo. Chuvangin kei chuan (state lianah chuan thuhra a ni a) keini ang state te, kan finance pawh tlem thamah chuan Chief Minister hian kan finance a enkawl hi tha ka ti a, keipawhin ka la enkawl char char a. Amaherawhchu eng emaw thilah min puitu tur Minister of State emaw, Minister pangngai emaw pawh an awma kha chu a tha ka ti thova, finance erawh chu a tawpnaah chuan Chief Minister ina a enkawl hi. Kum 10 a hmain ka lo enkawl tawh a, tunah hian ka enkawl chho leh mek a, harsatna lian a lo thlen pheih chuan midang tan khawih a hreawm tlat, mawhphurtu-tawp nilo tan chuan.

Chuvangin, kan member zahawm tak Pu Duha zawhna kha, hei hi a tha ka ti a, ka tih ang zelin kan sorkar-ah kan la kal char char a. Amaherawhchu, mi kan inang lova, kei chu ka sorkar-ah chuan, ‘finance minister hran neih tha ka ti’ miin an tih pawhin a tha kati thova, amaherawhchu efficient taka kal tur chuan Chief Minister chuan finance a enpui phak ngei ngei, “chhungkaw budget chu *Pa* kha a thu tur a ni” tiha kha chhungkaw pangngaiah pawh a dik a, kha kha tha ka tih a ni.

Engpawhnise, chutianga kan han tih pawh chuanin tunah *General Discussion* conclusion-a ka sawi ang khan, tunah pawh member zahawm tak ten inrawn sawi, ‘department-in hnathawhna tur an neilo, hei pawh an neilo’ tih kha a dik e. Engpawhnise la “tunah chuan an mamawh zualpui tur i han pe phawt ang, hlawh te, establishment leh thil mamawh zualpui pe phawt ila, chutianga kan tih zawhah a bang hi engzatnge kan la neih, chu chu engtin nge a hlawmin kan sem leh ang” kan ti a hei, kan kal a, tifuh kan inti khawp mai. Kan tawng tu huatthu suhah, heng SEDP-a kan dah *untied fund* leh *tied fund* te, hetia Finance ina Planning nena kan control-a hi sem zo ta vek ila chuan,

tunhma in ka lo ti tawh a, Chief Minister ka nih hmasakin, project kan zuk ti a, ‘State-matching share, khai le pe ru’ an han tih khan 10% pek tura kha department hian an lo hmang zo vek tawh a, khawi atang emaw, ‘koi surut’ a dap a ngai thin a, a kawihsapir-a zuk hnuhchhuahna tur pawisa pawh kha deptt. hian an lo reserve hlei thei meuh thin lova. Chuvangin, helaia a reserve khawma awma kha 90:10 a ni emaw, 80:20 a ni emaw, kan project lian tam ber (‘a zawng zawng’ ti ila a ni hial awm e) te hi chu khuta tanga lo kal vek a ni si a, matching share a ngai vek si a, khamia tan khan theihtawpin hemi kan pawisa dah hi han hmang ta a. Tunah pawh SEDP-a tan hei tunah crore 700 zet kan han dah naa, khatah pawh kan earmark-ah chuan *family-oriented*-a kan kal nan crore 350 ni se la, crore 200 kha chu a tul ang zela kan matching share neihah kan ti a. Kawng siam nan crore 50 reserve ila, 100 hi chu a tul dangah ti ila kan ti a. Tikhan kan dah a, kan vaiin kan hre theuh mai a ni. Khata mi kha a mamawh apiangin an rawn sawi a, “E, ni e” kan ti a, kan sawi tlang a kan inpe zel a ni. Chuvangin, hetiang system ni lova, a tira kan sem ral nghal vek chuan matching share nei tur hi kan awm vak thin lo a ni. Chuvangin, he system hi thaa ka hriat avangin he kan sorkar-ah hian hetiang hian kan kal a ni.

Eng pawh ni sela, budget-ah chuan zir tur a tam khawp mai a, keini pawhin hei chen kan Finance Minister tawh naa, a hmawr kan hre chauh a, a chhungril lam kan hriatloh technical deuh deuh hi a la tam khawp a. Chuvangin, mithiamin taima taka zir ngai a ni a. Eng pawh ni se la, heng thilah hian member zahawm tak ten in rawn sawi zawng zawng kha kan lo hria ang a. Amaherawhchu, ka sawi duha chu, House-a kan sawi emaw, hmundanga kan sawi emaw hi, Bible-a chang thenkhat la ila, a dang a tluanin la silo ila, ‘Bible-in a ti a lawm’ ti khan. Vawikhat chu, ka u hian Kolasib kawng-sir hotel kan neihah Bible chang a la chhuak a, *‘I eiin i in ang u khai, naktukah kan thi dawn si a’* tih kha Bible-ah khan a awm a, ‘an ti a’ tih a thatloh zia sawina kha a ni a, ‘i tar ang’ a ti a. ‘Ngawi rawh, ka u, chutianga tar chi a nilo; kha kha a tum a nilo, a kawh chu a dang daih a sin; khatianga tiho a demna kha a ni zawk a sin’ ka ti a. Khatianga deuh khan, kan thusawia hi a tluantlinga lak mang siloh chuan. Kan mautam tampui chungchangah Delhi-ah ka zuk dil a, ‘engnge ni BAFFACOS chu’ an lo tiha, “BAFFACOS tih hi ka phuahchawp a ni a, ‘Bamboo Flowering & Famine Combat Scheme’ tihna a ni a, hei, a hming pawh hi in la nei lovang” ka han ti a, an niin, ‘a hming pawh kan hre ngai lo’ an ti a, a dik chiah reng a. Tichuan, a hming pawh kan phuahchawp nen khan kan kal a, a crore tel min lo pe a. Kan vannei a, kan lawm tak zet a ni.

Khatianga chiah khan *Peace Bonus* pawh, Pu Sinha finance minister lai a ni a. ‘Engnge ni *peace-bonus* pawh chu’ a ti a, “E, a hming hi ka phuahchawp a ni a” ka ti a. Kan in nawr rei ngial a, Finance Jt. Secretary pakhat phei chuan, ‘ka awm chhung hian hetiang hi in hmu lovang’ a ti ngat a ni. Amaherawhchu, kan bei kan bei a, Pathian

tanpuinain kha kha kan lachhuak thei ta a. Mak ang reng viau chu, kan dil tak chu vaibelchhe 175 a ni a, chutah chuan 182 leh a chanve min han pe a. Vai hoin dil aia tam, a crore tela min belh ka hriat vawikhatna a ni a Aa hnuah pawh hian min belh leh pawh hi ka hre leh tawh lo reng reng a, kan vannei tak tak a.

Eng pawh ni se, khanga kha ‘ka phuahchawp a ni a’ han tih khan, lehlama a rik dan chuan, ‘a phuahchawp mai mai a ni a lawm maw le’ ti khan, vaibelchhe 180 chuang kan hman zawh tawh vek kum 10 kal ta ami pawh kha *awmlo* ang lek lekin a thang mai a. Khang te kha, Bible thu a chang tum bung chauh lak hi chuan a chawh chhe tawh chiah hian a chhuak thin a, khanga kha kan hriat pawh a tha a. Eng pawh ni se la, tunah pawh contract kan han sawite pawh kha PWD headquarters-ah, ‘min pe teh u, tun kum 10 chhung vela an hnathawh chi hrang hrang kan hotu ten min zawt a’ tiin. Tichuan, minrawn pe a, kha kha karawn sem ve leh chu a ni a. Amaherawhchu PWD headquarters min pek kha a diklo em maw ni, member zahawm tak Pu Duha hriat kha a let sawm velin a tam ta si a, kha kha chu kan zawh leh a ngai ang. A eng nge dik zawk kha kan en leh a ngai ang (**Pu Lalduhoma:** Kan Chief Minister kha ka dem lo che a, amaherawhchu i information kha chu an pe dik lo che a ni. A chhan chu hetah documents ka nei vek a, tuna kan MLA zahawm tak takte leh keimahin Zawhna/Chhanna atanga ka lak khawm a ni a, ka documents hi a accurate zawk ang tih ka ring a. Amah kan Chief Minister ka dem a ni lova, information a dawn erawh kha chu a accurate lo.) Nia, in chhutna pawh kha en ila, a pawisa tak an lak chinah an cut te pawh a lo ni thei a. Tin, an hna neih hrim hrima chu crore 105 a ni a, ‘heta tanga pekchhuah tawh chu crore 10 chauh a la ni; crore 20 chauh a la ni’ tiha, khami an pekchhuah china kha an lo chhut pawh a ni thei a. Engpawh nise, kha kha chu kan lo zawt Chiang ang a, member ten dik taka kan hriat a tha a, ka hriata hi a ‘dik thlap e’ ka ti bik miah lova, an chhut dana kha ‘engnge dik’ tih kha kan hriat a tha e.

Tin, chu lovah chuan hei, sawi dan hi kan leiba te pawh kha keini pawh kan ni ve tho a opposition kan nih lai khan, Congress sorkar-in vaibelchhe 2,000 leiba an neih kha chuan kan sawi nasa khawp mai a, ‘In tinin chuti zatin kan ba’ kan ti a, kan aupui ve viau a. Amaherawhchu kan han hre Chiang a, state liante khan keini ai khan an lo ba tam daih mai a, kha kha a ni a, keini pawhin kan opposition lai te chuan kan au pui ve tho a, chuangin miin an tih pawhin kha kha chu ka thiam tho a. Amaherawhchu tunah chuan hei kan nei vek a, karawn sem vek kha a ni a. Hei, North East State-ah pawh keini aia ba tlem Sikkim, (an te hrim hrim a anni kha chu) Sikkim kha an ba tlem a, tihloh chu kan aia ba tam vek kha an lo ni a, chuangin kan member zahawm tak ten....
(*interruption*)

DR. VANLALTHLANA : Pu Speaker, a mak ka ti khawp mai a! leiba hi kan thawhchhuaha tanga sawi thin tur a ni. Kan Chief Minister hian ti hian arawn ti leh thin

a, keichu ka ding lo thei lova. Ni e, 'Maharashtra' a rawn sawi ziah a, an ni kha chu 17% chauh a ni, an thawh chhuah atangin. Luhul thilah kan ti pawh a ni thei a; ni e, a tam zawk te anni a. Amaherawhchu mipuite hi an zahawm ka ti; hetiang a heti lai hmun zahawm takah hian a dikin i sawi ang u, a sawi tur ang zawngin i sawi ang u a percent in.

SPEAKER : A percentage khan han sawi ula.

PU L. THANGMAWIA : Pu Speaker, a GSDP pawh hianin hei, ka kawl a hetah hian, State dang ho hi an ba tam lutuk, tin, a thawkchhuak tam bik lo; Nagaland pawh 44.2% a ni. RBI study on state finances study of budget, hei aia actual hi chu awm lo reng reng.

DR. VANLALTHLANA : A *actuals* kha en rawh; *RBI: A study on state finances, A study of Budget, 2021* ka nei a, 2020 hi *actuals* awm chhun a ni a, kha kha chu danglam thei a ni. *Actuals*-ah khan leiba keini aia ziaawm zawk hi State 23 an nei a, keini aia chhe zawk chu State 7 chauh an ni.

SPEAKER : Mathlantea hi, i document neih kha engtik kuma mi nge?

DR. VANLALTHLANA : 2021.

SPEAKER : Nang Pu Mawi, i ta kha engtik kuma mi nge?

DR. VANLALTHLANA : A thar ber vawiina ka download chawp, a thar khawp mai hei chu, 2022 hi chu BE a nia danglam leh thei a ni; *actuals* te hi en tur.

PU LALDUHOMA : Chawkchhuak ziah tawh lo ila a tha ka ti khawp mai, a ngai leh ngaiah kan inhnial thin a, kan sawi leh dawn anih chuan 'percentage to GSDP' in sawi ila, kan figure te a update emaw update lo emaw tlemin a inanglo thei ang a. Amaherawhchu GSDP percentage theuha kan sawi chuan inhnialna tur a awm lo a ni; chu chu miin an sawi dan thin, India ram pawhin an sawi dan thin, khawvelin an sawi dan thin a ni. Chumi kalha kan sawi thin avang hian, hei chu tih tawhloh a tha ka ti a ni.

PU L. THANGMAWIA : Pu Speaker 2016 atanga 2022 a ni ka neih a hi.

SPEAKER : Ngawi lawk rawh aw. Engtika mi nge i neiha kha, kan inhniala hi kan tichiang ang. Pu Thangmawi, i neiha kha kum engzat maw? I mask kha la thla mai teh, i tawng a hriat theih si lova, i tawng a sin si a, a buaithlak.

PU L. THANGMAWIA : 2016 atangin a in tan a 2022 BE thleng a ni e, Pu Speaker.

SPEAKER : Chutah chuan a percentage-in a inziak em?

PU L. THANGMAWIA : Percentage ni lovin GSDP a ni e. Aw, a percentage ang pawhin a ni ang a; State, Andhra Pradesh atanga, all States leh all UTs a awm vek a ni. Mizoram hi a nei tlem pawl a ni e, Pu Speaker.

DR. VANLATHLANA : Kha kha kan duh mai a ni; a percentage khan rawn sawi mai rawh se. A tehna ber kher Maharashtra lehngal phei kha chu an hniam, keini aia hniam anni a. Chu chu ‘khati zawng khan o sawi thin ang u’ ka han ti a ni.

LALRINTLUANGA SAILO: Chief Minister, Finance Minister leh House Leader a ni a, a duh ang zawngin a sawi ang chu maw le.

PU L. THANGMAWIA : Pu Speaker, an duh chuan anmahni khan an sawi thei renga lawm a percentage khan. Lo sawi ve mai sela an hriat chuan.

DR. VANLATHLANA : Sawi dan thin a ni lova.

PU L. THANGMAWIA : Sawi dan thin a nihlohna a awmlo. Finance Minister ho sawi hi kan lo hre teuh tawh.

PU LALRINTLUANGA SAILO: Term khat pawh la minister lo leh finance pawh la khawih ngailo hian in duh duh rawn sawi lo ula a ni mai.

SPEAKER : Ngawi rawh u aw. Pu Chama kha senior a ni a, *finance-minister* tawh a ni a, *speaker* tawh a ni bawk a.

PU LALCHAMLIANA, MINISTER: Mizoram pawh hi 31.2% chiah a ni. Northeast-ah hian keini aia hniam chu Sikkim chiah a ni a, 29.6% an ni. Nagaland hi 44.2 a ni a, Meghalaya hi 39.2, Manipur hi keini aiin chhe tein a sang a 31.3 a ni a, Assam hi 31.9, Tripura hi 36.3 a ni a. Mizoram GSD-a tehin kan liabilities hi ‘all india level’ ang chiah chiah kan ni a. Northeast-ah hian Sikkim tihloh chu keini aiin an sang vek a ni.

SPEAKER : Awle, kha kha chu ti khan kan sawi tawh lovang. Kan Speaker ni tawh, mi zahawm tak, mithiam, Pu Lalchamlia, MA-ah pawh Gold

Medalist a ni a, a rawn sawichiang ta a. Kan sorkar hnathawk leh Zoram hi chhia kan ni em em lo. Heti em ema chhiaa kan inchhuah hi a dik bik lo.

Awle, midangin rawn tibuai tawh suh u. Chief Minister zahawm takin chhunzawm sela.

PU ZORAMTHANGA, CHIEF MINISTER: Awle, Pu Speaker, sawi duh dan chihnih a awm mai a. Leiba zawng zawng kha state tin bat zat ziak thlap a awm a, khatah khan state zawng zawng a awm vek a. A duh apiangin sawi sela, percentage-a chhutna a awm bawk a, a duhin GDP percentage-in sawi sela, chu chu a ni mai a. Eng le khaw le Mizoram chu a tam lo hrim hrim. Chuvang in ba tam em em anga in sawi tur kan ni love tih kha. Keini pawh opposition kan nih lai khan sawi tam kan tum a. Amaherawhchu, kan han en tak tak a, a lo tam miah lo mai a. Kan hunlai pawh khan vaibelchhe 3000 vel a tling chho a. Lehlam in a tam lutuk an ti a, kha kha chu tihdan pangngai a ni e.

Awle, Pu Speaker, ti khan ka han tawp dawn hnai ang a. Pu Duha'n SEDP leh thildang a rawn sawiah khan, “kan kal dan I thlak ang u” tih kha a thusawi tlangkawm nan a rawn hmang a. Amaherawhchu, keini chuan kal dan thlak zin lutuk hi kan hlauh ber a ni a. Tihdan pangngai kan nei a, kum 60 chutiang chuan kan kal tawh a. Chuvangin kan kal dan hi kan thlak zung zung ve thei lo a ni. Eng pawh ni se, Pathian malsawmna kan dawna pawh a ni ang a, hei chen kan daih takna chhan hi. Chuvangin, Pathian tanpuinain theihtawpin tan kan han la zel ang a. Hei, boruak pawh a tha chho zel a, kan sum leh pai dinhmun pawh a tha chho ve zel a. Chuvangin, tunah chuan kan mipuite hnenah pawh hma lam pana kan kal theihna turin kan theihtawp kan chhuah ang a. Tin, Member zahawm tak Pu Zodintluanga'n thahnem ngai takin “a kan rua/kan maute eng ang nge a nih tawh” an ti a. A tak taka kan phunna hi kum hnih/khat lek a la ni a, mihring chen te a ni a. Chuvangin a la lian lova, a sengna leh thil dang kha chu a puitling zat, hemi a processing tihloh chu a hranpaa han tih tak tak theih a ni lova. Amaherawhchu, puitling ngei tumin a kawng sutu, a hmahruaitu nih erawh chu ‘a hahtlak khawp mai’ tih erawh chu ka sawi tel a ni.

Engpawh nise, Pu Speaker, khati khan ka tawp dawn tawh ang a, a rei tawh bawk a, hotupa ber na nana chu zawhbelh tur pawh a lo awm a, ding duh pawh an lo tam ve bawk si a, kha kha nghah ve zel a ngai bawk a ni. Amaherawhchu, ka sawi duh chu, thil hi a nihna ziktluak taka sawi ila; ramhnuaia kan awm laiin an sawi lar em em leh fiamthu pakhat chu, a veng leh a hming pawh ka hre naa, sawi lo mai ila, thusawi uar thiam em em mai hi a ni a, chupa chuan, “he nu hi pawite em ni anih, misual, be kang te hi a han a chak teh lul nen a fate nen fun khat an ei zo, fun dang zu la thet leh a. Mihring hi kan lo va mak ngai em “ a ti e a han ti a. Khatiang ang deuh khan, “amah lah hi ka kaw-

thalo damdawiah zu a bain ka dil a, a phallo leh nghal, mihring hi kan lo va mak ngai em” a ti a, mihring, ‘mak ngai em em’ tih dan pawh kha a lo ni chuang lova. Chuvangin, thil hi kan sawi duh dan a zir hian bekang a fun hniha a thet mai ang pawh kha mi pangngai aia dangdaiah a inchhuah thei zel a ni tih kha ka sawi tel a.

Amaherawhchu, Member zahawm tak ten puitling takin thu kan sawi a. Engpawh nise, vawiinah kan budget kan zo ta a, a lawmawm ka ti a. Chuvangin, ka Demand ka han sawi a, kan member zahawm tak ten taima taka minrawn enpui, amaherawhchu ka react sen lohte pawh kha kan lo hre tho a, kan official-ten an lo chhinchhiah a. Nakinah kan chhui zui tlang zel dawn nia.

Tichuan, Pu Speaker, ka demand hi a tlar thui tam khawp a. “Finance hi an va ngah em em ve” an han ti a, a tam ber kha chu pension lam a lo ni leh nghal a, han thik vak tur pawh kha a lo awm chuang lova. A tam hi chu a tam reng a, Demand kha a tlar teuh mai a, amaherawhchu Governor te, Council of Ministers te, Assembly te a ni a. Chuvangin, a development lampang kha a tam lo em mai a, helai hi a number erawh chu a tam a ni. (**Speaker:** Pension ringawt hi kum khatah hian cheng vaibelchhe 1000 leh tih a ni)

Tichuan, Pu Speaker ka Demand-te –

Demand No.	Department	Amount (in ₹)
1	Legislative Assembly	31,22,02,000.00
3	Governor	30,60,000.00
	Council of Ministers	
5	Vigilance	6,63,71,000.00
9	Finance	31,12,17,34,000.00
11	Secretariat Administration	1,27,55,73,00.00
14	Planning & Programme Implementation	95,70,39,000.00
15	General Administration	92,11,45,000.00
32	Horticulture	88,09,71,000.00
45	Public Works	11,74,30,24,000.00
	TOTAL	47,35,13,53,000.00

A vaia belhkhawm - ₹47,35,13,53,000.00 hi he House zahawm tak hian min pass sak turin ka rawn dil e.

SPEAKER : Awle, kan demand sawi hnuhnun ber a ni a. Vote kan lak hmain, nichin a kan debate, kan han sat hlutna, kan mithiam Dr. Vanlalhlana’n a

rawn sawi a, a thahnem ngaihna a ropui a. Tin, Pu L. Thangmawia, Mathematics-a Gold Medalist khan a percentage a rawn sawi a, a ngaihthlaknawm hle mai. Tin, Senior Pu Chama'n a rawn sawi bawka, ram tana inthawhna hi a ropui ka ti a. Naktuka Vice President-in kan House-a thu a rawn sawi tur hi Parliament atangin an crew-te an rawn kal a, an rawn thleng tawh a. Live a pekchhuah tur niin, Parliament-ah te pawh an lo en tawh a ni tih Member zahawm takte hnenah ka sawi a ni.

Awle, tunah chuan kan Chief Minister zahawm tak Pu Zoramthanga'n a demand te: -

Demand No.	Department	Amount (in ₹)
1	Legislative Assembly	31,22,02,000.00
3	Governor	30,60,000.00
	Council of Ministers	
5	Vigilance	6,63,71,000.00
9	Finance	31,12,17,34,000.00
11	Secretariat Administration	1,27,55,73,00.00
14	Planning & Programme Implementation	95,70,39,000.00
15	General Administration	92,11,45,000.00
32	Horticulture	88,09,71,000.00
45	Public Works	11,74,30,24,000.00
TOTAL		47,35,13,53,000.00

A vaia belhkhawm - ₹47,35,13,53,000.00 hi House-ah pass a rawn dil a. Remti apiangin, 'remti' ti rawh u le. Remti lo kan awm chuan 'remti lo' ti ula. (*Member remti lo an awm lova*) Tunah chuan kan Chief Minister zahawm takin a department enkawlte Demand No. 1, 2, 3, 5, 9, 11, 14, 15, 32 leh 45, a vaia belhkhawm ₹47,35,13,53,000.00 hi House-in lungrual takin a pass a ni. (**Pu Zoramthanga, Chief Minister:** Pu Speaker, ka lawm e.)

SPEAKER : Awle, tunah chuan kan tihturte kan lo zo leh ta a, kan chawl rih ang a. Ngawi rawh aw, a pawimawh ber a chabi, 'Appropriation' kan tih a ngai a. Kei pawh ka lo hmanhmawh ve deuh a ni.

Tunah chuan *Legislative Business*-ah kan kal ang a. Kum 2022 - 2023 chhunga Minister ten an department chan an enkawlta tur *Demand for Grants* kan vote tak zawng zawng leh *charge* hnuai a sum hman turte hman anih theih nan Bill kan pass a la ngai a. Tunah chuan Finance changtu Pu Zoramthanga, Chief Minister zahawm tak

kan sawm ang a, “The Mizoram Appropriation (Demand for Grants 2022-23) Bill, 2022” ho House-ah introduce phalna rawn dil se.

PU ZORAMTHANGA, CHIEF MINISTER: Pu Speaker, i remtihna leh he House remtihna “The Mizoram Appropriation (Demand for Grants 2022-23) Bill, 2022” chu he House-ah introduce phalna ka rawn dil e.

SPEAKER : House-ah introduce a rawn dil a. Kan remti em? (*Member-te: Remti*) Awle, kan remti a, tunah rawn introduce turin kan sawm e.

PU ZORAMTHANGA, CHIEF MINISTER: Pu Speaker, i remtihna leh House remtihna, “The Mizoram Appropriation (Demand for Grants 2022-23) Bill, 2022” hi he House-ah ka rawn introduce e.

SPEAKER : A copy kha han sem ula. (*A copy sem a ni a.*) Kan chang kim em? Kan chankim chuan, tunah Chief Minister zahawm takin, “The Mizoram Appropriation (Demand for Grants 2022-23) Bill, 2022” House-a a introduce tak chu rawn move-a pass rawn dil turin kan sawm e.

PU ZORAMTHANGA, CHIEF MINISTER: Pu Speaker, he Bill hi ka rawn move-naah chuan han sawi vak pawh ngai lovin kan pass tawh zawng zawng kan move-na a ni mai a, thil thar pawh a awm tawh chuang lova, ‘hman kan phalsak a che’ min tihna kha a ni mai a. Chu chu anih avangin hei hi chu sawi ngai lovin tunhma pawhin kan tih danah House hian min pass sak mai thin a. Chutiang anih avang chuan, “The Mizoram Appropriation (Demand for Grants 2022-23) Bill, 2022” hi he House hian min pass sak turin ka rawn dil e.

SPEAKER : Appropriation Bill hi kan sawi ho ngai lova, kan Chief Minister zahawm takin pass a rawn dil nghal baw a kan buk nghal mai ang a.

Tunah “The Mizoram Appropriation (Demand for Grants 2022-23) Bill, 2022” hi pass remti apiangin, ‘remti’ ti ula. Remti lo kan awm chuan, ‘remti lo’ ti ula.

Awle, kum 2022 - 2023 chhunga sorkar sum mamawh *voted-amount* vaibelchhe 12,290, 63,32,000 (Singkhat sanghnih zahnih sawmkua, nuai sawmruk pathum singthum sanghnih leh *charge-amount* vaibelchhe 18,99,51,68,000 (Sangkhat zariat sawmkua pakua, nuai sawmnga pakhat singruk sangria), a vaia belhkhawm - vaibelchhe 1,41,90,15,00,000 (Singkhat sangli za sawmkua, nuai sawm panga) hman theihna Bill “The Mizoram Appropriation (Demand for Grants 2022-23) Bill, 2022” chu House-in lungual takin a pass ta a ni.

PU ZORAMTHANGA, CHIEF MINISTER: Pu Speaker, ka lawm e.

SPEAKER : Awle, tunah chuan kan tihturte kan zo tak tak ta a, kan chawl rih ang a. Naktuk March Ni 10, 2022 (Ningani) chawmhma dar 10:30-ah kan thukhawm leh dawn ania.

Sitting is adjourned. (8:56 PM)